

CONTINUAZIONE DEL
ROMAN DE GUIRON

I.

1. ¹Après ce que li bon chevalier, de qi ge vos ai ja mainte mer-
veille contee, furent enprisonnez a un tens, en tel guise com ge vos ai
ja devisé ça arrieres tout apertement, et li roi Meliadus se fu partiz de
Camahalot, dont il avoit esté si pres com ge vos ai devisé, ²li chevalier
a cui ly rois ot parlé qi le mesage devoit fere au roi Artus, ensint com
li roi Meliadus li avoit enchargié, qant il fu retornez a Camahalot, il
ne volt descendre en nul leu devant qe il fu venuz el mestre paleis.
³Li chevaliers de leienz, qi le jor l'avoient veu partir de la cort, qant
il le virent venir, il le tindrent a grant merveille. ⁴Maintenant qe il fu
descenduz et entrez el paleis, il comencierent a crier: «Bien veigniez!
Bien veigniez! Tost avez vostre geste finée». ⁵Et il respont en sorriant:
⁶«Seignors, vos dites verité, ge ai tost trouvé ce qe ge aloie qerant: ge
qeroie meillor chevalier de moi, et ge l'ai trouvé tantost».

2. ¹Li chevalier s'en vient devant le roi Artus, qi seoit entre ses
barons mout liez et mout joiant de ce qe il veoit sa cort plaine de che-
valier ²qi tuit estoient geune gent de jovente et de pou d'aage et tuit
pseudome fierement, de si pou de tens com il veoit q'il avoient porté
armes. ³Cil chevalier estoit apellez Heliaber et estoit nés de Camausin.
⁴Li rois Artus meemes l'avoit fet chevalier de sa main. ⁵Qant li rois le
vit retorner si tost, porce qe il avoit pris congié a lui celui jor meemes,
il le tient a grant merveille et por ce li dist il: ⁶«Bien veignoiz. Porquoi
estes vos si tost retornez? – ⁷En non Deu, fet li chevalier, ge le vos

1. 1. Après ce que] Or dist li contes que a. c. q. 350 ♦ furent] fu L4 ♦ en tel
guise] einsint 350 ♦ devisé ... apertement] conté par cy devant 362 2. fere]
porter β ♦ qant] et q. L4 ♦ retornez] venus β ♦ en nul leu] au milieu γ¹ ♦ devant]
jusques atant 362 ♦ el L4] devant 350 362; au γ 3. venir] **retorner** β* 4. Bien
veigniez! Bien veigniez!] Bien veignies β

2. 1. vient] **vait tout droit** β* ♦ barons] **chevaliers** β* ♦ chevalier qi ... ²d'aage]
chevalerie qui tout estoit jone (de *agg.* 350) **gent et de pou d'aage** β* 2. fie-
rement] *om.* 362 ♦ com il veoit q'il L4] com il 350 γ; qu'ilz 362 3. Heliaber
L4] Elgeber 350; (H-) Elieber β ♦ Camausin L4] Carermusin 350; Caermusin γ;
om. 362 4. Li ... fet] et l'avoit fait le roy Artus 362 5. a lui celui jor (jour
350) 350] au roi L4; a cel jour γ

dirai, et dire le me covient sanz faille, qe por autre chose ne sui ge retornez a cort. Or sachiez qe tele aventure m'avint orendroit, qant ge fui issuz de Camahalot». ⁸Et maintenant li comence a conter coment il avoit trouvé le chevalier estrange et le parlement q'il orent ensemble, et coment li chevalier l'abati de la premiere joste. ⁹«Sire, qant il m'ot abatu et ge li oi conté les nouveles de vostre cort et coment cist hostiaux estoit joianz et envoisiez, il me comanda enprès qe ge vos feisse un mesage et vos deisse de sa part qe vos deussiez mielz a cestui point plorer qe fere joie ¹⁰qe de touz les bons chevaliers qi deussent estre a vostre cort il n'i a nul, qar tout premierement i faut le Bon Chevalier sanz Poor, ne messire Lac n'i est mie, Danain li Rous n'i est mie, Arioan de Sasoigne i faut, et li riche Morolt d'Irlande demore bien en autre part, et li bon chevalier, li vaillanz, le meillor qi orendroit soit en tout le monde, celui qi porte l'escu d'or, n'i est mie. ¹¹Et qant auquns de ces pseudomes n'est demorans en cest ostel, dire poez seurement qe vostre court est sanz bonté de chevalerie. ¹²Il n'i a nulle voie qe l'en puisse gueres loer, por ce vos fet il asavoir qe vostre cort devroit mielz par reison plorer qe fere joie».

3. ¹Qant li chevalier ot parlé en tel mainere, il se test qe il ne dist plus a cele fois. Et li rois beise la teste vers terre qant il oï ceste merveille, lors est entrez en tel penser qi li dure plus longement qe ne li fust mestier adonc. ²Qant il a grant piece pensé, il drece la teste et regarde le chevalier, mout honteux et mout vergondeux de ceste nouvelle, et qant il parole, il respont au chevalier en ceste maniere: ³«Certes, il dit verité li chevalier qi ceste nouvelle me mande. Voirement puet l'en dire hardiement qe mis hostiaux devroit mielz fere par

7. sanz faille] aussi 362 ♦ a cort] a vous β* 8. trouvé] **encontré** β* ♦ le parlement ... ensemble] **les paroles qui furent entr'eus deus** β* ♦ premiere ... ⁹abatu L4 350 362] premiere joste: «Sire quant il m'ot abatu de la premiere joste 338; premiere joste γ¹ (*saut*) 9. cist ... envoisiez] elle estoit plaine de joye et de soulas 362 10. Danain li Rous n'i est mie] D. le R. β* ♦ i faut L4] ne si n'i est 350; om. β ♦ riche L4 γ] om. 350 362 ♦ en tout le monde] el (*sic*) 350; en cest m. γ; ou siecle 362 11. cort (court 350)] osun (?) L4 (*risritto*) 12. nulle voie] **riens** β* ♦ gueres L4] om. 350; granment β ♦ fere joie L4 350 338] ne feste *agg.* γ¹; ne demener feste *agg.* 362

3. 1. en tel mainere L4 350] ensemment γ; ainsi 362 ♦ il se test qe] om. γ ♦ fois] fon L4 (*risritto*) ♦ beise] beuse L4 ♦ qant il oï ceste merveille (nouvele 350)] om. β ♦ penser] pensor L4 ♦ plus] om. 350 2. grant piece pensé] grant piet (?) pannsé L4 (*risritto*) ♦ et mout vergondeux] om. β 3. il dit verité li chevalier] v. **me manda qui** (celui 362) β* ♦ l'en] ben L4 ♦ mis hostiaux] cort 362

reison duel qe joie, qant il est ensint avenuz qe il n'i a nul de ces bons chevaliers dom vos m'avez parlé. ⁴Mes ore me redites, savriez vos qi le bons chevaliers est qi ceste nouvelle me mande? — ⁵Certes, sire, fet li chevalier, nanil. Assez li demandai ge son non, mes il ne me volt riens dire, mes il estoit sanz faille un des granz chevaliers qe ge veisse enqore en tout mon aage. ⁶Et au derien me dist il qe ge vos deisse de sa part qe il estoit sanz faille celui meemes chevaliers qi ja s'esprouva devant vos encontre Hariohan le Fort de Sesoigne. ⁷Sire, ce me dist il qe ge vos deisse cest mesage: ce ne sai ge se par ces nouvelles enseignes le porroiz connoistre maintenant».

4. ¹Quant li rois ot ceste nouvelle, il est adonc assez plus liez et plus joianz qe il n'estoit devant, qar orendroit vet il reconoisant en soi meemes tout certainement qe ce est sanz faille li rois Meliadus qi ces nouvelles li a mandees. ²Illec meemes ot maint autres chevaliers qi tost reconeurent qe ce estoit li rois Meliadus qi cest mesage avoit mandé. ³Lors dist a ceus qi devant lui estoient: «Or tost, apportez moi mes armes. ⁴Ge me tendroie a vergondez et a deshonzorez trop malement se li chevalier qi ces nouvelles me manda m'eschapoit, en tel mainere qe ge ne parlasse a lui avant qe il se partist de ceste contree. ⁵Tout ci qe il m'a mandé m'a il mandé por la grant amor qe il a en moi, et porce qe il voudroit la hautece de mon hostel, ce voi ge bien». ⁶Puisque li rois a demandé ses armes, eles li sunt apportees tout maintenant. Qant cil de leienz voient qe li rois se voloit armer, il li dient: ⁷«Sire, souffrez qe li auquant de cest ostel chevaucent avec vos por tenir vos conpeignie jusq'au chevalier après cui vos volez aler». Et il respont: ⁸«Ge voil aler après le chevalier si priveement com il vint ceste part. Por la moie amor remanez tuit, qar ge revendrai tost, si

est] met 362 4. qi ceste ... mande] *om.* β 5. Certes ... nanil] nennil β ♦ enqore L4] plus 350; onques encore β 6. sanz faille] *om.* 350 ♦ Hariohan ... Sesoigne] le fort jayant 362 7. cest mesage] *om.* β* ♦ nouvelles] *om.* β* ♦ maintenant L4] voirement 357; *om.* 350 338 A2 362

4. 2. Illec ... mandé] *om.* 362 ♦ cest mesage L4] ces nouveles 350 γ 4. deshonzorez] vergondé 362 ♦ avant] et γ 5. Tout ... m'a il mandé L4] t. ce qu'il me mande m'a il m 350; Car je sai de certain que tout ce que il m'a mandé m'a il fait β ♦ voudroit la hautece L4] voit la h. 350; la h. acroistre γ; ayme et desirer l'accroissement de la h. 362 ♦ voi L4 350 357 A2] sai 338; *om.* 362 6. Puisque ... dient] Quant on eut apportees les armes au roy il se fait armer incontinent et alcuns qui prez de lui estoient lui dirent 362 (*riscrie il passo*) ♦ leienz] lei[.]nz L4 7. por tenir vos] **et vous tienent** β* ♦ jusq'au] tant que vous veigniez j.'au β ♦ après ... aler] a qui vous volés parler β 8. amor] amo[.] L4 (*l'ultima lettera evanita*) ♦ remanez] demourrés γ 362 ♦ revendrai L4 362] retournerai 350 γ

com ge croi». ⁹Qant li rois est armez de toutes armes, il se part en tel mainere qe il ne moine en sa conpeignie fors un esscuer, et ot fet couvrir son escu d'une once blanche, et avant qe il se parte de sun ostel, il demande au chevalier qi les nouvelles li ot aportees: ¹⁰«Qel part vos est il avis qe ge puisse trouver le chevalier qi me mande ces nouvelles? – ¹¹Sire, ce dit li chevalier, se Dex me doint bone aventure, ce ne sai ge qel part vos le porroiz trouver, mes tant vos sai ge bien dire qe ge le leissai cele part». Et li devise celui leu droitement dom il estoit de lui partiz. ¹²Li rois s'en part atant d'entr'els qe il n'i fet autre demorance, et chevauche si priveement com ge vos cont parmi la cité et tant qe il en ist fors. ¹³Et tant vait puis qe il est venuz dusq'a la maison de religion ou li chevalier avoit esté abatuz qi le message avoit apporté a la cort.

5. ¹Qant il fu venuz dusq'a la maison de religion ou la joste avoit esté devant et il ne trouve le roi Meliadus, ce est une chose qi fierelement le desconforte. ²Il demande a celz de laienz: «Veistes vos un tel chevalier?». Et li auquant qi avoient la joste veue dient au roi: ³«Sire, oïl, nos le veimes voirement. Il abati hui ci devant un chevalier et puis tin avec lui parlemant grant piece et puis s'en ala son chemin a tel eur qe nos ne le veimes puis. – ⁴Or me dites, fet li rois, et savez vos qel part il s'en ala? – Il s'en ala, font il, cele part», si li moustrent qel part. Li rois se met après tout maintenant com cil qi est trop desiranz de savoir qe il puisse trouver le roi Meliadus: il se tient a mort se il ne le trouve. ⁵Ensint s'en vait li rois Artus après le roi Meliadus, et tant chevauche en tel mainere qe il entre dedenz la forest qi Camahalot avironoit de toutes parz, qar la forest estoit grant durement, a la verité dire. ⁶Qant li rois fu en la forest et il ne trouve les esclos dou cheval le roi Meliadus, ce est une chose qi adonc le desconforte trop fierelement, qar il a a celui point poor et doutance qe il nel puisse trouver

ge croi] se je onques puis *agg.* γ¹ 9. Qant li rois] **Après ce que li r.** β* (*nuovo* §) ♦ de totes armes] *om.* 350 ♦ il se part] *om.* L4 ♦ en tel mainere] **tout maintenant** β* ♦ fors un esscuer] **f. un sueill e.** β* ♦ blanche] vermeille 362 ♦ de sun ostel L4] d'eus 350; d'entr'eus β 11. devise] moustre 362 ♦ droitement] *om.* 362 13. abatuz] devant a. 350

5. 1. dusq'a devant] *om.* β ♦ ce ... desconforte] il en est fort desconfortez 362 2. au roi] *om.* β 3. ci devant] *om.* 362 ♦ qe ... puis] que puis ne le veismes 362 4. qel part] *om.* β ♦ de savoir] **om.** β* ♦ com ... Meliadus] comme cellui qui fors est desirant de le trouver. Et dist qu'il est destruit et honni s'il ne treuve le Roy Meliadus 362 ♦ il se tient ... trouve] *rip.* 350 ♦ a mort] et a honni *agg.* γ 5. de toutes parz] tout entour 362 6. fu] **est venus** β* ♦ en la] a l'entree de la β

si legierement com il trouver le voudroit. ⁷Li rois chevauche toutes-voies la teste enclinee vers terre, com cil qi fierement pense au roi Meliadus. ⁸Li escuers est iriez qant il le voit penser si durement, qar il n'avoit pas apris qe il veist onques le roi son seignor se joiant non. ⁹Ensint chevaucha li rois jusq'a pres hore de vespres. ¹⁰Après hore de vespres tout droitement avint qe si chemins l'aporta a une fontaine, qi estoit encoste d'un chemin a moins d'une archee. ¹¹Qant il fu venuz a la fontaine, il trouve desouz un arbre un chevalier tout desarmé qi estoit navrez auques nouvellement et celui jor meemes tout freschement. ¹²Tantost com li rois voit le chevalier, il s'aproche de lui et le salue et li dit: «Sire chevalier, qi vos navra? — Sire, fet il, or sachiez qe ma folie me navra. — ¹³Vos puissiez estre navré par vostre folie, mes autre vos navra! — ¹⁴En non Deu, fet il chevalier, vos dites bien verité. Or sachiez qe uns chevalier me navra si malement qe il ne sera pieçamés jor qe ge ne m'en sente. — Biaux sire, fet li rois, et qeles armes portoit li chevalier qi vos navra? — ¹⁵Sire, fet cil, il portoit tel escu», si li devise. Et tant dit qe li rois Artus conoist tout certainement qe ce fu li rois Meliadus sanz faille qi le navra. ¹⁶Lors parole li rois Artus et dit au chevalier: «Or me dites, sire chevalier, se Dex vos doint bone aventure: porquoi vos navra li chevalier en tel maniere? Ge le voudroie mout savoir, se il vos pleisoit. — ¹⁷En non Deu, dit li chevalier, ge le vos dirai a briez paroles. Or sachiez qe il me navra porce qe ge dis qe de grans chevaliers ne trouveroit l'en jamés nul se mauveis non. — ¹⁸Dex aïe, fet li rois, et porquoi deistes vos ceste parole? Ja saviez vos bien qe vos disiez mal. — ¹⁹Sire, dit li chevalier, ou bien deisse ou mal deisse, ge l'ai achaté chèrement. ²⁰Et neporquant, encor di ge bien qe il ne m'est avis qe ge deisse trop mal qe, se Dex me doint bone aventure, ge ne me recort mie qe ge encore veisse de ces granz chevaliers un qi mout feist a loer. — ²¹En non Deu, sire chevalier, fet li rois, vos dites trop mal. Coment venistes vos entre vos deus a cest parlement? — ²²Sire, dist li chevalier, ce vos dirai ge bien assez briement.

com ... voudroit] qu'il trouver le porroit (voudroit A2; cuidoit 362) β 7. vers terre] *om.* 357 8. iriez] prez (*sic*) 362 ♦ pas apris] *om.* β 9. a pres] a β (*v. nota*) 10. Après hore] *nuovo* § β* ♦ tout droitement] *om.* 362 ♦ fontaine] *om.* 350 11. tout desarmé] armé de toutes armes (pieces A2) β 13. Vos puissiez ... ¹⁴vos dites bien verité] L4 *le due frasi sono nell'ordine inverso* 14.-13. (*v. nota*) ♦ Vos puissiez] **Comment v. p.** β* 14. jor L4 350] heure 362; *om.* γ 15. li devise] **quel** *agg.* β* ♦ sans faille] *om.* β 16. voudroie] vous diroie 350 ♦ mout L4] volentiers *agg.* 350; volentiers β 20. de ces ... loer L4] de tres bons chevaliers grans un qui moult feist a loer 350; de tres bons grans chevaliers γ; nulz bons grans chevaliers 362 21. trop mal] bien a mon advis t. m. 357

6. ¹«Le chevalier qī me navra s'en venoit a ceste fontaine. Ge estoie devant venuz et m'estoie ja arestez, armez de mes armes et montez sor mon destrier, et avoie beu de ceste fontaine. ²Qant ge le vi venir vers moi – et il estoit si gran chevalier qe ge ne me recort mie qe ge encore veisse nul si granz fors qe un seul –, ge dis a moi meimes qe encontre lui me voloie esprouver d'une seule joste, por veoir se il estoit si bon com il estoit granz. ³Lors li començai a crier: "Sire chevalier, gardez vos de moi, a joster vos estuet a moi". ⁴Il me dit errament: "Or vos souffrez, sire chevalier, qe ge n'ai ore talent de joster encontre vos ne encontre autre". Et ge me començai a sourire qant ge entendī ceste parole et li dis: ⁵"Sire chevalier, porqoi leissiez vos a joster, ou por poor ou por hardement?". Et il me respondi adonc: ⁶"Or sachiez, sire chevalier, qe meillor chevalier qe ge ne sui a auqune foiz leissiē a joster por poor. – ⁷En non Deu, dis ge, si fetes vos orendroit". Et il me respondi: "Voire par aventure, et par aventure non. – ⁸Certes, dis ge autre foiz, ge vos connois tant orendroit, sire chevalier, qe ge sai tout vraiment qe vos leissiez plus a joster por poor qe por hardement". ⁹Li chevalier me dist adonc: "De qoi me conneissiez vos si bien?". Et ge li respondi et li dis: ¹⁰"Ge vos connois de ce seulement qe vos estes granz, et por la grandece qe vos avez sai ge bien tout certainement qe vos ne porriez fere nulle proece se mauveise non. – ¹¹Coment, dist moi li chevalier, volez vos donc dire qe, porce qe ge sui mauveis, qe tuit li autres chevaliers granz sunt mauveis? ¹²Or sachiez qe l'en porroit bien trouver auqun grant chevalier si estrangement preudome des armes, et des autres chevalier qī de tel grandesce ne sunt mie, qe l'en n'en porroit trouver nul aussi bon, non voir des granz ne des petiz". ¹³Et qant ge entendī ceste parole, ge fui un pou correciez et por ce dis ge au chevalier: "Et qī puet ore estre celui grant mauveis qe vos tenez a si preudome?". ¹⁴Il me respondi autre foiz et dist: "En non Deu, il n'est pas mauveis, ainz est bien le meillor chevalier qī orendroit soit en cestui monde, et a ce le poez conoistre qe il porte un escu tout a or". ¹⁵Ge, qī a mon escent

6. 1. ja L4] chi 350 γ; y 362 ♦ montez] mon (*sic*) 350 ♦ mon destrier L4 γ] un grant d. 350; m. cheval 362 ♦ et avoie beu] **Ge m'estoie desarmés et a. b. β* ♦ fontaine] et avoie repris mes armes** *agg. β** 3. a joster vos estuet] j. vous convient 362 4. a sourire] as|sourire L4 6. meillor chevalier qe ge ne sui] **je sui β* (saut) ♦ leissiē a] om. 350** 7. Deu] *om. A2 ♦ non]* fas *agg. 350* 8. qe ge sai tout vraiment] *om. β* (saut)* 10. proece] **preuve β*** 12. preudome] **bon et si p. β* ♦ et des autres] que a. β* ♦ autres chevalier] a. chevaleries L4** 14. le meillor ... monde] ung des bons chevaliers du monde 362 15. Ge qī] ge cuit 350

avoie veu n'a encore granment de tens celui chevalier dom il parloit de si pouvre semblant et de si pouvre contenment qe il me fu bien avis a celui jor qe ge le vi q'en tout le monde n'eust nul plus doulant chevalier de lui ne plus cheitif, ge li respondi maintenant et dis: ¹⁶“Sire, par deable, de qoi menez vos paroles, qi ci m'avez amenteu celui grant chevalier qi porte l'escu d'or, le plus mauveis chevalier et le plus cohart qi orendroit soit en cest monde?” ¹⁷Certes, huimés ne vos porroit avenir bone aventure, por tant seulement qe vos en avez parlé”.

7. ¹«De ceste parole, sire chevalier, qe ge vos ai dite se corrouça a moi le granz chevalier et me dist: ²“Sire, certes huimés ne porroie ge souffrir voz paroles, qar trop avez dit a cestui point qant vos avez mesdit du meillor chevalier de tout le monde, et n'est merveille se vos en repentez. ³Huimés vos gardez de moi, qar, se ge ne vos faz orendroit deshonor por la vilenie qe vos deistes del preudome qi valt tex mil homes com vos estes, donc ne me tenez por chevalier! ⁴Assez peusiez dire de moi ce qi vos pleust, qar ge vos escoutasse adés. Mes qant vos avez parlé si vilainement de celui preudome, ge ne m'en souferroie qe ge ne venge sa deshonor”. ⁵Sire chevalier, par tel maniere com ge vos ai dit comença la meslee de nos deus, qi fu finee assez plus tost qe ge ne cuidioie: ⁶li chevalier ne feri fors un seul cop sor moi. Il me dona de sun glaive enmi le piz, ensint com il apert encore, e me navra et m'abati et s'en ala a tel eur qe ge ne le vi puis. Sire chevalier, or vos ai conté tout mot a mot coment ge fui navrez et par quel achoison». ⁷Et qant il a dite ceste parole il se test, qe il ne dist mot de cele chose, et se comence fort a plaindre com cel qi navrez estoit mout angoisseusement.

8. ¹Qant li rois Artus ot oï cestui conte, il dist au chevalier: «Or me dites, sire chevalier: quel part s'en ala li chevalier qi vos navra? – ²Mes porqoi le me demandez vos? dist li chevalier. Volez vos donc

avoie] n'a. 350 ♦ jor] **point** β* ♦ de lui] *om.* 350 16. menez vos paroles] **m'avez vos** (chi *agg.* 350) **parlé** β* ♦ cest (ceste 350) monde] *ce»[d]i m.* (?) L4 17. parlé] a ceste fois 357

7. 2. qar trop avez (avés 350) dit a cestui point 350 γ] *om.* L4; car t. a. dit 362 ♦ du meillor (meillour 350) chevalier] de li meinor c. L4 4. adés] volentiers 362 ♦ souferroie ... deshonor] **sofferrai itant que ge vous fache deshounour** β* 5. comença ... deus] *om.* 350 7. il ne dist mot L4] il ne d. plus 350 γ; sans plus dire 362 ♦ angoisseusement] de celui cop *agg.* 350

8. 1. li rois Artus] **li r.** β* ♦ Or me dites] *om.* β* ♦ li chevalier L4 362] chil 350 γ 2. le me demandez vos] *om.* β*

venchier ma honte? – Certes, nnil, fet li rois, qe ge n'en ai volenté orendroit. ³Se li chevalier vos eust pis fet qe il ne fist, ce ne fust pas trop grant merveille, qar, qant vos deistes si grant vilenie del bon chevalier a l'escu d'or com vos avez ici contee, ce fu bien outrage trop grant. ⁴Et certes, vos deservistes bien d'avoir pis qe li chevalier ne vos fist. – Bel sire, dist li chevalier, ge entent bien qe vos me dites: Dex vos envoit prochainement qi vos die si bone reison». ⁵Li rois se part atant del chevalier, qe il ne tient autre parlement, et chevauche tant qe il vient a un hermitage qi esto en une valee auques pres del chemin. En celui hermitage dormi celui soir li rois Artus et son escuer. ⁶A l'endemain auques matin, si tost com il aparut le jor, il s'apareille de chevauchier au plus vistement qe il le puet fere et dist a soi meemes qe il se tendroit por mort et por deshonzorez a toz jors mes se li rois Meliadus, qi por lui estoit venuz si pres de Camahalot, li eschapoit dou tout qe il ne le trovast ou pres ou loing. ⁷Tout maintenant qe li rois fu partiz de l'ermitage, il se mist el chemin et chevauche cele matinee tout le grant chemin de la forest qe il n'en oissi a cele foiz. ⁸Qant li rois ot chevauchié en tel mainere jusqe entor hore de midi, il li avint adonc qe si chemin l'aporta desus une fontaine. ⁹Devant la fontaine avoit un chevalier armé de toutes armes qi seoit ilec et pensoit mout durement, et estoit seul, qe il n'avoit en sa conpeignie home ne feme. ¹⁰Son escu estoit devant lui chouchié desus l'erbe et s'espee autresint, et si chevaux estoit atachiez a un arbre mout pres de lui. ¹¹Qant li rois est venuz desus le chevalier et il le voit penser si durement, il s'arreste tout devant lui ne mot ne li dit, qar il voit tout clerement qe li chevalier pensoit si durement qe il ne se fust remuez por sa venue. ¹²Li chevalier avoit son hiaume en sa teste et regardoit en la fontainne pensis si durement com ge vos cont. Qant li rois l'ot regardé une grant piece, il s'en vet un pou plus avant et li dist: ¹³«Sire chevalier, ne pensez tant!». Li chevalier drece la teste qant il ot le roi qi le met en paroles et regarde le roi. Et porce qe il n'ot pas bien entendu la parole dou roi, li dit il: ¹⁴«Sire chevalier, qe volez vos? – Certes, biaux sire, fet li rois, ge voudroie savoir, se il vos

3. ce ne fust ... merveille] *rip.* γ ♦ contee] **reconeue** β* 4. qi ... reison] tel qui vous die aussi bone raison β 5. et son escuer] **om.** β* 6. qe il ne le trovast] sans le trouver 362 7. Tout maintenant] *nuovo* § β* 8. entor hore] a h. β ♦ chemin] chevaux 350 11. desus L4] sor 350 γ; prez 362 ♦ remuez] de son penser *agg.* 350 ♦ 12. et regardoit en (vers γ) la fontainne] **om.** L4 ♦ s'en vet] **se met** β* 13. Et porce qe ... parole dou roi] **om.** β* 14. savoir] **om.** 350

pleisoit, porqoi vos pensez si merueilleusement, qe ge ne me recort mie qe ge veisse pieçamés chevalier penser si angoisseusement com vos fetes orendroit».

9. ¹Li chevalier gite un souspir qant il entent ceste parole et respont en semblant d'ome correciez: ²«Sire chevalier, or sachiez qe ge pense a ma honte et a ma vergoingne et ce est qi ensinnt me fet penser com vos veez. – ³Sire chevalier, fet li rois, vos porroie ge doner conseil de vos reconforter? – ⁴Certes, sire, fet li chevalier, nenil. – ⁵Or me dites, fet li rois, me savez vos a dire nouvelles d'un chevalier tel?». Si li devise les enseignes qe il avoit aprises del roi Meliadus. – ⁶«Et porqoi demandez vos nouvelles de celui? fet li chevalier. – ⁷Certes, fet li rois, ge le vois qerant qe ge le verroie volentiers. – ⁸Se vos me deissiez, fet li chevalier, nouvelles d'un autre chevalier qe ge vois qerant, ge vos diroie de cestui ce qe g'en sai. – ⁹Et qi est celui qe vos alez qerant? fet li rois. – ¹⁰Certes, biaux sire, fet li chevalier, ce est un chevalier qi porte un escu tout a or. – Et savez vos, fet li rois, coment il a non? – ¹¹Certes, bel sire, fet li chevalier, ge ne sai coment il a non. – Et de qui le conaisiez vos? fet li rois. – ¹²Si m'aït Dex, sire, fet li chevalier, ge ne le connois mie granment. ¹³Et neporqant, de tant com ge l'ai veu croi ge bien qe ce soit un des meillors chevaliers de tout le monde et le plus cortois de toutes choses. ¹⁴Et q'en diroie? Ge ai veu tantes bontez et tantes valore et tantes hautes chevaleries en lui qe il n'est orendroit chevalier en tout le mondes qe ge vouxisse si volentiers veoir com ge verroie lui. ¹⁵Et ce est la reison por qoi ge le vois qerant co[m] ge le puis trouver».

si angoisseusement ... orendroit] **si estrangement com vous pensés** β*

9. 1. ceste] cepste L4 2. pense] pars L4 (*riscritto*) ♦ vergoingne] vergoigie L4 ♦ ce est qi ensinnt me fet penser L4] ce est che qui me tient d'estroit p. 350 γ; ce est ce a quoi je pense si estroittement 362 3. de vos reconforter] de ce que vous estes desconfortez 362 6. nouvelles de celui] le roy Meliadus 362 7. verroie] trouveroie 362 8. me deissiez L4 350] me faites sage γ; me vouliez dire 362 10. tout a or] sens autre taint *agg.* 350 11. Certes bel sire ... non] *om.* 362 ♦ ge ne sai coment il a non L4] ge ne sai son non 350 γ; *om.* 362 12. ge ne le connois] ge vos c. 338 13. neporqant de tant] ne por tant 350 ♦ l'ai] lui L4 (*riscritto*) ♦ un des meillors chevaliers de tout le monde L4] le m. c. del m. 350 362; le m. c. qui orendroit soit en ce m. γ ♦ de toutes choses*] de [.] t. chose[.] L4; *om.* β* 14. et tantes hautes chevaleries en lui] *om.* β* ♦ qe ge vouxisse ... veoir*] en qe ge vouxissi ... veoir L4 (*riscritto*); qe ge veisse β* ♦ verroie 350 338 357 362] voudroe L4 (*riscritto*); *om.* A2 15. la reison] *om.* β* ♦ com ge] coge L4 (*riscritto*) ♦ com ge le puis trouver] *om.* β*

10. ¹Quant li rois Artus ot oïe ceste parole, il dit au chevalier: «Certes, sire chevalier, de celui chevalier dont vos me demandez ne vos savroie ge a dire nouvelles se petit non, qar ge ne le conois se de oïr dire non. ²Ge ne croi mie qe ge onques le veisse, et neporqant ge en ai ja oï dire mainte merveille en pou de tens, por qoi ge croi bien endroit moi qe il soit trop bon chevalier. ³Et certes, ge le voiroie plus volentiers qe nul autre chevalier qe ge sache orendroit, fors qe un ne pres ne loing. ⁴Et qant ge ne vos sai dire ne enseigner celui bon chevalier qe vos alez qerant, ge vos pri qe vos me dioiz ce qe ge vos demant. – Et qe demandez vos? fet li chevalier. – ⁵Ge vos pri, fet li rois, qe vos me dioiz porqoi vos pensiez ore si durement qant ge vins ici. – ⁶Coment, fet le chevalier, ja le vos dis ge, et encore le volez oïr une autre foiz? ⁷Ge vos dis, ce sai ge bien, qe ge pensoie a ma honte et a ma vergoigne, encore vos dis ge autre foiz. – ⁸Or me dites, fet li rois, qant vos fu fete ceste honte et ceste vergoigne por qoi vos estes si destroiz. – Certes, fet li chevalier, ge le vos dirai, qant vos savoir le volez. ⁹Or sachiez q'ele me fu fete hui en cest jor et par tel home qe ge conois tout certainement qe il est si preudome des armes qe encontre lui ne porroie ge en nulle mainere revenchier ceste honte par ma proesce. ¹⁰Mes il a tel chevalier par le monde qe, se ge le peusse trouver a cestui point, ge sai bien de voir qe il enpreist a venchier ceste honte et ceste vergoigne qi m'est fete. ¹¹Et ce est ce porqoi ge demandai nouveles del chevalier qi porte l'escu a or, qar cil sanz faille revenchast bien la moie honte, se il venist a point et en leu de trouver celi qi la m'a fete. – ¹²Or me dites, ce dit li rois, et savez vos qi est celi chevalier qi cele vergoigne et cele honte vos fist dont vos vos pleigniez si durement? – ¹³Certes, bel sire, fet li chevalier, nanil. Ge ne sai qe il est, fors tant seulement qe il porte un escu miparti d'argent et d'azur, et est la mipartiseure de lonc droitement. – ¹⁴Sire chevalier, fet li rois, qe avez vos en volenté de fere orendroit? Volez vos chevauchier ou remanoir ici? – ¹⁵Certes, bel sire, fet li chevalier, puisqe

10. 1. sire chevalier] s. β* ♦ nouvelles] *om.* β* 2. en pou] *puis pou* β* ♦ il soit ... ³Et certes] *om.* β* 3. orendroit fors qe un] *om.* β* 4. dire ... qerant] *assener* (asseurer A2) β* 6. et encore ... ⁷autre foiz] *om.* A2 8. ceste honte et] *om.* β* ♦ destroiz] *desplaisans* 362 9. hui en cest jor et] *om.* L4 ♦ en nulle mainere L4] mie 350 338 362; *om.* γ¹ 10. ceste honte et ceste vergoigne L4] ceste v. 350; la vergoigne β 11. demandai] *demandoe orendroit* β* ♦ celi ... fete] celui qui cele vergoigne vous fist 350 13. seulement L4 362] sans faille 350 γ ♦ de lonc droitement] du lonc de l'escu β 14. Sire chevalier] *nuovo* § β* ♦ qe avez ... de fere] que tendez vous a faire 362 ♦ remanoir] demourer 362

il est ensint avenu qe vos m'avez osté de mon penser, ge sui cel qi a ceste foiz ne demorai plus ici. ¹⁶Ainz monterai et chevaucheraï après le chevalier qi la vergoigne et la honte me fist, et se ge le truis, ge me metrai en aventure de revenchier la vilenie qe ge en cest jor ai receue, coment qe il m'en doie avenir! — ¹⁷Sire chevalier, fet li rois Artus, or m'est bien avis qe vos avez a ceste foiz parlé com chevalier: einsint doivent chevalier parler, et non mie mener dolor». ¹⁸Li chevalier n'i atant plus qant li rois ot dite ceste parole, ainz se dreice en estant et prent s'espee, si le ceint et puis prent son escu et vient a son cheval et monte. Et qant il est montez, il prent son glaive, qi estoit ileques dreciez a un arbre. ¹⁹«Sire chevalier, fet li rois, qel part volez vos chevauchier? — Sire, fet il, ceste part». Et li moustre qele. «En non Deu, fet li rois, donc sui ge apareilliez qe ge conpeignie vos face, se il vos plect, qar ceste part meemes voloie ge aler. — ²⁰Certes, biaux sire, fet li chevalier, de vostre conpeignie sui ge touz liez, porce qe pseudome me semblez. Or chevauchom ensemble. ²¹Se ma conpaignie vos plect, ge ne me partirai de vos se aventure trop grant ne nos fesoit departir».

11. ¹Ensint se met li rois Artus en la conpeignie dou chevalier qe il ne conoist de riens. Tantost com il se furent mis a la voie, li chevalier comence a demander au roi: ²«Sire chevalier, se Dex vos doint bone aventure, qi estes vos et qe alez vos qerant par cest forest? ³Certes, se il vos plesoit, ge le voudroie mout savoir volentiers, et vos m'en devriez bien auqune chose dire, se il vos pleisoit, puisqe vos me fetes tant de cortoisie qe vos en ma conpeignie volez venir». ⁴Li rois respont maintenant et dist: «Sire chevalier, puisqe vos de ce me reque- rez, et ge vos dirai tantost ce qe dire vos en puis. ⁵Or sachiez qe ge sui un chevalier errant qi repaire en la meison le roi Artus et ge vois qerant un chevalier qe ge mout volentiers voudroie trouver, et li chevalier porte un tel escu». Et li devise qel. ⁶«Biaux sire, sachiez qe a ceste foiz ne vos porroie ge autre chose dire de mon estre, fors tant

16. la vergoigne et la honte L4] la v. 350; la h. β 17. a ceste foiz (fois β*)] [...] f. L4 (v. nota) 18. qant li rois L4] q. li chevaliers 350; q. il β (v. nota) ♦ dreciez] apoiez 362 19. face] tiegne 362 ♦ aler] **chevaucher** β* 21. ne nos fesoit departir] ne m'en fait d. β

11. 2. qi estes vos] dittes moy qui vous e. 362 3. se il vos plesoit ... auqune chose dire] om. 362 (saut) ♦ voudroie] savroie γ 5. un chevalier errant ... roi Artus] om. β* ♦ qerant un chevalier] om. A2 6. a ceste foiz] tant comme je puis agg. 357

com vos en avez oï, et ge vos pri qe vos ne me reqerez plus a ceste foiz». ⁷Qant li rois Artus a finee ceste parole, li chevalier respont tantost et dist: «Sire conpeinz, qant il vos plect qe ge plus ne vos demant de vostre estre, et ge m'en soufferrai atant. ⁸De celui chevalier voirement qe vos alez qerant vos dirai ge teles nouvelles com ge en sai. ⁹Or sachiez veraïement qe ge l'encontrai hui matin ça devant en la compaignie d'un escuer seulement qi li portoit son escu et son glaive. Et ge vos di teles enseignes dou chevalier porce qe vos m'en creez mieulz. ¹⁰Or sachiez qe ce est le greignor chevalier qe ge onques a mon aage veisse. – En non Deu, sire conpeinz, fet li rois, tant m'avez dit de celui chevalier qe ge connois qe ce est celui qe ge vois qerant. ¹¹Or me dites, se il vos plect, qel part il s'en aloit quant vous le veistes. – ¹²Sire compains, fait le chevalier, or saciés de voir qu'il s'en aloit tout cestui chemin que nous alom orendroit. – ¹³En non Dieu, fait li rois, de ces nouveles sui ge trop joians, moult me targe durement que ge l'aie trouvé, quar pour autre chose ne me parti ge a ceste fois de la maison le roi Artus, fors que pour trover le. – ¹⁴Certes, ce dist li chevaliers, ge croi bien que vous le porrois hui bien trouver se il n'a laissié ceste chemin. Mais or me dites, vous qui estes de la maison le roi Artus et qui orendroit venés de celui ostel, li rois Artus, queill hom est il? ¹⁵Est il si vaillant home com vont recontant mainte gent?».

12. ¹Li rois respont adonc et dist: «Comment, sire chevalier? Vait l'en donc disant que li rois Artus soit home de valour? – ²Oïll, certes, fait le chevalier, ge ai ja veu maint chevalier errant qui de la maison le roi Artus venoient que del roi Artus disoient si grant bien que, s'il en avoit seulement le disime part que il vont disant, si en avroit il assés. ³Et pour ce le demant ge a vous qui orendroit en venés: que vous semble del roi Artus?». Li rois respont tout esroment et dit: «Sire chevalier, ge vous en dirai ce que il m'en samble.

7. Qant li rois] *nuovo* § β* ♦ soufferrai] deporteray 362 8. com ge en sai] *om.* β* 9. porce qe] adfin que 362 10. a mon aage L4] a mon escient 350 338 357; en ma vye 362; *om.* A2 11. qel part] in L4 *ultime parole del f. 163vb; per una lacuna il testo manca fino al § 15.6* ♦ quant] et q. 350 13. de ces ... joians] de ceste nouvelle suis je moult liez et moult joyeulx 362 ♦ me targe 350 338] me tarde γ' 362 ♦ trover le] chevalier *agg.* 362 14. vous le ... trouver] vous le trouverez aujourd'hui 362 ♦ et qui orendroit ... li rois Artus] *om.* A2 15. com vont recontant*] com vont recon v. r. 350; c. on va (orendroit *agg.* 362) disant 338 A2 362; c. tout li mondes vait orendroit disant 357

12. 1. Comment] *om.* β 2. certes fait le chevalier] *rip.* 350 ♦ je ai ja veu] je ai trouvé β ♦ errant] *estrangle* β ♦ la maison 350 γ] l'ostel 362 ♦ seulement le disime part] sans plus la disusie (*sic*) 338; la disime partie 357; la disime A2; une partie 362 3. qui orendroit ... roi Artus] qu'il vous en samble β

⁴Or sachiés que de l'afaire del monde est en tele maniere: quant la bone renomnee tourne sor aucun bon chevalier et la parole de lui se commence a espandre par unes contrees et par autres, l'en en dist esroment vint tant plus qu'il n'en est. ⁵Et s'il feisoit puis mal assés, se ne li porroit pas cheoir la bone renomnee qu'il ot des le commencement. ⁶Ausint est de la male renomnee: s'un chevalier de grant valour et de haute proueche garnis acoillist par aucune mescheance aucune male renomnee, a painnes porroit il puis tant feire que il abatist cele male renomnee. ⁷Sire chevalier, ceste parole vous ai ge dite por çou que vous me demandastes del roi Artu. Or sachiés qu'il m'est bien avis que li rois ait greignour renomnee qu'il n'ait deservie. Ge sai auques tout le sien fait et pour ce em paroill ge si seurement». ⁸Li chevaliers respont tantost et dist: «Sire compains, se Dex me saut, il m'est bien avis que vous avés orendroit parllé plus sagement et plus amesurement del fait le roi Artus que nul autre chevalier que ge trouvasse onques mais. ⁹Et pour ce vous en croi ge miex, que certes il est encore si jones hom qu'il ne m'est pas avis qu'il peust avoir deservi si grant lox ne si grant pris com li mondes li doune. ¹⁰Mais fortune, qui bien le veut, selonc mon avis, si li done ceste aventure que chascuns si dist bien de lui. — Tout ce porroit estre», ce dist li rois.

13. ¹Ensint parllant chevauchent tant entr'eus deus que hore de nonne commencha a passer. Li rois met en moult des paroles le chevalier et li demande comment il a non, et cil dit que son non ne pueit il ore savoir. ²Quant vint après hore de none, il regardent devant eus et voient adonc desus le chemin droitement un moult biau chastel petit, moult bel assis de toutes pars, si fort durement com petit chastel porroit estre, d'aigue et de fossé, quar une petite aigue i couroit tout entour de l'autre part del chemin. ³Devant le chastel droitement avoit une tour moult bele et moult riche et trop bien assise durement, et forte assés et haute moult. ⁴Tout maintenant que li chevaliers voit le chastel et la tour, il reconnoist et l'un et l'autre, quar aucune fois i avoit il ja esté, et il se torne adonc envers le roi Artus et dist: ⁵«Sire compains, savés vous comment chis chastiaux a non et ceste tour? — Certes, biaux sire, fait li rois, oïll,

4. tourne] **court** β ♦ par unes contrees et par autres] par les contrees 362 5. cheoir] **legierement** agg. β ♦ qu'il ot des le commencement] que il avoit premierement 362 6. male] *om.* 362 ♦ de grant valour et] *om.* 362 ♦ acoillist] et a. 350 ♦ tant faire] t. pitis f. 357 8. chevalier] *om.* 362 9. jones] jointes 362 10. le veut] li vault β

13. 1. en moult des paroles] en devises 362 2. devant] avec 350 ♦ si fort ... fossé] que nul ne le porroit estre 362; *om.* A2 ♦ com petit] c'uns p. 338 ♦ une petite] une autre p. γ¹ 3. Devant ... droitement] Droit devant le chastel 362 4. reconnoist et l'un et l'autre] **le r. molt bien** β 5. et ceste tour ... moult bien] *om.* 362

moult bien. Li chastiaux a non li Petis Chastiaux de la Forche Esprouvee et la tour a non la Tor de Biauté. — ⁶En non Dieu, feit li chevalier, vous avés voir dit. Or me dites: savés vous pourquoi li chastiaux fu premierement ensint apelés, et pourquoi la tour ot si biau non? — ⁷Certes, fait li rois, oïll, ge le sai bien. — En non Dieu, fet le chevalier, il me plaist moult que vous le sachiés, quar adonc le savrai ge, s'il vous plaist, et certes ge l'ai ja a maint chevalier demandé qui ne m'en savoient a dire le certainnité. ⁸Et ensint com j'ai oï conter as chevaliers anchiens, ichi fu ja acomplie une des plus estranges aventures que le cors d'un sueill chevalier meist onques a ffin. — ⁹En non Dieu, fait li rois, vous dites bien verité. Et quant vous la certainnité de la besoingne et de l'aventure qui avint ja en cestui leu ne savés, dire poés seurement que vous n'avés encor apris unes des plus beles merveilles qui onques avenist el roialme de Logres. — ¹⁰Ha! pour Dieu, sire compains, fait le chevalier, encommenchiés a conter ceste aventure, si l'orrai. — ¹¹Or vous souffrés, ce dist li rois, tant que nous aiomes passé le chastel, que Dex le nous laist passer si honoreement com il nous est mestier. — ¹²Coment, sire compains, fait le chevalier, avés vous donc paour d'une seule joste, qui ja alés Dieu priant qu'il vous en laist partir honoreement? ¹³Or nous comenchiés cestui conte tout orendroit, et ge vous preg a conduire cestui pas, qui ja n'i ferrois a ceste fois cop de lance ne d'espee. — ¹⁴Et comment la porrois vous faire? feit li rois. — En non Dieu, feit le chevalier, ge le vous dirai, ge jousterai premierement pour vous et après jousterai pour moi. — ¹⁵Et vous, por coi, sire compains, fet li rois, vous fiés vous donc tant en vostre prouesche que vous vous cuidiés si legierement delivrer de cestui passage com vous dites? — N'aiés paour, feit le chevalier, bien vous deliverrai, se Deu plect. ¹⁶Assés pou me porroie prisier se ge ne pooie delivrer moi et un autre chevalier a un sueill passage».

14. ¹Quant li rois entent ceste parole, il regarde le chevalier et voit adonc tout apertement qu'il estoit si bien fait de cors et si seans desous les armes qu'il fait bien reison en soi meesmes qu'il porroit estre preus des armes. Et s'il ne

Forche Esprouvee 350] **Forte Espreuve** β 6. si biau non] **si fait n.** β 7. certes] sachiés en verité que *agg.* 357; *om.* 362 ♦ dire le certainnité] d. la verité γ; mot dire 362 8. oï conter] yci conté 338 9. la certainnité ... aventure] **la verité de l'aventure** β ♦ qui avenist] et qui a. 350 ♦ merveilles qui] m. du monde ne qui 362 **11.** Or vous souffrés] *nuovo* § β **12.** laist partir honoreement] doint p. h. come il nous est mestier A2 **13.** cestui pas] tout franchement *agg.* 357 ♦ a ceste ... d'espee] a cestui cop de lance de (ne A2) d'espee γ; coup de lance ne d'espee a cestui point 362 **14.** pour moi] et vous *agg.* γ **16.** un autre ... passage] aultrui de ung seul passage 362 ♦ passage] tant seulement *agg.* 357

14. **1.** regarde] **commence a regarder** β ♦ tout apertement 350 γ¹] *om.* 338 362 ♦ si seans (grans 338 357) desous les armes] si bien lui seioient les armes 362

le fust, il n'eust parllé a ceste fois si hardiement com il a parllé. ²Et li chevalier, qui trop est desirrans d'oïr le conte qu'il demande, dit autrefois au roi Artus: ³«Sire compains, se Dex vous salt, encomenchiés celui conte que ge demant, et ne pensés plus a passage, que ge vous promet que vous le passerois en tel maniere que ja ne vous en covendra cop ferir». ⁴Li rois comenche a sourire quant il entent ceste parole et respont: «Sire chevalier, or sachiés que ge ne pensoie au passage se petit non. ⁵Ge pensoie une autre chose que jou ore ne vous dirai mie voirement. Puisque ge voi que vous estes desirrant d'oïr ce que vous me demandés, et ge le vous dirai maintenant. Or escoutés comment il avint en ceste aventure!». ⁶Quant il a dit ceste parole, il encomence son conte en tel maniere:

15. ¹«Sire compains, ce dist li rois, encor n'a mie plus de .XL. ans, ce vont recordant pluisours chevalier qui en la maison le roi Artus repairent et qui l'virent, que dui chevalier furent qui s'entracompaignierent en une valee, ausint com entre moi et vous sommes ore entracompaignié, la vostre merchi. ²Li chevalier estoient ambedui de grant affeire, gentill home durement et prodome durement des armes. ³Li uns d'eus estoit rois et estoit apelés li rois Uterpandragon. Li autres n'estoit pas rois, mais il estoit tant prodome des armes qu'il valoit mix de son cors que nul autres rois qui a celui tens fust el monde, et chil estoit apelés Galeholt le Brun. ⁴Puisque li dui chevalier se furent entracompaigniés, il s'entramerent moult et moult s'entreprisierent meesment, ⁵pour che que li uns veoit de l'autre que chascuns estoit de son cors bon chevalier. Bien chevauchierent ensemble li dui prodomme demi an entirement, que li uns ne savoit le non de l'autre, ne ne s'entreconnoisoient fors que de chevalerie. ⁶Li rois Uterpandragon ne voloit demander son non a Galeholt le Brun pour che qu'il veoit tout clerement que cil ne voloit son non dire a nul home q'i a lui parlast. Autretel feisoit li rois toutesvoies.

16. ¹«En cele seison qe ge vos cont, avoit en cele tor qe vos veez une damoisele tant bele riens de toutes choses qe cil q'i la veoient afer-

3. passage] **cel p. β ♦ promet**] loyalement *agg.* 362 ♦ **cop ferir** 350] d'espee ne de lance *agg.* γ; coup ne de lance ne d'espee 362 6. il encomence son conte] il compte 357

15. 1. maison] **ostel β ♦ ausint ... vous**] **ainsi comme vous et moi β** 2. de grant affeire] *om.* 362 ♦ **preudome durement** 350] p. γ; fors p. 362 ♦ **prodome des armes**] si durement *agg.* 362 3. de son cors] *om.* β 6. tout clerement] *dopo la lacuna segnalata al § 11.11 riprende il testo di L4 ♦ non*] [...] L4 (*strappo*) ♦ Autretel (autrestel 350)] Aut[...] L4 (*strappo*) ♦ feisoit ... toutesvoies] **feisoit Galeholt del roi Uterpandragon β***

16. 1. *no nuovo* § 357 ♦ en cele tor qe vos veez L4] ci devant avoit en cel petit chastel *agg.* 350; devant ce petit chastel *agg.* β

moient certainement qe il n'avoient en son aage veu nulle si bele damoisele qe cele ne fust encore plus bele. ²Et q'en diroie? Ce estoit a celui tens la merveille de toutes les damoiseles de la Grant Bretagne. ³Li dui conpeignon qe ge vos cont vindrent herbergier ceste part en celui tens. La damoisele, qi a merveilles estoit sage, les fist ambedui venir devant li et les reçut mout honoreement porce qe trop resembloient preudome. ⁴Qant il virent la grant biauté de la damoisele, qi tant estoit desmesurement bele com ge vos ai conté, il furent ambedui si esbahiz qe il ne savoient q'il deussent dire. ⁵Chascuns mist del tout son cuer en amer la, chascuns d'eaus l'ama fort com chevalier porroit amer dame ou damoisele. ⁶Qant il orent veu la damoisele et parlé a li, il pristrent congé a lui et vindrent dormir en cest chastel. ⁷A l'endemain auques matin il se partirent del chastel. Maintenant qe il se furent mis au chemin, il s'arrestèrent enmi le chemin et comencierent a parler ensemble. ⁸Galeot le Brun parla premierement et dist au roi: "Sire conpeinz, qe vos semble de nostre damoisele d'arsoir? – ⁹Biaux sire, dist li rois, il ne m'en puet sembler autre chose fors ce qe ele est sanz faille la plus bele qi soit en tout le monde. – ¹⁰Certes, vos dites verité, fet Galeot, voirement est ce la plus bele riens qi orendroit soit vivant. Mes ore me dites, se il vos plect, qe vos en dit li cuers. – ¹¹En non Deu, dist li rois Uterpendragon, conpeinz, a vos nel celeroie ge mie. Or sachiez qe mi cuers i est si del tout entrez *qu'il dist et afferme seurement que jamais ne s'en partira de lui amer, tant com j'aie la vie el cors.* ¹²*Et qu'en diroie? Ge l'aim si enterinement que, se ge bien voloie, orendroit ne m'en porroie ge partir.* – ¹³*Sire compains, dist Galehalt, quant il est ensint avenu que vous dites, donc sommes nous venus a chou que nostre compaignie depart tout maintenant.* ¹⁴*A cestui point faut nostre amour, quar, quant vous amés cele que ge aim, donc volés vous feire encontre l'onnour de moi, et encontre*

2. la merveille ... Bretagne] la m. de toute la Grant B. β 3. sage] et courtoise de son aage *agg.* 350; bele et sage et courtoise de son aage β ♦ fist] fistent 350 5. Chascuns mist ... amer la L4] *om.* 350 362; tout esrament *agg.* γ ♦ dame ou damoisele] **damoisele** β* 6. Qant ... parlé a li] Il parlerent a li β 7. A l'endemain] *nuovo* § β* ♦ il se partirent] il se leverent et se p. γ 8. au roi] **Uterpandragon** *agg.* β* ♦ d'arsoir] *om.* β* 9. la plus bele L4] damoisele *agg.* 350 A2; une des plus belles damoiselles 338 357 362 ♦ qui soit en tout le monde] que je veisse oncques mais en jour de ma vye 362 10. Galeot] le Brun *agg.* A2 (*anche in seguito*) 11. i est si ... entrez] est si del tout entrez en la L4 (*v. nota*); in L4 ultime parole del f. 164ra; per una lacuna il testo manca fino al § 17.2 ♦ afferme seurement] assure s. γ' ♦ j'aie] il ait β 12. enterinement] fort 362 13. que nostre compaignie ... 14faut nostre amour] qu'il convient nostre compaignie departir et nostre amour faillir 362 14. onneur] **amour** β

ma volenté? ¹⁵Se vous voirement volés tant feire pour l'amour de moi que vous de ceste amor vous vauxiés departir et entrelaisier le del tout, dont remaindroit nostre compaignie si sainement et si bonement com ele fu dusque chi".

17. ¹«A ceste parole respondi li rois Uterpandragon et dist: "Or sachiés, sire compains, qu'il n'a orendroit en tout le monde un chevalier pour qui compaignie tenir ge leissasse les amours de ceste damoisele. ²Mix vaudroie ge lessier tous les chevaliers qui vivent que ces amours ou je ai le mien cuer assis. — ³Coment, sire conpainz, dist Galeot, volez donc amer ceste damoisele la ou ge vos ai dit que ge l'aim de tout mun cuer? — ⁴Oïl, certes, dist li rois, por vos ne leissierai ge pas a amer. Ne vos est il avis que ge soie ausi bon chevalier que ge doie amer une damoisele ausi bien com vos devez? — ⁵Sire conpeinz, dist Galeot, oïl par aventure, et par aventure non estes. — ⁶Ostez en toutes aventures et toutes doutes, fist li rois Uterpandragon, sachiez que ge sui ausi bon gentilx hom com vos estes ou plus et ausint bon chevalier, ce m'est avis. — ⁷Sire conpeinz, ce dit Galeot, bien porroit estre par aventure que vos soiez ausint gentil hom com ge sui ou plus. Mes ores, se vos cuidiez estre ausint bon chevalier com ge sui, qui ne me tieng mie pour bon, malement estes decheus, que sachiés tout certainement que vous ne l'estes mie. ⁸Pour coi ge di hardiement que vous ne devés metre vostre cuer en amer si noble damoisele com est ceste, quar vous n'estes si boins chevaliers que ele se deust tenir apatie de vostre amour. Or vous en ai dit mon avis, que vaudrois vous a che repondre?"

18. ¹«Quant li rois Uterpandragon entendi ceste parole, il fu courouchiés a merveilles: "Comment? dist il. Sire compains, si ne prisies vous tant ma chevalerie com vous feites la vostre? — ²Non certes, dist Galehalt, et par raison. Ge connois moult mix vostre chevalerie que vous ne quidiés, et vous connoissiés moult malement la moie. — ³En non Dieu, dist li rois Uterpandragon, quant vous dites que ge encor ne conois bien vostre chevalerie, et ge la veull tantost connoistre. ⁴Or vous gardés tantost de moi, ge vous mousterrai, se ge puis, que

15. com ele fu] c. e. a fait β

17. 1. les amours de ceste damoisele] la compaignie de c. d. ne ses a. β 2. qui vivent] qui aujourd'hui v. β ♦ que ces ... assis] de amer celle ou je ay mis mon cuer 362 3. Coment, sire] dopo la lacuna segnalata al § 16.11 riprende il testo di L4 ♦ volez] vole[.] L4 (strappo) ♦ la ou] sour ce que β 4. bon chevalier ... devez] bons chevaliers et aie pooir d'amer une haute damoisele com vous avez β ♦ damoisele] si haute d. 350 6. Ostez] om. 350 γ ♦ et toutes doutes*] et en t. d. L4 350 γ; Et toute doubte ostee 362 ♦ sachiez ... bon] sachiés que ge le sui. Ge sui aussi gentill home β* ♦ bon chevalier] ou plus agg. γ 7. com ge sui] in L4 ultime parole del f. 164rb; per una lacuna il testo manca fino al § 18.5

18. 1. Comment] om. 362 4. gardés tantost 350] [...z huimés L4; gardés γ

vous ne m'avés pas encor trop bien coneu, et si avom mi an demouré ensamble et plus. – ⁵*Coment? dist Galeot. Avés vous donc volenté de combatre vous encontre moi?* – ⁶*Oïl, certes, dist li rois, voz paroles m'ont doné talent et volenté.* – *Sire conpeinz, fist Galeot, vos enprenez trop grant folie, ge le vos di avant cop.* – ⁷*Or i para, dist li rois, qe vos feroiz. Se vos de mon cors vos poez defendre, a pris le vos poez tenir*".

19. ¹«Einsint parlant s'entrepristrent li chevalier qi avoient esté trop merueilleux ami une grant piece. Por ceste achoison vint entr'eaus deus la discorde qi puis ne fu recordere d'une grant piece. ²Il n'i firent autre demore, ainz se garnirent de lor armes. Qant il furent garni, il leisserent corre ensemble, et avint de cele joste en tel mainere qe li rois Uterpendragon en fu abatuz, quar, a la verité dire, trop estoit meillor chevalier Galeot en toutes mainere. ³Qant Galeot ot le roi abatu il descendi de sun cheval. Et qant il fu descenduz il dist au roi: "As tu assez de ceste enprisse? – Coment? dist li rois Uterpendragon. Me cuides tu donc auvoir outré porce qe tu m'as abatu? ⁴Or saches qe tu trouveras encore en moi mout autre defense qe tu par aventure ne cuides trouver. – Or i parra, dist Galeot, qe tu feras, qar tu es venuz a la meslee". ⁵Par ceste achoison qe ge vos cont comença la meslee entr'els deus, qi bien estoient homes de grant valor et de haute proece garniz. ⁶Galeot estoit de son cors tel qe en tout le monde n'avoit meillor. ⁷Li rois Uterpendragon, d'autre part, estoit bien home qi trop feisoit a prisier de chevalerie. ⁸Ensint comencierent la meslee enmi le chemin tout a pié, et tant se combaterent qe la damoi-

mi an ... plus] [...]mi an ou plus L4; un an demorié ensamble β (*v. nota*) 5. encontre] *dopo la lacuna segnalata al § 17.7 riprende il testo di L4* 6. li rois] li ro[.]s L4 ♦ talent et volenté] v. β* 7. de mon cors vos poez defendre] **de mon cors solement vous poés le vostre cors d.** β* ♦ tenir] **tornier** β*

19. 1. trop ... grant piece] ami ensamble trop g. p. β ♦ merueilleux] mveilleux L4 ♦ recordere] acordee 350 2. Qant (Quant 350)] [...]nt L4 (*strappo*) ♦ leisserent corre ensemble*] l. cor[...]semble L4 (*strappo*); au ferir des esperons *agg.* 350; il s'entrevindrent (s'entremirent 338) au ferir des esperons β ♦ en tel mainere*] en tel [...]ainere L4 (*strappo*); om. 350 ♦ quar a la verité dire] [...] a la v. L4 (*strappo*) ♦ Galeot en toutes mainere] **en t. m. Galehalt le Brun que li rois Uterpendragon** β* 3. Et qant ... enprisse] et puis dist au roy (Uterpendragon *agg.* γ¹): "Comment vous est il de ceste emprise (joste 362) β 4. trouveras ... qe tu par aventure ne cuides] **que tu par a. me c.** β* (*saut*) ♦ Galeot] le Brun *agg.* 350 (*anche in seguito*) ♦ tu feras qar (quar 350)] om. L4 5. Par ceste] *nuovo* § β* ♦ entr'els deus] **chevalier** *agg.* β* ♦ valor] **affere** β* 6. tel] **chevalier** β* 7. d'autre part estoit L4 350] e. de l'a. p. qui bien estoit hons qui β; 362 (*v. nota*) ♦ prisier] **loer** β* 8. la meslee L4] la bataille 350; la bataille des .ii. chevaliers γ

sele meemes par qi il se combatoient vint ilec a grant conpeignie de chevaliers et de dames et de damoiseles. ⁹Ele s'en aloit a un chastel qi estoit pres de ci por veoir un sien frere charnel qi estoit venuz dou roi de Norgales, qi en celi mois proprement l'avoit fet chevalier. ¹⁰La damoisele aloit a son frere por estre a la feste de sa nouvele chevalerie.

20. ¹«Qant la bele damoisele fu venue sor les deus chevaliers qi se combatoient et cele entendi porquoi il se combatoient et por qel achoison, ele en devint toute esbahie. ²Les chevaliers qi en sa compaignie estoient distrent: “Ha! damoiselle, por Deu, metez pes entre ceus deus preudomes. Ce seroit trop grant dolor se il se metoient a mort por tel achoison”. ³La damoisele respondi et dist a ceus qi ce li avoient dit: “Ne por moi comencierent ceste bataille ne por moi ne laisseront, ge ne lor puis pas doner sens qant il ne l'ont par lor meemes. ⁴Et neporqant, se ge puis entre ceus deus metre pes, ge l'i metroie trop volentiers.” Et lors dist la damoisele as deus chevaliers: ⁵“Seignors, arrestez vos tant qe ge aie parlé a vos!”. Et cil s'arrestèrent maintenant. Qant il se furent arrestez, ele lor dist: ⁶“Seignors, dont vos vint ceste volenté qe vos en tel mainere vos combatiez por moi? Certes, ge ne le tieng pas a sens, mes a la greignor folie qe chevalier feissent onques mes”. ⁷Galeot respondi premierement et dist a la damoisele: “Ma chiere damoisele, coment qe l'en nos doie atoner cestui fet, ou a sens ou a folie, einsint nos est avenu qe nos avom encomencie ceste bataille por tel chose”. Et li comence a deviser mot a mot le comencement de lor estrif et toute la reison. ⁸Qant li uns des chevaliers qi avec la damoisele aloit oï ceste parole, si comença trop durement a rrire et il ne se puet tenir qe il ne deist: ⁹“Par Deu, seignors

meemes (meemes 350 γ)] emeemes L4 ♦ se combatoient L4 362] en tel maniere *agg.* 350 γ 9. aloit] *om.* A2 ♦ roi de Norgales L4 350 338 A2] royaume de N. 357; royaume de N. ou le roy 362 ♦ chevalier L4 γ¹ 362] novel c. 350 338 10. nouvele chevalerie] qui encore duroit *agg.* 350

20. 1. la bele damoisele] **ele** β* ♦ sor les ... combatoient] **enmi le chemin** β* ♦ et pour qel achoison] *om.* 362 ♦ devint toute esbahie] fut moult e. 362 2. preudomes ... achoison] chevaliers qu'ilz cessent leur bataille 362 ♦ grant] *rip.* L4 ♦ dolor L4] damage 350 γ; 362 *riserve* 3. a ceus qi ce] **a che que chil** β* ♦ Ne por moi comencierent] qe par moi c. 350 ♦ ceste bataille] *om.* γ ♦ sens] **pes** β* ♦ lor meemes L4] moi m. 350 γ; par moy ne l'ont commenciee 362 4. entre ceus deus L4 γ] envers eus 350; y 362 ♦ pes] **et concorde** *agg.* β* 5. arrestez vos] (un peu *agg.* β) **s'il vos plaist** *agg.* β* ♦ s'arrestèrent] s'arrent L4 7. Galeot respondi] *nuovo* § β* ♦ Ma chiere damoisele] *om.* L4 (*saut*) ♦ deviser] compter β 8. si comença ... et il] il ne se pot tenir de rrire γ

chevaliers, bien poez seurement dire qe voirement avez vos a cestui point encomencié la plus haute folie qe chevalier encomençassent a pieçamés, qi vos combatez entre vos por cele qi ne vos aime ne vos prise plus qe ceaus qu'ele ne vit onques". ¹⁰Galeot respondi adonc et dist: "Sire chevalier, por ce, s'ele ne nos aime ne ne prise, ne remaindra il mie qe ge endroit moi ne la prise toute ma vie plus qe toutes celes del monde. ¹¹Et certes, se ele m'ahoit mortelment, ne la porroie ge haïr por nulle aventure qi avenist. ¹²Or me dites, fet li chevalier, e qe feriez vos por ma dame, qi tant l'amés? Oseriez vos fere por lui plus qe vostre conpeinz n'oseroit? – ¹³Ge ne sai, fet Galeot, qe mi conpeinz oseroit por lui fere, mes se il voloit avant dire le hardemant qe il oseroit por lui enprendre, ge diroie le mien après. Et tout ce qe ge diroie por lui, ge oseroie bien maintenir. ¹⁴Ore die mi conpeinz avant, et ge dirai après". Lors parole li rois Uterpendragon et dist au chevalier: ¹⁵"Or sachiez qe ge oseroie bien tant fere por les amors de la damoisele qi ci est qe ge demorroie deus mois en cestui chastel et defenderoie le chemin touz les deus mois encontre touz les chevaliers estranges qi passer voudroient dedenz celui terme, ¹⁶en tel mainere voirement qe chescun chevalier venist li un après l'autre, et qe il en venist un chascun jor touz les deus mois. ¹⁷Ce est a dire qe ge mettroie a outrance .lx. chevaliers en deus mois, a chascun jor un. ¹⁸Cestui fet oseroie ge bien enprendre por ceste damoisele qi ci est, et bien le cuideroie mener a fin et a honor de moi. ¹⁹Or ai dit ce qe ge oseroie por ma damoisele enprendre. Ore dites, se vos volez dire, qe vos oseriez por lui fere".

21. ¹«Après ceste parole respondi Galeot et dist: "Sire conpeinz, vos avez dit qe vos defenderiez cest passage a deus mois entiers, en tel mainere qe chascun jor vos combatriez encontre un chevalier. ²Vos avez dit .ii. mois tant seulement, et ge di qe ge le defendroie un an tout entier par tel mainere com vos avez devisé ici. ³Et au darrain jor de

10. ne remaindra ... prise] ne demoura il endroit de moy que je ne la prise et ayme 362 **11.** aventure] du monde *agg.* 362 **12.** Or me dites fet li chevalier] je voudroie bien que vous me deüssiés *agg.* γ ♦ oseroit] **feroit** β* **13.** se il voloit ... oseroit ... diroie le mien après] mais se osoit pour lui enprendre aucune grant chose je scay de ma part que je ne l'emprendroie pas petite 362 **15.** deus mois] entirs *agg.* 350 ♦ terme] **termine** β* **16.** qe chescun ... qe il en venist un] *om.* β* (*saut*) **17.** .lx.] .xl. L4 **18.** mener] metre β **19.** se vos] ce qe v. L4 ♦ dire] maintenant ce *agg.* 362

21. **1.** Après] A 362 ♦ passage] passagessage L4 ♦ deus mois entiers] .ii. m. 362

l'an, qant ge avroie mis a otrance le derain chevalier, se vos adonc venissiez sor moi tout fres et repousez et un tel chevalier avec vos com vos estes, se ge en cel jor ne vos pooie ambedeus mener dusq'a outrance, ge voudroie qe l'en me trenchast la teste". ⁴De ceste parole fu li rois Uterpendragon mout honteux et mout vergondeux, qar il li fu bien avis qe si conpeinz ne le prisoit pas tant d'assez com il cuidoit, et respondi adonc: ⁵"Sire conpeins, trop avez dit: vos avez dit chose qe vos ne feriez, ce sai ge bien tout certainement. A cestui point n'estes vos pas si voirdisant com ge cuidois. — ⁶Coment, dist Galeot, cuidez vos donc qe ge soie chevalier qi tel couvenant com est cestui ne peust maintenir? — ⁷Certes, vassal, ce dit li rois, vos estes assez bon chevalier, mes cestui couvenant sanz faille qe vos avez dit ici ne porriez vos pas souffrir, ce di gié bien tout certainement. — ⁸Sire, ce dit Galeot, qant vos de ceste chose me tenez a mesoengier, et vos si m'en tendroiz encore a voirdisant, porqoi l'aventure de moi soit tele qe chascun jor viegne a cest passage un chevalier qi a moi se voille combatre, ⁹qe ge vos pramet loiaument qe ge m'en retournerai orendroit au chastel, ne ge ne m'en remuerai de chief un an. ¹⁰Et se vos de chief un an volez venir au chastel, amenez en vostre conpeignie un tel chevalier com vos estes. ¹¹Se ge adonc ne vos puis ambedeus mener dusq'a outrance, ge voil qe vos me trenchiez la teste, qe ja pitié n'en aiez".

22. ¹La ou li rois Artus devisoit au chevalier cestui conte, il lor avint q'il orent tant chevauchié qe il furent tant aprochiez del chastel qe il estoient pres a meinz d'une archee. ²«Sire conpeinz, fet li chevalier, or vos soufrez, se il vos plect, de vostre conte tant qe nos aiom passé cest pas. — ³Beaux sire, fet li rois Artus, a vostre comandement». Li chevalier s'apareille de la joste, qar bien set tout certainement qe

3. ambedeus (ambesdeus 350)] *om.* L4 ♦ tel chevalier] tel 350 4. mout honteux et mout vergondeux] *m.* courouciez 362 5. trop avez dit] *om.* β* ♦ ne feriez ... certainement] **feriés pas certainement** β* ♦ cuidoie] disoie par cy devant 362 6. chevalier L4 350 338 A2] tel tel c. 357 362 ♦ couvenant L4 350 γ'] convent 338 362 (*anche la successiva occorrenza*, § 20.7) ♦ cestui] convenant *agg.* 350 7. dit] **ichi amenteu** β* ♦ souffrir L4] fournir 350; maintenir β ♦ ce di gié ... certainement] *om.* γ 8. mesoengier] menteur β ♦ vos si m'en tendroiz] je m'en tieng β ♦ porqoi l'aventure L4] pour que la verité 350; or soit l'a. β ♦ voille] viegne 350 9. m'en remuerai de chief un an L4] m'en irai (revendray 362) devant un an et d'ui a un an 350 362; m'en remuenrai devant .i. an γ 10. Et se] **et** β* ♦ de chief] **d'ui** β* ♦ amenez L4 γ'] amener 350 338 362 ♦ com L4 350] autres 338; autel γ' 362

22. 1. cestui conte] *om.* β* ♦ chevauchié] **alé** β*

de leienz istront deus chevaliers qi le passage voudront defendre. ⁴La ou li chevalier s'estoit ja apareilliez de la joste, il regarde et voit oissir de leienz deus chevaliers touz apareilliez de la bataille qi crient as deus chevaliers: ⁵«Gardez vos, vos estes venuz a la meslee! Nos vos defendrom cestui passage se nos onques poom». ⁶Li chevalier respont tantost et dit: «Vient il a defendre cestui chastel nul autre chevalier qe vos deus? – Nanil, dient cil. – ⁷En non Deu, dist li chevalier, donc l'avrai ge tost delivré, se fortune ne m'est trop durement contraire. ⁸Ne ge ne voil qe vos vos esprouvez fors a moi seul: se de moi seul vos poez ambedeus defendre, donc vos tendrai ge a pseudomes durement». ⁹Qant il a dite ceste parole, il n'i fet autre demorance, ainz leisse corre maintenant vers celui qi venoit avant et le fiert si roidement en son venir qe cil n'a pooir ne force qe il se puisse tenir en sele, ainz vole a terre maintenant, ¹⁰et de tant li avint mout bien qe il n'ot mal de cele joste, fors qe del dur cheoir seulesment. ¹¹Qant il a celui abatu, il nel vait mie regardant, ainz leisse corre a l'autre maintenant, qi ja li venoit le glaive beissié por lui abatre, se il le peust fere. ¹²Li chevalier, qi de haute chevalerie estoit, ne vait pas celui espargnant qant il le voit sor lui venir, ainz le fiert si roidement de celui encontre qe il fait de lui com il avoit fet del premier. ¹³Il abat celui el chemin si roidement qe il li est bien avis sanz faille, au cheoir qe il a fet a terre, qe il ait le col rompu. ¹⁴Il gist ilec une grant piece en tel mainere com se il fust mors. Qant li chevalier ot fet ces deus cox, il se torne envers le roi Artus et li dit: ¹⁵«Sire conpeinz, delivrez est cestui passage, ce m'est avis. Ore poom huimés chevauchier et retourner a nostre conte, qant il vos pleira, qar trop en desir a oïr la fin». ¹⁶Li rois grant poor avoit qe li chevalier ne fust navrez qar, a la verité dire, li chevalier li ot doné un si grant cop enmi le piz, cil qi au dereain avoit josté, ¹⁷et

3. istront (ysteroint 338) β] istroit L4; iousterent 350 ♦ deus chevaliers] **aussint come il sont dui** *agg.* β* (*v. nota*) 4. joste L4] en tel guise com ge vos cont *agg.* 350 γ; comme je vous conte *agg.* 362 ♦ deus chevaliers L4] errans *agg.* 350; c. esrans β 5. Gardez vos] **de nous seignour chevalier** *agg.* β* 8. vos esprouvez] uore (*sic*) vos e. L4 ♦ a pseudomes durement] **pour p.** β* 9. Qant il a] *nuovo* ∫ β* ♦ venoit avant L4] por jouter *agg.* 350 γ; v. pour jouter 362 ♦ roidement] [ro]drement L4 (*riscritto*) ♦ tenir] *om.* A2 10. dur cheoir] c. β* 12. estoit] **garnis** *agg.* β* ♦ sor lui venir] v. β ♦ de celui encontre] *om.* β* ♦ com il avoit fet del premier] qu'il en fait autretant c. du premier β 13. Il abat] Et qu'en diroie? Il a. β* ♦ qe il a fet a terre] *om.* β* 15. retourner a] **recommen-**
chier β* ♦ en desir a oïr] bien en vouldroie scavoir 362 16. navrez qar ... avoit josté] car le chevalier qui derrainement avoit jousté lui avoit donné ung moult grant coup ou pis 362

por ce demande li rois Artus a son conpeignon: «Sire conpeinz, coment vos sentez vos orendroit? — Certes, sire conpeinz, ge me sent mout bien, la Deu merci, ge n'ai mal ne bleceure de ces deus jostes. — ¹⁸En non Deu, fet li rois Artus, ce m'est mout bel. — ¹⁹Sire conpeinz, ce dist li chevalier, metez huimés a fin le conte qe vos avez encomencié. — Certes, sire conpeinz, fet li rois, volentiers». Et lors recomence son conte maintenant.

23. ¹«Sire conpeinz, ce dist li rois, par tel aventure com ge vos ai conté enprist Galeot le Brun a garder cestui passage un an entier. ²Et li rois Uterpendragon fu trop doulenz de ceste enprise, qar bien veoit tout apertement qe assez petit le prisoit et doutoit Galeot le Brun, qi en tel mainere avoit parlé devant lui et si seurement, ne encore ne cuidoit il mie qe ce fust Galeot le Brun, ne Galeot ne savoit pas qe ce fust li rois Uterpendragon. ³Li rois, qi trop estoit iriez, ne fist ilec autre demorance, ainz s'en retorne tout maintenant a Camahalot. ⁴Cil de son chastel furent mot liez et mout joiant qant il le virent retourner, qar ja avoit grant piece qe il n'en avoient oï nulle nouvele del monde, porquoi il avoient eu grant poor et grant doute de lui. ⁵Qant il fu venuz a Camahalot, il prist maintenant dis de ses conpeignons et lor dist: ⁶«Prenez voz armes et vos en alez a cel chastel tout droitement, et ne façoiz ja asavoir qe vos soiez de mon hostel. ⁷Li un de vos s'aille esprouver le premier jor encontre celui chevalier qi a enpris a defendre le chastel et, se il vos met au desouz, uns autres de vos viegne l'autre jor emprés, et puis le tierz et puis le quart. ⁸Et s'en avient en tel mainere qe il viegne au desus de vos touz par sa proesce, retornez a moi, et ge manderai puis des autres. — ⁹Sire, ce distrent li chevaliers, ce ne porroit avenir qe un chevalier nos meist touz .x. a desconfiture par sa proesce. — Ce ne sai ge, ce dist li rois, puisque vos serois a l'esprouve vos verroiz qe il fera». ¹⁰Li chevalier s'en partirent

17. a son conpeignon] **au chevalier** β* ♦ la Deu] la la Deu L4 (*rip.*) 18. ce m'est mout bel] j'en suis bien joyeux 362 19. qe vos avez encomencié] *om.* A2 ♦ Certes ... maintenant] *om.* 350 ♦ maintenant] et dist en telle maniere β

23. 1. Galeot le Brun] le bon chevalier 350 (*anche nel seguito dell'episodio*); li chevaliers β 2. qui en tel mainere ... Galeot le Brun, ne Galeot ne savoit] **ne connoissent** (connoissoit β) **pas que ce fust li rois Uterpandragon** β* (*saut, v. nota*) 3. Li rois] Mais puis le sot il β (*da qui, redazione alternativa di β, v. Appendice § 23-bis e 23-ter*) ♦ retorne tout maintenant] torna tantost 350 4. chastel] ostel 350 ♦ del monde] *om.* 350 6. hostel] [chevalier] qicel (*sic*) L4 7. se il vos met] se il vient 350 ♦ emprés] après 350 8. manderai] enverrai 350 9. un chevalier] un L4 ♦ verroiz] tost *agg.* 350

a celui tens de Camahalot et vindrent ceste part par le comandement de lor seignor. Le premier des .x. chevaliers s'esprove le premier jor qe il fu ci venuz, mes il en avint en tel guise qe il fu outrez tout maintenant. ¹¹A l'autre jor vint le segont chevalier et fu ausint outrez tout errament, qar Galeot le Brun estoit trop de haute proece garniz. ¹²Et q'en diroie? Il mist touz les dis chevaliers a outrance, qe il ne s'en travailla pas granment.

24. ¹«Quant li rois Uterpendragon sot ceste aventure, il fu irez trop durement et prist tout maintenant autres .x. chevaliers et les envoia ceste part por eaus esprouver encontre Galeot le Brun. Autresint com il avoit fet des .x. chevaliers premeiranz fist il des autres .x. ²Après ces .x. en remanda il autres .x., mes Galeot les mist toz a desconfiture et a outrance, com cil qi bien estoit sanz faille le meillor chevalier qi fust a celui tens en tout le monde. ³Et porqoi vos feroie ge lonc conte de ceste chose? Tout celui an enterinement maintin Galeot le Brun cestui estrif qe ge vos ai encomencié a conter. ⁴Et l'en avenoit toutesvoies en tel mainere qe nul si preudome n'i venoit qe il ne menast a outrance par force d'armes. ⁵Et que en diroie ge? Il atorna dedenz celui an la meison le roi Uterpendragon tel qui pou i remist des bons chevaliers qe il ne menast dusq'a outrance, ⁶et tant fist qe de celui ostel n'i avoit mes un seul qi bien ne deist au roi Uterpendragon: "Sire, Dex me gart de cele esprouve. ⁷Or sachiez qe de ma volenté n'i irai ge mie, et se vos me mandez, ce sera encontre mon cuer". ⁸Tout celui an fist Galeot la damoisele prier et requerre d'amor, mes tel estoit la volenté de cele damoisele qe ele ne se voloit acorder ne a celui ne a l'autre.

25. ¹«Au derain jor de l'an qe touz li termes estoit aconpliz – qe bien avoit mis a fin Galeot tout ce qe il avoit pramis, et il avoit apel-

10. Le premier des .x. chevaliers] Le p. des .x. 350 ♦ fu] furent 350 ♦ maintenant ... ¹¹outrez tout] *om.* 350 (*saut*) 12. outrance (outranche 350)] out[...] L4 (*buco*)

24. 1. sot] ot 350 ♦ tout maintenant] *om.* 350 ♦ il] li bons chevaliers 350 ♦ des .x. chevaliers premeiranz] des autres p. 350 ♦ fist il des autres .x. ... ²remanda il autres .x.] fist il des autres .x. après, et après ces .x. en renvoia .x. autres li rois Uterpendragon 350 2. mes ... outrance] mes tout mist a outranche li bons chevalier 350 3. encomencié a conter] conte 350 4. toutesvoies] *om.* 350 5. tel qi pou] si que poi 350 ♦ dusq'a] a 350 7. me mandez] m'i envoiés 350 ♦ encontre mon cuer] que ge irai *agg.* 350 8. fist ... d'amor] fist a la damoisele li tres bons chevaliers priere d'amour et la requist en mainte maniere 350 ♦ ne a l'autre] en nulle maniere ni a l'. 350

25. 1. pramis] empris 350

lee ceste tor “Tor de Biauté del Monde”, qi adonc demoroit leienz, et ausint l’apeloient tuit li autre de cest païs qi avoient oï le non — ²a cel jor qe il n’i avoit mes fors un seul jor aconplir de la pramese, adonc vint un chevalier de la maison le roi Uterpendragon qi aco- mença la bataille de celui jor, mes ele fu tost finee: d’un seul cop le mena Galeot le Brun a outrance. ³Quant li rois Uterpendragon, qi estoit venuz en la place et avoit mené en sa conpeignie un mout preu chevalier, vit ceste chose, il dist: “Sire co[n]peinz, or n’i faut fors une seule joste qe vos ne vos soiez trop bien aqitez de ce qe vos me prameistes or a ja un an. — ⁴Qi estes vos, dist Galeot, qi m’apelez conpeinz? — Ge sui, dist li rois, celui por qi am[i]e vos enpreistes cestui fet. — ⁵Bien soiez vos venuz, dist Galeot, or vos vois ge reco- noisant. Vos est il avis qe ge aie bien aconpli tot ce qe ge vos pramis? — ⁶Oïl, certes, dist li rois, mes encore i faut une chose. — Et qe est ce? dit Galeot. — ⁷Ce est, dist li rois, qe vos devez combatre a moi e a cest mien conpeignon, qar ensint le me prameistes vos. — ⁸Puisque ge le vos pramis, dist Galeot, vos ne m’en trouveroiz en faute a cestui point. Veez moi tout apareilliez et sachiez qe vos estes deceuz oren- droit assez plus vilainement qe vos ne cuidiez. — ⁹Et de qoi sui ge deceuz? fet li rois. — Certes, dist Galeot, ge le vos dirai. ¹⁰Vos cuidez tout veraïement, porce qe ge me sui tot cestui an combatuz tant com vos savez, qe ge soie orendroit si travailliez qe ge ne me puisse defendre de vos, mes li fet vet ore tout autrement. ¹¹Or sachiez tout certainement qe de tout ce qe ge ai souffert cestui an ne me sent ge ne pou ne grant, et ce verroiz vos orendroit. ¹²Or vos apareilliez andeus de defendre vos encontre moi, se vos le poez fere, qe bien sachiez qe tost sera ceste guerre finee”. ¹³Quant il ot dite ceste parole, il n’i fist autre demorance, ainz leisse corre maintenant desus le roi Uterpendragon, qi de la joste estoit ja touz apareilliez endroit soi. ¹⁴Galeot li bon chevalier le feri si roidement qe il le porta a terre tout en un mont, et lui et le cheval tout ensemble. ¹⁵Quant il ot fet

ceste tor] le chaste] 350 ♦ tuit li autre de cest païs] ja tuit et cist de cist p. 350
 2. a cel jor qe] Quant 350 ♦ le mena ... outrance] l’amena a ffin Galeholt le
 Fort 350 3. chose] joste 350 ♦ conpeinz] copeinz L4; compaignon 350
 4. celui] om. 350 ♦ amie*] ame L4 350 (v. nota) 9. Et de qoi ... ¹⁰Vos cuidez]
 et vous creés pour çou que ge sui combatus a cestui point 350 (*riscrittura generata
 da un saut*) 10. mes li fet ... autrement] il ira tout autrement 350 11. tout
 certainement] om. 350 ♦ sent] soigne 350 12. andeus ... encontre moi] tous
 deus et vous deffendés de moi 350 13. Quant il ot] *nuovo* § 350 14. Galeot]
 om. 350

cestui cop, il ne s'arestut pas sor lui, ainz leissa corre au conpeignon le roi. ¹⁶Qant li rois se voit abatuz et son conpeignon d'autre part, il vint a son cheval et remonta. Et qant il fu a cheval, Galeot li dist: "Sire conpeinz, avez vos plus en volenté de combatre encontre moi? – ¹⁷Certes, fet li rois, beaux sire, nanil, qar orendroit connois ge tout certainement et par moi meemes qe vos estes sanz faille meillor chevalier qe ge ne sui. Et certes ge croi qe vos soiez le meillor chevalier qi orendroit soit el monde, fors un autre. – ¹⁸Qi est celi qe vos tenez a meillor chevalier de moi? dist Galeot. – Certes, dist li rois Uterpendragon, ge le vos dirai, qant vos savoir le volez. Encore tieng ge a meillor chevalier d'assez Galeot le Brun qe ge ne faz vos. – ¹⁹Qant vos a ce vos acordez, et ge ausint m'i acort, et puisqe il m'est si bien avenuz de ceste enprise qe ge l'ai menee a fin honoreement, ormés m'en voil ge departir de ma dame qe ge ai servi si longement sanz guerredon. ²⁰M'en part ge doulenz et iriez et di bien qe a cestui point m'a esté fortune contraire trop durement, qar j'ai travaillé sanz deserte. ²¹Amor, qi maint home a vengié, puisse revengier cestui orgoil prouchainement. Ormés vos comant ge a Deu, sire conpeinz, qar ge m'en vois le mien chemin".

26. ¹«Après ce qe Galeot ot parlé au roi Uterpendragon en ceste mainere et li rois vit qe il se voloit metre au chemin, li rois, qi trop estoit desiranz de conoistre le, li dist adonc: ²«Sire conpeinz, avant qe vos vos partoz de moi del tout voudroie ge, se il vos pleisoit, qe vos me donisoiz un don qi assez pou vos costera. Et sachiez qe ge me tendroie a trop mielz païé de celui petit dom qe ge ne feroie d'un trop greignor. – ³Sire conpeinz, dist Galeot, dites moi tost qe ce est qe vos demandez. – Certes, dist li rois, ge le vos dirai volentiers: ge vos pri qe vos dioiz vostre non". ⁴Qant li bon chevalier entendit ceste demande, il comença a penser, et qant il ot un pou pensé il dit au roi: "Or me dites le vostre, et ge vos dirai le mien après. – ⁵Certes, dist li rois, puisqe mon non volez savoir, et ge le vos dirai". ⁶Lors le tret a une part et li dit: "Or sachiez qe ge sui li rois Uterpendragon, ge fui vostre compaignon d'armes si longement com vos savez ⁷et ge ne me fusse

15. conpeignon le roi] c. et fist de lui tout autresint com il avoit fait du roi 350
18. Encore] Or sachiés que e. 350 20. M'en part] me p. L4

26. 2. tendroie] tendra L4 ♦ de celui ... greignor] de celui don 350 4. comen-
ça a penser ... pensé il dit] commencha a penser et dist 350 5. et ge le vos
dirai*] Sachiez qe ge me celoie en vostre conpeignie si longement com vos savez
agg. L4 350 (v. nota) 6. li rois Uterpdendragon] le U. L4 ♦ savez] veistes 350

vers vos celé si fierement com vos veistes, mes le fis porce qe ge veioie qe vos ne voliez dire vostre non ne nulle chose de vostre estre a home q'i vos demandast. ⁸Porce qe ge veioie qe vos vos teniez toutesvoies si couvertement envers toute gent me celui ge si dou tout vers vos. ⁹Or me sui ge vers vos descouvert et vos ai dit mon non, or vos pri qe vos me tegnoiz couvenant de ce qe vos m'avez pramis”.

27. ¹«Quant Galeot entent qe ce estoit li rois Uterpendragon q'i li avoit esté conpeinz d'armes si longement et envers lui s'estoit celez tout autresint com se il fust un povre chevalier, ce est une chose dont il devint tout esbahiz. ²Il fu si vergondeux durement q'a poine ot il pooir de parler une grant piece. Quant il ot pooir de parler, si li dist: ³“Sire, il me poise mout chierement qe ge ne vos conui pieça, qar ge vos eusse en moutes maineres greignor honor porté qe ge n'ai fet. ⁴Et ge le devoie fere par reison qar, encore me fussiez vos conpeignon d'armes, si m'estes vos seignor, puisqe vos avez la seignorie de la Grant Bretagne. ⁵Sire, envers vos ne me voil ge ore plus celer, ainz vos dirai mon non, par tel couvenant voiremant qe vos de ci en avant nel diez a ceste foiz. — ⁶Certes, fet li rois, ge le vos creant loiaument qe ge si tost n'en parlerai. — Sire, fet Galeot, donc vos dirai ge mon non. ⁷Or sachiez qe ge sui celui Galeot le Brun dont vos parlastes orendroit, et qant ge vos oï dire mon nom, ge m'en merveille molt. ⁸Or vous pri ge qe vos ne façoiz semblant ne chiere por qoi ge sois coneuz, et vos requier qe vos me doignoiz congîe tout orendroit sanz moi arrester de riens”. ⁹Li rois Uterpendragon fu touz esbahiz qant il entendit ceste parole. ¹⁰“Ha! dist il, Galeot, deceuz m'avez! Ge ne cuidasse mie qe nus si bon chevalier com vos estes se peust si longement celer envers son conpeignon com vos feistes envers moi. — ¹¹Sire, dist Galeot, ne ge ne cuidasse qe nul si grant home com vos estes se peust si longement celer envers un povre chevalier com vos feistes envers moi”. Et qant il a dite ceste parole, il s'en ala outre, qe il n'i tint autre parlement au roi fors cestui qe ge vos ai devisé.

7. si fierement com vos veistes] *om.* 350 8. teniez toutesvoies] *veniés* 350 ♦ dou (del 350)] *dun[...]* L4

27. 1. ce est une chose dont] *om.* 350 2. q'a poine ot il pooir] si qu'il n'ot p. 350 ♦ une grant piece (pieche 350). Qant (Quant 350) ... de parler] *om.* L4 (*saut*)
3. moutes maineres] moult de choses 350 5. qe vos ... ceste foiz] qe vous en avent non diés 350 6. loiaument] bien 350 7. vos parlastes orendroit, et qant (quant 350) ge vos (vous) ... ⁸qe vos (que vous 350) ne façoiz] orendroit non f. L4 (*saut*) 9. Li rois] *nuovo* § 350 10. envers] *encontre* 350 ♦ com vos feistes envers moi] *om.* 350 11. povre] *pouiroe* (?) L4 (*riscritto*)

28. ¹«Qant li rois Uterpendragon vit que Galeot s'en aloit en tel mainere, il ne l'osa arrester ne aler après lui par les couvenances qi entr'es estoient. ²Qant Galeot s'en fu alez, li rois se fist adonc conoistre a la damoisele et a cels de cest chastel, et dit que – porce que il en avoit esté commencement de ceste aventure et de cest dur passage, et il meemes i avoit deus foiz receu deshonor – il ne voloit mie que ceste costume remainsist, ainz voloit q'ele durast tout son vivant, et ele si fist, et encore dure ausint com vos poez veoir. ³Qant a la damoisele fu puis conté q'ele n'avoit mie fet trop grant sens, qi einsint avoit refusé la priere del meillor chevalier del monde qi prendre la voloit por moillier, ele manda après por fer le torner en ceste contree, mes tele fu l'aventure que il ne pot estre trouvez en cele seison. ⁴Après ce ne demora mie lonc tens que nouvelles vindrent en cest chastel que Galeot le Brun estoit mort. Un chevalier de ceste contree, qi mal voloit a la damoisele, aporta ceste nouvelle por veoir qel semblant et qel chiere la damoisele en feroit. ⁵Encore dist il plus, qar il dist que Galeot li bon chevalier sanz faille estoit mort por les amors de la damoisele, ce avoit il reconeu a sa mort. ⁶Qant ceste chose fu countee a la damoisele, ele cuida certainement que ce fust verité, si enprist si grant duel sor lui q'ele ne volt puis mangier ne boivre. Ainz dist: puisq'ele avoit fet morir le meillor chevalier del monde, ele ne qeroit plus vivre. ⁷Bien vesqi la damoisele .viii. jors entiers en ceste dolor et morut en cel meemes duel. Si vos ai ore finé mon conte, qar ge vos ai conté tout apertement ce que ge vos pramis a dire, et plus vos ai encore dit». ⁸Et qant il a dite ceste parole, il se test que il ne dist plus a cele foiz de celui conte. Qant li rois a finé son conte, li chevalier respont a chief de piece: ⁹«Si m'aït Dex, sire conpeinz, biau conte vos avez conté, et bele aventure fu cele et merveilleusse, ne cestui fet ne fu pas si estrange que Galeot le Brun n'en feïst encore de greignors, tant com il porta armes». ¹⁰Einsint parlant chevauchent ensemble li

28. 1. *no nuovo* § 350 ♦ entr'es] entre lui 350 2. Galeot (Gallehals 350)] li rois L4 ♦ commencement] comandement L4 ♦ deus foiz receu deshonor] deus grandes deshonnors 350 ♦ voloit mie que ceste costume ... ainz] *om.* 350 (*saut*) ♦ mie fet trop grant sens] mie g. s. 350 3. prendre] prendra L4 4. lonc tens] longuement 350 ♦ Galeot le Brun] li bons chevaliers 350 ♦ de ceste contree] qui estoit de c. c. 350 ♦ la damoisele] ele 350 5. qar il dist ... sanz faille estoit] que s. f. il e. 350 6. si grant duel] et si grant dolour *agg.* 350 ♦ ne volt ... puisq'ele] que ele 350 (*saut*) ♦ ne] *om.* L4 7. .viii. jors] .vii. j. 350 8. Qant li rois] Quant il *nuovo* § 350 9. porta armes] pout 350 10. parlant chevauchent ensemble] chevauchoit 350

rois Artus et li chevalier avec lui tant qe hore de vespres comença aprochier. «Sire conpeinz, fet li chevalier au roi Artus, il m'est avis qe se nos trovom huimés aucun recés ou nos puissom herbergier, qe il en seroit auques tens, qar ore de vespres est ja auques passee. — ¹¹Sire conpeinz, fet li rois Artus, vos dites voir, et ge cuit qe nos n'irom pas grant tens avant qe nos trouverom la maison d'une dame veuve qi maint ici devant une mareschiere. Ge croi bien qe cele veuve dame nos herbergera mout volentiers porce qe chevaliers erranz somes. — ¹²Sire conpeinz, vos dites voir, et ge cuit qe nos n'irom pas granment avant, qar certes — puisque ge sui herbergiez — ce est la chose qe ge plus aim qe repos, et il me torne a gran anui se ge truis onques autre chose fors qe boivre et mengier et dormir». ¹³De ceste parole se comence a rire li rois Artus trop fierement et il ne se puet tenir qe il ne die au chevalier: «Coment, sire conpeinz? Vos volez vos donc si bien aaisier en chascun ostel com vos dites? — ¹⁴Oil, certes, fet li chevalier, ge m'aaise trop volentiers, qant fortune me done l'aaise. — ¹⁵Sire conpeinz, ce dit li rois, qant vos parlastes orendroit vos oubliastes le meillor, qar vos oubliastes amentevor le deduit ou de dame ou de damoisele, qe grant aaise ne puet le chevalier errant avoir en ostel se ceste li faut. ¹⁶Et certes de ceste devroit bien a mon esciant chascun chevalier errant avant parler. — ¹⁷Sire conpeinz, ce dit li chevalier, et qe est ore ce qe vos dites? Qe me porroit ore tenir de tel soulaz com vos parlez? ¹⁸Ja a trois jors, si m'ait Dex, qe li haubers ne m'oisi dou dos ne les chaues de fer, ja a trois jors qe ge n'oi se mout petit non de pain et d'eve sanz plus. Or donc qe me porroit tenir de tel deduit? ¹⁹Ja qant ge vendrai a l'ostel, si m'ait Dex, biaux conpeinz, il m'en souvendra mout petit, por ce di ge qe Dex nos doit ostel de pes et de repos.

29. «— ¹Sire conpeinz, dist li rois Artus, et se il avenoit orendroit par aucune aventure qe nostre chemin nos aportast a tel hostel qe vos covenist joster a l'oste devant qe vos herbergissiez leienz, qe diriez vos? — ²En non Deu, dist li chevalier, ançois qe ge josteasse a mon

aprochier] a passer 350 ♦ est ja] estes a L4 (*riscritto*) 11. grant tens] grantiment 350 ♦ mareschiere] margès 350 12. Sire conpeinz ... avant] Sire compaignon dist li chevalier Dex vous doinst hostel de repos 350 14. m'aaise] ma aaise L4; m'aise 350 15. le meillor] a dire *agg.* 350 16. chascun chevalier errant] l'en bien 350 17. com] dont 350 18. ja a trois jors qe ge n'oi] ne ge n'oi aise 350 ♦ tenir de] *om.* 350

29. 1. *no nuovo* § 350 ♦ a l'oste] a l'ostel L4 ♦ leienz] *om.* 350

hoste iroie ge herbergier avant, qar il m'est bien avis qe, se ge a mon hoste feisoie honte a l'entree de sa mason, qe ge ne porroie jamés avoir de lui se male chiere non. ³Aprés la honte qe ge li avroie fete, coment me porroit il jamés fere honor? Ge trouveroie bien leienz male chere et mal semblant de tout en tout, ne me seroit il donc mielz demorer fors qe leienz? ⁴Sire conpeinz, Dex nos gart de celui encontre en cestui soir, qar ge n'en avroie mestier a ceste foiz. Et ge vos di seurement qe en tel hostel ne me feroiz vos herbergier, se ge onges puis». ⁵Li rois se rit trop volentiers de ces paroles. Il conoist bien qe li chevalier ne dit ceste chose fors par deduit et par soulaz. ⁶Il a ja tant veu et oï de lui qe il le prise a merveille en son cuer.

30. ¹Einsint parlant chevauchent tant qe il comencierent aprouchier d'une mareschiere et virent adonc tout apertement un manoir mout bel et mout riche qi estoit fermé droitement a l'entree de la mareschiere. ²Qant il virent le recet, li chevalier demande tout erramment au roi: «Sire conpeinz, est ce la meison dom vos parlastes orendroit, la meison a la veuve dame? – Biaux sire, fet li rois, oïl, ce est ele voirement. – ³Or voille Dex, fet li chevalier, qe nos trovion tel ostel com il est mestier a moi. – Dex le voille», fet li rois. ⁴Ensint parlant chevauchent tant qe il vindrent pres de la meison et lors rencontrent un escuer qi lor dist, qant il fu venuz dusq'a eaus: «Seignors chevaliers, ou alez vos? – ⁵Biaux frere, fet li chevalier, nos alom dusqe a cest ostel ou nos voillom herbergier ceste nuit. – ⁶En non Deu, fet li valez, ore poez qerre un autre ostel qe cestui, qar a cestui avez vos bien failli. ⁷Cil de leienz porroient mal entendre a vos servir, qar orendroit est aportez un chevalier mors qi parenz charnel estoit a la dame de leienz. ⁸La dame moine si grant duel com se ele veist devant lui mort tout le monde, et por ce ne m'est il pas avis qe vos peussiez leienz herbergier ceste nuit». Et qant il a dite ceste parole, il s'en vait outre qe il ne tint a eus autre parlemant.

2. avant] aillours 350 ♦ se ge a] ge mon 350 ♦ avoir ... chiere non] de lui avoir bele chiere 350 3. donc mielz (millez L4)] mie mix 350 ♦ demorer fors qe leienz] au dormir f. de l. 350 4. nos gart] vous g. 350 5. volentiers] fierelement 350 ♦ il conoist bien] en soi meesmes agg. 350 ♦ par deduit] pour faire d. 350 6. en son cuer] om. 350

30. 1. mareschiere] marés 350 ♦ fermé droitement] fremés 350 ♦ de la mareschiere] du marés 350 2. est ce] est ore 350 3. com il est mestier] qu'il est m. 350 4. un escuer] a cheval agg. 350 6. cestui qar (quar 350)] om. L4 7. servir] ceste nuit agg. 350 ♦ mors] ochis 350 8. La dame moine] et ele demainne 350 ♦ a eus] d'els agg. 350

31. ¹Quant li vallez s'en fu alez, li rois Artus parole au chevalier et li dit: «Sire conpeinz, qe dites vos de ces nouveles? — ²Qe g'en di? Certes, ge n'en di se mal non: or sachiez bien qe cestui hostel refus ge bien del tout en tout. — ³Porquoi? fet li rois. Or sachiez: se nos entrom leienz, nos n'i troverom se cortoisie non. — En non Deu, sire conpeinz, fet li chevalier, vos ne m'i verroiz ore entrer. Volez vos qe ge aille plorer ceaus de leienz? ⁴Or aillom rire en autre leu, ge n'ai ore talent de plorer se ge puis. — Sire conpeinz, ce dit li rois, or sachiez tout veraïement, se nos nos partom de cest ostel ge ai poor qe nos ne le trovom peor. — ⁵Coment peor? ce dit li chevalier. Peior nel poom nos trouver. — Si ferom, certes, fet li rois, ge le vos di. — ⁶En non Deu, fet li chevalier, ceienz ne voil ge pas remanoir se ge onques puis: ge ne voill pas hostel de lermes! Alom avant, coment qe il nos en doie avenir, et ge vos tendrai conpeignie, ce dit li chevalier. — ⁷Et ge vos di, fet li rois, qe ce n'est pas por mon conseil qe nos nos partom de ci. — Coment? ce dit li chevalier. Avez vos donc si grant volenté de plorer? ⁸Sire co[n]peinz, porce qe vos volez ja remanoir, se il vos plect, vos poez bien ici demorer, mes ge vos pramet loiaument qe ge n'i demorrai mie. Plus avant geroie ge enmi le chemin sanz mangier et sanz boivre». ⁹Quant il a dite ceste parole, il s'en vet outre qe il n'i fet autre demorance. Li rois se met au chemin après lui, qar trop prise lui et son fet. Tant chevauchent qe il ont passé la mareschiere. ¹⁰Alors voient devant els une grant tor fors del chemin, enprés d'une roche mout haute. Maintenant qe li rois vit la tor, il la moustre au chevalier et li dist: «Sire conpeinz, veez vos cele tor? — ¹¹Oïl, ce dist li chevalier, ge la voi bien. Pourquoi le dites vos? — Sire conpeinz, ge cuit qe nos herbergerom leienz, se il ne remaint en vos. — ¹²En non Deu, fet li chevalier, en moi ne remandra il ja qe ge n'i herberge, porquoi li sires de leienz me voille herbergier. — ¹³Sire conpeinz, ce dit li rois, herbergier est tout autrement qe vos ne cuidez. Ore sachiez qe li sires dou chastel

31. 2. Qe g'en di] fet le chevalier *agg.* 350 3. entrom leienz] i e. 350 3. Volez vos qe ge aille plorer ceaus de leienz] laians por plourer celui que ge onques ne connui? Laïssom plourer cels de leians 350 4. ge ai poor ... peor] que nous troverom ja pieur 350 5. Coment] *om.* 350 6. li chevalier] li rois 350 7. fet li rois] *om.* 350 ♦ volenté] talent 350 8. Sire ... vos ja remanoir] Se vous volés chi r. 350 ♦ conpeinz] copeinz L4; *om.* 350 ♦ Plus] *om.* 350 ♦ et sanz boivre] *om.* 350 9. Quant il] *nuovo* § 350 ♦ et son fet] *om.* 350 ♦ tant chevauchent] et si ont tant alé alé 350 ♦ la mareschiere] le marés 350 10. enprés] et pres 350 12. porquoi li sires de leienz] puisque li s. 350 13. herbergier est tout autrement] ceste herbergerie ira t. a. 350 ♦ dou chastel] de l'ostel 350

nos herbergera volentiers, se il ne remaint en vos. – ¹⁴Coment remandroit il en moi? dist li chevalier. Ja veez vos qe il est tart et tens d'herbergier, et ge sui lassez et travailliez des armes porter. Or sachiez qe il ne me couvendra pas mout prier de herbergier. A ceste foiz ge remaindrai bien sanz faille sanz trop prier. – ¹⁵Sire conpeinz, ce dit li rois, encore ne m'entendez vos mie bien de ce qe ge voil dire. – Et qe volez vos dire ? fet li chevalier. Fetes le moi entendre, puisque ge ne l'entent pas bien orendroit por moi meemes. – Volentiers», fet li rois.

32. ¹«La costume de cele tor, biaux conpeinz, si est bien la plus estrange, a mon escient, qi orendroit soit en ceste contree, qar li sires de leienz, qi assez est bon chevalier de son cors et preuz des armes, si est acostumez qe il ne velt recevoir nul chevalier en son ostel devant qe il l'ait esprouvé au glaive et a l'espee. ²Se il le trouve bon chevalier, il le herberge, se non il li done congié: ceste costume qe ge vos ai orendroit dite est adés leienz maintenue». Qant li chevalier entent ceste parole il respont au roi errament: ³«Sire conpeinz, se Dex me saut, ceste nouvele qe vos m'avez orendroit dite n'est mie trop bone por moi, puisque li sires de leienz ne reçoit en son hostel nul home se il n'est bon chevalier. ⁴Donc me couvendrai il cestui soir remanoir defors, qar ge ne sui bon chevalier, ce sai ge bien certainement. ⁵Mes ore me redites, se il vos plect, une autre chose. Se il trouve meillor chevalier de lui et home qi li face honte et vergoigne, le reçoit il en son hostel? – ⁶En non Deu, fet li rois, oïl. Touz cels qe il trove meillor chevalier de lui est mestier qe il reçoit en son hostel. ⁷De cels ne puet il giter un: il couvient qe il lor face honor de tout son pooir. – Sire co[n]peinz, ce li a dit li chevalier, or amende li nostre afere. ⁸La costume n'est pas si fort ne si annuieuse d'assez com vos me feissiez entendant au comencement, puisque l'usance de son hostel est tele qe il est mestier qe il face honor a cels qi li font vergoigne. ⁹Ore sachiez qe il est mestier qe il nos face honor a cestui point, qar se ge honte ne li faz et vergoigne avant qe il isse de mes mains, ne me tenez

14. porter] toute jour *agg.* 350 ♦ sanz faille] *om.* 350 15. ce dit li rois] *om.* 350 ♦ encore ... dire] encor n'entendés vous pas çou que ge veull dire sire 350 ♦ pas bien ... meemes] *om.* 350

32. 1. biaux conpeinz] *om.* 350 ♦ la plus estrange] *coustume agg.* 350 3. en son hostel] dedens s. h. 350 4. sai] quit 350 5. vergoigne] deshounour 350 6. meillor chevalier] meillours 350 7. De cels ... couvient qe il lor] de ce ne puet il nous geter ains convient qu'il nous 350 ♦ conpeinz] copeinz L4; compaignon 350 8. qe il face honor ... 'il est mestier] *om.* 350 (*saut*) 9. vergoigne] et deshounour *agg.* 350

por chevalier! ¹⁰Itant me dites voirement: a il ci nulle autre esprouve fors ceste? — Nanil, ce dist li rois. — ¹¹Donc chevauchom seurement, ce dit li chevalier. Se il est ensint com vos m'avez fet entendant, et se ge ne vos faz herbergier honoreement, tenez moi a maveiz». ¹²Li rois s'en rit desouz son hiaume des paroles au chevalier. Toutes les paroles qe il dit li pleisent trop. ¹³A chief de pice qant il parole il dit: «Sire conpeinz, ge me recort qe vos me feiste hui, la vostre merci, si grant avantage com ge sai, qar vos me qitastes dou passage d'un chevalier. ¹⁴Por celui fet qe vos enpreistes sor vos voul ge cestui sor moi enprendre et aqiter vos a l'entree de vostre hostel». Li chevalier respont tantost et dit au roi: ¹⁵«Ce ne soufferrai ge pas qe vos vos meissiez avant moi en ceste esprouve et vos dirai reison porquoi. Après le travail de cest jor ai mestier d'avoir repos. ¹⁶Se par aventure fust qe vos venissiez au desus de l'oste et vos me feissiez herbergier, et il avenist en aventure par aucune mainere qe vos fuissiez blechiez ou pou ou grant, ge n'avroie de vos cestui soir se male chiere non, qar vos savez reison en vos meemes qe vos avriez ceste bleceure por moi. ¹⁷Li ostes, d'autre part, me feroit male chiere porce qe il n'avroit pas esprouvé moi. Einsint me seroit mal avenü de toutes parz, qe ge avroie male chiere de vos et male chiere de l'oste. ¹⁸Bien seroit donc por moi mauveis hostel en toutes guises! Sire conpeinz, por ce voil ge herberger par ma lance et par ma spee, ge ne voil herbergier par vos». ¹⁹Ensint parlant chevauchent tant q'il vindrent jusq'a la tor et il oïrent un cor soner mout hautement, et fu sonez desus les qerniaux de la tor mout apertement.

33. ¹Aprés ce ne demora mie granment qe il voient de la tor oïssir un chevalier armé de toutes armes q'i s'arestut devant la porte montez sor un grant destrier. Et qant il voit les chevaliers aprouchier il lor

10. Itant ... ceste] Tant me dites a ill nule autre esprouvee forse l'espreuve del seignour 350 11. chevauchom] chevauchen^o 350 ♦ tenez moi] del tout *agg.* 350 12. Li rois] *nuovo* § 350 ♦ desouz son hiaume] en soi meesmes 350 ♦ trop] au roi *agg.* 350 13. d'un chevalier] des chevaliers 350 14. a l'entree] *om.* 350 15. Ce ne soufferrai] ce en feroie 350 ♦ esprouve] besoingne 350 16. fust] vous avoient 350 ♦ l'oste*] l'ostel L4; la joust 350 ♦ en aventure par aucune mainere] en aucune m. 350 ♦ vos savez reison] vous avés r. 350 ♦ qe vous avriez ceste bleceure por moi] se vous avés hoste blechiés pour moi 350 17. male chiere de l'oste] et de l'oste 350 18. Bien seroit ... guises] *om.* 350 ♦ herberger] a ceste fois 350 (*manca il verbo*) 19. qu'il vindrent] que li dui chevalier v. 350 29. mout apertement] *om.* 350

33. 1. oïssir] *om.* 350 ♦ les chevaliers aprouchier] de lui *agg.* 350

crie: ²«Seignors chevaliers, volez vos hebergier ceienz?». Et li rois respont premierement et dit: «Oïl, voiremant volom nos herbergier. – ³Donc vos couvient il joster a moi, dist li chevalier, qar la costume de ceienz est tele qe nus ne puet herbergier ceienz se il ne se prouve avant a moi». ⁴Et li chevalier se met avant et respont au segnor de leienz: «Ostes, fet il, la costume de vostre ostel est bele et bone, mes ele est si fierement estrange qe il m'est avis, par la reison qe vos dites, qe vos ne poez honor fere a nul preudome se il avant ne vos fet honte. ⁵Or tost, sire ostes, ne feisom trop lonc parlemant, mes enco-mençom oremés l'entree de vostre meison. ⁶Encore n'est il mie si tart qe vos ne poissiez avoir vostre reison aconplie. – De quel reison me parlez vos? ce dit li ostes. – ⁷De la costume de vostre ostel, ce dit li chevalier, ge ne vos parol d'autre chose. ⁸Quant vos estes acostumez de rendre honor por deshonor, ne autrement ne le volez fere, se ge onques puis, ge avrai honor cestui soir, et mi compeinz tout autresint: celi ne voill ge oublier a cest besoing. – ⁹Sire vassal, dit li ostes, gardez qe vos alez disant. Or sachiez tot veraïement qe ge ai ja veu maint bon chevalier, autant orgueilleux com vos estes, de cui ge abati ja l'or-goil. ¹⁰Si ferai ge de vos, se ge onques puis. – ¹¹Ostes, ce dit li chevalier, veez la nuit. Ge voudroie ja estre herbergiez. Or tost, començom la besoigne! – Certes, ce dit li chevalier, ce me plect mout orendroit».

34. ¹Quant il orent ensint parlé, il n'i font autre demorance, ainz s'apareillent de la joste, et leisse corre maintenant li uns sor l'autre. Et qant ce vient a l'aprouchier, il s'entrefierent de toute la force q'il ont. ²Li chevalier qi sires estoit de la tor fu feruz de si grant force a cele joste qe por l'escu ne por l'auberc ne remaint qe il n'ait une grant plaie enmi le piz. A pieçamés ne sera jor qi il ne s'en sente. ³Li autres chevalier sanz doute le charja tant de cel encontre qe li hostes n'a nul pooir qe il se puisse tenir en sele, ainz vole maintenant navrez a terre. ⁴Quant li chevalier le voit a terre, il passe outre por faire son pondre. Et qant il est retornez, il voit qe li chevalier se relevoit ja si navrez et

2. ceienz] *om.* 350 3. ne se prouve avant] n'est esprouvé ançois 350 4. avant] tout esroment *agg.* 350 ♦ Ostes fet il] se Dex me saut *agg.* 350 ♦ la reison qe vos dites, qe vos ne poez] par reison que vous ne poés 350 ♦ honte] et si li dist or tout avant *agg.* 350 6. qe vos ... vostre] que nous ne peussom avoir ce jour nostre 350 7. vostre] *urstau (sic) L4 (riscritto?)* 9. bon chevalier] autre c. 350

34. 1. sor] encontre 350 ♦ li uns sor l'autre] tant com il puent des chevax traire *agg.* 350 ♦ a l'aprouchier] as glaives baissier 350 2. ne por l'auberc] *om.* 350 ♦ jor] *om.* 350 ♦ s'en sente] de cest cop *agg.* 350 3. le charja] le hurte 350 ♦ navrez a terre] n. et malmenés 350 4. pondre] tour 350

si atornez com il estoit. ⁵«Sire oste, fet li chevalier, porce qe ge aie honor en vostre ostel, me feroiz vos ore fere une grant vilenie orendroit et chose qe ge ne deusse fere par reison». ⁶Lors hurte cheval des esperons, et la ou li hostes se voloit relever, ensint com ge vos di, li chevalier se fiert en lui et le fiert dou piz dou cheval si roidement qe il le fait flatur a la terre et li passe desus le cors, et il retorne autrefois sor lui et le comence a defoler trop malement as piez dou cheval. ⁷Quant cil se sent si malement mener, porce qe il a poor et doutance de morir, s'escrïe a haute voiz: «Ha! merci, sire chevalier. Ne m'ociez en tel mainere, trop m'avez fet honte et vergoigne!» ⁸Por Deu, soufrez vos atant, ge vos reçois en mon ostel. — En non Deu, fet li chevalier, ce ne fait riens. ⁹Quant vos a cest point oubliastes mon conpeinz, nos somes a recomencier. ¹⁰Ge vos ai ma reison donee, si est mestier qe la soe vos soit rendue mout plus largement qe por moi».

35. ¹Quant li osten entent ceste parole, il se tient por mort et, porce qe il ne viegne une autre fois entre les mains dou chevalier, s'escrïe il a haute voiz: ²«Ha! merci, sire chevalier, ge n'en voil plus. Ge me tieng a trop bien païé de vos et de vostre conpeignon. ³Por Deu, leissiez moi atant, ge vos ferai qanqe vos voudroiz et plus encore». Lors se torne li chevalier vers le roi Artus et li dist: ⁴«Sire, qe vos est avis de ceste chose? A bien li nostre oste sa reison por vos et por moi?». Et li rois respont en sorriant: ⁵«Se Dex me saut, il m'est avis qe il s'en devroit bien por reison souffrir atant, mes encore par aventure en velt il plus». ⁶Li chevalier, qe de morir a toute doutance et toute poor, quant il entent ceste parole s'escrïe a haute voiz: «Merci, merci, franc chevalier, ne me touchiez plus, qe ja me verroiz morir entre vos mains! ⁷Tu m'as tant fet qe a pieçamés n'avrai pooir de porter armes, ce sent ge bien. — Sire conpeinz, ce dit li chevalier au roi Artus, est il assez? Encore se puet il atant souffrir vostre hoste?». ⁸Li rois respont en sorriant: «Bien le poez atant leissier. Puisqe il meemes aferme qe il est assez, et nos por assez le tenom. ⁹Se il nos voloit a reison mener, nos

atornez] estonés 350 5. porce qe] pour que 350 ♦ me feroiz ... orendroit] me ferois vous orendroit vilenie faire 350 6. se fiert] hurte 350 ♦ passe] le cheval agg. 350 7. cil] li hostes 350 8. reçois] recroï 350 ♦ fait] vous vaut 350 9. mon conpeinz (compaignon 350)] mon L4 ♦ recomencier] revierchier (sic) 350 10. qe por moi] que la moie 350

35. 1. ceste parole] cest plait 350 3. et li dist] om. 350 5. por reison] om. 350 6. plus] om. 350 7. sent] sai 350 8. leissier] desormais agg. 350 9. voloit] voit 350

ne faudrom a bon hostel cestui soir, qar de l'entree a il bien eu sa reison». Lors dit li chevalier au seignor de la tor: ¹⁰«Sire hostes, poom nos descendre desoremés? Avrom nos hostel bon et bel? – ¹¹Oïl, biaux sire, ce respont li sires de la tor, vos l'avroiz tel com vos voudroiz. Trop chierement m'avez vendue vostre venue, ge n'ai membre qi ne m'en doille».

36. ¹Lors descent li chevalier a son conpeignon li rois Artus. Et maintenant qe il furent descenduz, viennent vallez fors de la tor qi pregnent lor chevaux, et li autres les moient leienz. Et il estoit ja nuit non pas trop obscure, qar la lune luisoit clere. ²Qant il sunt leienz venuz et amené en un mout bel paleis, et il les ont desarmez, il aporent maintenant un bel mantel vair porce q'il n'eussent froit après les armes. ³Et il les font asseoir desus un drap de soie qi estendu estoit el chief dou paleis, e l'en veoit leienz mout cler, qar chandoilles i avoit assez. ⁴Atant evos entr'els venir le seignors de leianz, qi ja avoit fet sa plaie regarder et bender, et estoit tex atornez qe il ne li est pas avis qe il puisse a piece guerir ne mangier par santé. ⁵Li dui conpeignon se drecent encontre lui. Qant il le voient venir, il le saluent, et il lor rent son salu tout maintenant com cil qi trop se douloit. «Coment, sire hostes? N'avez vos bien eu vostre reison, qe si fetes male chiere? – Sire, fet li osten, vos ne me donastes mie ma reison, mes vos m'avez mort. ⁶Ge ne croi qe jamés ge puisse porter armes. – Sire hostes, donc seront herbergiez li autres chevaliers qi ça vendront, qar, puisqe vos estes atornez einsint com vos dites, et ilec ne porroiz defendre la male costume de vostre hostel. ⁷Vos devez estre liez de ce qe ge vos ai fet, qar vos vos porroiz repouser une grant piece. ⁸Et si vos peust pis avenir qe ge ne vos ai fet, qar tel chevalier peust ceienz venir qi seroit si preudome d'armes qe il vos peust metre a la mort d'un seul cop. ⁹Cil vos feist plus de mal assez qe ge ne vos ai fet.

qar ... reison] *om.* 350 II. vos (vous 350) voudroiz] aos (?) v. L4 (*riscritto*)

36. I. descent ... descenduz] descendent li chevaliers qui n'i font autre demouranche et maintenant 350 ♦ li autres] *om.* 350 ♦ obscure] oucure L4 2. bel] riche 350 ♦ maintenant] a chascun *agg.* 350 ♦ porce qu'il ... armes] pour asfubler les que il n'eussent froit après le chaut qu'il avoient eu de porter les armes 350 3. soie] sois L4 ♦ l'en veoit ... chandoiles] l'en ou voit (*sic*) la gent de toutes pars et chandoiles 350 ♦ assez] et lumineaire grant *agg.* 350 4. de leianz] *om.* 350 ♦ a piece guerir] mais a pieche porter armes 350 5. il lor rent son salu] il lor salu L4 6. estes atornez] navrés estes et si mal a. 350 ♦ et ilec] *om.* 350 8. Et si vos peust ... ai fet] *om.* 350

Et certes, sire hostes, de si male costume com vos avez establee vos devriez bien souffrir, se il vos pleisoit: cil ne firent pas cortoisie qi premierement la trouverent. — ¹⁰Sire, ce dist li chevalier de la tor, ore sachiez bien qe la costume m'a fet annui et vilenie cestui soir assez plus qe ge ne vouxisse. ¹¹Et neporquant, se ge sui navrez et avileniz durement, ne remaindra il mie, se Dex me saut, qe ge ne vos face cestui soir tout ce qe ge vos porrai fere de cortoisie et de bonté».

37. ¹Einsint parlant demorent entr'els trois une grant piece. Li chevalier se vet trop fierement gabant de son hoste qi si se pleint. Il dit souventes foiz: ²«Sire hostes, se Dex me conselt, ge vos loeroie en droit conseil qe vos leississiez desoremés ceste male costume. ³De ce qe vos en estes eschapez devez vos bien a Deu loer merci. ⁴Mes vos devez regarder a ce qe tel chevalier porroit venir ceienz qi d'un seul cop vos porroit metre a mort se vos rencontre lui vos vouxissez esprouver por maintenir ceste costume. ⁵Biaux sire hostes, pensez a ce: par mon conseil la leisseroiz vos desoremés». ⁶Li hostes, qi est trop honteux de ceste aventure qe il ne set qe il doie dire ne respondre, vergondeux est trop malement, qar bien conoist qe a cestui point a il trouvé mestres des armes. ⁷A piece mes ne trouva il qi si tost le meist a terre com fist cestui chevalier. Grant pris li done et grant lox dedenz son cuer et dit bien a soi meemes qe, se il ne fust trop bon chevalier et trop preuz des armes, il ne peust pas avoir fet de li ce qe il en fist. ⁸Atant evos entr'els venir un valet de leienz qi dit au seignor de la tor: «Sire, qant il vos plera li chevaliers porront mangier, qar tout est appareilli sanz faille. — ⁹Donc, fet li sires de la tor, vieignent, et donez l'eve a ces seignors». Et l'en le fet tout errament. Et qant il sont lavé et les tables furent mises, il s'asistrent, et li rois s'asiet premierement.

9. Et certes ... vos pleisoit] Certes de si male coustume vous devroit vous bien tenir 350 10. li chevalier de la tor] li hostes 350 ♦ ore sachiez bien que] *om.* 350 ♦ annui] mal et a. 350 11. Et neporquant] Quar se 350 ♦ ne remaindra il mie] mais ne r. pas pour che que 350 ♦ tout ce ... bonté] toute l'onour que ge vos porrai faire a mon pooir 350

37. 1. se vet ... gabant] se vont g. 350 2. se Dex me conselt ge vos loeroie] se Dex vous saut nous vous loerom 350 ♦ male costume] c. 350 3. eschapez] si legierement *agg.* 350 4. esprouver por] e. de 350 5. pensez ... desormés] feriés vous trop que faus nous vous loom que vous le laissiés 350 6. dire ne respondre] r. 350 7. chevalier] *om.* 350 ♦ li done] a 350 8. Atant e vos] *nuovo* § 350 ♦ entr'els (ex 350) venir] venir leienz L4 ♦ sanz faille] *om.* 350 9. Donc ... seignors] Donc nous dounés fait li sires a laver a cestes segneurs 350 ♦ il sont lavé] il ont l. 350

¹⁰Li chevalier, qi mout le prise por le semblant qe il avoit en lui, non pas porce qe il le connoise, le fait tout avant asseoir et il s'asiet après. ¹¹Li sires, qui trop se doloit, s'assiet d'autre part, non pas porce qe il voil mengier, qar il ne puet adonc com cil qi estoit tex apareilliez qe il avoit adonc greignor mestier de gesir qe de seoir, mes por maintenir la costume de son hostel s'assiet il encontre les chevaliers, et lor dit qe il pensent de mangier et de conforter els, qar il lor fera toute la bonté qe il lor porra fere. ¹²Il entendent mout petit a lui, qar mout pou lor en est. Il mangent et se soulacent et ne dient qantqe il pensent. ¹³Li rois se rit a soi meemes de lor hoste qe il voit mal apareillé, qe il set de voir q'a pieçamés n'avra pooir de porter armes. ¹⁴Il regarde le chevalier trop volentiers, qar trop le voit bien fet de toutes ses membres, et bien li semble, a la contenance de lui, qe il ne porroit estre qe il ne soit home de valor. ¹⁵Mout li est bon et mout li plect de ce qe il plot a aventure qe il le trovast a cestui point. ¹⁶Li chevalier, qi d'autre part le vet regardant et voit qe li rois Artus estoit trop bel chevalier et bien fet et grant a merveilles e geune bachaller, mout dit a soi meemes qe se cist n'est preudome dont ne set il qe il doie dire. ¹⁷Il ne puet estre en nule guise qe cist ne soit home de bien et de valor. ¹⁸Et q'en diroie? Chascun endroit soi se tient a trop bien païé de conpeignon, selonc ce qe il poent conoistre par ce qi defors apert. ¹⁹Mes qe qe il aillent pensant entre els, toutesvoies retorne lor penser sor lor hostes, qe il voient q'i de son fet vet trop malement. ²⁰Mes por tout ce ne leissent il qe il manjuent a grant soulaz et a grant joie. ²¹Mout lor est a pou de lor hoste: se il avoit rompu le braz e puis le col, il n'en lei-roient a mengier une hore del jor. ²²Il li dient souventes foiz qe il manjut e qe il s'esforce, mes cil, qi fere nel puet, lor dit: ²³«Seignors, mangiez et vos confortez entre vos, il ne me tient ore de ce fere, qar ge ne puis». ²⁴Et qant vient vers la fin del mengier, li chevalier, qi ne

10. avoit] voit 350 ♦ le fait (fait 350)] *om.* L4 11. avoit adonc] a. alore (*sic*) 350 ♦ encontre les chevaliers] entr'eus deus c. 350 ♦ els] entr'eus 350 ♦ toute la bonté] toute l'aise et t. la b. 350 12. mout pou lor en est] a poi ne lour est 350 14. le voit ... ses membres] bien est fais de membres 350 ♦ contenance] contenance L4 ♦ de lui] et a la maniere *agg.* 350 ♦ estre] en nule guise *agg.* 350 15. il plot ... point] par aventure le trouva 350 16. et voit qe] quar 350 ♦ bien fet] de membres *agg.* 350 ♦ mout dit] lours dist li chevaliers 350 ♦ preudom] des armes *agg.* 350 17. estre en nule guise] *om.* L4 18. par ce qi defors apert] par defors 350 19. q'i de son fet] si mal atourné et si mal appareillié de toutes choses quar a lor avis le suen fait 350 20. ne leissent il] ne remainst 350 21. rompu le braz] les bras brisiés 350 23. Seignors] se il vous plaist *agg.* 350 ♦ de ce fere] de f. si come vous faites 350

se puet tenir de rire, qant il vet regardant son hoste, le met adonc en parlement et li dit en riant:

38. ¹«Sire hostes, se Dex vos doint bone aventure et bone joie, itant me dites, se il vos plect, la costume de vostre hostel qe vos enco-
re mantenez, ce m'est avis. ²Coment fu ele encomencee, e por quele
achaison? Dites moi le comencement, se Dex vos saut». ³Li ostes
respont errament et dit: «Sire, or voi ge bien qe de moi vos alez
gabant. Et certes, vos poez ce fere qe chevalier ne pot fere pieçamés,
qar certes encore ne vint nul chevalier en ceste part q' si tost me meist
a terre com vos feistes annuit. ⁴Et q'en diroie? Vos en eustes l'aven-
ture de fere moi vergoigne et honte, mes, por Deu, por toute la ver-
goigne ne remandra qe ge ne vos cont mot a mot ce qe vos me
demandez. ⁵Or escoutez, si orroiz coment il avint premierement». Et
qant il a dite ceste parole, il comence maintenant son conte en tel
mainere: ⁶«Sire, fet il, il avint ja qe mi peres venoit ja de Camahalot,
ou une grant cort merveilleuse avoit esté tenue a celui point, qe li rois
Utependragon l'avoit tenue si grant et si estrange qe lonc tens en fu
puis parlé de cele cort. ⁷Mi peres — q' a cele cort avoit esté com cil q'
bien estoit chevalier errant, et entre les chevaliers erranz usoit il adés
toute sa vie — qant il se retornoit de cort et s'en venoit a ceste tor, il
li avint par aventure qe il s'acompaigna a deus chevaliers q' a ceste tor
venoient autresint ambedui. ⁸Les chevaliers estoient ambedui trop
biaux et trop bien ressembloient pseudome. ⁹Li un d'els estoit trop bel
chevalier estrangement, assez plus bel qe n'estoit li autres, mes il ert
tant mauveis et cheitif de cors et de cuer qe il n'avoit plus cheitif en
tout le monde. ¹⁰Mes il estoit de si hautes paroles et de si mer-
veilleusses qe nus ne l'oïst parler et regardast son corsage et son conte-
nement qe il ne cuidast de verité qe il deust estre la merveille de toute
la chevalerie del monde. ¹¹Et q'en diroie? Ensint com il me fu puis
dit, ce estoit le plus bel chevalier del monde et le plus mauveis. ¹²Li

24. le met ... riant] adonques li dist 350

38. 1. *no nuovo* § 350 ♦ bone aventure et bone joie] joie 350 2. Dites moi] d.
m'ent 350 3. vos alez (vous alés 350) gabant] volez g. L4 ♦ nul chevalier] nul
350 4. en eustes] eusse 350 ♦ por Deu] *om.* 350 ♦ remandra] a cestui point
agg. 350 ♦ premierement] de la costume de cheiens 350 5. si orroiz] *om.* 350
♦ maintenant] *om.* 350 6. Sire] *nuovo* § 350 ♦ point] tens 350 ♦ et si estrange]
om. 350 ♦ de cele] *om.* L4 7. il se retornoit] s'en venoit 350 ♦ ambedui] *om.*
350 9. cheitif de cors et de cuer] c. de cuer 350 10. et de si ... et regardast
son corsage] parllers que qui regardast son cors 350 ♦ cuidast de verité] c. 350 ♦
merveille ... del monde] m. de tout le m. 350

autres estoit biaux assez, mes non pas tant. Il estoit si preuz et si vaillant de toutes choses q'a poine peust l'en trouver a celui point en tout le monde si bon chevalier. ¹³Cil estoit si muz et si qois et avoit si pou de paroles qe jamés ne disoit un mot. Einsint estoit com un aigneaus ou come une pucele.

39. ¹«E porce qe il estoit si simplex de parler et si cortois en toutes maineres, cuida mi peres tout certainement, qant il se fu aconpeigniez, qe il ne vauxis un garçon, et por ce le comença il a despresier trop malement dedenz son cuer. ²Il prisoit tant l'autre chevalier por le contement de lui et par les autres paroles qe il disoit qe il cuidoit veraïement qe ce fust tout le meïllor chevalier del monde. ³Il estoit grant yver adonc, entor Noel tout droitement avoit cele cort esté tenue a Camahalot. Les nuitz estoient granz estrangement par cela contree, einsint me fu puis conté. ⁴Li mauveis chevalier qi tant estoit biaux avoit dit a mon pere tantes hontes et tantes vilenies dou bon chevalier qe mi peres ne le voloït ne ne pooit mes regarder. Qant il vindrent a ceste tor, il estoit tart et nuit obscure. ⁵La porte fu ouverte, qar cil de ceïenz reconeurent qe mi peres estoit venuz. Qant li bon chevalier, qi avoit chevauchié a grant poine et a grant travaill por la noif et por le mal tens, cuida entrer dedenz la porte, il ne pot, qar mi peres li defendi et li dist tout plainement: ⁶“Remanez defors, sire chevalier. Certes, vos pensez grant folie se vos cuidez qe ge en mon hostel vos reçoive. ⁷Or sachiez tout certainement qe ge tendroie mon ostel a honi et a deshonzorez trop malement se vos seulement une nuit i demorisiez. ⁸Remanez fors de ceïenz, qe ceïanz ne metroiz vos le pié, se ge onques puis. Ja, se Deu plect, si vil chevalier com vos estes ne demorra ja en mon ostel”. ⁹Et maintenant fu la porte close, si qe li bon chevalier remest defors et li mauveiz chevalier entra dedenz avec le seignor de ceïenz. ¹⁰Einsint avint li comencement de l'aven-ture de cest ostel. Li bon chevalier remest defors en la noif et au mal

12. preuz] des armes *agg.* 350 ♦ q'a poine] qu'a pou 350 ♦ point] tens 350 13. si muz et si qois] si cointes 350 ♦ qe jamés ne disoit un mot] et 350

39. 1. si simplex ... cortois] simples de parlement et si cointes 350 2. l'autre chevalier] l'a. 350 ♦ chevalier del monde] home de tout le m. 350 3. entor Noel] quar le jour de N. 350 ♦ estrangement] *om.* 350 ♦ me fu] comme fu 350 4. ne le voloït ... regarder] nel pot mes veoir ne regarder 350 5. La porte fu ouverte] *om.* 350 7. tout certainement] *om.* 350 ♦ a honi] a ahonté 350 8. fors de ceïenz ... metroiz] fors chainans n'i metrés 350 ♦ demorra] dormira 350 9. entra dedenz ... ceïenz] entra chains 350 10. Einsint avint] *nuovo* § 350

tens, et a male poine li voudrent doner a mangier cele nuit cil de ceste tor. ¹¹Et q'en diroie? Il jut cele nuit entre lui et son escuer enmi la noif: a grant dolor passa cele nuit en tel mainere. ¹²A l'endemain se voloit partir de ceianz li mauveis chevalier, mes mi peres ne volt, ainz le pria tant de demorer celui jor por lui fere feste et honor qe il demora tout celui jor. ¹³Li bon chevalier demora tout celui jor la defors einsint com il avoit fet la nuit. Et qant cil de leienz li disoient: "Dan chevalier! Mauveis chevalier! Porqoi ne vos en alez vos? Qe fetes vos ci? Ja veez vos qe li tens est si mauveis et si annuieux com vos veez". Et il responnoit: ¹⁴"Encore n'est tens qe ge m'en aille, bien savroiz qant ge m'en irai". Einsint demora ci devant le bon chevalier deus nuiz et un jor. Assez prioit cist de ceienz qe il le leissassent ceienz entrer, mes il ne trouvoit ne grant ne petit qi li veuxist ouvrir la porte en aucune mainere.

40. ¹«L'autre jor après avint qe mi peres volt chevauchier a un chastel ça devant qi suens estoit et encore est il miens. ²Il fist appareillier une soe fille, pucelle trop belle durement, et sa moillier, qi ma mere fu, qi estoit bien sanz faille une des plus belles dames de ceste contree, et ot avec lui deus conpeignons. ³Et porce qe de celui tens avoient acostumez les chevaliers erranz de chevauchier armez ou qe il alassent, chevaucha mi peres armés, et si conpeignons ausint. ⁴Li mauveis chevalier, qi tant se feisoit preudome, chevaucha adonc avec els. Et q'en diroie? Il furent a cele foiz plus de .xx. a cheval, qe vallez, qe escuers, qe chevaliers, qe dames et damoiseles. ⁵Qant il furent la defors, encor trouverent il devant la porte le bon chevalier en la conpeignie de deus escuers, et il i avoit ja tant demoré, com ge vos ai dit. ⁶Qant il le virent, il le comencierent a gaber et a escharnir, et mi peres ne se pot tenir qe il ne li deist: ⁷"Dan mauveis chevalier, qe fetes vos ici? Par quel comandement avez vos si longement gardé ma porte?

et a male poine] a p. 350 ♦ cele nuit] en celui soir 350 ♦ tor] hostel 350
11. entre lui] et il 350 ♦ a grant dolor] et a grant painne *agg.* 350 12. le pria
... tout celui jor] li pria que il demourast chaïans 350 13. fet la nuit] demouré
la n. devant 350 ♦ com vos veez] *om.* 350 14. un jor] deus j. 350 ♦ en aucune
mainere] *om.* 350

40. 1. après] sanz faille 350 ♦ ça devant] *om.* 350 ♦ est il miens] i est il 350 2. Il
fist] Mais celi chastel il f. 350 3. ou qe il alassent] en quele contree ou il a. 350
♦ chevaucha mi peres ... ⁴preudome] *om.* 350 (*saut*) 4. a cheval ... damoiseles]
que chevaliers que dames que damoiseles que escuiers que vallés autresint 350
5. la defors] d. la tour 350 ♦ deus escuers] seulement *agg.* 350 6. gaber] trop
fierement *agg.* 350 7. Par quel (quel 350)] Par cui L4

Par Deu, huimés vos en devriez vos bien aler, qar tens en est”. ⁸Li bon chevalier respondi et dist: “Certes, bien est il tens qe ge m’en parte, et ge m’en partirai orendroit. ⁹Et sachiez de voir qe de mon departimant ne vos vendra se corroz non. Vos m’avez fet a ceste foiz ce qe nul chevalier ne deust fere a autre, et se vos de ce ne vos repentez, ce sera trop grant merveille, se Deux me saut”.

41. ¹«Einsint se mistrent a la voie tuit ensemble. Encore s’aloit gabant mi peres del bon chevalier, qar il cuidoit certainement q’il fust del tout si mauveiz com li mauveiz chevalier l’avoit fet entendant. ²Maintenant qe il furent venuz dou tout au plain, li bon chevalier se mist enmi le chemin et dist a mon pere: “Sire vilain chevalier, vos souvient il de la deshonor et de la honte qe vos m’avez fete devant vostre porte? ³A cestui point ou vos estes orendroit serez vos par moi deshonzorez, ou vos feroiz si qe vos vos defendroiz encontre moi”. ⁴Lors hurte cheval des esperons et leisse corre sor mon pere et le feri si roidement qe il li fist une grant plaie enmi le piz et le porta a terre si q’il gisoit enmi le chemin com se il fust mortz. ⁵Li mauveis chevalier qi tant se feissoit preudome et qi disoit si granz paroles, tout maintenant qe il vit ceste merveille, il se mist en fuie. Ne place Deu qe il osast un cop ferir. ⁶Li bons chevaliers ala après et l’abati tout errament. Et q’en diroie? Li bon chevalier fist tant par sa proesce qe il mist en petit d’ore a desconfiture touz cels qi en la conpeignie mun pere s’estoient mis. ⁷Et qant il les mis a desconfiture, si qe il n’avoit un seul remés en la place fors auquns qi gisoient enmi le chemin navrez, il prist ma mere maintenant et ma seror, e les amena avec soi.

42. ¹«Qant mi peres vit ceste chose, se il fu doulanz nel demandez mie. ²Qant il vit qe il perdoit en tel mainere sa moillier et sa fille et qe li chevalier s’en aloit atout, il s’esforça tant qe il vint a son cheval et monta sus et vint après le chevalier, tout ensint navrez com il estoit. ³Et qant il ot ataint le chevalier il li dist: “Ha! merci, gentil

9. sachiez] trestuit *agg.* 350 ♦ se Deux me saut] *om.* 350

41. **1.** *no nuovo* § 350 **2.** enmi le chemin] tantost au c. 350 **3.** orendroit serez ... encontre moi] maintenant vous en rendrai ge gueredon, se Dex me saut 350
4. si roidement] en son venir *agg.* 350 **5.** si granz paroles] et si merveilleuses *agg.* 350 **6.** Li bons chevaliers ... errament (esroment 350). Et q’en (qu’en 350) diroie] *om.* L4 (*saut*) **7.** un seul] de tous un s. 350 ♦ gisoient ... navrez] estoient navrés enmi la camp 350

42. **1.** se ... mie] il fu moult dolent 350 **2.** Qant] quar 350 **3.** le chevalier] *om.* 350

chevalier, ne me fetes si grant deshonor qe vos ne me tolez en tel mainere ma moillier et ma fille: ne regardez a ma vilenie, mes a vostre bonté. ⁴Or sachiez tout veraïement qe se ge vos eusse coneu einsint com ge vos conois orendroit, ge ne vos eusse fet en nulle mainere la vilenie qe ge vos fis. ⁵Quant qe ge vos fis ai ge fet par ma mesconnoissance et par conseil dou mauveis chevalier qi en mon hostel demoroit. ⁶Por Deu, aiez de moi merci, ne me rendez mal por mal. Ne regardez a ma folie, mes a vostre haute bonté!'. ⁷Et qant li bon chevalier entendi qe mi peres parloit en tel mainere, porce qe il li fu bien avis qe il ne li disoit se verité non, il s'aresta enmi le chemin tout einsint a cheval com il estoit. Et qant il ot un pou pensé, il dist: ⁸"Porce qe ge voi qe tu meemes reconois qe tu as fet mal, avrai ge merci de toi et te rendrai ta moillier et ta fille, en tel mainere voiremant qe tu me creantes orendoit com chevalier qe jamés jor de ta vie tu ne feras honte ne deshonor a nul chevalier errant, se tu ne ses avant qe il l'ait deservi". ⁹Mi peres li creanta et il li rendi maintenant tout ce qe il li demandoit et s'en part atant d'ilec, qe il n'i fist autre demorance. ¹⁰Celui jor meemes sot mi peres certainement qe ce estoit Lamorat de Listenois, li bon chevalier, li vaillanz, a cui il avoit fet ceste vilenie, et qi li avoit fet ceste cortoisie, dont il se tient por ahontez trop vileinement. ¹¹Et qant il fu retornez a son hostel, il fist un veu qe jamés estrange chevalier n'i herbergeroit se il ne l'esprouvoit avant. Et qant il l'avroit esprouvé, il li feroit adonc honor selonc ce qe il trouveroit en lui. ¹²Ceste costume qe ge vos ai orendroit contee et qe il trouva par ceste aventure maintint il puis tout son aage. Et qant il vint au morir, il me fist jurer qe ge la maintendroie, tant com ge la porroie maintenir. ¹³Et ge l'ai fet, dont ge ai ja receu mainte poine et maint travaill, puisque ge m'i mis premierement, et encor en recevrai sanz faille, qe bien sachent tuit veraïement qe ge ne la laisserai, tant com ge la porrai maintenir. ¹⁴Si vos ai ore finé mon conte, qar ge vos ai devisé ce qe vos me demandastes». Et qant il a dite ceste parole il se test.

7. chemin] camp 350 ♦ a cheval] armés 350 ♦ un pou (poi 350)] un L4 8. ses] vois 350 9. maintenant] esroment 350 ♦ d'ilec] om. 350 10. Celui jor] *nuovo* § 350 ♦ qi li] qil|li L4 ♦ por ahontez] et pour deshonoré *agg.* 350 11. adonc honor (hounour 350) selonc] s. L4 12. contee et qe il trouva] devisee 350 ♦ jurer] creanter 350 13. m'i mis] le pramis 350 14. devisé] tout mot a mot *agg.* 350 ♦ il se test] qu'il ne dist plus a cele fois *agg.* 350

43. ¹Quant il a tout son conte finé, li rois Artus li dit: «Sire hostes, bien nos avez conté ce qe nos vos demandames, mes or me dites, se il vos plect: tenez vos a sens e a bien ce qe vos encor la tenez ceste costume? – ²Certes, fet il, ge ne le tieng mie a bien, mes a la greignor folie de tout le monde et a vilenie trop grant. – ³A folie le poez vos bien tenir, qar bien poez savoir certainement qe il ne puet estre en nulle guise qe vos ne vos metoiz encore en esprove encontre aucun bon chevalier qi d'un seul cop vos ocira, et vos en fustes anuit bien pres, ce savez vos bien! ⁴Or soit chose qe vos en doiez morir de ceste atine, toutesvoies fetes vos vilenie trop grant de ce qe vos ne volez recevoir nul estrange chevalier en vostre ostel jusque vos l'aiez assaié. ⁵Ceste n'est pas mainere de gentil home, mes de vilain tout droitement. Sire oste, se Dex me conselt, encore vos loeroie ge bien en droit conseil qe vos atant leissiez ceste costume, qar ele est trop vilaine. Ele n'appartient a nul preudome. – ⁶Biaux douz hostes, dist li sires de la tor, mi peres si acostuma ceste costume et la maintint auques grant tens, et ge après li si l'ai ja mainz anz maintenue et encore la maintendrai, tant com ge porrai. ⁷Se ceste costume ne fust, ce sachiez tout verairement qe ge ne feisse orendroit a cest preudome si grant honor com ge faz. Coment qe vos l'alez blasmant, et ge la lou. – ⁸Or la loez, ce dit li rois, tant com vos voudroiz, qar certes ge ne la porroie loer». Autretel dit li chevalier qi conpeignon estoit au roi. Il aferme bien endroit soi qe ce est la plus vilaine costume dont il oïst pieçamés parler: ⁹«Et ge vos di une autre chose, sire oste, fet li chevalier, or sachiez tout verairement qe anuit, qant ge vos tenoie entre les piez de mun cheval, se ge cuidasse adonc qe vos ne fuissez del tout chastiez de ceste costume, ge vos pramet loiaument qe ge vos eusse adonc tel atornez qe vos n'eusiez pooir de porter armes tout cestui an, ¹⁰mes ge vos leisai si tost porce qe ge cuidai tout de voir qe vos fussiez atant chastiez».

44. ¹Einsint passerent celui soir. Quant il fu ore de dormir, l'en mena les chevaliers en une chambre mout riche, ou il dormirent cele

43. 1. li rois Artus li dist] li r. parlle qui premiers li dist 350 ♦ demandames] de ceste aventure *agg.* 350 ♦ a sens e] *om.* 350 3. encore en esprove] en ceste e. 350 ♦ ce savez vos bien] certainement *agg.* 350 4. vos en doiez] vos ne d. 350 ♦ atine] abatue 350 ♦ fetes vos vilenie ... de ce qe] est che v. ... que 350 ♦ chevalier] *om.* 350 6. si acostuma ... la maintint] si la maintint 350 ♦ mainz anz] *om.* 350 ♦ ge porrai] ge la p. maintenir 350 8. qi conpeignon ... roi] *om.* 350 ♦ oïst pieçamés parler] eust en pieche parllé 350 9. tenoie] tornoie 350 ♦ eusse] *om.* L4 10. si tost porce qe] si tout quites quar 350

44. 1. passerent] parlerent 350 ♦ mout riche] moult bele et m. r. 350

nuit mout aisé. ²Cele nuit pensa assez li rois Artus coment il porroit trouver le roi Meliadus, qar ce est une chose qe il verroit trop volentiers. ³Qant il vet pensant au chevalier a cui il s'est aconpaigniez, il se merveille trop qi il puet estre, qar, a ce qe il en a veu, il li est bien avis sanz faille qe il soit home de valor et de haute bonté. ⁴Et ce est porquoi il le connoistroit trop volentiers, se li chevalier li voloit fere tant de cortoisie qe il se descouvrist vers lui et qe il li deist la certainté de son estre. ⁵En tel penser dist li rois souventes foiz a soi meemes: «Dex, qi puet estre cestui chevalier? Tant me plect tout le suen afere de tant com ge l'ai ore veu». ⁶En tel penser s'endort li rois, et por le travail des armes qe il avoit tout le jor devant portees l'autres dort si fierement toute la nuit qe il ne s'esveille pou ne grant. ⁷A l'endemain auques matin, avant qe li soleill levast, s'est esveilliez li chevalier et, porce qe il voit qe li rois dormoit encore, ne le velt il mie esveiller, ainz le leisse dormir. ⁸Il se vest et s'apareille et puis ist fors de la chambre et trouve cels de leianz qi li eurent bon jor et bone aventure. ⁹Et il demande maintenant coment le fait li sires de la tor, et cil de leianz qi la nuit l'avoient gardé dient qe il ne pot la nuit reposer, ainz cria toute nuit de la plaie qe il li avoit fete el piz. ¹⁰Li chevalier velt veoir son hoste et s'en vet en la chambre et trove qe encore crioit il, et fessoit la plus male fin de tout le monde. ¹¹«Dex aïe, biaux ostes, encore vos loeroie ge, por honor de vos et por vostre preu meemes, qe vos leissiez la male costume de vostre hostel. ¹²Vos en avez orendroit mal, mes encore en avroiz vos pis, si com ge croi». Et cil, qi trop est iriez de ce qe il se sent si mal appareilliez, respont par corrouz: ¹³«Certes, ge ne la laisserai, ainz revengerai la dolor qe ge sent. Ge ne trouverai pas toutesvoies si bon chevalier com vos estes: sor cels qi ne seront si bons vengerai ge ma dolor». ¹⁴Et qant il

mout aisé] quar il trouverent les lis fais tous a lor devise *agg.* 350 2. trop volentiers] celui proudom *agg.* 350 3. Qant il vet pensant au chevalier] et quant il a penssé grant pieche, il pense d'autre part au chevalier 350 (*v. nota*) ♦ de valor] de haute hounour 350 4. il le connoistroit trop volentiers] il convenoit trop que 350 5. En tel penser] de son p. 350 ♦ a soi meemes (*meesmes* 350)] en sui mes L4 6. devant] *om.* 350 ♦ l'autres dort] s'endort il L4 (*v. nota*) 7. A l'endemain] *nuovo* § 350 ♦ matin] *om.* 350 ♦ encore] si fierement *agg.* 350 8. se vest] se lieve 350 ♦ ist] vient 350 ♦ trouve] lors *agg.* 350 9. toute nuit] t. L4 ♦ il li avoit fete el piz] li est faite emmi le pis 350 10. velt] vait 350 ♦ et s'en vet en la chambre] quant il oient ceste nouvele 350 13. revengerai] se ge puis *agg.* 350 ♦ sent] ai ore 350 ♦ Ge ne trouverai pas toutesvoies] Ge ne trouvai mais 350 ♦ sor cels ... ma dolor] sor ceus qui ne seront mie si bon chevalier come vous, revengerai ge ma dolour que ge sent orendroit 350

a dite ceste parole, il se test et recomence a crier ausint fort com il feisoit devant.

45. ¹Qant li chevalier conoist qe il ne porra trere autre parole de son hoste fors qe ceste, il prent congié a lui et retorne au roi Artus qi ja s'estoit esveilliez, et il li eüre bon jor et puis li dit: ²«Sire conpeinz, se il vos pleisoit, il seroit tens de chevauchier desoremés, se vos ceianz ne volez remanoir. – Sire, fet li rois, Dex m'en gart de demorer ceianz. ³Or sachiez qe ge n'enn ai nulle volenté. – Donc prenom hui-més noz armes, fet li chevalier, et nos metom a la voie. – ⁴Volentiers, fet li rois, ge sui appareillez». ⁵Maintenant li rois se fet armer au plus vistement qe il puet. Qant se sunt ambedui armé, il preignent congié a cels de leianz et s'en vont. ⁶Cele matinee chevauchent tant qe il sunt en la forest. ⁷Li rois, qi bien est montez, chevauche avant et li chevalier après, et li escuer aloit avant, qi portoit toutesvoies couvert l'escu de la honce blanche. ⁸La ou li chevalier chevauchoit après le roi Artus, en tel guise com ge vos cont, il li avint qe il cheï en penser, dont il comença puis a chevauchier plus lentement qe il n'avoit fet le jor devant. ⁹Li rois, qi bien voit et conoist qe li chevalier est entrez en penser, porce qe il ne voudroit encore sa compaignie leissier en nulle mainere, comence il adonc a chevauchier asi lentement com fesoit le chevalier. ¹⁰Se il l'osast remuer de son penser, il le remuast volentier, mes il n'ose, qar il doute trop durement de corroucier le. ¹¹Qant il orent en tel mainere chevauchié une grant piece, li chevalier, qi longement avoit pensé, leisse son penser et comence a chanter trop fieremant. Et il avoit une voiz si bone et si haute et si acordant qe ce estoit un grant desduit qe d'oïr le chanter. ¹²Et il disoit adonc une chanchon toute nouvelle, qe il meemes avoit fete en cele saison por la roine d'Orcanie, qe il n'amoit pas de pouvre cuer. Et cele chanchon avoit ja li rois oïe, bien estoient deus mois passez. ¹³Li chevalier, qi adonc chante et de cuer et de volanté, s'efforce de son chant

14. fort] *om.* 350

45. 1. porra trere] porta tre L4 2. se vos ... remanoir] se nous chians ne volom demeurer 350 4. ge ... appareillez] veesmes tout prest 350 5. maintenant ... puet] tout maintenant li rois se vest et se fait les armes bailler. Sis escuiers le vont armant si bien com il le sevent fere 350 ♦ armé] et montés *agg.* 350 ♦ vont] partent 350 6. chevauchent ... forest] que il n'i font autre demouranche. Quant il se furent mis au chemin, il lour avint adonc que il trouverent une foreste de celui matin meïsmes, et il se mistrent dedens la foreste qui estoit grant et haute, et li tens estoit *ultime parole di* 350, *f.* 366vb (*v. nota*) 10. osast] osassast L4

tenir. Bien tient les notes e[n] droit: il ne les vet mie discordant. ¹⁴Et une chose q[ue] li done trop grant aide au chanter, si est q[ue] il avoit a celui point osté son hiaume de sa teste et l'avoit baillié a son escuer. ¹⁵Li rois, q[ue] celui chant escoute trop volentiers, chevauche premierement. Porce q[ue] li chevaliers chantoit trop bien et porce q[ue] li chanz estoit bons e noviaux assez, chevauche il devant toutesvoies, einsint com il veoit q[ue] li chevalier venoit après. ¹⁶Il chevauche ne trop fort ne trop plain, mes en cele mainere q[ue] il voit q[ue] li chevalier vient après. Ne li rois n'ose regarder li chevalier, porce q[ue] il ne leissast en nulle guise son chant. ¹⁷Quant li chevalier ot finé son chant, il beisse maintenant la teste et recomence a penser ausint durement et plus assez q[ue] il n'avoit fet avant.

46. ¹A celui point tout droitemant q[ue] li chevalier estoit entrez en celui penser si durement, atant evos oissir d'une broches un chevalier armé de toutes armes. Et il s'arreste enmi le chemin et comence a crier a haute voiz: «Mal i chantastes, dan chevalier, se Dex me saut». ²Quant il a dite ceste parole, il hurte le cheval des esperons et leisse corre envers les deus conpeignons tant com il puet del cheval trere. ³Li rois, q[ue] venoit devant, ne de la joste n'estoit appareilliez, qar li escuer portoit son escu et son glaive, ne set q[ue] il doie dire. ⁴*Et li chevalier qui venoit son glaive bessié tant come il puet dou cheval traire et qui estoit sanz faille home de trop grant force, fiert le roi Artu si roidement en son venir que li cheval sour quoi li rois estoit montez est chargez si estrangement de celui encontre que il ne se puet sustenir, ainz chiet arières tout envers.* ⁵*Et li chevalier, qui venoit de si grant force come je vos cont, ne s'areste pas sor le roi, ainz passe outre sor le chevalier qui encore n'avoit laissé son penser, et le fiert si roidement enmi le piz que li chevalier ne se garde de celui encontre devant qu'il s'en voit a terre.* ⁶*Quant li chevalier se voit abatu, adonc laissa il son penser, qar il chei trop durement de la venue du chevalier, et li cheval dum il fu abatu torna maintenant droit au travers de la forest.* ⁷*Tout autresi fist le cheval dum li rois estoit trabuchez. Einsi remistrent li dui chevalier a*

13. en droit] edroit L4 14. li done] in X *prime parole del f. 71a* ♦ au chanter] au chant tenir X 15. chevauche premierement] p. X ♦ li chevaliers] il L4 ♦ et] après agg. X 16. il voit q[ue] (que X)] venoit L4 ♦ li rois] il X ♦ il ne leissast] li chevalier ne laist X

46. 1. *no nuovo* § X ♦ entrez ... durement] en celui penser X ♦ armé de toutes] arm[...].outes X (*macchia*) 2. corre] maintenant agg. X 3. n'estoit] encore agg. X ♦ qar li escuer] et li rois qui venoit devant agg. X (*rip. della frase precedente*) ♦ q[ue] il doit dire] fere a celui point X; in L4 *ultime parole del f. 173va, per una lacuna il testo manca fino al § 73.1*

pié enmi la forest. ⁸Quant li chevalier qui abatu les avoit par ceste aventure que je vous ai conté les voit en tel mainere arester enmi le chemin qu'il ne poent a celle foiz aler avant ne ariere pource que a pié estoient, et il lor dist par corroz, come cil qui n'estoit mie le plus cortois chevalier dou monde: ⁹«Seignor chevalier, comant vous est, par Dieu? A ceste foiz mostrastes vous tout cleremant que vous ne savez mie trop bien [cevauchier] de celle encontre, et il m'est bien aviz que encore devriez vous apprendre a cevauchier».

47. ¹Li chevalier qui portoît l'escu miparti estoit trop doulenz quant il entent ceste parole, ne ne se puet tenir qu'il ne die: ²«Certes, sire chevalier, de ce que vous m'avez abatu n'avez vous mie conquisté trop grant pris ne trop grant lox quar, quant vous venistes sour moi, je pensoie si fieremant a une moie besoigne que je ne m'aparçui de vostre venue devant que vous m'eustes abatu. ³Et quel pris vous en poez vous doner? Certes, nul, se vous regardez a raison. — Sire chevalier, fet li autres qui abatu l'avoit, me reconoisiez vous droitemant? — ⁴Oïl, certes, fet li chevalier a l'escu miparti, voiremant vous conois je bien, quar encor n'a mie quatre jour que je vous mis a pié voiremant. — ⁵Et non Dieu, fet li chevalier, or n'avez le geurdon, ce poez voir bien. — E non Dieu, fet li chevalier a l'escu miparti, pource que vous m'avez abatu? ⁶Mes ceste abatue fu fet honteusement par vous, en tel mainere ne vous portai je pas a terre, ce savez vous bien certainement, ainz vous abati de la premiere joste et honte vous fis a celui point et desonor, et mout plus que vous ne m'en avez fet. ⁷Et se vous fuisiez chevalier si preux come vous devroiz estre, vous metoriez orendroit en aventure de vengier celle vergoingne que je vous fis. Adonc, or descendez et vous venez conbatre a moi a la spee trenchant. ⁸Se vous ensi me poez metre au desouz, je diroie adonc que voiremant seriez vous bon chevalier et vous vous en poriez doner pris et lox». ⁹Li chevalier, qui bien estoit un des granz chevalier dou monde et un des forz et plus felons qui portast armes a celui tens, quant il entent ceste parole il ne fist autre demorance, mes por le grant corroz que il a hurte il le cheval des esperons. Et si cuide ferir le chevalier a l'escu miparti des piez dou cheval, ¹⁰mes cil, qui leger estoit a merveilles, ne vult pas ensi atendre la force dou cheval, ainz faut de travers et lesse celui passer outre.

48. ¹Quant li chevalier a l'escu miparti voit ceste chose, il est irez a merveilles et ne se puet tenir qu'il ne die: «Certes, Escanor, a cest point feistes vous vilenie, quar bien mostrastes apertement que voiremant estes vous coart et mauvais en toute mainere. ²Se vous fuisiez home de bien, vous n'eusiez fet

9. bien cevauchier] b. X

47. 4. mie quatre] mi[...]uatre X (macchia) 7. venez] v[...]ez X 8. au desouz] augesonz X

celle pointe si vilainement come vous l'avez faite pour gaagner un bon chastel, et ci mostrastes vous trop la grant coardise de vostre cuer». ³Quant Escanor entent ceste parole, il est tant durement irez que il ne set que il doie dire. ⁴Trop est doulenz dedenz son cuer de ce qu'il a failli en tel mainere de ferir li chevalier, et cil, qui auques le conoist dedenz son cuer et qui le doute trop petit, li dit autre foiz: ⁵«Escanor, quar descent a terre, si t'en vient combatre a moi. Ha! chetis, pourquoi es tu ore si coart de ton corage et si es armés? Si n'ai je de ce nulle poour, si m'ait Dieu. Et tu, pourquoi as ore de moi si grant doutance? — ⁶Se Dieu te saut, fet Escanor, as tu ore si volenté de combatre encontre moi come tu en mostres le semblant? — Oïl, certes, fet li chevalier, greignor assez, quar encor es tu plus granz assez que je ne sui et plus fors. ⁷Si sai ge tout certainement que tu n'auvras ja longue duree encontre moi. Et pour ce voudroie trop voluntiers que nous combatison ensemble a cheval ou a piez, et me poras conoistre adonc meuz que tu encore ne me conoïs». ⁸Quant Escanor entent cest plet, il ne fet autre demorance, ainz hurte le cheval des esperons et s'en vet orendroit au travers de la forest et en petit d'ore est il tant eslongiez qu'il ne le voient plus. ⁹Quant li chevalier a l'escu miparti voit qu'il a ainsi perdu Escanor qu'il ne le puet mes voir, ce est une chosse dont il est trop irez durement. Et li rois, qui le voit color muer et bien conoist qu'il est irez trop durement, li dit il pour oïr qu'il respondra: ¹⁰«Sire compainz, comant vous est? — Certes, sire, malemant, quar mout me poise de la mescheance que nous est avenue, si ne m'en poise mie tant pour nulle chose come pource que Escanor s'en vet si quites. ¹¹Certes, se je fusse ainsi a cheval come il est, il m'en pesast mout chierement se il ne me feist reison de ce qu'il nous a fet vergoingne si soudainement, ¹²mes ore est nostre aventure telle que il s'en vet plus quitement que je ne vouxise». Et lors dit li rois a l'escuier: ¹³«Or tost, va! Trouve mon cheval et le cheval de cest seignor». Et li escuier se met maintenant a la voie, puisqu'il est dechargez de l'escu et dou glaive dou roi que il portoit et de l'hiaume dou chevalier, et s'en vet celle part o il avoit veu que le cheval dou roi s'en estoit alez. ¹⁴Et après ce ne demora gaires que il amoine au roi son cheval, et maintenant que li cheval est venuz, li rois, qui mout prisoit le chevalier, li dit: «Sire, montez s'il vous plect et alez prendre vostre cheval. — ¹⁵Sire, respont li chevalier, sauve vostre grace, je nel feroie en nulle mainere que je mont a cheval et vous laixase a pié. Mes s'il vous plect, l'escuier qui vous amena le vostre amenera le mien. — ¹⁶Certes, fet li rois, ce me plect mout». Et li escuier se met erramment a la voie, quar si sires li avoit comandé, et après ne demore gaires qu'il retorne a tot le cheval dou chevalier.

49. ¹Quant li chevalier voit qu'il a recouvré son cheval, et il lache son hiaume en sa teste et monte sus son cheval. Et quant il est montez, il s'en torne envers le roi et li dit: ²«Sire compainz, a cestui point faut la nostre compaignie,

quar je sai bien que vous tendroiz vostre droite voie, quar vous volez aler après celui que vous alez querant. Et je endroit moi ne voil pas aler orendroit ceste voie, ³ainz voil fere une autre chose, car je m'en voil aler tout droit après li chevalier qui de nous se departi orendroit. Et sachez qu'il me pesera mout s'il m'eschape si quitemant come il est alez». ⁴Quant li rois entent ceste nouvelle, ce est une chose dont il n'est mie trop joianz, et il ne set qu'il doie dire, quar la compaignie de cestui chevalier, qu'il tieng trop proudomme et trop vaillant, li covient laisser orendroit. ⁵Se ne fust la queste du roi Meliadus qu'il vet querant, il ne leseroit la compaignie dou chevalier en nulle guisse. Et pour ce covient il que il s'en parte dou chevalier dont il li poise mout, et lors dit au chevalier: ⁶«Comant, sire compainz, soumes nous donc au departimant? – Sire, fet li chevalier, oïl, quar il m'est bien aviz que vous tendroiz cestui chemin, et je tendrai cest autre sanz faille. – ⁷Sire compainz, ce dit li rois, or sachez tout veraiemant que cest departimant me poise mout quar, se Dieu me saut, je estoie mout plus joianz de vostre compaignie que vous ne cuidez par aventure. ⁸Mes puisque einsint est avenü que au departir nous somes, or vous voudroie proier, par vostre cortoisie, que vous me disiez vostre nom, que bien sachez veraiemant que ce est une chose que je mout desir asavoir». ⁹Li chevalier respont tantost et dit: «Sire compainz, or m'est aviz que vous ne feistes pas si grant cortoisie come chevalier devoit faire, qui mon nom me demandastes. Ja veïstes vos bien que je ne vous encor demandai le vostre. ¹⁰Pour Dieu, soufrez vous atant de ceste chose, que certes ce est une chose que je ne vous diroï pas voluntiers. – ¹¹Sire, fet li rois, et je m'en souffrirai atant, que bien sachez que encontre vostre volünté ne le voudroie savoir. – Sire, ce dit li chevalier, je vous comant a Nostre Seignor, que je ne puis plus demorer. – ¹²A Dieu soiez vous, fet li rois, et que Dieux vous conduie sauvemant et vous done bone aventure et bone fin de trouver ce que vous emprenez orendroit». Et quant il a dite ceste parole, il s'en vet outre, et li chevalier remaint d'autre part, et en tel mainere se partent li dui chevalier. ¹³Mes atant laisse ore li contes a parler de celui a l'es-cu miparti et retorne au roi Artus pour conter aucune chose de lui.

II.

50. ¹En ceste partie dit li contes que [quant] li rois se fu parti dou chevalier, il cevaucha puis celui jour le grant chemin entre lui et son escuier, qu'il

49. 2. volez aler] v. alez X 3. come il est] c. il il e. X 8. est avenü] [...]venu X (*macchia*) ♦ vous voudroie] vou[...]oudroie X (*macchia*) 13. aucune chose] aucun[...]hosse X (*macchia*)

50. 1. quant] om. X

ne trouverant point de recet, et li escuier qui les armes portoit cevaucha toutes voies devant. ²Li rois avoit le hiaume lacié en sa teste, ne ne cevauchoit pas orendroit si bien come il avoit devant fait, quar il li estoit auques anui qu'il s'estoit si tost departiz de la compaignie dou chevalier. ³En tel mainere cevauche li rois Artus en la compaignie de son escuier soulevant dusqu'après hore de vespre, et la forest lor ot duré tout le jour entier. ⁴Quant vint après hore de vespre, adonc com[en]cerant il aprochier d'un chastel qui seoit sour une rivere, et li chastiaus estoit biaux et granz et si bien assis de toutes chosses come chastel porroit estre, quar il avoit la riviere de l'une part, et puis la prairie et li campinz et la forest de l'autre part. ⁵Et li rois, qui toute jour entierement ot cevauché et sanz manger, puisqu'il vit le chastel apertement, il comença adonc a cevauchier un pou plus esforceement qu'il ne fesoit devant, quar il voudroit estre voluntiers dedenz cel chastel. ⁶Tant [a] cevauchié en tel guise qu'il est venus dusqu'au chastel. Et quant il est venus a deus archies pres de la porte, et il vit adonc devant la porte une grant asemblee de gent et il s'en va celle part. ⁷Et quant il est venus dusqu'a la, il voit que enmi la place avoit une grant pierre de maubre, et en mileu de celle pierre avoit une damoiselle mout bien vestue durement, et estoit liee d'une cheine par le col et par le flans. ⁸Et sachiez que la damoisele estoit tant belle riens de cors et de toute façons que ce fu adonc une merveille que de regarder sa biauté, se ne fust ce qu'elle avoit le cuer triste et doulent et espoenté mortelmant, ⁹et ce estoit une chose qui un pou li noisoit a sa merveilleuse biauté. ¹⁰Et pour la grant biauté dont la damoiselle estoit garnie, cil dou chastel, ansi les fêmes come les homes, estoient venu devant li pour li regarder. ¹¹Et quant il voient si desmesuree biauté, qui tant estoit estrangiemant belle que nature meimes atoute sa persone ne peust rienz trouver de mal fait, il ne se puent tenir de plorer. ¹²Et li auquant disoient tout apertement: «Ha! Sire Dieuz, come grant doumage est que si belle damoiselle com'est ceste doit si tost morir!».

51. ¹Quant li rois Artus fu entr'elz venus, si armés come il estoit, et il ot regardé la damoiselle, il devient ausi come tout esbaï de la grant biauté qu'il veoit en li, et dit adonc a soi meimes que il ne li est pas avis que il veist encor en tout son aage une plus belle damoiselle de ceste, et trop en seroit grant doumage, a son jument, se ele morist si tost. ²Quant il l'a grant piece regardee et escouté les paroles que cil disoient qui entor de li estoient, et se torna vers un chevalier auques d'ages qui dejuste lui estoit et li dit: ³«Sire chevalier, dites moi, se Dieux vous doint bone aventure, ceste damoiselle

4. comencerant] comcerant X ♦ porroit] porroi[.] X (*macchia*) 6. a cevauchié] c. X ♦ dusqu'au] dusqua au X ♦ devant la] devan[...]a X (*macchia*) ♦ s'en va] se[...]a X (*macchia*)

pourquoi fu elle misse a si grant desonor? Et pourquoi doit elle estre morte ensi com dient ceste gent?». ⁴Li chevalier respont tantost et dit: «Certes, biau sire, puisque vous ne le savez et vous de moi le volez savoir, et je vos en dirai ce que l'en en dit. ⁵Or sachez que de cest chastel que vous veez furent seignor, n'a encore mie grant tens, quatre frere mout proudomes d'armes et vailant. ⁶Li troi morirent por l'achaison de la damoiselle, et elle meimes les fist ocire. Li quart freres remest ensi seignor de cest chastel, come il est encors, et mena dolor plorant de ses freres. ⁷Or avint aussi come mescheance et mesaventure que ceste damoiselle cevauchoit par ceste contree el conduit d'un vallet et d'une damoiselle. ⁸Et au seignor de cest chastel fu conté ce et il li ala tantost après et trouva la damoiselle et la prist et la fist ci amener et metre la desus cest perrom, tout ensi come vous la poez veoir, e des ier fu elle misse en ceste chaine et hui tout jour i sera. ⁹Et demain, quant sera none passee, adonc sera fet un feu grant et merveilloux, et la damoiselle i ert dedenz misse tout erramment et ensi en chaine come est. ¹⁰Sire chevalier, or vous ai je dit ce que vous me demandastes». Et quant il a dite ceste parole il se test atant, puisqu'il a sa raison finie. ¹¹Li rois parle maintenant et dit en tel mainere au chevalier: «Dites moi, biau sire, ceste damoiselle, quant elle fu prise, estoit elle en conduit d'aucun chevalier? — ¹²Certes, sire nani, elle n'avoit autre compaignie fors celle que je vous dis. — Dex aïe, fet li rois, comant fu donc si hardiz li sires de cest chastel, qu'ill osa metre main en la damoiselle puisque elle n'estoit en conduit d'aucun chevalier! ¹³Certes, il en deviroit perdre la teste par la costume des chevaliers erranz. — Sire, ce dit li chevaliers, de tout ceste costume ne sai je rienz, mes il est mi sires: je ne diroie encontre lui ne tort ne droit. ¹⁴Mes or me dites vous, biau sire, s'il vous plect, qui vous estes qui en tel mainere cevauchez armés par ceste contree. — Biau sire, fet li rois, je sui un chevalier erranz que en une moie besoingne vois par cest país. — ¹⁵Or me dites, fet li chevalier, estes vous encore herbergiez en cest chastel? — Certes, fet li rois, nani, mes je croi bien que je trouverai tost qui me herbergera puisque je serai leienz entrez. — ¹⁶Biau sire, fet li chevalier, puisque encor n'estes herbergiez, or vous pri ge par cortoisie que vous veigniez herbergier a mon hostel que je ai dedenz cest chastel et bon et bel, ¹⁷et je vous proumet que je vous ferai honeur et cortoisie tant come je porai, si qu'il vous plaira, si come je cuit».

52. ¹Li rois respont tout erramment au chevalier et li dit: «Certes, biau sire, puisque je voi que vous m'an proiez si debonairement, je feroie vilenie se je vous en escondisoie, et je outroi ce dunt me proiez. — ²Moutes mercis, fet li proudoume, or nous metons huimais a la voie, que bien est tens desoremais de herbergier». Atant s'en partent de la place q'i granz estoit et merveilloux et

entrent dedenz le chastel, ³et tant cevaucherent parmi la metre rue que il vienent au grant hostel. «Sire, ce dist li chevalier au roi Artus, veez ici nostre hostel. Or poez huimaiz reposer. — Moutes mercis», ce dist li rois, et lors descent tout erramment. ⁴Et atant evous venir valez qui saillent fors de la maison, qui reçoivent le seignor mout honoreemant et le rois Artus autresi, et meinent le roi pour desarmer enmi le palais qui ert mout bel et rice. ⁵Quant il ont le roi desarmé, il li aportent erramment de l'aigue chaude pour laver ses mains et sun vis, qui estoit tainz et nercis des armes porter. ⁶Et puis li afuble[n]t un grant mantel d'escarlade foré de vair, pour poour que li froit ne li feist mal por le chaut qu'il avoit eu des armes porter. Et li sires de l'ost dit au roi Artu: «Manjastes vos hui?». Et li rois respont en soriant et dit: ⁷«Certes, biau sire hoste, nani. Encore n'en ai je trop grant volonté, se Dieu me saut». ⁸Et l'an li fet maintenant apporter vainason et metre devant lui dusqu'atant que li mengier soit aparaille, quar a la verité dire il avoit ja comandé a celz de lieienz qu'il aparoiassent trop hautement da mengier pour li chevalier erranz, quar il le veut trop voluntiers et noblemant servir, s'il unques puet. ⁹Endementiers mange li rois un petit, et quant il a un pou mengé, celz qui devant lui estoient leverent lo remanant. Li sires de lieienz le comence adonc a metre en paroles et li dit: ¹⁰«Sire chevalier, se Dieux vous doint bone aventure, dont venez vous et de quel part? — Certes, hostes, fet li rois, de ce vous dirai je auques la verité, puisque savoir le volez. Or sachez que vieng de vers Camaalot». ¹¹Li oste besse la teste vers terre et maintenant li viennent les lermes as ieuz, si que li rois s'en aparçut tout clerement. Quant li hostes parole, il dit au roi Artus: «Ha! sire, je croi que vous venez de la cort au roi Artus. — ¹²Certes, fet li rois, vous dites verité, de celle part vieng je voiremant. — Ha! las, fet li chevalier. Tuit en viennent, tuit en retorent. ¹³Mes li mienz fiz, li bon chevalier et li biaux, et la plus cortoise creature qui armes portast a nostre tens, ne s'en puet retourner. ¹⁴Ainz est mors a grant dolor et a grant martire, li bons et li biaux. Ha! fortune, come vous me fustes encontre a celui point, qui vous me tousistes mon enfant si hastivement. Ha! rois Artus, come je me puis plaindre de toi. ¹⁵La male mort puiss tu faire et la male fin! Tu le mienz enfant as mort de tex mains, Dieu me laist tant vivre dusqu'a que de toi me soient apportez tieux nouvelles come je desir a oïr. ¹⁶Tu m'as mort mon douz cuer et ma douz [vie]. Dieux t'anvoie prochienement qui face de toi si come tu feist de lui».

53. ¹Quant li rois entent ceste nouvelle, il ne dit rienz [et] pense, quar il n'est pas si aseur orendroit come il estoit devant, quar toutevoies a il poour et

52. 3. et tant] [.] t. X (macchia) 6. afublent] afublet X 9. il a un pou] il [.i.] a pou X 16. vie] om. X (v. nota)

53. 1. et] om. X

doute de reconnoissance. ²Quant li chevalier ot parlé en ceste mainere et il ot finé son conte, li rois le met en parole et dit adonc: «Sire hoste, qui fu vostre filz que vous vous plaignez si durement? — ³Sire, respont li chevalier, ce fu un chevalier de pou de tens qui estoit apellez Durehon. ⁴Quant il estoit vallez de l'aage de .xvii. ainz, je le mandai a cort et il i demora tant que il fu nouvel chevalier, et li roi meimes le fist chevalier de sa main, ce sai je tout certainement. ⁵Mes celle honeur que il me fist a celui point il me lo vendi trop chierement au derian, quar celui que il avoit fet chevalier si come je vous dis ocist il puis a ses douz mainz. ⁶Et il m'est aviz qu'il ne poust en nulle guise fere greignor felonie que il fist adonc que de metre a mort celui meimes qu'il avoit fet chevalier de sa main». ⁷Li rois, qui ja s'aloit recordant tout certainement de celui chevalier dont ses hostes parloit, il respont adonc et dit en tel guise: ⁸«Sire hoste, pourquoi alez vous ore le roi Artus si malemant blasmant pour la mort de vostre filz? ⁹Or sachez que de celle mort oï je parler a cort, et certes je entendi tant que je diroie ardiement devant le plus proudoume qui soit en cest chastel que li rois Artus ne fist nul outrage de metre a mort vostre filz, qui regarderoit a ce que fist vostre filz encontre le roi Artus. — ¹⁰Ha! merci, fet li hostes, ne dites ce. Or sachez tout veraiemant que mis filz estoit si cortois et si loiaux que il ne fist encontre le roi Artu chose pour quoi li rois le deust ocire. ¹¹Mes einsint avint adonc, par pechié et par felonie dou roi, que mis filz fu mort!». Et li rois respont et dist adonc: «Dites moi, sire hostes, se Dieu vous doint bone aventure, savez vous encore certainement coment vostre filz fu ocis? — ¹²Certes, nani, fet li hostes, fors qu'il me fu dit pour verité que li rois Artus l'oci encontre raison et pour aceison d'une damoisselle. — Sire hoste, fet li rois Artus, or sachez tout veraiemant que il vous fist malemant entendre la verité de ceste chose. ¹³Mes, se vous volez, je vous en dirai la certainté, si orroiz adonc se la colpe fu de vostre filz et la raison pour quoi il morut fu dou roi Artus. — Or me dites, fet li hostes, seustes vous si le fet que isi me volez ore acerter [est] la verité? — ¹⁴Certes, ce dit li rois, je le sai pour verité, non mie pour oïr dire, quar je le vi apertement, et pour ce le vous osseroie bien conter. — ¹⁵Quant vous le veistes, fet li hostes, adonc dites moi la verité, s'il vous plect. — Certes, voluntiers, fet li rois, or escoutez com il avint.

54. ¹«Bien fu verités sanz faille que li rois Artus fist vostre filz chevalier a cest Noel, or est un an, en la cité de Camaalot. Pource que li roy l'avoit fet chevalier, l'amoit il mout et li portoit assez plus honeur que il ne fesoit a un meilor chevalier de lui. ²Un jour se mist le rois en voie pour aler querre un chevalier qui en sa cort avoit esté et leienz avoit abatu dous chevaliers de la

7. guise] gui[...] X (macchia) 8. le roi Artus] le [...]rtus (macchia) X 9. devant] dev[...]t X (macchia) 12. d'une] d|d'une 13. est] om. X

Table Reonde. ³Et li rois, pour vengier la honte qu'il avoit fet en sa cort, se mist il au chemin et cevaucha bien dous jours entiers, que il [ne] le poust ataindre ne trouver le, et la ou il aloit après le chevalier li avint qu'il trouva vostre filz a l'ensue d'un chastel. ⁴Li rois fu liez trop durement quant il vit vostre filz et dit qu'il ne voloit huïmais que il se partist de sa compaignie devant que il fussent retornez a Camaalot. ⁵Cest honeur fist li rois a vostre filz, quar il le reçut adonc por son compaignon en celui viage. Or vous conterai mot a mot quel gueredon rendi vostre filz au roi Artus. ⁶Quant il se furent mis a la voie en tel guise come je vous cont, il cevaucherant puis tant qu'il trouverant li chevalier que li rois aloit querant. ⁷Et li chevalier menoit a celui point en sa compaignie une damoiselle tant belle qu'ele estoit une merveille a garder sa biauté. Quant li chevalier s'aparçut que li rois por lui s'est partiz de Camaalot, il mist jus la belle damoiselle que il menoit en sa compaignie. Et li rois dist tantost au chevalier: ⁸«Sire chevalier, gardez vous de moi, que je vous di que je voil combattre a vous par dous chosses: premierement pour vengier la vergoingne que me feistes a Camelot et après ce pour ceste damaiselle que vous conduisiez, quar je la voil avoir».

55. ¹«Après cestui parlemant il ne font autre demorance, ainz començant la bataille entr'elz dous. Et tant se combattirent ensemble que li rois mist dou tout li chevalier au desouz et le mena a utrance et prist la damoiselle et le chevalier leissa enmi le champ. ²Et puis s'en parti atant pour retourner a Camaalot, et ainsi s'en retoma li rois et amena vostre filz en sa compaignie et la damoiselle. ³Celui jour meïmes avint qu'il cevaucherant par une forest et avint qu'il oïrent un grant cri auques pres d'elz, et li rois s'aresta maintenant qu'il oï le cri et dist a vestre filz: ⁴«Je voil aler savoir pourquoi cist cris a esté. Hore remanez ici et gardez ceste damoiselle si chierement come vous garderez vous meïmes, quar elle me plect tant que je la voil mener a Camaalot et la tendrai illec pour ma amie.» ⁵Et li rois s'en parti atant, qu'il ne fist autre demorance et s'en ala cele part ou il avoit oï li cri. Et après ce ne demora gaires qu'il retourna. ⁶Quant il fu retornez celle part, la ou il avoit lassé vostre filz et la damoiselle, et il ne trouva ne l'un ne l'autre, mes voirement il oï la damoiselle crier auques long de lui. Et bien reconnoist au cri que ce estoit proprement la damoiselle que li rois avoit gaagnée et que il amoit tant. ⁷Il ne fist autre demorance quant il oï la damoiselle crier, ainz s'en ala celle part ou il avoit oï le cri. Et tant fist que il vint en une grant valle, et trouva adonc vostre filz

54. 3. ne le poust] le p. X 7. Quant] Q[...]nt X (*machia*) ♦ belle damoiselle ... sa compaignie] b. d. ... fa c. X

55. 4. remanez] remantoez X (*v. nota*) 6. Quant il fu retornez] Q. il avoit fu r. X ♦ il amoit] ele amoit X

qui avoit ostees ses armes et tenoit la damoiselle, ⁸et li avoit fet ja vilanie
 encontre la volenté de la damoiselle meimes. Quant li rois Artus fu venus illec,
 il trova que li chevalier tenoit encor la damoiselle desor lui et celle crioit toute-
 voies. ⁹Li rois, qui reconut certainement que ce estoit la damoiselle que il aloit
 querant et li chevalier autresi a cui il avoit baillé a garder, il fu trop doulenz
 de ceste chose. ¹⁰Quant il la vit, il comença erramment a crier: “Certes, mau-
 vais traïtor, vous estes mors!”. Quant li chevalier vi ceste chose, il sailli souz
 erramment et ne fist pas adonc semblant que il fust trop espoentez dou roi
 Artus, ainz currut erramment a sa spee et la tret fors. ¹¹Et li rois, qui vit que
 vostre filz estoit tout desarmés, ne en tel mainere ne le voloit asaillir, quar trop
 li feroit grant desoneur, il li dit adonc: ¹²“Or tost, sire, armés vous hastive-
 mant et atend moi se tu l’osses faire. Itant te di je bien pour voir que, se tu
 de moi ne te puéz defendre, tu es mort”.

56. ¹«Après ce que vostre filz vit qu’il avoit congé de prendre ses armes seu-
 remant, et il prist les armes erramment. ²Et quant il furent ambedui aparoillez
 de la bataille, en tel mainere com chevalier devoient estre quan il s’en voloient
 combatre, li rois, qui trop estoit corociez envers vostre filz de ce que je vous ai
 conté, il lesse corre tout erramment sour vostre filz ³et le feri dou premier cop si
 durement que pour l’escu ne pour l’auberc ne remest qu’il ne li meist parmi li
 piz le fer de son glaive et le porta mort a la terre de celui cop. ⁴Et en tel guise
 come je vos ai dit, biaux hostes chier, fu mors vostre filz, et pour telle acheison.
⁵Or gardez si li rois Artus ot grant tort de metre a mort vostre filz quant il
 trouva ce encontre lui. — Biau sire, fet li peres, fu donc la chose en ceste mai-
 nere si com vous l’avez contee? — ⁶Oïl, certes, fet li rois, ensi avint il, et je le
 sai certainement, et par le roi Artu et par la damoiselle». Quant li hoste
 entendit cest conte, il besse la teste vers terre et les lermes li viennent as ieux qui
 li corrent tout contreval la face. ⁷Et quant il a pooir de parler, il li dit tout ler-
 moient des iauz: ⁸«Comant que la colpe avenist, de mon filz ou dou roi
 Artus, je en sui honiz, quar je en ai perdu ce que je plus amoie el monde. Et
 je di que ce fu mon pechié que mi filz fu mors si tost et a si grant tort». ⁹Quant
 il parloient entr’elz en tel guise come je vous cont, cil de leienz dient au sei-
 gnor: «Sire, quant il vous plera vous porroiz mangier, quar li tens en est et li
 mengiers est aparoilé». ¹⁰Les tables sont mises tantost, quar li sires li comande.
 Puisqu’il sont assiz, il mangient assez enforceemant et richement ce que
 avoient aparoilé cil de leienz. Et quant il orent mangié il s’en vont choucier,
 quar li tens en est a ce que grant part de la nuit estoit ja alee. ¹¹Et li rois dormi

9. la damoisele] une d. X 10. vit] (?) X (macchia) ♦ currut] (?) X 12. mort]
 mo[...] X (macchia)

56. 1. et il prist] [...] il prist X (macchia)

bien celle nuit et nepourquant il ne dormi mie si esforceant que il ne pensast assez. A l'e[n]demain auques maitin se leve li rois, et a toutevoies doute et pour que aucuns ne le reconoisse en aucune mainere. ¹²Quant vint pres hore de prime, adonc comence parmi le chastel un grant cri et merveillox, quar tuit disoient comunement: «Alon veoir la damoiselle ardoir maintenant». ¹³A cestui point tout droitement que cist cri fu levé par le chastel en tel guise come je vous cont, li rois Artus et li sires de leienz estoient en une chambre desus la rivire droitement. ¹⁴«Biaux hostes, fet li rois, cest cri que nous oom, pourquoi est il enmenché? — Sire, fet li hostes, je le vos dirai, puisque vous ne le savez. Or sachez que la damoiselle que veistes arsoir atachie en la chaine sor le perom de maubre doit orendroit estre gittee el feu. ¹⁵Pour ce criant la gent de cest chastel. Il volent tuit oisir fors pour veoir la fin de la damoiselle». ¹⁶Quant li rois ot ceste nouvelle, il demande ses armes et li escuiers li aporta erramment, et il se fet armer auques hastiuvement, come cil qui ja vousist estre defors. ¹⁷Et quant il est armés au mieuz que cil de leienz le savoient fere, il descent dou palaiz et vient enmi la cort et monte sor son cheval, et done a son escuier son glaive et son escu pour porter dusque la fors. ¹⁸Et li sires de leienz i fu, qui assez le prioit de remanoire selonc ce que l'an puet chevalier prier, et li fet tout adés compaignie a celle foiz.

57. ¹Quant il se furent mis au chivauchier parmi la mestre rue, il vont tant ensemble qu'il sont oissu fors de la porte dou chastel. Et lors voient tout apertement que li feus estoit ja aluminez enmi la place ou la damoiselle devoit estre arse. ²Et li sires dou chastel, qui celle dure vengeance devoit prendre, estoit ja venus entr'elz ³et avoit en sa compaignie dusqu'a sis chevaliers armés, ne il nes avoit pas ensi amenez armez avec lui pource qu'il eust adonc poor de nul home, mes il l'avoit fet pour honeur de lui, et tuit si autre compaignon estoient desarmez. ⁴Atant evous venir entr'elz le roi Artus ensi armés come il estoit. Et maintenant que cil de la place le virent, il conoissent certainement qu'il est chevalier erranz et pour ce li font voie li plusors. ⁵La ou li rois regardoit la damoisele, qui tant estoit bele de toutes façons come je vous ai ja autre foiz devisé ça arieres, et il regarde de l'autre part et voit adonc venir li chevalier qui le jor devant estoit partiz de lui pour aler après Escanor le Grant. ⁶Quant li rois le voit venir, il est trop liez duremant, et li chevalier ne venoit pas orendroit si priveement come quant li rois Artus le trouva premierement, ainz amenoit orendroit deus escuiers avec lui et une damoiselle mout belle et mout avenant. ⁷Quant li rois le voit aprochier de lui, il se part maintena[n]t de la presse et li vient encontre et li crie auques de loing: «Ha!

II. l'endemain] ledemain X

57. 7. maintenant] maintenat X

sire, vous soiez li bienvenus». ⁸Et li chevalier, qui voit li rois, il le reconoist de tant come il l'avoit reconeu et il dit de l'autre part: «Sire compainz, Dieux vous doint bone aventure. — Biau sire, fet li rois, vous venez ore a grant compaignie. — ⁹Sire compainz, ce dit li chevalier, je ai ceste damoiselle gaagné sor autre, mes je ne l'ai pas pour noient. Mes quelle asemblé est ore ceste? — ¹⁰E non Dieu, fet li rois, je le vous dirai maintenant». Et li comence a conter tout celui fet au plus briement que il le puet dire. «Comant, sire compainz, fet li chevalier, est donc ceste damoiselle si belle come vous dites? — ¹¹Si m'ait Dieux, sire, fet li rois, oïl. Je ne cuit que dusqu'a deus jour[n]ees en ait plus belle de li. Et se vous de ce ne me creez, veoir la poez maintenant, et puis en dirois vostre avis». ¹²Maintenant que li chevalier oï ceste parole, il se met entre la gent et comença a regarder la damoiselle, et quant il l'a un pou regardee, il [ne] se puet tenir qu'il ne die au roi: ¹³«Sire compainz, se Dieux me saut, auques me deistes verité de ceste damoiselle: ele est tant belle voiremant que a poine porroit l'an trouver plus belle de li en ceste contree ne en autre. Et certes, pour la grant biauté qu'ele a di je q'il seroit trop grant doumage se elle morist encore si tost. — ¹⁴Si m'ait Dieux, fet li rois, vos dites bien verité, et certes, pour la grant biauté de li di je bien tout ardiement que ele ne mora se onques puis. Et il sunt ici set chevalier armés, si m'ait Dieux, je me combatroie avant a celz touz anchois qu'elle morist pour defaute d'aide». ¹⁵Quant li chevalier entent ceste nouvelle, il comença a sorire et dist au roi: «Sire compainz, se Dieux me saut, si grant fet com seroit cestui apartendrait bien a meillor que vous n'estes ne que je ne sui. ¹⁶Et nepourquant bon est que nous nous i esprouvom, pour savoir s'il plairoit a Dieu que nous pousson delivrer ceste damoiselle de mort. — ¹⁷E non Dieu, fet li rois, je ne leiroie pour grant chose que je ne me meisse en aventure de delivrer ceste damoiselle de mort, quomant qu'il m'en doie avenir. — ¹⁸Sire compainz, ce li a dit li chevalier, leissez sor moi ceste esproeuve, se il vous plect. Je croi que je la delivrerai plus tost que vous ne feroiez».

58. ¹De ceste parole se coroce li rois trop fierement, quar il li est bien aviz sanz faile que li chevalier ne le prisse d'assez tant come il fet lui meimes: «Comant, sire compainz, pourquoi dites vous ce? ²Cuidez vous plus tost cestui fet mener a fin que je ne feroie? Cuidez vous donc estre meillor chevalier que je ne sui? Se Dieux me saut, je ne voil que vos mi façoiz aide ne secors, mes se je en doi morir, si muire». ³Endemaintiers qu'il avoient entr'elz deus tenu si lonc parlemant come je vous ai conté, fu avenu que la damoiselle fu deslie, et il la voloient erramment gitter el feu, quar li sires dou chastel, qui illec estoit presentement, einsint come je vous ai conté ça arieres, l'avoit comandé.

11. journées] jourees X 12. ne se puet] se p. X 18. se il] scil X

⁴Quant li rois, qui mout estoit ardez chevalier, voit que li afere de la damoiselle estoit ja tant avant alez, il ne fet adonc autre demorance, ainz se lance avant erramment, si aparaillez come il estoit de toutes armes. ⁵Il dit adonc a celz qui la damoiselle tenoient: «Or tost, laissez ceste damoiselle, ne ne soiez plus ardez de metre main en li, quar autrement vous estes mors». ⁶Quant cil qui la damoiselle tenoient entendent ceste parole, il sont trop durement espoentez, et pour ce laissant il la damoiselle tout erramment. ⁷Quant li sires dou chastel voit ceste chose, il s'en vient au roi droitemant et si li dit: «Sire chevalier, fet il, que demandez vous? — Je demant, fet li rois, que ceste damoiselle soit delivré. ⁸A moi ne plect qu'elle muire encor si tost, quar doumagie en seroit trop grant, pource que trop est belle. — E non Dieu, fet li sires, ja pour vous ne remandra qu'ele ne muire orendroit, quar elle l'a trop bien deservi. — ⁹Si m'äit Deux, dit li rois, elle ne mora mie, se je onques puis. — Comant, ce dit li chevalier, la volez vous donc defendre? — Oil, certes, fet li rois, je la defendrai orendroit encontre vous et encontre touz celz qui orendroit li voloient fere mal a mon pooir. — ¹⁰E non Dieu, fet li chevalier, or n'est mie sens, ainz est folie pour vous. Et pource que vous avez dit ceste parole vous desfi ge. Gardez vous deshoremais de moi, quar je vous ferai honte, se je unques puis».

59. ¹Quant il a dite ceste parole, il ne fet autre demorance, ainz crie as chevaliers: «Or a cestui!». Et il lesse corre tout premiers. Après ce qu'il se fu un pou retret dou roi, lesse vers lui venir le frein abandoné, tant come il puet dou cheval trere. ²Quant li rois voit que li aferz se comence en tel mainere, il ne mostre pas a celui point qu'il soit de rienz espoenté, ainz s'adrece envers le seignor dou chastel et li done enmi le piz un si grant cop dou glaive que, se li hauberc ne fust bons, bien l'eust mort de celui encontre. ³Li chevalier est si chargiez de celui cop que li rois li a doné que il n'a ne pooir ne force qu'il se poust tenir en selle, ainz vole a terre maintenant. Mes ce que vaut au roi Artus qu'il a le seignor abatu des le comencement? ⁴Il est feruz de toutes parz des autres chevaliers si qu'il le ruent mort, son cheval, desouz lui. Einsint remainit li rois a pié. ⁵Il se desfent trop fierement. Il n'est mie por lui remés qu'il n'ait ici fet grant ocirre, quar trop avoit bien encomencé. Mes ce qu'il li orent ocis son cheval des le comencement li fet bien ici trop grant contraire. ⁶Et qu'en diroie? Il le saillent de toutes parz, mes il se desfent si tres bien tout einsint a pié come il estoit que nus nel veist adonc qui par raisom nel deust tenir a proudoume. ⁷Mes li sires dou chastel, qui ja estoit remonte, li vient corrant tant einsint a cheval come il estoit et li crie aute vois: «Certes, vassal, vos estes mors! A cestui point feroiz vous bien compaignie a la damoiselle que vous voliez delivrer».

58. 9. defendre] d. la X

60. ¹Quant li chevalier a l'escu miparti, qui tout celui afere avoit regardé, voit que li rois est oremais en aventure de perdre la vie, quar tuit estoient a cheval et il estoit a pié enmi elz — et il ne l'aloient pas espargnant, ainz li donoient sovent grandismes cox et des glaives et des espees, si que en la fin ne le peust li rois durer, a ce qu'il estoit toutevoies a pié ne a cheval ne poit remonter — ²quant il voit que li rois est a tel meschief, il ne fet autre demorance, ainz hurte cheval d'esperons pour lui secorrere. Et la ou il voit le seignor dou chastel, il nel meschonoist pas, ainz le reconoist trop bien, et por ce li lesse il corre tout avant ³et li fiert si roidemant en son venir qu'il l'abat dou cheval a terre, et del dur cheoire que cil ot pris, adonc est il si durement estordiz qu'il ne set s'il est nuit ou jour. ⁴Il gist a la terre autresint come s'il fust mors, qu'il ne remue ne pié ne main. Quant li chevalier a l'escu miparti voit q'il a le seignor abatu, il ne s'areste pas sor lui, ainz lesse corre as autres, qui mout entendoient a prendre le roi Artus, se faire le peussent. ⁵Et puisqu'il s'est ferus entr'elz, il ne les vet pas espargnant, ainz en abat un erranment et après le seont. ⁶Et qu'en diroie je? Tant fet li chevalier en petit d'ore, a ce qu'il est proudoum des armez merveillosemant, que il met a desconfiture touz les chevaliers qui en la compaignie dou seignor del chastel estoient illec venus armez. ⁷Et li rois fu ja remonte sor le cheval au seignor dou chastel. Et sachez que tuit cil qui estoient illec venus pour veoir la mort de la damoiselle avoient ja la place delivré de celui point qu'il virent que li set chevalier furent desconfit. ⁸Et il cuidoiert tout certainment que li sires dou chastel fust mors, pource que encore gisoit enmi le chemin si estordiz durement qu'il n'avoit pooir de soi redrechier. ⁹Après ce que li chevalier a l'escu miparti vit qu'il avoit la place einsint delivree et son compaignon remonté, dont il avoit eu toute doutance, il ne fet autre demorance, ainz apelle un des escuiers et li dit: ¹⁰«Prent cel cheval la devant qui s'en vet fuient et monte sus ceste damoiselle, et nous meton au chemin, quar je n'ai plus volenté de demorer ici». ¹¹Li vallez fet tout einsint come si sires li comande, quar il prent le cheval qui avoit esté a un des chevaliers dou chastel et le meïne a la damoiselle et la fet monter. Et il se metent eranment au chemin une autre voie, non mie dedenz le chastel mes une autre par defors. ¹²Adonc recomence a revenir li sires dou chastel d'estordison ou il avoit si longement demoré, et n'estoit mie merveille quar il estoit cheoiz trop felonosemant. ¹³Et quant il se voit si seul enmi le champ et si desconfit et si vilainement menez en toutes manieres, ce est une chose dum il est trop esbaiz et tant doulent en toutes guises qu'il voudroit estre mors orendroit, a ce qu'il avoit esté mout honorez chevalier toutevoies et de grant afaire et redouté de ses

60. 2. le seignor dou chastel] la greignor dou chastel X (v. nota) 9. escuiers] esescuiers X

voisins, autant come chevalier poroit estre. ¹⁴Et li dui chevalier qui de la place se furent partiz en tel guise come je vous ai conté, quant il furent passez outre le chastel, adonc met li chevalier en parole le roi Artu et li dit: ¹⁵«Sire compainz, que vous semble de ceste aventure qui avenue nous est a cestui point?». Li rois, qui trop fieremant estoit doulenz de ce que si compainz l'avoit veu si au desouz, ne set qu'il doie dire, fors qu'il respont au derain: ¹⁶«Sire compainz, sire compainz, cil a cui l'aventure vient belle pour soi si s'en puet rir et esjoir, mes li autres, a cui il meschiet dou tot, s'en test quant bien ne li vient. ¹⁷Sire compainz, de ceste aventure sanz faille poez vous bien rir et faire joie, quar bien vous est avenü, si m'ait Dieus, et bien avez a cestui point mostre apertement que voirement estes vous chevalier d'aut hafere garniz et de haute proesce. ¹⁸Je, endroit moi, ne m'an puis doner ne lox ne pris, quar il m'est ici mescheux si fieremant que bien puis dire que je eusse receu honte et deshonneur, se vous ne fuisse. Et qu'en diroie? J'ai ici esté deshonoré vilainement assez plus que je ne fui mes en tout mon aage». ¹⁹Et quant il a dite ceste parole, il besse la teste vers terre tant doulenz estrangement qu'il ne se puet tenir que les lermes ne li vienent as ieuz qui li corrent tout contreval la face desouz le hiaume.

61. ¹Li chevalier conoist trop bien au semblant que li rois demostre qu'il est corrociez de tout son cuer. Et porce qu'il l'en poisse et reconforter le voudroit li dit il: «Sire compainz, se Dieux me saut, or voi je bien que vous vous corrociez a vous meimes pour noient. — ²Coment? ce dit li rois. Volez vous donc dire que je ne [me] soie a cestui point prouvez si mauvaïsemant come nul autre chevalier dou munde le poroit honteusement faire? — ³E non Dieu, sire compainz, fet li chevalier, je vous mostre que de [ce]stui fet ne vous porroit nul home doner blame qui a reison regarderoit, quar tout premierement vous encomençastes le fet trop si hautement come je le sai et si bien, por voir dire, come chevalier poroit encomencier. ⁴Et quant l'avez si bien encomencé que nul autre chevalier ne le poust avoir mieuz encomencié, se vostre chevaux vous fu ocis, quel reproche vous en puet l'an doner? ⁵Sire compainz, sire compainz, ne vous corrociez de cest fet si durement come vous en mostrez le semblant. Se vous, en chascun perilleux fet, vous v'i prouvez si bien come vous vous prouvastes en cestui, jamés ne serois blasmez par raison de rienz que vous faciez. ⁶Or regardés en vous meimes, se Dieux vous saut. Se mi chevaux m'eust esté ocis einsint come fu a vous le v[ost]re, que peusse je avoir fet? ⁷Or sachez de voir que je n'eusse pooir de faire plus que vous en feistes, mes il ne me fu pas ocis. Pour ce i fis je tant come je i fis: autant en eussiez vous fet, par aventure, se vostre cheval ne vous fust mors». ⁸Tant dit au roi Artus unes paroles et autres

61. 2. ne me soie] ne s. X 3. de cestui] destui X 6. vostre] ure X

li chevalier qui trop estoit [courtois] que li rois se comence a reconforter en soi meimes. ⁹Or est mains irez qu'il ne suelt et einsint, petit a petit, li passe l'ire et le corroz, et chevauche avec li chevalier tout le chemin feré dusqu'après hore de midi, voire dusq'a hore de none. ¹⁰Quant il orent einsint cevauché dusqu'après hore de none, et li rois fu adonc auques apaié de son maltalent, il met adonc li chevalier en paroles et si li dit: ¹¹«Sire compainz, se Dieux vous saut, dont vous vint ceste damoiselle? Dites le moi, se Diex vous doint bone aventure: coment vous l'austes?».

62. ¹Li chevalier respont au roi et dit en tel mainere: «Sire compainz, or sachez bien que je l'ai par ma lance. ²Et certes, je ne voudroie pas avoir cent damoiselles par tel couvenant que chascune des cent m'eust cousté autant come ceste me costa. Et neporquant ja por moi nel savroiz ore comant je l'oi, ne comant elle me vint, quar cestui conte n'appartient pas a moi a cont[er]». ³Li rois se test de cheste chosse, quar il conoist tout clerement que li chevalier ne li conteroit mie ceste aventure, porce que de ses ovres estoit. ⁴Li rois chevauche a ceste foiz en la compaignie del chevalier assez plus voluntiers qu'il ne fesoit devant, car, quant il regardoit la damoiselle qui tant estoit belle estrangiemant que ce estoit une mervoille que de rimirer sa biauté, et il dit bien a soi meimes que de ceste compaignie ne se quiert il a piece mais departir. ⁵Trop li plest la damoiselle et li atalente en toutes maineres. ⁶Quant il orent en tel mainere chevauchié dusqu'après hore de none, et il estoient adonc entrez dedenz une forest mout belle et mout grant et trop delitable a chevauchier, il lor avint adonc qu'il encontrent un chevalier armé de toutes armes qui chevauchoit en la compaignie d'un nain et d'une damoiselle. ⁷Li chevalier estoit granz de cors et bien fet de membres et chevauchoit trop bien et trop seurement. Tout maintenant que li chevalier le voit venir, il dit au roi Artu: ⁸«Sire, conoissiez vous cest chevalier qui rencontre nous vient? — Nani, certes, fet li rois, qui est il? — E non Dieu sire, fet li chevalier, quant vous nel conoissiez, bien poez dire seurement que vous ne conoisseiz mie uns des bons chevaliers qui orendroit soient en ceste monde! ⁹Or sachez bien, sire compainz, que se aventure ne nous aide trop durement a cestui point, j'ai perdu mes dous damoiselles et a pié nos couvendra partir de cestui leu, quar cist chevalier sanz faille est tout le meillor josteur que je veisse ja a grant tens, et si a toutevoies une tele costume come vous porroiz veoir. ¹⁰Il ne covient pas que je la vous die, quar vous la veroiz maintenant». Quant li rois ot ceste parole, il se paroille de la joste. ¹¹Autresint fet li chevalier de sa partie, quar il set bien veraiemant que sanz joster ne se puent il p[ar]tir de celle place.

8. courtois] om. X (v. nota)

62. 2. a conter] acont X 11. partir] ptir X

63. ¹Atant evous entr'elz venir le chevalier armez de toutes armes a tel compaignie come il menoit. Et tout maintenant qu'il est venuz entre les dous chevaliers il lor dit: «Seignor chevalier, ces deus damoiselles de cui sont ellez? ²Sont ellez d'ambeduis vous dous chevalier, ou de l'un de vous deus?». Li chevalier qui portoit l'escu miparti respont tantost et dit: ³«Sire, elles sont moies. Or sachez que cist mienz compainz qui cist est n'i a que faire: elles sont moies ambedeus. — ⁴E non Dieu, biau sire, fet li autres chevalier, or m'est avis, quant vous avés deus damoiselles et vostre compainz n'en a nule, et je n'en ai fors une seule, que ci ne cort mie raison. ⁵Cil qui plus a, si devroit par raison doner a celui qui a mienz de lui. Vous avez eu dusqu'a ci, ce m'est avis, la seignorie de ces deus damoiselles. ⁶Or les me laissez, s'il vous plect: je les voil avoir ambedues, si en avra adon troiz». Li chevalier qui portoit l'escu miparti respont tantost et dit: ⁷«Biau sire, se vous orendroit eussiez trois damoiselles, einsint come vos dites, ne seroit ce trop fieremant contre raison? — ⁸Certes, ce dit li chevalier, de trois damoiselles avoir un seul chevalier, ce seroit trop: de ce m'acort je bien a vous. Mes se vous des deus me donissiez l'une que vous conduissiez, je sai bien que je en ferai puis. ⁹Je retendrai les deus sanz faille qui orendroit sont en vestre balie et donrai maintenant la tierce que je ore conduis a l'un de vous deus». ¹⁰Et celle damoiselle qu'il conduisoit estoit sanz doute la plus laide damoisselle et la plus noire que li rois Artus eust veu de grant tens. ¹¹Et li rois Artu comence a rire quant il entent ceste parole, ausint fet li chevalier qui portoit l'escu miparti. Il ne se puet tenir qu'il ne die tout e[n] riant: ¹²«Si m'aït Dieux, sire chevalier, il m'est avis que je feroie bien trop mauvais changie, se je laissase mes deus damoiselles pour la vestre damoisselle. Mieuз voudroie je estre sanz damoisselle tout mon aage. — ¹³E non Dieu, fet li rois, ce meimes vous di je de moi. — Sire chevalier, fet li autres, pourquoi me blasmez vous ma damoisselle si durement? Certes, ce n'est pas cortoisie. — ¹⁴Et qui seroit li chevalier, fet cil a l'escu miparti, qui la porroit loer? Ja est elle la plus hideuse damoiselle que je veisse en tout mon aage. — ¹⁵Encor vous di je, fet li granз chevalier, que vous dites vilenie, qui si durement la blasmez, et repentir vos en poroiez, qar s'il avenist chose que a prendre la vous convenist et elle fust telle com elle est, ne vous repentiriez vous puis de ce que vous la blasmez orendroit si durement? — ¹⁶Sire chevalier, fet cil a l'escu miparti, que dites vos? Je ne la voil prendre. Mieuз rechevroie une grant honte et un grant lait que je pour moi la preisse. Diex me garde de tel damoiselle avoir!». ¹⁷Lors parole li granз chevalier et dit a celui qui portoit l'escu miparti: «Sire chevalier, je vous dis des le coman-

63. 9. balie] qui ore sont agg. X 11. en riant] eriant X 12. estre sanz] sanz e. s. X

cemant que ce ne seroit mie raison que vous aiez deus damoiselles et je une seule. ¹⁸Or sachez que, pource que en ai le mieuz, voil je le plus avoir. Et qu'en diroie? Je vous demant vous damoiselles: ou vous le me quitez ambedeus, ou vous vos combattez a moi. ¹⁹En autre guise ne puet nostre [afere] finier, quar je les voil avoir ambedeus».

64. ¹Quant li chevalier a l'escu miparti entent ceste parole, il ne set preu que il doie respondre, quar, a ce qu'il avoit ja autre foiz esprouvé le grant chevalier, il li est bien aviz sanz faille que contre lui ne porra il rienz gaagner a la meslie, se aventure ne li aidoit trop durement. ²Et li rois, qui pensif le voit et bien reconoist erramment dedenz son cuer que li chevalier a l'escu miparti n'est mie trop bien aseur a cestui point, li dit il pour reconforter le: ³«Comant, sire compainz, estes vous esbaïz? Si m'aït Dieux, si bon chevalier come vous estes [ne] se devroit espoenter pour mortel home». ⁴Li chevalier se tret arieres quant il entent ceste parole et respont au roi erramment: «Sire compainz, sire compainz, vous parlez mout de teste saine. Vous ne conoissiez pas si bien cest chevalier come je le conois. ⁵Si m'aït Dieux, se vous eussiez esprouvé sa bonté autant come je l'ai esprouvé, et vous eussiez veu de lui autant come je en ai veu aucune foiz, vous tendroiz la teste basse tout autrement que je ne fai, pourquoi vous vous deussiez combattre encontre lui, sire compainz. Ne vous apert cestui proudoume? — ⁶Oïl, certes, ce dit li rois. — Or sachez, fet li chevalier, qu'il est trop meillor chevalier d'assez qu'il ne semble, et vous en porroiz veoir partie avant que nous parton de ses mains». ⁷Lors respont au grant chevalier et li dit: «Sire chevalier, vous me partez un geu non pas en tel mainere come je vouxisse, quar vous dites tout apertement qu'il est mestier que je me combatte encontre vous, ou que je vos doing mes deus damoiselles. ⁸Or sachez bien que de tout ce me souffrisoie trop voluntiers, s'il peust estre. Mes quant il est einsint avenü que autrement ne puis oïssir de vous mains que je ne face ou l'un ou l'autre, je preing l'une partie comant qu'il m'en doit avenir. ⁹Je me voil mieuz combattre encontre vous que je vous rendisse mes deus damoiselles si quitement, quar a mauvastié et a co[ha]rdie le me peussiez atorner, se je les vous rendisse si quitement». ¹⁰Li chevalier respont tantost et dist: «Certes, je les voil conquerere par ma spee ainz que vous le me rendissiez quitement, mes avant que nous nous combatison, or me fêtes une petite bonté, s'il vous plect, qui granment ne vous costera. — ¹¹Quelle? fet li chevalier a l'escu miparti. Dites le moi. Elle puet telle estre que je la vous farai, et telle que je ne la vous ferai mie. — ¹²Or sachez, fet li grant chevalier, que je ne puis

19. nostre afere] vostre X

64. 1. set] fet X 3. ne] om. X 8. avenü] rip. X 9. rendisse] rendissez X ♦
cohardie] cordie L4 10. je les voil] je les je v. X

ici granment demorer, quar j'ai trop aillors afere. Por ce voudroie, s'il vous pleust, que nostre querelle fust partie au plus legerement que nous le porriom faire. ¹³Et [i]e vous dirai en quel mainere nous josterom orendroit ensemble, par tel guise que se vous me poez abatre avant que je vous quit de toutes querelles, vous damoiselles vous remainent tout franchement. Mes se je vous abat avant, les damoiselles si me remainent de ma partie. ¹⁴Einsint sera le nostre estrif plus tost finiez qu'il ne seroit a la bataille, car la bataille ne porra tost estre finiee se nos la voillon encomencier après la joste. Vous plect il que nous nous acordom a ceste chosse?».

65. ¹Li chevalier pense un petit, quant il entent ceste parole, et puis respont: «Sire chevalier, quant il vous plect qu'il soit einsint, et je m'i acort maintenant. Or encomençomes les jostes par tel convenant come vous avez ici devisé. — Bien dites», fet li chevalier. ²Lors s'entrelongant maintenant, qu'il ne font autre demorance, et puis lessent ensemble corre tant come il poent des chevaux trere. ³Et quant ce vint as glaives bessier, il s'entrefirent a celui point de toute la force qu'il ont. ⁴Li chevalier qui portoit l'escu miparti, tout fust il de bon pris et home de grant afere et bon chevalier durement, si li est il avenu qu'il a[n]contre trop meillor de lui et plus fort en toutes maineres. ⁵Et bien apert tout clerement, quar il est de ceste joste feruz si angoisseusement que, voille ou ne voille, a terre le convient aler, tant est estrangement garjez del glaive dou fort chevalier. ⁶Il prent adonc si dur cheoir, quant il est trabuchiez a terre, qu'il en devient si estordis qu'il ne set s'il est nuit ou jour. ⁷Il gist illec einsint come s'il fust mors, qu'il ne remue ne pié ne main se trop petit non. Quant li rois Artus voit la joste et le chevalier que il tant amoît gesir a terre en tel mainere, s'il est doulenz et irez nel demandez. ⁸Or ne set il qu'il doie fere, quar il ne li est pas aviz qu'il peust ceste vergoingne revengier e nulle mainere, puisque li chevalier qu'il tenoit au meillor de lui ne se pot ici contretenir. ⁹Que fara il, quant il conoist q'il n'est si proudoume des armes — ce croît il bien? La ou li rois pensoit a ceste chosse, li granz chevalier, qui sa joste ot menee a fin en tel mainere come je vous ai conté, quant il ot sa pointe finie, il se torne envers le roi et li dit: ¹⁰«Sire chevalier, que vous semble de moi? Ne vous est il aviz que je soie bien garniz de damoiselles, qui trois en ai? — ¹¹Sire chevalier, fet li rois, je voi bien comant la chosse vet. Dire poez seurement que a cestui point enn avez vous deus gaagniez des damoisselles. — ¹²Et non Dieu, fet li chevalier, de ce devez vous estre liez, se je en ai trois damoiselles, quar je vous en serai orendroit plus cortois que ne vous estoit vostre compainz. ¹³Votre compainz en avoit deus et si ne vous en donoit nulle: je vous en serai

13. je] e X ♦ se je vous] se je vous je vous X

65. 4. avenu] si a. X ♦ ancontre] acontre X

bien plus larges, quar de ces trois que vous veez vos en donerai je l'une tantost. — E non Dieu, sire chevalier, fet li rois, je n'en voill nulle, por amor del chevalier a cui elz furent. — ¹⁴Comant biau sire, fet li granz chevalier, cuidez vous donc que je voille [vous] doner l'une des deus damoiselles que je ai conquise orendroit? Or sachez bien que je les voill ambedeus por moi. ¹⁵Mes ceste autre, qui tant est belle et plaisant en toutes maineres, qui est clere et reluisant plus que n'est li soleuz de mai, avroiz vous a vostre partie. ¹⁶Je la vous doing et il me plect bien que vous l'aiez. Pour ce, se elle est bien un pou brunete et elle a passee quarante anz, ne remaint il qu'elle ne soit mignote et cointe. ¹⁷Bien i convendra vostre amor, dan chevalier, se Dieu me saut. Or la tenez, que je la vous doing voluntiers, se Dieux me saut». Lors se tret vers la damoiselle et la prent par la main, et se torne vers li rois et li dit: ¹⁸«Veez la ci, la flor dou munde, sire chevalier, fetes vous liez! Bon jour vous est hui ajorné». Quant li rois voit ce que li chevalier li ofre, il se tret un pou arieres et puis li respont, ausint come par corroz: ¹⁹«Au diables la donez, sire chevalier, que je ne la voill: de ce me deffende Dieux! — Comant, fet li granz chevalier, sire vasal, alez einsint refusant ce que je vous voloie doner? ²⁰Or sachez qu'il est mestier que vous la prenoiz et que vous soiez li suen amis et elle soit la vostre amie. Et se vous ce ne volez faire, il vous estuet combatre a moi tout maintenant. — ²¹E non Dieu, sire chevalier, fet li rois Artus, je croi que vous soies mout proudoume des armes, mes, si voiremant m'aït Dieux, come se vos estes encor trop meillor chevalier que vous n'estes, si me combatroie a vous avant que je preisse ceste damoiselle que vous me volez doner, ²²que certes je ne tendroie a si grant honte d'estre mené dusqu'a outrance par tel chevalier come vous estes come de prendre ceste damoiselle que vous me volez doner. — ²³Comant, fet li granz chevalier, volez vous donc mieuz combatre encontre moi que prendre ceste damoiselle? — Oil, certes, ce dit li rois. — E non Dieu, fet li granz chevalier, vous n'avez mie bon consoil, et vous dirai raison pour quoi. ²⁴Or sachez que, se vous vous combattez orendroit encontre moi, vous avroiz adonc plus honte que vous n'avriez orendroit a cestui point, quar premierement vous serois outrez, et après ce ne remandra qu'il ne vous conviegne toutevois prendre la damoiselle. ²⁵Or donc, ne la vous vaudroit mieuz prendre a miens de honte que de plus? Qu'en diriez vous?». Fet li rois: ²⁶«Or sachez tout veraïement que je ne la prendrai tant come je peusse ferir d'espee: mieuz voudroie morir d'une seule mort que de cent, quar je avroie nouvelle mort toutes les foiz que je la veroie. ²⁷Pour ce me voil je mieuz combatre, comant qu'il m'en doie avenir. — Or vous gardez donc de moi, fet li

14. vous doner] d. X 18. ajorné] ajornee X 26. je ne la prendrai] je ne ne la p. X

granz chevalier, quar a combatre vos estuet. Et certes, je ne me tieng pour chevalier se ceste bataille n'est assez plus tost finée que vous ne cuidez». ²⁸Quant il a dit ceste parole, il s'esloinge dou roi pour encomencier les jostes. Autresint fet li roi Artu, qui n'est pas orendroit si asseur come il avoit esté aucune foiz, quar bien conoist certainement que trop est proudoum le chevalier. ²⁹Quant il sont ambedui aparoillez de la joste, il ne font autre demorance, ainz lesse corre maintenant li uns encontre l'autre. Et quant ce vient as glaives bessier, il s'entrefrent de toute la force qu'il ont. ³⁰Li rois fu de ceste joste si fort chargez que, voille li gentix home ou ne voille, si ne puet il souffrir la desmesuree force du grant chevalier. ³¹Et de tant se puet il venter a cele foiz qu'il ne chei pas trop honteusement, quar il se tint si fort en selle que li archons deriers ront et vola a terre, et li rois Artu autresint. ³²Quant li rois se voit trabuchier en tel maniere, s'il est doulenz et corriciez nel demandez, quar il n'estoit mie souvent acoustumé de trouver autre chevalier qui a terre le peust metre si vistement come cestui l'a mis orendroit. ³³Et neporquant, il se relieve mout vistement, come cil qui mout estoit legiers et forz, et voit que li autre chevalier a l'escu miparti s'estoit adonc redreciez. ³⁴Et li granz chevalier, qui ambedeus les avoit abatus, quant il a fet sa pointe, il se retorne sour le roi Artu et trouve qu'il s'estoit ja relevez et tenoit son escu et avoit sa spee trete et mostroit bien tout apertement que voirement se voloit il defendre, a quelque fin qu'il deust venir de celle emprise.

66. ¹Après ce que li granz chevalier fu retornez desus le roi et il voit qu'il s'apareilloit si fierement de soi defendre, il s'aresta et dit: «Sire chevalier, vos veez bien comant il est. Que pensez vous de faire? ²Avant que nous encommençon nostre bataille, vous faz je bien asavoir que, se vous vous i metez, vous n'en partiroiez puis si honoreement come vous cuidez. ³Pour ce vous loioie, sire chevalier, que, avant que nous en façon plus, que vos preissiez ceste damoiselle, einsint come je ai dit. — ⁴Sire chevalier, fet li rois, et se je la preing, que diables en ferai je? — Qu'en ai je fet? ce dit li chevalier. — Je ne sai que vous en avez fait, ce dit li rois. — E non Dieu, fet li chevalier, et je le vous dirai, quant vous nel savez. ⁵Or sachez que je la chouchoie en mon lit, quant je ne pou[oi]e mieuz faire, et en fessoie mon soulaz. Ausint poroiez vous ore faire, dan chevalier, s'il vous plect. — Que je la chouce avec moi? fet li rois. Dieux me garde de celle vergoingne. ⁶Avant fusse je mors que je tel diable meisse en mon lit. — Vassal, ce dit li chevalier, quant vous savroiz qu'elle set fere, vous ne seroiz par aventure si orgueilleuz encontre lui come vous estes orendroit: ⁷prenez la, par le mien consoil! — Vous dites des paroles pour noient.

31. il se tint] il il se t. X

66. 5. pouoie] poue X ♦ avec] ance X 6. seroiz] sau seroiz X (salto all'indietro sul precedente savroiz)

Ja, se Dieu plest, ne serai mis a tel vilté que je la preingne: mieuz voudroie la teste perdre. — ⁸Vassal, dit li granz chevalier, par celle foiz que je doi vous, de teste perdre n'est pas geu. Or sachez tout veraiemant que se je puis vous par ma force mener a terre, que je eusse le pooir sor vous de trenchier vous la teste, et voiez après venir la spee d'en haut toute nue pour faire vous voler la teste, ⁹je sai de voire que a celui point prendroiz vous bien la damoiselle et voluntierz, se elle estoit cent mile tanz plus laide que elle n'est. — Sire chevalier, fet li rois, encor ne sui je a ce menez. — ¹⁰Et pour ce parlez vous einsint, fet li chevalier, quar vous ne savez encor par aventure que fet celle tres grant pooir. Puisque vous savroiz que ce est, adonc feroiez vous ma proiere par aventure et ma requeste, mes avant nel volez faire. ¹¹Or vous gardez hui-més de moi. Il est mestier, se Dieu me saut, se je onques puis, que vous prenoiz la damoiselle que vous avez tant reffusee».

67. ¹Quant il a dite ceste parole, il s'aparoille d'assailir le roi Artus. Et il estoit ja descenduz de son cheval, quar encontre celui [qui] a pié estoit ne se vouxist il en nulle mainere combatre, tant come il fust a cheval. ²Quant il s'est aparoillez de la bataille, il lesse maintenant corre vers le roi Artus, l'espee droite contremonte, et cil, qui auques le redoute, quar bien conoissoit ja tout apertement que voirement estoit il chevalier de trop grant force, s'aparoille de soi deffendre et de garder la soe honor, s'il onques puet. ³Einsint encomence l'estrif des deus chevalier enmi le chemin droitement. ⁴Li rois, qui mout estoit hardiz et de grant cuer, comence premierement celle barate et ameine un grant cop d'en haut de si grant force come il a et fiert le chevalier sor son escu, qu'il en abat une grant piece, ⁵mes de celui cop que il dona au chevalier, adonc an reçut il tost le gueredom. Li chevalier, tantost come li rois a feru, ameine un cop et fiert le roi desus le hiaume de si grant force come il a. ⁶La spee ert bone, et le chevalier ert trop forz et si savoit ferir d'espee merveillosement et si estoit greignor du roi pres d'un grant pié. ⁷Li rois, qui sent le cop descendre desus le hiaume, en est garjez si durement et si fort estonez qu'a poine se puet il tenir enn estant, tant le cervel li est troublez dedenz la teste: a piece mes il ne senti cop de tel force come fu cestui, et pour ce se tret il arieres einsint come il puet. ⁸Il ne voudroit pas voluntiers que li chevalier li donast orendroit un autretel cop come fu cestui, qar il le metroit a la terre, ce set il tout certainement. ⁹Por ce se tret il un petit arieres quant il ot receu le premier cop, et li chevalier, qui mout estoit aprenanz et qui bien reconoist en soi meimes que li rois est grevez sanz faille, parole adonc et dit einsint au roi Artu: ¹⁰«Sire che-

8. mener a terre] menei ate[...] X (macchia, v. nota § 66-7)

67. 1. qui] om. X 3. droitement] droite|temant 7. tant] t[.]nt X (macchia)

valier, encore vous otroie en droit consoil que vous preissiez la damoiselle avant que pis vous enn avenist». ¹¹Li rois, quant bien conoissoit de voir que rencontre cest chevalier ne poroit il durer au loing aler et tost i poroit perdre la teste, s'areste quant il entent autre foiz la requeste du chevalier. ¹²Et cil, qui arester le voit, li dit: «Sire chevalier, pourquoi vous tenez vous ore si fiere-mant a encombré de ceste damoiselle prendre? Ja la poroiez vous donier a un autre, s'il vous plaira, tout ausint come je la vous doing orendroit. — ¹³Certes, sire chevalier, fet li rois, or sachez tout certainment que de ma bone volenté ne la prendrai je mi onques voiremant. ¹⁴Pource que je voi que je ne poroie en autre mainere finier a vous ne partir moi de vous mains se je la damoisele ne prenoie la prendrai je par tel couvenant que vous orendroit me diroiz vostre non et qui vous estes et de quel lignage, ¹⁵quar, se Dieux me doint bone aventure, je voi en vos si haute proece et si merveilleuse que je ne cuidasse pas legere-mant qu'il eust orendroit en tout le roiaume de Logres nul si bon chevalier come vous estes». ¹⁶Li chevalier respont tantost et dit au roi Artu: «Certes, sire chevalier, bon chevalier ne sui je pas, et se vous le cuidez, deceuz estes villainement. ¹⁷Trop en a de meillors par le roiaume de Logres que je ne sui. Et neporquant, porce que vous a moi vous acordez de la damoisele prendre et vous avez talent de savoir mon non et qui je sui, je vous ferai tel cortoise que je de ce vous dirai la verité. ¹⁸Or prenez la damoiselle tout avant!». Et li rois la prent mout corociez estrangiemant. Et quant il l'a prise et il la tient en sa saisine, li chevalier li dit adonc: ¹⁹«Sire chevalier, or sachez que je ai nom Febus. Ce ne sai je se vous oïstes onques parler de mon nom. Li bon chevalier, li vailanz, la merveille des morteux homes, celui proprement que l'an appelle Galeot le Brun fu mi peres, ce sachez vous». ²⁰A ceste parole respont li rois et dit: «E non Dieu, sire chevalier, de Galeot le Brun oï je ja parlé a plusors homes, et bien oï dire sanz faille que ce fu tout le meillor chevalier qui a son tens portast armes. ²¹Mes de vous, a la verité dire, n'oï je encore parler se petit non. — ²²Certes, biau sire, fet li chevalier, se vos de moi n'oïstes encore grantment parler, ce n'est mie trop grant merveille, que je vous proumet loiaument que encore a mout pou de tens que je començai a chevauchier entre les chevaliers erranz. ²³Por ce ne poroie je encore estre de si grant renomee. — Et combien puet avoir de tens que vous fustes chevalier nouvel? — Certes, sire, respont Febus, encore n'a pas trois ainz passez. — ²⁴Et quelle aventure vous aporta ore en ceste contree? ce dit li rois. — Certes, sire, respont Febus, je le vous dirai quant savoir le volez. Or sachez que je voiz querant un chevalier mout preuz des armes ça et la. ²⁵Et si en ai ja chevauché et travaillé, et le travail que je en ai ja fet tenisse je a trop bien employé, se aventure vouxist que

10. otroie en droit consoil] [...]en d. c. [...] X (macchia) 12. arester] [...] X (macchia)

je le trouvasse, ²⁶mes einsint m'est adés avenu, puisque je me p[ar]ti de ma contree, que je ne trouvai home ne feme qui m'en seust a dire nouveles ne bones ne mauvaisses. ²⁷Einsint a je adés trauvaillé, et pour noient. Et encor travaill en tel guise, quar je vois toutevoies, ne riens ne puis trouver et encor ne le trouvasse je. Si me fust ce un grant reconfort et trop mienz m'anuiast la queste ou je me sui mis, ²⁸se je peusse aucuns trouver qui me seust a dire aucune nouvelle, mes je n'en puis trouver null, et ce est une chose qui trop fieremant me desconforte en ceste queste».

68. ¹Quant Febus ot einsint parlez, li rois parole et dit après: «Or me dites, biau sire, celui chevalier que vos alez querant et dont vous ne poez oïr novielz, savez vous quel escu il porte? – ²Oil, certes, ce dit Febus, se il n'a son escu changé puisque je le vi, or sachez tout veraiemant qu'il porte un escu tout a or sanz autre taint. – ³E non Dieu, fet li rois, de celui chevalier ai je ja bien oï parler autre foiz a maint chevalier qui trop li donent grant pris et grant lox de chevalerie, non pas que je encore le veisse, si com je croi. – ⁴E non Dieu, biau vasal, dit Febus, donc poez seuremant dire que vos encor ne veistes le meillor chevalier dou monde, quar bien sachez certainemant qu'il n'a orendroit en cest monde nul si bon chevalier com est celui. – ⁵E non Dieu, fet li rois, ceste parole que vous avez orendroit dite dient maint autre chevalier, et ce est ce pour quoi je le verioie trop voluntiers, se Dieux vouxist que aventure l'amenast entre mes mains». ⁶Quant li chevalier a l'escu miparti, qui tout cest parlemant avoit oï, ot entendu que Febus parloit du chevalier a l'escu d'or, il se met adonc plus avant et dit: ⁷«Dites moi, sire chevalier, combien puet avoïre que vous ne veistes celui bon chevalier que vous alez querant? – Certes, biau sire, dit Febus, il puet bien avoïre demi an et plus encore. – ⁸Et quel part le cuidez vous trouver? fet li chevalier. – Si m'ait Dieux, fet Febus, de ce ne vous sai faire certain: cevauchent vois as aventures de jour en jour querant le toutevoies. – ⁹Certes, fet li chevalier a l'escu miparti, autresint le vois je querant come vous le querez, et je vous proumet que je l'ai ja si longuemant quis en unes contrés et autres que vous tendriez a grant merveille se vous en saussiez le travaill que je en ai souffert. ¹⁰Issi voiremant m'ait Dieux come il a demi an compli et plus encore que je nel finai de querere, assez l'ai quis et cerchié, mes trouver nel poi encor ne nouvelles n'en poi oïr qui grantment me peussent plaïre. ¹¹Et neporquant, assez trouvai chevaliers, dames et damoiseles qui l'avoïent veu, mes nus ne me pot enseigner en quel part je le peusse trouver certainemant.

26. parti] pti X ♦ trouvaï] trou[...]i X (macchia) 27. adés] ad[...] X (macchia)

68. 1. novielz] novie[.]z X (difficile dire se si tratti di -i- o -l-) 6. ot] et X

69. «— ¹Sire chevalier, dit Febus, puisque vous avez tant quis le chevalier a l'escu d'or, ne encore ne [le] trouvastes, bien poom seuremant dire que bien poom compaignon estre, quar dusqu'a ci avez vous bien dou tout travaillé por noient, et je autresint. ²Mes tant me dites, s'il vous plest, savez vous encore comant a nom le chevalier que vous alez querant? — Oïl, bien, fet li chevalier, cil qui le conoissent l'apellent Guron le Cortois. — ³E non Dieu, fet Febus, vous dites bien verité: einsint a il non voiremant. Mes or me redites: que baaez vous a fere? — ⁴Certes, fet li chevalier a l'escu miparti, je baasse bien voluntiers a recouvrer mes deus damoiselles, se je le peusse faire, mes il m'est bien aviz sanz doute que ce seroit trop fort chose a moi a ce que vous estes trop meillor chevalier que je ne sui voiremant. ⁵Porce que je ne le voill encore lessier dou tot en tel mainere, quar je ai esperance que vous me feçoiz tant de cortoisie que vous les me rendoiez, voill je cevauchier avec vous quel part que vous iroiz, dusqu'a tant que je sache certainement se je les perdrai dou tout ou non. — ⁶Or sachiez de voir, dit Febus, que je ne les vous rendrai, se vous sor moi ne les gaaigné par force d'armes». ⁷Li rois, qui tant est corociez de ceste aventure qui ci li est avenue, ne set qu'il doie dire, mes il escoute tout lor parlement. Et Febus demande au chevalier a l'escu miparti: ⁸«Dites moi vostre nom, se Dieux vous doint bone aventure. — Certes, respont li chevalier, quant vous le volez savoir, et je le vous dirai, quar bien sachez que a si bon chevalier come vous estes ne doie pas escondre mon nom. ⁹Or sachez que je ai nom Kehedins li Blans. Ce ne sai je se vous oïstes onques parler de moi: li rois Hoel, qui sires est de la Petite Bretagne, si est mi freres charniauz». ¹⁰Or sachent tuit cil qui cest conte escoutent que pour honor de cestui Kehedin propremant fu apellez par cestui non meimes Kehedins li freres Yseult as Blances Mains, cil qui morut puis pour les amors a la roine Yseult, einsint come nostre Livre dou Bret le devise tout apertement. ¹¹Quant li rois Artus entent ceste nouvelle, il est assez plus liez et plus joianz qu'il n'estoit devant, quar orendroit reconoist il celui qu'il ne conut onques mais, et si en avoit mainte foiz oï parler et bien avoit ja oï dire a plusors chevaliers que Kehedinz li Blanz sanz faille estoit un des bons chevaliers dou munde et si cortois de toutes choses qu'a poine peust l'en trouver si cortois entre les chevaliers erranz. ¹²Orendroit a il avantage, quar il conoist certainement ces dous chevaliers. Et [quant] li dui chevalier se furent acordé a cevauchier ensemble, pource que ambedui aloient querant Guron, il dient: ¹³«Montom oïmais, quar assez avom demoré en ceste place: il est bien tens de cevauchier!». Lors montent ambedui. ¹⁴Li rois meimes estoit ja montez et son escuier autresint, qui mout estoit liez et joianz de ce qu'il voit que si sires estoit eschampeiz si sauvemant

69. 1. ne le] ne X 4. le peusse] les p. X 12. Et quant li] et «ib li X

des mains Febus: il en avoit eu trop grant doutance. ¹⁵Quant li dui chevalier furent montez, il dient au roi: «Sire chevalier, que voudriez vous faire? – Seignor, fet li rois, or sachez que, s’il vos plest, je voill cevauchier en vostre compaignie dusqu’a tant que aventure nous departe. ¹⁶Or sachiez tout certainement que, tout einsint come je sui orendroit encombrez de ceste damoiselle que je conduis, ausint encombrerai je un autre chevalier, se je puis, avant que je me parte mais de vostre compaignie. – ¹⁷Or i para que vous feroiz, ce dit Febus, je croi bien que vous la cuideroiz a tel chevalier leisser qui la vous lessera». Atant se metent tuit troi au chemin a tel compaignie come il avoient et cevauchent en tel mainere dusqu’a vers hore de vespres. ¹⁸Li rois est tant firemant corociez de la damoiselle qu’il cunduit qu’il ne set quel consoil il doie prendre de ceste chose. ¹⁹Quant il orent tant cevauché entr’elz troiz tout le grant chemin de la forest que hore de vespre estoit passé, adonc lor avint qu’il encontrerant un chevalier armés de toutes armes qui menoit en sa compaignie un seul escuier. ²⁰Et se aucuns me demandoit qui li chevalier estoit, je diroie que ce estoit Kex le seneschax, un des plus hardiz chevaliers dou monde. ²¹S’il eust proece selonc l’ardimant, bien le peust l’en tenir pour un des bons chevaliers de tout le monde. Quant il vit les trois chevalier aprochier, il s’aresta enmi le chemin et comença a penser s’il les apelleroit de joster ou non. ²²Au derian s’acorde il a ce que a joster ne les apelleroit il pas a ceste foiz, pource [que], s’il en abatoit un, il le convendrait puis joster as autres, et a poine poroit il resister a trois chevaliers qu’il n’en fust abatuz de l’un, ²³pourquoi il fussent point proudoumes. [Si] s’en vult il souffrir a ceste fois, ce dit il bien a soi meimes. La ou il pensoit sor le chemin en tel guise come je vous cont, atant evous sur lui venir les trois chevaliers. ²⁴Et li rois, qui ne le conoist mie, quar missire Kex portoit adonc autres armes que les soes, le salue premierement et puis li dit: «Sire chevalier, bien vous est venu. Or sachez que fortune vous vult bien! – ²⁵Sire chevalier, fet Kex, Dieux le voille. Se fortune me vult bien, je sai de voir qi mi fet iroient trop mieuz que il ne vont. – ²⁶Sire chevalier, fet li rois, avriez vous hardimant de prendre une belle damoiselle que l’a[n] vous donast? – Comant, dit Kex, estes vous donc entre vous si encombrez de vous damoiselles que vos les volez einsint doner pour noiant? – ²⁷Certes, fet li rois, nous ne somes pas encombrez, mes pource que nous veom que vos estes chevalier errant et cevauchiez si priveement et sanz damoiselle, ce que chevalier errant ne doit fere, vous en doneron nous une, s’il vous plest. Et ce feron nous pour honeur de vous et de chevalerie. – ²⁸Sire chevalier, respont Kex, et de damoise, que feroie? Je sui touz

20. hardiz] bardiz (?) X 21. un des] [...]des X (*macchia*, v. nota) 22. pource que] p. X 23. Si s’en vult] s’en v. X 26. que l’an] qu[...] la X (*macchia*)

encombrez de conduire moi seul par ceste contré, quar trop i a felons passages et anieus, et vous volez que je prende damoiselle? ²⁹Je n'en voil nulle a cestui point, si Dieux m'ait. — Sire chevalier, fet li rois, tant avez dit a cestui point que je conois certainement que vous n'estes mie chevalier errant, quar se vous fuissiez chevalier errant ja n'eussiez refusé damoiselle. ³⁰Vous estes sanz doute aucun mauvais chevalier de Cornoaille, qui cevauchiez en tel mainere pource que vous ne soiez coneuz. Et pour ce t'a je bien volonté de faire vergoingne et honte. Or tost, gardez vous de moi, quar venus estes a la meillè.

³¹Quant missire Kex entent ceste parole, se comence a rrire trop fierement. Et quant il parole, il dit au roi Artus: «Comant, fet il, sire chevalier, se Dieux vous saut, quelle acheison trouvez vous orendroit de combatre encontre moi?

— ³²Pour ce, fet li rois, que vous estes chevalier erranz. — E non Dieu, fet missire Kex, ceste est une couverture que vous avez orendroit trouvé, si n'est pas la droite aceison. ³³Pourquoi vos volez ceste bataille encomencier encontre [moi] et quelle en est l'acheison?». Fet li rois: «Puisque vous la savez si bien, dites le moi! — ³⁴E non Dieu, fet missire Kex, vous vous volez combatre enco[n]tre moi pource que je ne voill prendre vostre damoiselle. — ³⁵Certes, fet li rois, vous dites verité: pour ce me voill je combatre a vous voirement, ou vous la prendroiz».

³⁶Missire Kex, qui a celui point estoit assez plus travaillez que il ne vouxist, quant il entent que a combatre li covient encontre le chevalier ou prendre la damoiselle, il respont et dit: ³⁷«Or sachez, sire chevalier, qu'a cestui point n'a je nul desir ne nulle volonté de prendre damoiselle, quar certes je me sent orendroit assez plus travaillez que je ne vouisse.

³⁸Et nepourquant, pour eschever ceste bataille dont vous me chargiez, la prendrai je. Or tost, baillez moi celle damoiselle dont vous estes si e[n]combrez».

³⁹Quant missire Kex ot parlé en ceste mainere, li rois se torne maintenant envers la damoiselle qu'il conduisoit et dont il se tenoit a mout deceu qu'il l'avoit tant conduite et la prent par la main, et dit a missire Kex: ⁴⁰«Tenez la, sire chevalier, la damoiselle qui passe de biauté sanz faille toutes les damoisselles de la Grant Bretaigne. Bon jorz vous est hui avenuz, se Dieu me saut, quant vous avez telle damoiselle gaaigné».

⁴¹Quant missire Kex voit la damoiselle, qui tant estoit et laide et horrible en toutes guises que ce estoit un grant hanui de veoir la damoisele, il est irez trop durement. Et de grant coroz qu'il a respont il au roi en tel guise: ⁴²«Chevalier, vostre soit la damoiselle, que je la vous quit dou tout, que je ne voill telle damoiselle. A touz diables la comant, que je ne la voil prendre — ⁴³E non Dieu, sire, fet li rois, vous ne la poez refuser, quar vous me creantastes orendrot de prendre la. Mestier est

28. anieus] anieuses X ♦ prende] prendre X 31. se] sese X 33. moi] om. X
34. encontre] encore X 38. encombrez] ecombres X

que vos la prenez, ou vous vous combatiez a moi tout maintenant. — ⁴⁴E non Dieu, fet missire Kex, avant me combatroie a vous que je la preisse. Dieux me gart qu'elle ne me remaigne. — Puisque vous estes acordé a ce, ce dit li rois, or fesson bien entre nous pour nostre querele finier plus isnelemant. — ⁴⁵Dites tost, fet missire Kex, si oirai ce que vous volez dire. — Nous josteron ensemble, ce dit li rois, par tel covenant come je vous deviserai. ⁴⁶Se vous me poez abatre avant que je vous, je vous quit de toutes querelles, et la damoiselle me remaigne adonc. Mes se je vous puis metre a t[er]re, la damoiselle vous remandra de vostre part, et je m'en irai le mien chemin».

70. ¹Quant missire Kex ot cest plet, il respont erranment au roi et dit: «Dan chevalier, se Diex me saut, vous [me] metez en tel querelle dont je me souffrisse trop bien. ²Et nepourquant, puisque je voi que il ne puet estre autrement, et je me acort bien entre moi et vous pour tel mainere come vous dites voiremant. ³Mes je voill que vostres compaignons me creantant avant que je joste que, se je vous abat par aventure, qu'il ne me feront puis force encontre ma volenté de joster a elz. — ⁴Certes, ce dit li rois Artus, je vous creant bien por elz». Et quant la chosse est atant mennee q'il n'i ot fors de leisser corre, il ne font autre demorance, ainz leissent corre maintenant li uns encontre l'autre tant come il puent des chevaux traire. ⁵Et quant ce vient as glaives baisier, il s'entrefirent adonc de toutes lour forces qu'il ont. Missire Kex est si chargiez de celui cop, a ce que li rois i mist bien adonc toute sa force, qu'il n'a pooir ne force qu'il se peust tenir en selle, ainz voille a terre maintenant. ⁶Quant li rois le voit trebuchier, il s'en vet outre, qu'il ne s'arestes pas sor lui. Et quant il ot parforni son pondre et [se] fu mis au retormer, il voit adonc que missire Kex se relevoit, come cil qui legiers chevalier estoit et mout fort de son cors. ⁷Quant li rois le voit relever en son estant, il le crie de si long come il puet: «Sire chevalier, il m'est aviz que vous avez gaaigné la damoiselle, et elle est vostre sanz faille desoremais». ⁸Missire Kex respont adonc et dit trop durement irez: «Sire chevalier, voiremant est elle moie, la damoiselle. Ce ne puis je pas contredire desoremais. ⁹Ausi grant feste come je ai de cestui gaaigne que je ai fet en ceste place vous envoit Dieux prochiainement le guerdon, si savroiz bien puis come je sui liez de ceste chosse». ¹⁰A la deriaine parole qu'avoit dite missire Kex le reconuit li rois Artus tou maintenant. Se aucuns me demandoit comant il le reconnut, je dirai a l'espee que il portoit, que li rois Artus meimes li avoit donee. ¹¹Et quant il li vint a doner la damoiselle, li rois li dit en soriant: «Missire Kex, or la tenez, la damoiselle, et la gardez bien, que certes

46. terre] tre X

70. 1. vous me metez] vous metez X 5. de celui] de | de c. X 6. se] om. X
(v. § 384.3)

ja ne vendroiz en leu ou vous ne soiez honorez pour acheison de ceste damoiselle. — ¹²Sire, respont missire Kex, or m'est aviz que vous me conoissiez. Sanz faille je prent ce que vous me donez, puisque adès li proudoume me feront honneur pour acheison de ceste damoisele. ¹³Mais se elle seust assés dire honte et villanie aucune foiz as chevaliers que je encontrei desoremais, or me seroit un grant solaz. Rire me feroit par aventure aucune foiz que je n'an avroie talent de rire».

71. ¹Quant la damoiselle entent et ot que elle est venue entre les mains de monseignor Kex le seneschal, dont la gent en disoient tant mal et villanie, elle en est fieremant corrocie. ²Et missire Kex, qui de sa part est encore plus corrociez, ne se puet tenir qu'il ne die: «Damoiselle, savez vous nulle chose? — ³Certes, oïl, missire Kex, ce li respont la damoiselle, voiremant sa je assez plus que vous ne cuidez. — Et de ce que vos savez dites moi aucune chose, se Dieux vous saut. — ⁴Certes, fet elle, voluntiers. Or sachez que je sai de voir que vous estes sanz faille le plus vil chevalier et le plus mauvais et le plus fauz que l'an peust orendroit trouver en tout le rouiaume de Logres, ⁵ne que vous ne trouvez si mauvais chevalier en leu ou vous vieingnez qui ne vous abate a la terre en quelque leu que aventure vous aport, ⁶et que vous estes coart et le plus vil, que vous n'avez rienz fors que la lange, qui tout jourz est aparaille de dire mal et vilanie. ⁷Missire Kex, tout ce sai je bien voiremant, ne ja ne vendroiz en hostel ou je n'aille de vous chantant ceste chançon et plus encore, qar je sai plus que vous ne cuidez». ⁸Et quant missire Kex ot cest plet il ne set que il die et or est plus esbaiz d'assez qu'il n'estoit devant. Et le rois, qui penser le voit, li dit en soriant: ⁹«Missire Kex, vous [est] il aviz que assez sache la damoiselle? Et vous avez pooir et doute qu'elle ne seust rienz! ¹⁰Mais elle set mout bien et n'est pas dou tout si simple come vous cuidez. — Sire, ce dit missire Kex, ele set trop! A maleur sache elle tant, quar hontez en sui et vergoingniez, ¹¹ce voi je bien, se [par] pechié l'amoine avec moi, quar elle set mout plus de moi que je meime ne savoie. Et ceste n'est mie damoisele, ainz est le dyable d'enfer propremant! ¹²Et Dieux, par sa misericorde, me delivre de li et de sa compaignie. — Ha! mauvais chevalier, vous ve tenez a encombré de ma compaignie? ¹³Se Dex m'ait, mal le deistes, quar encore vous em pentirois chieremant, se Dieux me doint bone aventure. — ¹⁴Damoiselle, ce dit missire Kex, avez vous dit que je conois que je ai a cestui point trouvé mestre? Or sachez bien que je ai de vous greigneur pooir que je n'oi onque-mais de dame ne demoiselle que je trouvasse. — ¹⁵Si m'ait Dieux, fet elle, vous avez raison, que vous avez ja tant dit de moi a cest comencement. Se je

12. honneur] boneur X

71. 9. est] om. X 11. par pechié] pechié X

ne vous faz repentir a brief terme, il m'en pesera mout chierement. — ¹⁶Ha! damoiselle, ce dit missire Kex, Dex par sa pieté l'e[n] vous envoit Brehus sanz Pitié, le bon pere des damoiselles. Si m'aît Dieux, il vous savroit chastier et doner vous vestre raison, come il fet a toutes les autres. Et Dex vous l'envoït prochieinment, einsint come il vous est mestier». ¹⁷A celui point tout droitement que li rois escoutoit cestui parlemant de monseigneur Kex et de sa damoiselle, et il en fessoient entre elz trop grant joie et trop grant soulaz, atant evous d'els aprochier un chevalier armés de toutes armes, qui s'en aloit vers Chamaalot au plus droit que il le puet faire. ¹⁸Et se aucuns me demandoit qui li chevalier estoit, je diroie que ce estoit Bandemagus, li bon chevalier preux et ardiz et qui des armes savoit mout selonc son aage. ¹⁹Et le rois le reconnut tantost come il le vit, quar celui chevaux sour quoi il seoit adonc li avoit il mandé encor n'avoit mie lonctemps. ²⁰Missire Kex ne le reconut de rinz, ne Bandemagus lui, ne li autres meimes ne le reconoient. «Ha! damoiselle, fet missire Kex, or sachez de voir qu'il me pesera mout chierement se vous orendroit ne remanez el cumduit de [ce]stui chevalier qui ci vient. — ²¹E non Dieu, fet la damoiselle, encor me pesera il plus se je ne vous vois abatre une autre foiz, et pour acheison de moi. Et a cest encontre, par aventure, vous ve ronproiz le col ou le braz, si que je vous ferai puis porter en une bere chevaleresche!».

72. ¹Missire Kex ne set qu'il doie dire quant il entent ceste parole, quar il voit tout apertement que la damoiselle li set bien respondre mot a mot et que de parler ne puet il sour li gaaigner une maille. ²Et il a tant la damoiselle entendue que Bandemagus est venuz dusqu'a lui, et il li dit: «Dex vous saut, sire chevalier, et bone aventure vous doint. — Biau sire, fet missire Kex, n'estes vous chevalier erranz? — Oïl, fet Bandemagus. — ³Comant alez vous si priveement que vous ne menez en vostre conduit aucune dame ou damoiselle qui vous face compaignie? — Mes pourquoi, sire chevalier, me fe[tes] vous ceste demande? ⁴Avez vous en volenté de doner moi aucune damoiselle? — Oïl, certes, ce dit missire Kex, se vous l'ousez prendre. — E non Dieu, fet Bandemagus, ja damoiselle ne me donroiz que je ne prene voluntierz». ⁵Et a celui point n'avoit il pas encor veu la damoiselle que missire Kex li cuidoit doner, quar elle estoit ilec descendue entre deuz arbres, ne sai pourquoi. ⁶Les autres deus damoiselles veoit il bien tout clerement, et l'une de celz cuidoit il bien avoir. Missire Kex le reedit une autre foiz: ⁷«Sire chevalier, avez vous si grant volenté de p[re]ndre damoiselle, se je la vous voloie doner come vous en fetes

16. l'en] le X ♦ des] rip. X 17. entre elz] encontre e. X 20. de cestui] destui X

72. 2. vous doint] Dieux, fet Bandemagus agg. X 3. fetes] fe X 7. prendre] pndre X

le semblant? — Oïl, si m'aït Dieux, fet Bandemagus, pourquoi ne la prene-roie? ⁸Ja sa je bien conduire une damoiselle par un mal passage. Or la me donez, sire chevalier, la damoiselle, et se je ne la preng, adonc m'apellez de couvenant. — E non Dieu, fet missire Kex, et je la vous donerai. ⁹Et main-tenant apelle la damoiselle. Et quant elle est avant venue, et il dit a Bandemagus: ¹⁰«Sire chevalier, veez ici la damoiselle que je vous voil doner. Tenez la, qu'elle est bien vostre desoremais, et gardez la bien».

73. ¹Quant Bandemagus voit la damoisele si laide riens com ele estoit, il est si fierement esbahiz qe il ne set qe il doie dire. Il se retret un pou arrieres, et quant il parole il dit a Kex: ²«Sire chevalier, or sachiez qe ceste damoisele ne voil ge pas garder por vos. Ge me vou-droie mielz souffrir dusq'a un an de damoisele qe ge ceste preisse por moi. ³Einsint com vos l'avez ici conduite, la conduissiez en avant. Ge ne la voill, ançois la refus ge del tout. — ⁴En non Deu, fet messire Kex, ce ne poez vos mie faire par reison, qar vos savez bien qe vos me pra-meistes de prendre la damoisele qe ge vos donroie, et ge vos doing ceste. ⁵Por ce estuet qe vos la preignoiz. — Sire chevalier, fet Bandemagus, q'en diriez? Or sachiez qe ge ne la prendroie ne por vos ne por autre chevalier, se force ne le me feissoit fere. — ⁶En non Deu, fet messire Keu, et ge vos en ferai force, que avant me combatai ge a vos qe vos ne la preissiez. — ⁷En non Deu, fet Bandemagus, e ge m'en combatroie atant a tel chevalier com vos estes et a un autretel avant qe ge la preisse. ⁸Et se vos ore de combatre avez si grant volenté com vos me dites, venuz estes a la meslee errament, qar ausint en ai ge grant volenté». ⁹Messire Kex respont tout maintenant et dit: «Dan chevalier, puisque ge voi qe vos avez tel volenté de joster encontre moi, començom orendroit cest estrif entre moi et vos en tel guise com ge vos dirai. ¹⁰Se il avient par aventure en tel maniere qe vos abatre me peussiez de la premiere joste, ge vos qit de toutes qereles: ge ne vos demandrai plus. ¹¹Mes s'il avient en tel guise qe ge abatre vos puisse avant qe vos moi, il couvendra adonc qe vos preignoiz ceste damoisele. — ¹²Certes, ce dit Bandemagus, ge m'acort a cest cou-

73. 1. dopo lacuna segnalata al § 46.3 riprende il testo di L4, f. 174ra; no nuovo § X ♦ est] om. X ♦ a Kex : ²«Sire chevalier] Ha! missire Kex X 2. garder] gardez la X 4. mie faire*] mie L4; faire et X 5. q'en diriez] om. X ♦ ne por vos ... chevalier] por nulle chose X ♦ feissoit fere] fere X 7. atant ... preisse] avant a vos que je la preisse et a un autretel com vous estes X (inverte l'ordine delle frasi) 8. volenté] talent X ♦ qar ... volenté] om. X 9. de joster] et de combatre agg. X ♦ guise (guisse X)] om. L4 10. par aventure] om. X 11. adonc] sanz sanz faille agg. X

venant trop volentiers. Or vos gardez de moi, qe ge vos abatrai sanz faille, se ge onques puis, qar ge ne voudroie en nulle maniere qe la damoisele me remainsist a ma partie». ¹³Après cestui parlement il n'i funt autre demorance, ainz leissent corre li uns encontre l'autre tant com il poent trere des chevaux. ¹⁴Et qant ce vient as glaives beissier, il s'entrefierent si a celui point de toute la force qe de cele joste avint ensint a cele foiz qe messire Kex, qi n'estoit mie d'assez si bon chevalier com estoit Bandemagus, ne puet pas soustenir le cop qe cil li done sor son escu, ainz voide les arçons et vole a terre mout feleneusement. ¹⁵Qant la damoisele voit Kex trebuchier a terre, ele s'escrie: ¹⁶«Messire Kex, or sunt deus foiz: se la tierce foiz vos avient, il ne puet estre en nulle guisse qe vos ne vos rompez adonc le col ou le braz, ou ambedeus par aventure. ¹⁷Ces deus encontres avez ja eu por moi, or gardez qe pis ne vos viegne encore». ¹⁸Messire Kex, qi ja s'estoit relevez, ot bien entendu mot a mot les paroles de la damoisele, dom il devient adonc com tout de maltalent. ¹⁹Il ne dit mie adonc qanke il pense a cele foiz, mes la ou il voit son cheval, il vient cele part tout droit et le prent et remonte sus. Et qant il est remonte, il se torne envers la damoisele et li dit: ²⁰«Ore conois ge bien qe vos estes plus lie de mon corrouz qe de ma joie. – Certes, fet ele, vos dites bien verité. – Ore damoisele, se ge ne sui avant brief terme liez et joianz de vostre honte, ge ne me pris se pou non. – ²¹Messire Kex, ce dit la damoisele, tex cuide fere a autrui honte qi la soe porchace adés. Gardez qe il n'aviegne de vos en tel mainere. ²²Or sachiez tout veraïement qe se vos me fetes vergoigne, il ne demorra trop lonc tens qe vos vos en repentiroiz, veraïement le sachiez vos».

74. ¹Qant Bandemaguz entent qe ce est Kex li seneschaux qe il a abatu a cest encontre, il ne dit mot, com cil qi ne vouxist mie volentiers qe messire Kex le coneust, porce qe il estoient d'un ostel ambedeus. ²Si s'en vet outre, qe il ne tint autre parlement a nul de cels qi ilec estoient. Et qant il est un pou esloigniez, li rois Artus, qi ne vouldroit pas volentiers qe Bandemaguz li eschapast en nulle mainere qe il ne seust aucune chose de ses nouvelles, et dom il vient et ou il vait,

13. Après cestui] *nuovo* § X ♦ l'autre] *om.* X ♦ des chevaux] des il (*sic*) c. X 14. force] qu'il ont *agg.* X ♦ sor son escu] *om.* X ♦ voide les arçons] *om.* X 15. s'escrie] haute vois *agg.* X 16. le col] *om.* X ♦ ambedeus] encontrez avez *agg.* L4 18. adonc] aussi X ♦ de maltalent] esbaiz et irez de m. X 19. vient] s'en va X ♦ se torne] s'en trone (*sic*) X ♦ envers (enutre [*sic*] L4)] vers X ♦ la damoiselle] *in X ultime parole del f. 14vb; le foto riprendono dal f. 29va, § 170.5* 21. tex] dex L4

broche le cheval des esperons. ³Et qant il est venuz dusq'a lui il li dit: «Sire chevalier, arrestez vos, se il vos plect, tant qe ge aie parlé a vos!». Et cil s'aresta maintenant. ⁴«Biaux sire, qe vos plect? — Ge voudroie, fet li rois, se il vos pleisoit, qe vos me deissiez dont vos venez et ou vos alez. — Certes, biaux sire, fet Bandemagus, ce vos dirai ge volentiers, puisqe savoir le volez. ⁵Or sachiez qe ge vieg de vers Sorelois. — Et qeles nouvelles y a il cele part? fet li rois. — Si m'aït Dex, sire, ge n'i sai nouvelles se bones non. — ⁶Or me dites, fet li rois, oïstes vos parler del Bon Chevalier sanz Poor en nul leu ou vos venissiez? — Certes, fet il, encore n'a pas un mois conpli qe ge trovai une damoisele qi me demanda ou ge aloie, et ge li dis qe ge aloie vers la meison le roi Artus. Et ele me dist après: ⁷“Or poez dire au roi Artus qe il a perdu le Bon Chevalier sanz Poor. Jamés a nul jor de sa vie ne le verra, qar il est mis en tel prison dom il n'istra jamés se mort non. ⁸Bien puet dire li rois Artus seurement, qant il a celui home perdu, qe l'onor de lui n'est mie abeissié petit”.

75. ¹«Qant ge entendi les paroles de la damoisele, ge li demandai adonc: ²“Ha! chiere damoisele, por Deu et por gentillesce, se vos savez ou li bon chevalier est enprisonnez, si le me dites, qe bien sachiez qe ge le dirai au roi Artus. Et il ne puet estre en nulle guisse qe il ne mete puis aucun conseil parqoi il sera puis delivrez ou tost ou tart”. ³La damoisele me dist puis: “Si m'aït Dex, sire, se ge le seusse ge le vos deisse tantost, mes ge ne le sai. Ge n'en sai autre chose fors qe il est enprisonnez en tel leu dont il n'istra jamés: ce porroiz seurement dire au roi Artus qant vos le verroiz”. ⁴Ge me parti atant de la damoisele qe onqes puis ne la vi. A l'endemain auqes matin encontraï ge une damoisele toute seule montee sor un palefroï noir. La damoisele estoit trop bele durement. ⁵Qan ele fu venue dusq'a moi, ele me dist: “Sire chevalier, qel part alez?”. Et ge li dis errament: “Damoisele, or sachiez de voir qe ge m'en vois au plus droit qe ge puis vers la meison le roi Artus. — ⁶Or li dites, fet la damoisele, de ma part qe il sache de verité qe il a perdu Danain le Rous et le bon chevalier qi portoit l'escu d'or. ⁷Il sunt ambedui enprisonnez, mes non mie ensemble, et sunt en tel prison dom il n'istront jamé a nul jor de sa vie. Et qant li rois a perdu deus tex chevaliers, dire puet seurement qe l'onor de sa cort de trop a beissié”. ⁸Ceste parole proprement me dist la damoisele, et ge endroit moi, qi ne voudroie pas volentiers le damage ne le deshonor le roi Artus, m'en vois vers Camahalot tant com ge puis, qar mout me targe durement qe ge aie conté ceste nouvelle au roi Artus, qe ge croi bien qe il est tant sages et tant preuz qe il savra bien metre conseil en

toutes ces choses. ⁹Sire chevalier, toutes ces nouvelles port ge a cort. Ge les vouxisse bien meillor porter. – ¹⁰Or me dites, sire chevalier, ou cuidez vos trouver le roi Artus, qi alez a Camahalot por parler a lui? – Et ou le doi ge trouver fors dedenz Camahalot? ce li respont li chevalier. – ¹¹Or sachiez de voir, fet li rois, qe se vos a Camahalot alez orendroit vos ne l'i trouveroiz a cestui point, qar il n'i est pas, ce sai ge bien. – Coment, sire? fet Bandemaguz. Venez vos donc de Camahalot? – ¹²Oïl, certes, fet li rois, voirement en vieng ge. Encore n'a pas .v. jors aconpliz qe ge i estoie. A celui point qe ge m'en parti, s'en parti li rois Artus mout priveement: ge le vi voirement. – ¹³Or me dites donc, fet Bandemaguz, cuidez vos qe il soit retornez? – Nanil, certes, fet li rois, ne ne retornera de cestui mois».

76. ¹Tant parole li rois a Bandemagus qe il le reconoist a la parole, et il se voloit lancier a terre por fere honor au roi son seignor, mes li rois ne li soefre mie, ainz li dist: «Tenez vos qoi, Bandemagus, qe ge ne voudroie mie en nulle guise qe ge fusse ici reconeuz. – ²Ha! sire, ou alez vos? – Certes, ce dit li rois Artus, a vos ne le celeroie ge mie. ³Or sachiez qe ge estoie a Camahalot mout envoiseement, et lors avint qe li rois Meliadus de Loenoys me manda ceste paroles». Et li conte qeles. ⁴«Por ces paroles qe li rois me manda adonc me parti ge de Camahalot la cité, et me sui mis en qeste por truver le, qar, se ge le trouvasse par aucune aventure, il ne peust estre qe il ne me seust a dire aucune certaineté de ces pseudomes dont il me manda noveles. ⁵Ceste fu l'achoisson por qoi ge me parti de Camahalot. – Sire, fet Bandemagus, et qi sunt ore cist chevaliers qi ilec sunt et en cui conpeignie ge vos ai trouvé? – ⁶Si m'aït Dex, ce dit li rois, ce sunt deus chevaliers estranges qi assez sont a loer de chevalerie, selonc ce qe il m'est avis. Avec l'un ai ge demoré deus jors, ne encore ne le connois ge mie granment fors qe bon chevalier est sanz faille. ⁷Cil autre chevalier si grant si vint orendroit entre nos et a non Febus, ce m'est avis, et fu fill au tres bon chevalier qe l'en appella Galeot le Brun. Et certes il est si tres bon chevalier de soi qe assez le ressemble. Ge ne cuidasse pas legierement qe il fust si bon chevalier com il est, se ge ne l'eusse veu. – ⁸Sire, ce dit Bandemagus, qe voudroiz vos fere? – Certes, fet li rois Artus, puisque il est einsint avenu qe ge vos ai trouvé par tel aventure com vos veez, or sachiez qe ge voill qe nos chevauchom si priveement com nos plus porrom et cerchom le roiaume de Lorgres d'une part et d'autre, por savoir se nos porrom trouver auqunes certaines nouvelles de ces pseudomes qi ensint sunt enprisonnez et ne savom en quel leu. ⁹Se g'en puis aprendre le voir en

aucune guise, ge metrai puis bon conseil en lor delivrance. – Sire, ce dit Bandemagus, qant il vos plect qe vos doiez mener moi avec vos en celui voiage por vos servir et por vos fere conpeignie, or sachiez tout certainement qe ce est une chose dom ge sui trop liez et trop joianz. – ¹⁰Une chose vos di ge, fet li rois Artus, gardez qe vos ne me façois connoistre en nul leu ou aventure nos aporte, qar vos ne me porriez fere chose dont ge fusse plus correciez qe de cele. – ¹¹Sire, ce dit Bandemagus, ne place Deu, puisque ge sai vostre volenté de ceste chose. Or sachiez tout veraïement qe de cestui voiage ne me trouveroiz vos de riens encontre. ¹²Mes de monseignor Kex, qi ensint est ore entre vos, qe voudroiz vos fere? – Il tendra son chemin, fet li rois, assez tost le trouverom, se Deu plect».

77. ¹Qant il orent eu celui parlement entre le roi et Bandemagus, messire Kex, qi estoit ja remonte, [est] tant doulant et tant correciez de la damoisele qi toutesvoies li remaint qe il ne set qe il doie dire. ²Qant il a grant piece parlé au chevalier qi les deus damoiseles avoit gaignees, il li demandoit: ³«Sire, ou voudroiz vos annuit geisir? – Certes, sire chevalier, fet Febus, ge cuit qe nos girom anuit a un chastel ça devant. ⁴Mes or me dites, messire Kex, se Dex vos doint bone aventure: vos tenez vos trop encombrez de ceste damoisele qe aventure vos a amenee entre voz mains? – ⁵Sire, fet messire Kex, volez vos qe ge vos die ou verité ou mençonge? – Certes, ce dit li chevalier, ge ne voill qe vos me dioiz se la verité non. – ⁶En non Deu, fet messire Kex, donc vos di ge bien loiaument qe ge m'en tieng encombrez ausint com se ge fus orendroit en prison. – ⁷Or me dites, fet li grant chevalier, et qe voudriez vos mielz avoir en vostre conduit? Ou ces deus damoiseles qe j'ai en ma baillie, ou cele seule qe vos conduisiez, par tel mainere voiremant qe il covenist qe vos les conduisiez andeus sauvement a touz les passages ou vos vendriez, encontre touz les chevaliers qi les vos voudroient tollir? ⁸Or me dites leqex vos voudroiz miels, qar ge vos faz bien asavoir: qi une damoisele ne puet conduire sauvement, honteusement se part de deus au derrain. Ce vos faz ge bien asavoir».

78. ¹A ceste parole respont messire Kex et dit au grant chevalier: «Biaux sire, porquoi m'avez vos fet ceste demande? Ja sai ge bien qe ge ne puis prendre de ces deus parties laqel qe ge miels voudroie. ²Or sachiez qe, se g'en fusse a choiz, ge avroie tost pris [la premiere],

77. 1. est] *om.* L4

78. 2. la premiere] *om.* L4

coment qe il m'en deust avenir. — ³Certes, messire Kex, ce dit li grant chevalier, e ge vos i met. Or i parra comment vos prendroiz sagement. Veez vos ces deus damoiseles qe ge conduis? ⁴Se il vos plest, ge le vos donrai ambedeus por cele qe vos conduisiez: cele remaindra de ma part et ces deus si remaindront de la vostre. Amez vos mieuls les deus qe l'une?». ⁵Messire Kex comence a rire qant il entent ceste parole e puis respont: «Si m'aït Dex com ge voudroie miels morir en la conpeignie de ces deus qe vivre et deusse ceste mener longement en ma conpeignie. — ⁶E la me volez volentiers doner par ces deus damoiseles? fet Febus. — Sire, fet messire Kex, ge sai bien qe vos me gabez: qe gaaigniez vos en tel gas? — ⁷Si m'aït Dex, messire Kex, fet li grant chevalier, ge ne vos gab mie. Ainz sui apareilliez sanz faille qe ge tout orendroit vos doigne ces deus damoiseles por cele qe vos conduissiez. — En non Deu, sire, fet messire Kex, et ge sui apareilliez de fere ceste chose, se vos vos i volez acorder». ⁸Li grant chevalier n'i fet nulle autre demorance qant il entent ceste parole, ainz dit as deus damoiseles: ⁹«Alés vos en a monseignor Kex, qe ge vos i doing a lui tout franchement. Et ge voill avoir la damoisele qe ge amenai en ceste place: ge la conois, ge saz trop bien qe ele velt et qe ele fet, et por ce ne la voill ge leissier». ¹⁰Les damoiseles comencent ambedeus trop fierement a plorer qant eles entendent cest comandement, et l'une des damoiseles comence un parlement tout en plorant et dit: ¹¹«Ha! sire gentix, ho ra! coment vos nos metez en mal conduit et en cheitif, qi nos metez el conduit de Kex li seneschal! ¹²Certes, biaux sire, vos ne le deussiez fere, si grant vilenie com vos nos fetes, qar vos savez certainement qe vos fetes mal. — ¹³Ge ne puis, fet il, fere autre chose, qar la moie damoisele ne leiroie ge en conduit d'autre chevalier qe de moi a cestui point».

79. ¹Qant messire Kex voit qe ce est a certes qe li grant chevalier velt toutesvoies fere celui change, ce est une chose dom il est trop liez durement. ²Il s'en vient as deus damoiseles sanz fere autre demorance et lor dit: «Damoiseles, puisque Dex m'a mandé tant de bone aventure qe vos estes moies, or vos en venez après moi la ou ge voudrai aler. ³Et n'aiez doute ne poor, qar ge vos conduirai sauvement en quel leu qe aventure nos aporte». Après ceste parole respont l'une des damoiseles et dit: ⁴«Certes, messire Kex, puisque nos somes en vostre conduit, bien poom estre asseur qe nos y avrom assez honte et vergoigne se nos y demorom longement. Mes j'ai esperance en Nostre Seignor qe nos en serom tost fors, et qe meillor chevalier qe vos

9. en ceste] e.i (sic) ceste L4 (*v. nota*)

n'estes nos avra en son conduit». ⁵Messire Kex est esbahiz qant il entent ceste parole et ne set qe il doie respondre porce qe damoisele sunt. Et l'autre damoisele recomence tantost son parlement et dit: ⁶«Messire Kex, se Dex vos doint bone aventure, coment avez vos hardement de prendre en vostre conduit tex deus damoiseles com nos somes? ⁷Ja sai ge bien tout certainement qe vos estes li plus cohart chevalier de tout le monde et li plus cheitif de toutes choses, qe jamés ne trouveroiz qi ne vos abate. — ⁸Damoisele, dit il, dites vos porce qe ge sui ici abatuz devant vos? — ⁹Certes, fet ele, ge ne le di mie por ceste, ainz le di bien por toutes les foiz qe vos assemblez a autre chevalier, qe de toutes les jostes qe vos fetes vos avient ensint qe vos estes portez a terre. — ¹⁰Damoisele, fet il, ja ne me veistes vos onques joster fors en cestui leu. — Certes, fet ele, non. Mes j'ai ja oï parler de vos en plusors leus et ge sai bien qe, encore soiez vos plus enparlez qe nul autre chevalier, si estes vos plus coarz et plus cheitif qe [nul] chevalier del monde. — ¹¹Damoisele, ce dit messire Kex, ore sachiez qe por hardement ne remaindra qe ge ne vos condui en qelqe leu qe vos me comanderoiz, et metez moi en tele esprouve, ge di en qelqe leu qe vos plera, qe vos façoiz de moi toute vostre volenté». ¹²Qant la damoisele entent ceste nouvelle, ele comence a penser. Et qant ele a un pou pensé ele drece la te[ste] et puis dit a monseignor Kex: «Voudroiz vos qe ge vos amasse par amors? — Si m'aît Dex, fet messire Kex, voiremant le voudroie ge mout. — Or vos dirai qe vos feroiz por la moie amor. ¹³Il a ci devant un chastel a moins de qatre lieues englesches. Dedenz cel chastel est un mien frere enprisonnez. ¹⁴Se vos tant poez fere par vostre chevalerie qe vos le delivrez de la prison ou il a plus demoré qe ge ne vouxisse, or sachiez tout veraïement qe de ilec en avant ferai ge tout vostre voloir et irai adonc avec vos qel part qe vos me voudroiz mener». ¹⁵Et ce estoit la damoisele qe Heredins avoit delivree de la chaine, einsint com ge vos ai ja conté ça arrieres tout apertement, qant il secorrut le roi Artus.

80. ¹Qant messire Kex entent ceste parole, il respont errament et dit: «Damoisele, or sachiez qe ge ne vos oseroie pas aseurer de rendre vos le vostre frere einsint com vos le demandoiz, qar, par aventure, trop meillor chevalier qe ge ne sui si le tient en sa prison. ²Mes por vostre amor avoir vos ferai ge tant qe ge m'en irai jusqe a cel chastel ou vostre freres est et me combatrai au chevalier qi en prison le tient, se ge ilec le puis trouver. ³Et tant ferai en toutes guises, se ge onques

79. 10. nul chevalier] c. L4 11. tele] cele L4 12. teste] te L4

puis, qe ge le deliverrai. – Certes, fet ele, ge ne vos demant plus. ⁴Or tost, metom nos a la voie, qar ge voudroie qe nos fussion ja au chastel venuz ou est mi freres enprisonnez. – ⁵Alon donc, fet il, ge sui touz apareilliez d'aler ou vos voudroiz».

81. ¹Atant, se metent a la voie les deus damoiseles ensemble qi avoient conseillé. Et ja avoient bien trouvé et art et engin coment eles se porroient delivrer de monseignor Kex, et legierement, selonc ce qe il lor estoit avis. ²«Seignor chevalier, fet il, qe voudriez vos fere? Or sachiez qe ge m'en vois après mes damoiseles. Volez vos ci remanoir, ou chevauchier après nos?». ³Et il dient tuit qe il ne voudroient pas remanoir, ainz chevaucheroient tuit ensemble. ⁴Messire Kex se met avant entre lui et ses damoiseles e mout est joianz et liez de ceste grant bone aventure qe Dex li a mandé a cestui point, qar il dit bien hardiement qe il a gaagné toutes les plus beles deus damoiseles qe il veist ja a grant tens. ⁵Et qant li grant chevalier, qi Febus estoit apelez, voit le chemin qe les deus damoiseles funt, il [dit] as autres chevaliers qi ilec estoient: ⁶«Seignors chevaliers, savez vos ou ces damoiseles vont?». Et il dient qe nenil. «En non Deu, fet li grant chevalier, ge le vos dirai, qant vos ne le savez. ⁷Or sachiez q'eles moient monseignor Kex a un chetel ça devant, et ilec seront eles delivrees plus tost qe en nul autre leu qe ge sache orendroit ne pres ne loing». ⁸Qant li rois Artus entent ceste nouvelle, porce qe il a toutesvoies poor de monseignor Kex, qe il amoit de tout son cuer, il li destorneroit volentiers son damage et son encombrer, se il le pooit fere. ⁹Et por ce dit il a Bandemagus: «Avez vos entendu ceste nouvelle? – Sire, fet Bandemagus, oïl, bien. Or sachiez qe se nos le leison aler si seul com il est, ge ne croi pas qe nos le peussom trouver a pieçamés. – ¹⁰En non Deu, fet li rois Artus, ge voill chevauchier après». E Bandemagus dit ausint. Lors se torne li rois envers le grant chevalier et li dit: ¹¹«Sire, se Dex vos doint bone aventure, dites moi porqoi vos deistes orendroit ceste parole de Kex et des deus damoiseles. – En non Deu, sire, fet cil, ge le vos dirai qant vos le volez savoir. ¹²Or sachiez qe celui chastel proprement ou les deus damoiseles moient monseignor Kex maintient une costume mout annuiese et mout vilaine, et vos dirai coment. Or sachiez qe cele costume y a ja esté maintenue plus de .xx. anz. ¹³Se il avient par aventure qe auquns chevalier hi amaint une damoisele ou deus, il est mestier qe li chevalier qi les conduit

80. 4. qe] ja qe L4

81. 4. deus damoiseles] damoiseles deus damoiseles L4 5. dit] om. L4

joste por chascune damoisele a deus chevaliers de leianz. ¹⁴Et [s']il avient qe il soit abatuz, il pert tout maintenant le cheval et les armes et demore en prison dedenz le chasté un an entier. ¹⁵Les damoiseles s'en vont, se eles volunt, qe ja ne trouveront qi les arreste de riens. Por cele costume sanz faille moient eles monseignor Kex a celui chastel, qar bien sevent certainement qe encontre .iiii. chevaliers ne se porroit il pas defendre. ¹⁶Por ce li covendra il demorer leianz, et eles s'en iroint avant et seront de lui delivrees. Sire chevalier, ceste chose sanz faille ont pensé les damoiseles por oissir de la baillie monseignor Kex. — ¹⁷Sire, dist li rois Artus, puisque il est einsint venu com vos m'avez conté, se Dex me saut, il est mestier qe ge voie a qel fin messire Kex vendra de ceste chose. — ¹⁸En non Deu, fet li chevalier, ge ne croi qe il en viegne ja se a honteuse fin non et a vilaine, qar a cest chastel ou il vait trouve l'en des bons chevaliers souventes foiz qi [sunt] dou chastel meemes. ¹⁹Et por ce croi ge qe il ne se porra partir se honteusement non, qant il s'en partira. — Biaux sire, fet li rois Artus, et vos, qel part voudroiz vos chevauchier? — ²⁰Certes, sire, fet li granz chevalier, ge ne sai encore. — Sire, ce dit li rois, donc vos comant ge a Deu, qar après Kex m'en voil aler tout errament, por veoir et por esgarder coment il li porra avenir de cestui fet.

82. «— ¹A Deu soiez vos», fet Febus. Et maintenant se met li rois Artus a la voie, et Bandemagus avec lui, et li grant chevalier qi Febus avoit non est encore remés. ²Qant il voit qe li autres chevaliers s'en sunt partiz, il dit a Herchendin li Blanc: «Sire conpeinz, qe ferom nos? Il m'est avis, et ge ai entendu par voz paroles, qe vos alez qerant ce qe ge qier. ³Vos qerez celui bon chevalier a l'escu d'or. — Certes, fet cil, vos dites bien verité. — ⁴Or me dites, ce dist Febus, vos pleroit il qe nos chevauchisom amdeus ensemble, porce qe nos somes ambedui d'une qeste, ou qe chascun de nos chevauche par soi? — ⁵Sire, ce dit Herchendins, or sachiez qe greignor sens sera de chevauchier nos deus ensemble qe chascun par soi. — Donc chevauchom entre nos deus, ce dit Febus. — Sire fet li autres, a ce m'acort ge mout volantiers. — ⁶Puisque a ce nos somes acordez, ce dit Febus, or me dites de qel part vos volez qe nos chevauchom a cestui point. — Sire, fet cil, qel part qe vos voudroiz dites, qar ge sui apareilliez d'aler avec vos. ⁷Si porrom veoir coment il avendra a monseignor Kex, en cestui soir, de ceste aventure ou il s'est mis. — Si m'ait Dex, sire, fet li autre, ge m'i acort: or chevauchom avant».

14. s'il] il L4 18. sunt] om. L4

83. ¹Après ce que il orent parlé en tel mainere il n'i font autre demorance, ançois se metent au chemin tout errament cele part tout droit ou li autres chevaliers s'en aloient devant. ²Et messire Kex, qi devant chevauchoit entre lui et ses deus damoiseles, atant evos que il voit devant li un chastel mout bel et mout riche, qar il estoit clos de toutes parz de mareschieres si estranges que nus n'i peust passer a cheval, ne cele voie n'estoit mie si large que deus chevaliers armez s'i peussent entrecontrer ahaisiement. ³Quant messire Kex ot tant chevauchié atoute sa conpeignie que il fu venuz dusq'a la mareschiere, il se met devant errament et dit as deus damoiseles: ⁴«Sehivez moi». Et eles si funt, qi mout desirent durement q'eles soient fors de la conpeignie. Tant ont alé en tel mainere que il sunt mout pres del chastel a moins d'une archees. ⁵Et lors trouverent un grant pont de fust, si large durement que bien s'i peussent entrecontrer .iv. chevaliers aaisiement. Li pons duroit bien plus d'une archee de lonc et estoit bordés a destres et a senestres. ⁶Au chief dou pont, par devers le chetel, avoit une grant porte, si que par devant la tor qi estoit au chief del pont, qi corroit la boche del pont d'une part par devers le chastel, par devant la tor et parmi la porte droitement, estoit li chemins si larges que bien s'i peussent deus chevaliers entrecontrer et combatre. ⁷Dedenz la tor avoit tout adés chevaliers qi le passage gardoient, en tel mainere que nul chevalier i venoit qi damoisele menast en sa conpeignie, q'i ne li couvenist fere deus jostes por chasque damoisele que il conduisoit. ⁸Maintenant que messire Kex, qi les damoiseles conduisoit, comença a aprouchier dou chastel, atant evos un chevalier qi aloit geisir a un suen recet, qi assez estoit pres d'ilec.

84. ¹Quant il voit monseignor Kex qi menoit deus damoiseles avec lui, il comença a rrire a soi meemes. Et quant il est venuz dusq'a lui il dit: ²«Coment, sire chevalier? Ne deussiez vos assez avoir d'une damoisele seule por vos? – Biaux sire, fet messire Kex, et a vos que grieve se ge en ai deus? – ³Certes, fet li chevalier, a moi ne grieve riens se vos en eusiez .iiii., mes a vos grevera, si com ge croi, ce que vos seulemant en avez deus. – Et qele grevance m'en puet avenir? fet messire Kex. Dites le moi se vos le savez. – ⁴En non Deu, dit li chevalier, ge le vos dirai. Veez vos cele tor ci devant qi est ou chief de cestui pont? – Oil, fet messire Kex, voirement la voi ge bien. – ⁵En non Deu, fet li chevalier, or poez savoir certainement que a celui pont sanz doute vos couvendra joster encontre deus chevaliers de leienz por chasque de ces deus damoiseles que vos amenez. ⁶Et ensint vos couvendra a fere .iiii. jostes por eles deus. Vos est il ore

avis, sire chevalier, qe ce soit soulaz? — En non Deu, fet messire Kex, or sachiez qe de si chier passage com est cestui me souffrisse ge volantiers a cestui point. ⁷Ge me metrai en aventure, coment qe il m'en doie avenir, qar le retourner ne feroie ge volantiers en nulle mainere, ne mes damoiseles ne leiserioie ge arrieres moi, tant com ge les peusse conduire. — ⁸En non Deu, fet li chevalier, ge ne sai qe vos feroiz, mes ge croi mout bien qe le retourner vos vausist mielz qe l'aler avant. — Ge entent bien ce qe vos me dites», fet messire Kex. ⁹Atant s'en vaît messire Kex, qi tant estoit hardi durement qe a grant foulie li atornerent maint chevaliers. ¹⁰Qant il doit entrer sor le pont, il prent son glaive et son escu, et lors oï un cor soner desus la tor, qi fu sonez si hautement qe li sons s'en ala bien loing. ¹¹Et maintenant oisirent dusq'a .iiii. chevaliers de la tor, qar cil de leianz voient tout clerelement qe les damoiseles estoient deus qe messire Kex conduisoit. ¹²Et li rois Artus, qi celui fet voloit veoir, qar toute poor avoit de monseignor Kex, q'i s'estoit tant hastez de chevauchier entre lui et Bandemagus, et voit tout clerelement les .iiii. chevaliers qi de l'autre part estoient arestez desouz la tor et attendoient qe messire Kex se meist desus [le] pont. ¹³Devant l'entree de la porte avoit un arbre de fust grant et gros qi estoit mis en travers de la voie, si qe nul home qi a cheval fust ne peust outre passer se la barre ne fust ostee. Et cele barre de fust avoient ja passee li .iiii. chevaliers et attendoient monseignor Kex, qi aprouchast plus.

85. ¹Tout maintenant qe il virent monseignor Kex aprouchier au monter desus le pont, il li crient: «Retornez, sire chevalier, se vos ne volez joster encontre nos .iiii.!». Messire Kex respont tantost: ²«Seignors, bien poez veoir qe ge me sui apareilliez de joster: or i parra qe vos feroiz». Qant il a dite ceste parole, il n'i fet autre demorance, ainz urte cheval des esperons et leisse corre desus le pont, le col estendu dou cheval envers l'un des .iiii. chevaliers qi ja li venoit a l'encontre ferant des esperons. ³Messire Kex s'esforce tant com il puet, qar bien conoist tout clerelement qe il a plus a fere a cestui point qe il ne li seroit mestier. ⁴Et por ce met il en cele joste e cuer et cors et volanté, et fiert celui si roidemant en son venir qe por l'escu ne por le hauberc ne remaint qe il ne li face enmi le piz une grant plaie et parfonde. ⁵Il l'enpeint si bien qe il li fet voidier les arçons et le porte del cheval a terre, et au trebuchier qe il fet il giete un cri mout dolereux, com cil qi cuidoit estre navrez a mort.

86. ¹[Q]ant li rois Artus voit celui cop, il est trop liez, dont il ne se puet tenir qe il ne die a Bandemagus: «Qe vos semble de Kex? – ²Sire, ce dit Bandemagus, il a bien encomencié la beisoigne: s'il la definoit si bien, a grant honor li torneroit. Mes encore a il trop a fere, qe encontre trois chevaliers le couvient joster. – ³Certes, ce dit li rois Artus, ceste costume est annuieuse, et, se puis, il ne demorra mie longement qe ele remaindra, qar cestui fet est trop parti mauvement d'un chevalier encontre qatre». ⁴A celui point qe li rois parloit, il regarde et voit qe Kex fu retornez au chief del pont de l'autre part, de la ou il devoit movoir por encomencier les joster. ⁵Et qant il s'est appareilliez, il leisse corre encontre l'autre chevalier qi encontre li venoit mout corrant por revenchier son conpeignon, se il peust, et por maintenir la costume dou pont. ⁶Messire Kex, qi ne le vait mie espargnant, fiert celui chevalier si fort qe il fet de lui tout autretant com il avoit fet de l'autre. ⁷Li rois Artus est trop joianz qant il voit la seconde joste mener a fin en tel mainere et il ne se puet tenir qe ne die a Bandemagus: ⁸«Qe vos senble de ceste autre joste? – Sire, fet Bandemagus, se Dex me saut, messire Kex se prouve bien mielz assez qe ge ne cuidasse au comencement. ⁹Et se il puet mener a fin ceste besoigne si bien com il a encomencié, a grant honor s'en partira, se Dex me saut». ¹⁰Einsint parloit li rois Artus de monseignor Kex, et cil, qi mout pou entendoit a toutes ces paroles, puisque il voit qe il estoit delivrés des deus chevaliers en tel mainere, il n'i fet nulle autre demorance, ainz leisse corre sor le tierz, tant com il puet del cheval trere, et le fiert ensint en son venir qe il n'a pooir ne force qe il se puisse tenir en sele, ainz vole a terre maintenant. ¹¹Li rois Artus est durement liez qant il voit trebuchier celui, il se reconforte assez plus qe ne fist au comencement. ¹²«Sire, fet Bandemagus, avez vos veu merveilles, qe messire Kex a fait trois si beles jostes pres a pres? Si m'aït Dex, ge ne le cuidasse en nulle guise, se ge ne l'euse veu, a ce qe cist de cest chastel ont renomee d'estre bons chevaliers. – ¹³Si m'aït Dex, ce dit li rois, messire Kex l'a si bien fet qe il nel peust fere mielz. Dex voille qe il face autretant del qarte chevalier, si seroit adonc gitez de la grant poor ou ge sui encore. – ¹⁴Sire, fet Bandemagus, or sachiez tout certainement qe, puisque il li est si bien avenuz de trois chevaliers, ja ne li mescheira dou quart, ce me vet bien li cuer disant. – Dex le voille», ce dit li rois.

86. 1. Qant] ant L4 (l'iniziale non è stata disegnata) 9. mener a fin] m. a finer a fin L4

87. ¹Endementiers qe il parloient entr'els de monseignor Kex – com cil qi trop voloient qe il fust delivrés de cestui fet honoreement, qar, soit ce qe il li soit bien avenü des trois chevaliers, ont il doutance dou qart chevalier – ²et messire Kex, qi trop est aseurez por la bone cheance qi a cest point li est avenue qant il a les trois abatuz, il prise mout petit le qart. ³Et bien le moustre apertement, qar, qant il voit celui movoir encontre lui, il leisse maintenant corre, le frein abandoné, et le fiert en son venir si durement qe il fait de lui tout autretant com il avoit [fet] des autres .iii. ⁴Mes qant il se fu delivrés en tel mainere com ge vos ai conté, il voit adonc qe la barre qi estoit el mileu de la voie fu ostee tout errament, et cil qi sor la porte estoient li comencent a crier: ⁵«Venez avant, sire chevalier, qe vos soiez le bienvenuz, qe bien avez moustré apertement qe voirement estes vos chevalier errant, non mie des mauveis mes des tres bons voiremant». ⁶A grant honor et a grant feste reçoivent adonc monseignor Kex cil del chastel qi desus les murs estoient et qi les jostes avoient veues tout apertement. ⁷Qant il voient qe il avoit passé la porte de la tor por entrer dedenz le chastel, il li comencierent tuit a crier: «Bien viegne li bons josteors!». Et le reçoivent a si grant honor com se il fust lor seignor lige, qe il ne l'eussent veu d'un grant tens. ⁸Il ne li peussent plus fere honor qe il li firent a cele foiz. ⁹A si grant joie et a si grant honor com ge vos cont enmoient cil de leienz monseignor Kex dedenz le chastel et le conduient dusqe a la mestre forteresc. Illec le font descendre et desarmer si honoreement com il plus poent. ¹⁰Les damoiseles qe il conduisoit sunt tant doulentes durement de ceste aventure q'eles se timent a mortes e a destruites et dient entre eles qe desoremes ne sevent coment eles puissent metre a mort monseignor Kex, qant il est de [ce]stui pas eschapez ou eles le cuidoient fere morir sanz toute faille.

88. ¹Tout cestui parlement qe les deus damoiseles tenoient en tel mainere entendi tout clerement li escuer de monseignor Kex, et il ne se puet tenir qe il nel die priveement a monseignor Kex: ²«Sire, or sachiez qe les vostres damoiseles parloient de vos en tel mainere: gardez vos de lor decevement, qe il m'est avis q'eles vos encombr[r]eront en auqun leu, s'eles onques porront. – ³Or ne te chaille, fet messire Kex, ge connois qe les damoiseles voillent porchacier mon damage.

87. 3. avoit fet] a. L4 10. tienent] tienement L4 ♦ de cestui] destui L4

88. 2. encombreront] encomberont L4

Ge te pramet qe ge les metrai en tel leu dom eles n'istront a lor volanté. — ⁴Sire, fet li vallez, or sachiez tout veraïement qe il est einsint: eles parloient orendroit entr'eles en tel mainere». Et li dit coment. ⁵«Voire, ce dit messire Kex, beent eles donc a ma mort? Si m'ait Dex, ge cuit et croi q'eles s'en repentiront plus tost q'eles ne cuident. Or leisse cestui fet sor moi: eles me conoissent petit». ⁶Tant dit messire Kex adonc unes paroles e autres qe, c'eles li porchacent domage, la joie est si grant qe tuit li font qe ce est merveille de veoir. ⁷Li rois, qi ja estoit entrez dedenz le chastel entre lui et Bandemagus, fu herbergiez en la meison d'un chevalier qi trop volentiers le reçut en son hostel, porce qe il vit qe il estoient chevaliers erranz. ⁸Qant il les ot fet desarmer en son paleis, qi assez estoit biaux et riches, il comanda maintenant a cels de son hostel qe il les servent et honorent tant com il porront. ⁹Qe vos diroie? A cele foiz fu herbergiez li rois Artus si bien com il voloit, qar li sires de l'ostel estoit cortois merveilleusement et si frans et si deboneres qe il ne pooit estre plus cortois. ¹⁰Et si avoit bien .c. anz d'aage et plus encore, et por tout ce ne remanoit qe il ne fust encore joianz et liez et vistes et legiers et fort mout durement des anz que il avoit. ¹¹Qant il vit le roi Artus desarmé et ot un pou regardé sa bele taille et sa bone façom, il dit a soi meemes qe il ne porroit estre en nulle mainere qe il ne soit home de valor. ¹²Volentiers li demandast la certanité de son estre, se ne fust ce qe il avoit poor qe li rois ne li tornast a vilenie, qar ce savoit il bien de pieça qe li bons chevaliers de hautes chevaleries garniz s'aloieint celant tant com il pooient en touz les leus ou il venoient. ¹³Por ce ne velt il demander au roi Artus son non ne qi il est, qar bien li est avis qe li rois ne li voudroit dire. ¹⁴La ou li rois Artus et Bandemagus estoient assis devant unes fenestres, et li sire de l'ostel estoit avec eaus, qi trop volentiers les regardoit et qi trop les prisoit de tant com il puet prisier chevaliers estranges q'el en ve[u] out granment, atant evos entr'eaus venir un vallet de leienz qi dit au seignor de l'ostel: ¹⁵«Sire, nouvelles vos aport. Or sachiez qe la defors vindrent orendroit deus chevaliers estranges qi menoient en lor conpeignie la plus laide damoisele qe ge veisse en tout mon aage. ¹⁶Des deus chevaliers estoit li uns tout le greignor qe ge onques veisse en toute ma vie. Cil dist a cels qi gardoient le passage de la tor qe il voloit defendre la damoisele. ¹⁷Et maintenant vint contre lui un chevaliers de la tor qi voloit defendre le passage, si petit durement qe il sembloit vers lui noient. ¹⁸Qant nos

14. veu out] veont L4 (*v. nota*) ♦ sire de l'ostel] s. del chastel L4

veimes le chevalier si grant encontre le petit, nos cuidames qe li petit chevalier fust maintenant porté a terre, qar cil estoit granz envers lui com une montaigne. Qe vos diroie? Entre nos disiom tuit: ¹⁹“Li petit chevalier si a trouvé mestre”. Mes de la joste ala adonc autrement, qar li grant en fu abatuz tout maintenant. ²⁰Li autre qi avec lui venoit avoit ja passé le pont et la tor avant qe la joste fust encomenciee et il voloit retourner por revengier le grant chevalier, mes cil de la tor ne li souffrirent pas qe il tornast arrieres».

89. ¹Qant li rois Artus entent ceste nouvelle, il est hesbahiz si durement qe il ne set qe il doie dire de ceste chose, qar de celui chevalier avoit il tant veu et tant oï dire qe il conoissoit bien tout certainement qe il estoit garniz de trop grant proece de chevalerie. ²Et qant ensint est avenu, il dit a soi meemes qe ce ne puet estre par force de chevalerie. En aucune autre mainere li mesavint porquoi ceste mescheance li est sorvenue. ³Qant il ont escouté la reison dou vallet, li rois ne se puet tenir q'il ne die: ⁴«Coment ala de cele joste? Di le moi, se Dex te saut, qe ge sai tout certainement qe li chevalier dont tu paroles est si preudom des armes qe il ne porroit estre pas abatuz por home de cest chastel, se il ne li mescheoit trop durement. — ⁵Coment, biaux ostes, fet li sires de leienz, cuidez vos donc qe en cest chastel n'ait des bons chevaliers? — ⁶Certes, biaux hostes, fet li rois, ge croi bien qe il i ait des bons chevaliers, mes ge sai bien certainement qe li grant chevalier dont li vallet parole est si preudome des armes qe ge di bien qe trop covendroit qe il fust de haute proesce cil qi a terre l'abatist si legierement com cil valet conte. ⁷Por ce voudroie ge trop savoir coment il ala de cele joste, qe ge ne croi en nulle mainere qe li granz chevalier fust abatuz de cele joste droitement. — Sire, fet li vallet, si fu voirement, le sachiez vos par verité».

90. ¹Atant evos leienz venir un autre vallez de leienz. Tantost com li rois le voit, il le fait venir devant lui et li dit: «Di moi vallet, se Dex te saut, coment ala de cele joste? — ²Sire, fet cil, se Dex me saut, ge ne vos en mentirai de riens, ne por les chevaliers de cest chastel, ne por les estranges. ³Or sachiez qe li granz chevalier venoit si fierement a la joste qe il sembloit tout veraïement qe li pont deust fondre desoutz lui. Et la dom il estoient com a jondre des glaives, li cheval del grant chevalier mist un des piez entre les tables dou pont et trebuchu le col avant. ⁴Li petit chevalier feri adonc desus le grant et le porta a terre. Legierement le pot fere, qar sanz ce trebuchoit il por le cheval qi li faillloit». Qant li rois ot le vallet il dit: ⁵«Or, biaux ostes, ne vos disoie ge qe li granz chevalier ne fu mie abatu de droite joste?

⁶Si m'aït Dex, ge le connois tant qe ge le metroie hardiement en une place por abatre, en un matin, touz les chevalier qi orendroit sunt en cest chastel, porquoi aventure ne li fust trop durement contraire. ⁷De ce qe il fu ensint abatu ne se puet doner ne pris ne lox vostre chevalier, qar il ne l'abati pas, mes li cheval qi li cheï». Lors demande autre foiz li rois: ⁸«Or me di tost, et qe ont il fet del grant chevalier, puisque il li est ensint avenu com tu as dit? – En non Deu, sire, il fu si honteux durement qe jamés ne verroiz home si vergondeus com il estoit. ⁹L'en l'enmena tout ensint a pié com il estoit dusq'a la tor, et ilec fu desarmeiz et puis enprisonnez. Et encore est en prison et sera plus qe il ne voudroit».

91. ¹Qant li rois Artus ot ceste nouvelle, il est si fierement iriez et comence a penser. Et qant il a une grant piece pensé, il ne se puet plus tenir qe il ne die: ²«Coment? Ont donc enprisonnez cist de cest chastel si pseudome com est li granz chevalier? Si m'aït Dex, il ont fet chose dont il se repentiront encore, si com ge croi, et mout plus tost, per aventure, qe il ne cuident». ³De ceste nouvelle fu li rois Artus trop durement iriez et corrociez, qar il prisoit trop durement le grant chevalier de bonté de chevalerie. ⁴Qant li ostes entendi qe li rois avoit dit ce, il ne se puet tenir qe il ne die: «Coment, sire? Se repentiront cil de cest chastel de ce q'il ont fet au grant chevalier? ⁵Or sachiez qe il [n'i a] orendroit home el monde dont il ne feissent orendroit ensint, fors dou roi Artus et sanz le seignor de cest chastel. ⁶Mes a ces deus ne le feroient il, porquoi il les coneussent. ⁷A touz autres feroient il autretant, qar la costume de ceienz si est tele, et il ne la leiseroient, qar il est mestier qe il la mantiegnent dusq'a tant qe li sires de ce[st cha]stel la fera remanoir por soi meemes. – ⁸Ge ne vos dirai ore pas qanqe ge pens de ceste chose», fet li rois. Lors se torne vers li vallet et li dit: ⁹«Sez tu qe devint li chevalier qi venoit en la conpeignie del grant chevalier? – Certes, sire, ge cuit qe il soit herbergiez ça devant en la meison d'un vavassor. – ¹⁰Ha! por Deu, fet li rois Artus, va tu a l'ostel ou il est herbergiez et voies semblant et son contement et torne tost a moi. – ¹¹Sire, fet li vallet, a vostre comandement: ge serai tantost retornez, se ge onques puis». ¹²Li vallet se part de leianz et s'en vet a l'ostel al chevalier a l'escu miparti et trouve qe il s'estoit devant une fenestre et pensoit si durement com nus hom porroit penser, et tenoit la teste beissie vers terre et les lermes li corroient des elz tout contreval les faces.

91. 5. n'i a] *om.* L4 7. cest chastel] cestel L4

92. ¹Qant li vallet ot grant piece regardé le contenement dou chevalier, [por]ce qe il ne li disoit nul mot del monde, il se part de leienz et s'en revient tout droitemant au roi, et li dit ce qe il avoit veu li chevalier. ²Qant li rois oï ceste nouvelle, il respont: «Ge t'en croi bien, alon veoir celui chevalier et le reconfortom entre nos deus d'aucune chose». ³Lors se metent a la voie tout a pié, qar li ostel estoit mout pres. Et qant il sunt leienz venuz, il trouvent le chevalier si doulant com se il veist devant lui mort tout li monde. ⁴Et neporqant, tot maintenant qe il voit venir les chevaliers, il leisse maintenant son duel au plus sagement qe il le puet fere et se drece encontre eaus et dit qe bien soient il venuz, et puis les fet asseoir. ⁵Qant il se sunt tuit trois assis, il dit au roi Artus, tout lermoiant des elz: «Sire ge muir de duel et de corrouz, qar j'ai anuit veu ce qi me fera morir de duel, si com ge croi». ⁶Li rois Artus respont maintenant por conforter le: «Ore sachiez, sire conpeinz, qe cestui n'est mie le premier bon chevalier a cui l'en a fet honte et vergoigne, ne ne sera le derrain. ⁷A Galeot le Brun, qi fu si peres, fist l'en greignor honte et vergoigne qe ne fu ceste et puis fu hautement venchiee, si sera encore bien ceste, n'en doutez mie. — ⁸Sire conpeinz, fet li chevalier a l'escu miparti, se ge eusse veu qe li bon chevalier eust esté abatu de droite joste, ensint com chevalier doit abatre autre, il ne me chausist pas granment se l'en li eust fet honte et laidure, ensint com l'en fet as estranges chevaliers qi abatuz i sunt. ⁹Mes ge vi qe il venoit si hautement a la joste et si noblement qe il m'estoit bien avis, se Dex me doint bone aventure, qe il eust abatu a ceste joste [les] deus meillors chevaliers de cest chastel, porqe il les eust encontrez a cele joste. ¹⁰Et porce qe si chevaux cheï desouz lui, il li ont fet si grant vergoigne et si grant honte qe de ce seulemant qe ge le vi me tieng ge a deshonzorez e a mort! ¹¹Et de tout ce qe ge vi ne m'eust chalu, se il m'eussent soufert qe ge me fusse mis en celui fet por revenchier la honte del bon chevalier, mes il ne le me souffrirent mie. — ¹²Sire conpeinz, ce dit li rois Artus, leissiez aler tous cestui corrouz et vos reconfortez, qe ge vos pramet loiaument qe, se Dex li done vie, encore revencheira il ceste vergoigne mout hautement. — ¹³Si m'aït Dex, sire, fet cil a l'escu miparti, com ge voudroie avoir doné la moitié de qantqe ge ai el monde, qe ge encore veisse cele venchance, qe de regarder celui fet me tendroie ge a bie-neuré durement».

92. 1. porce qe] ce qe L4 9. les] *om.* L4

93. ¹Quant il orent grant piece parlé de cele joste, porce qe li rois vit qe li chevalier estoit leianz tout seul, li pria il tant qe il venist avec eaus herbergier qe cil en leissa son hostel. ²Quant il furent tuit trois ensemble, adonc recomencent il entr'eaus trois le parlemant. «Sire, fet li chevalier a l'escu miparti, avez vos veu la greignor merveille de tout le monde? ³Qe Kex li seneschaux, qi est le peior chevalier del monde, atant vaut ore qe il conduist ses damoiseles si sauvement e mist a desconfiture les .iiii. chevaliers qi le passage defendoient? ⁴Et est orendroit en cel chastel por celui fet etant prisiez qe se ce fust le cors au roi Artus meemes qi a cestui point fust venuz dedenz cest chastel, il nel peussent plus honorer qe il funt lui. ⁵Et li bon chevalier, qi vaut de chevalerie tex mil homes com est messire Kex, ont deshonoré et avilé com se ce fust le peior home del monde. ⁶Par Deu, sire conpeinz, de ceste chose ai ge trop grant merveille en moi meemes, qe li bon chevalier est deshonoré et avilé et li mauveis est honorez. Ce est bien encontre reison». ⁷Li rois Artus respont tout errament et dit: «Sire conpeinz, se Dex me saut, il vet einsint des aventures. ⁸Or sunt li bons chevaliers liez et puis doulanz: ce est des oeuvres de fortune, qi orendroit met home en haut et en joie et en bone aventure, et puis le met au desouz et en ire et en doulor et en tristece. ⁹Se li bon chevalier dont vos parlez ot a cestui point vergoigne, encore s'en vengera ou ci ou aillors, et einsint recevra et joie et leece. ¹⁰De teles aventures ne se doivent onques esmaier chevaliers errant, porqe il soient pseudomes, qar par lor proesce et par lor haute chevalerie viennent il au desus de toutes chouses et revengent tout lor corrouz et tout lor duel en lor tens: ensint avient il tout jor». ¹¹Mout tindrent celui soir grant parlemant del bon chevalier qi Febus estoit apelez et de Kex autresint. ¹²Quant il orent mangié, cil virent qe il estoit tens de dormir, si s'alèrent couchier en une chambre de leianz qi assez estoit bele et dormirent la nuit aaisié, qar le jor avoient auques travaillé. ¹³Mes de monseignor Kex qe dirom nos, qi est lasus en la mestre forteresce mis et honorez assez plus qe se il fust uns rois? ¹⁴De celui ne poom nos dire fors qe il est aaisé orendroit. ¹⁵Se il li avint ensint bien en chasque aventure ou fortune l'amerra, desoremés dire puet tout seurement qe il est en bone aventurez. ¹⁶Mes encore soit il en pris et en honor et en noblece, si li est ore ensint venu de ses deus damoiseles q'eles ne volent fere por lui ne ce ne qoi. ¹⁷Il voloit la bele damoisele avoir, cele qi fu delivree de la chaene, mes ele dit tout

apertement q'ele ne s'acorderoit a lui por nulle aventure dou monde devant q'ele ait esprouvé sa chevalerie. ¹⁸Ele ne se velt ensint doner a home q'ele ne conoist de riens. Et q'en diroie? Por priere qe il li face ele ne se velt a lui acorder, dont il est tant durement iriez qe il dit a soi meemes qe, se il puet trouver Brehuz sanz Pitié, il li metra entre ses mains ses damoiseles ambedeus. ¹⁹Ensint pensoit monseignor Kex, qe il velt orendroit tout le mal dou monde as deus damoiseles. Il pense une chose et celes une autre: se eles poent, eles le feront trebuchier. Cil fera autresint [d']eles, en tel mainere qe il n'i metra de riens la main.

94. ¹A l'endemain auques matin s'est esveillé messire Kex. Et qant il est appareilliez, il demande ses armes et l'en li aporte tantost. Et qant il est armez, il prent congié a ceus de leianz et se part atant de leienz entre lui et ses damoiseles, qi ne vont pas trop volontiers avec lui. ²Mout amassent mielz a celui point avoir un autre conduisor, mes ensint est ore avvenu: eles ne poent ore avoir autre si tost com eles voudroient. ³Messire Kex, qi bien conoist orendroit qe les damoiseles ne voudroient de lui veoir fors qe sa honte et sa deshonor, vet celui matin mout pensant et chevauche auques enforcement. ⁴Et qant il ot chevauchié dusqe ore de prime, adonc li avint qe il trouva un escu pendant a un arbre, et un glaive qi estoit dreciez, et un cheval i estoit atachiez. ⁵Li chevalier de cui ceste arme estoient n'estoit mie trop loing d'ilec, qar il s'estoit devant un arbre, le hiaume en la teste et l'espee ceinte. ⁶Et maintenant qe il vit monseignor Kex ensint armez com il estoit et qi menoît en conduit deus damoiseles, il dit a soi meemes qe se cist ne fust chevalier de grant valor, il ne menast en son conduit deus damoiseles. ⁷Lors vient a son cheval au plus tost qe il puet. Et qant il est montez, il prent son glaive et son escu et vient a monseignor Kex a l'encontre et s'arreste enmi le chemin et li dit:

95. ¹«Sire, bien vegnoiz vos. — Sire, fet messire Kex, bone aventure vos doint Dex. — Biaux sire, fet li chevalier, qi estes vos? — Vos le poez bien veoir, fet messire Kex, ge sui un chevalier. — ²Certes, fet li chevalier, ge le voi bien qe vos estes chevalier, mes porce qe vos estes seul et conduisiez deus damoiseles par cest país, faz ge reison a moi meemes qe vos ne le feissiez pas se vos ne fuissiez garniz de haute chevalerie. ³Por ce voudroie ge, se il vos pleisoit, savoir vostre non et qi vos estes, qar des bons chevaliers conoistre et arreigner sui ge tout adés desiranz». Messire Kex respont tantost et dit: ⁴«Sire, or

18. doner] don[...] L4 (*buco*) 19. d'eles] eles L4

sachiez qe a ceste foiz ne poez vos savoir mon non ne auqune chose de mon estre fors qe ge sui un chevalier errant, ensint com vos poez veoir. – Certes, ce dit li chevalier, ce me poise mout». ⁵Lors se met avant l'une des deus damoiseles et dit au chevalier estrange: «Sire chevalier, savez vos porqoi cist chevalier qi nos conduit ne vos velt dire son non? Porce qe il n'ose. ⁶Il le vos deïst volantiers se il osast, mes il set tout certainement qe, se il vos avoit dit son non, vos ne le prisiriez ne pou ne grant. Por ce vet il son non celant tant com il puet. – ⁷Ha! damoisele, fet li chevalier, por Deu et por cortoisie, or me dites son non! Si savra adonc qi il est. Se Dex me saut, or sui ge assez plus desiranz de lui conoistre qe ge n'estoie devant. – ⁸En non Deu, sire chevalier, fet ele, qant vos estes si desiranz de savoir son non, et ge le vos dirai tantost. Or sachiez qe ce est messire Kex li seneschaux, la plus male langue et la plus maldisant qi soit orendroit en tout le monde, et plus cheitif ne plus honiz de lui ne porte armes orendroit el roiaume de Logres». ⁹Qant li chevalier entent ceste nouvelle, il devient touz esbahiz et dit a chief de piece a la damoisele: «Et coment li venistes vos entre les mains? Ja sai ge tout certainement qe par force de chevalerie ne peust il conqerre deus damoiseles sor autre chevalier. – ¹⁰En non Deu, fet la damoisele, nos li venimes entre mainz par ceste aventure». Et li conte coment. «Or me dites, fet li chevalier, ne voudriez vos mienz venir entre mes mains qe demorer en son conduit? – ¹¹En non Deu, dient eles, il n'a el monde [chevalier] entor cui nos ne vouxissom moins estre qe entor Kex. – ¹²En non Deu, fet li chevalier, donc est il mestier qe ge vos gaaigne par mes armes, si ne vos avrai si legieremant com il vos ot». ¹³Lors se lance enmi le chemin, si apareilliez com il estoit, et dit a monseignor Kex: «Sire, se Dex me saut, or i parra qe vos feroiz. Sachiez qe vos me leirez les damoiseles ou vos vos combatroiz a moi. Gardez leqel vos amez mienz».

96. ¹Qant messire Kex entent ceste parole, il se comence a sorrre et après respont au chevalier et dit: «Biaux sire, com grant poor m'avez fet qant vos de bataille m'appelez. Or sachiez qe la vostre bataille me fet mout petit poor. – ²En non Deu, fet li chevalier, ele vos fera encore greignor poor qe vos ne cuidez. Ge ne voill ici granz paroles: gardez vos de moi desoremés, qar ge vos abatrai, se ge onques puis». ³Aprés icestui parlement il n'i funt autre demorance, ainz leisse corre li uns encontre l'autre tant com il poent des chevaux trere. Andui sunt fort, andui chevauchent si bien qe nus ne les peust blas-

95. 11. chevalier] *om.* L4 ♦ moins] mienz L4

mer de chevauchier. ⁴Mes por tout ce ne remaint il qe li chevalier ne soit feruz par si grant force qe il n'a pooir qe il se puisse tenir en sele, ainz vole a terre maintenant et est si estordiz qe il gist ilec com se il fust morz, qe il ne remue granment ne pié ne main. ⁵Qant messire Kex se voit delivré del chevalier en tel guise com ge vos cont, il se torne envers les damoiseles et li dit: ⁶«Qe vos est avis de cest chevalier qe vos demandiez orendroit por vostre conduiseur e me voliez leissier por lui?». Et cele, qi trop est iree durement de ce q'ele voit a monseignor Kex avenir, respont: ⁷«Certes, ce n'est mie par vostre proece qe vos fetes ceste merveilles, ainz est par le deable proprement qi vos aide a cestui point. — ⁸Damoisele, fet messire Kex, celui qe vos avez amenteu a ceste foiz si vos trebuchera et rompera le col assez plus tost qe vos ne cuidez. Par celui non faz ge nulle chose, merci a Deu, mes il est dedenz vostre cuer et si vos fet ensint parler orendroit».

97. ¹Atant se metent a la voie, qe il n'i funt autre demorance, et leissent le chevalier gissant en la place, qi encore estoit si estordi qe il ne savoit a celui point se il estoit nuit ou jor. Il chevauchent tout le grant chemin. ²Messire Kex, qi trop estoit iriez envers les damoiseles, chevauche et pense tout adés coment il se porroit delivrer de ces deus damoiseles, qar il voit bien tout clerement qe, se il demore longement avec eles, il ne porra estre q'eles ne l'encombrent en tel leu ou il ne se porra delivrer a sa volenté, a ce qe il voit qe eles li volent mal de mort. Assez pense messire Kex cele matinee au fet des damoiseles. ³Qant il vint ad ore de midi, adonc lor avint qe lor chemins les aporta a une fontaine. Et qant il furent venuz, il trouverent adonc un chevalier ilec qi manoit desus le ruisel de la fontaine, et une damoisele avec lui et dui escuers qi le servoient. ⁴Qant li chevalier qi manoit desus le ruisel voit aprouchier monseignor Kex si armé com il estoit, il reconut tout maintenant qe ce estot chevalier errant. ⁵Et por ce se drece il encontre lui et li dit: «Sire, bien veigniez. Se Dex vos doint bone aventure, descendez, si venez mangier avec nos». ⁶Messire Kex, qi n'en avoit adonc grant talent, dist au chevalier: «Sire chevalier, ge vos merci de la cortoisie qe vos me dites. ⁷Or sachiez qe se ge eusse volanté de mangier, ge descendisse maintenant, mes ge n'en ai volanté: por ce ne voill ge descendre. — ⁸Et se vos volanté n'enn avez, biaux sire, por ce ne remaint pas par aventure qe voz damoiseles n'en aient volanté, por quoi il m'est avis qe il seroit reison qe vos descendissiez, non mie tant por vos com par voz damoiseles. — ⁹Sire chevalier, ce dit

messire Kex, de mes damoiseles ne vos estuet mie trop penser. Ge conois bien qant eles ont volanté de mangier, qar eles le demandent tantost. ¹⁰Or sachiez qe, se eles eussent volanté de mangier, eles le m'eussent ja dit, mes eles sunt d'autre mainere qe vos ne cuidez, qe eles funt chascun jor jornee, ne ne manjuent devant le soir. Ceste costume ont eles ja maintenue lonc tens. – ¹¹Si m'aït Dex, fet li chevalier, ceste costume est mout bone, ce ne fait pas la moie qe vos ci veez. Or sachiez qe se ele n'eust chascun jor a mangier atout le meins plus tart a ore de midi, ge ne porroie avoir sa pes ne sa concorde. – ¹²Sire chevalier, fet messire Kex, ceste mauveise costume par aventure li avez vos aprise? [...] – Biaux sire, fet li chevalier, vos pleroit il a descendre? – ¹³Nanil ore, la vostre merci, fet messire Kex, mes ge voudroie vostre damoisele, se il ne vos devoit anuier orendroit».

98. ¹Li chevalier comence a rrire qant il entent ceste parole: «Dex aïe, biaux sire, ja en avez vos deus et encore volez la tierce? – ²Oïl, fet messire Kex, vos en merveilliez vos? N'avez vos oï dire maintes foiz qe cil qi plus a plus velt avoir? Por ce, se ge ai deus damoiseles, voill ge avoir la tierce sanz faille. – ³En non Deu, biaux sire, fet li chevalier, or sachiez: se vos la tierce damoisele volez avoir, ge croi bien qe la vos couvendra qerre en autre leu qe ci, qar ceste moie ne porriez vos avoir si legieremant com vos cuidez. – ⁴En non Deu, fet messire Kex, ge la voil avoir, ou vos avroiz andeus les moies. – Biaux sire, fet li chevalier, de voz deus damoiseles ne voill ge nulle, ainz les vos qit: ⁵ge me tieng apaié de la moie qe ge qit toutes les autres dou monde. – En non Deu, fet messire Kex, ce ne vos vaut: ou ge n'en avrai nulle ou g'en avrai trois. Or tost, venez vos a moi combatre por defendre vostre damoisele ou vos la me qitez del tout! – ⁶En non Deu, fet li chevalier, ce ne vos feroie ge legieremant qe ge vos qitasse la moie, qar ge l'aim trop durement. – Donc la defendez encontre moi, fet messire Kex, qar a ce en estes vos venuz! – ⁷Biaux sire, trouveroie ge en vos autre cortoisie? – Nanil, fet messire Kex. – En non Deu, fet li chevalier, donc me combattrai ge a vos, qar ma damoisele ne vos qiteroie ge en nulle mainere, tant com ge la puisse defendre». ⁸Qant li chevalier voit qe il ne porroit trouver autre cortoisie ne autre pes en monseignor Kex, il prent son hyaume si le lace, et vient a son cheval et monte, et prent sun escu et son glaive. ⁹Et qant il est apareilliez, il dit a monseignor Kex: «Se Dex vos doint bone aventure, dites moi qi vos estes qi me fetes joster encontre ma volanté. – ¹⁰Et qe volez vos savoir de mon estre, fet messire Kex, fors qe ge sui un chevalier errant? Autre chose vos ne poez savoir de moi ne de mon estre. – En

non Deu, fet li chevalier, ce me poise mout qe vos plus ne m'en dites». ¹¹Lors se met avant l'une des damoiseles et dit au chevalier: «Confortez vos et soiez aseur, qar ge vos faz bien asavoir q'a acestui point n'avez vos pas afere a meillor chevalier del monde. ¹²Savez vos or qi est celui qi tant se tient a cointes et nobles et envoisiez? Or sachiez tot veraïement qe ce est Kex li seneschaux! – En non Deu, fet li chevalier, ce m'est or bel. ¹³Or sui ge moins espoentez qe ge n'estoie devant. Ge cuïdoie avoir trouvé mestre a cestui point, mes, puis-qe c'est messire Kex, ge ne cuit mie granment perdre en cestui estrif, se aventure voirement ne me fust trop durement contraire». ¹⁴Lors se torne enver monseignor Kex et li dit: «Encor vos voudroie ge prier, avant qe nos feisom plus, qe vos ne me fetes joster. Et sachiez tot certainement qe ge ne vos en pri mie tant por doute qe ge aie de vos, mes por l'amor au roi Artus, a cui ge voill mout grant bien. – ¹⁵Or sachiez, sire chevalier, qe vos ne vos poez partir de moi autrement, fors ensint com ge vos ai dit. – Donc començom huimés les jostes, fet li chevalier, puisque autrement ne puet estre. – Il me plect mout, fet messire Kex, ce vos di ge bien».

99. ¹Quant il orent ensint parlé, il n'i funt autre demorance, ainz s'entreloignent et puis leissent corre ensemble au ferir des esperons. Et quant ce vient as glaives beisier, il s'entrefierent de toute la force. ²Li chevalier est si feruz en cele pointe, a ce qe messire Kex i metoit tout son cuer et sa force, en tel guise qe il le porte a terre mout feleneusement. ³Et de tant li est bien venu a cele foiz qe il n'a mal ne bleceure, fors del cheoir qe il prist a terre. Li chevalier, qi assez est preuz et vistes, se relieve mout vistement, après ce qe il fu abatu, et dit a monseignor Kex: ⁴«Ge vos apel a la bataille. Or sachiez tout certainement qe por ce, se vos m'avez abatu, ne sui ge pas encore mené dusq'a outrance. ⁵Se ge encore ne me revenge as espees trenchant [de] la vergoigne qe vos m'avez fete a cestui point, ge ne me tieng por chevalier». Messire Kex respont tantost et dit: «A vos ne combatroie ge, puisque ge vos ai abatu de la premiere joste, qar a deshonor me porroit atoner. – ⁶Coment, dit li chevalier, cuidez vos ore avoir ma damoisele si legierement par un cop de lance? Si m'aït Dex, ge cuit et croi qe vos i leisseroiz dou sanc avant q'ele vos remaigne del tout. ⁷Or tost, decendez, se il vos plect, et vos venez a moi combatre. Se vos a l'espee

98. 12. En non ... chevalier] Voire ce dit li chevalier. En non Deu fet li chevalier L4 (*v. nota*)

99. 5. de la vergoigne] la v. L4

trenchant me poez mener a outrance, donc soit vostre la damoisele, ge la vos qit del tout, mes autrement non en aucune mainere».

100. ¹Qant messire Kex voit qe combat[r]e le covient en toutes guises encontre le chevalier se il velt avoir la damoisele, il n'i fet autre demorance, ainz descent tout maintenant del cheval et le baille a son escuer a garder, ²et s'apareille de la bataille et leisse corre au chevalier, l'espee droite contremont, et cil li vient d'autre part apareilliez de soi defendre: volantiers vencheroit sa honte, se il le pooit fere. ³Ensint comence la bataille des deus chevaliers, droitement enmi le chemin. Granz cox se vont entredonant, et durs et pesanz, des espees trenchanz et dures. ⁴Il ne se vont pas espargnant, ançois s'entrefierent adés si fellons cox com il poent amener de haute a la force des braz. ⁵Et q'en diroie? Longement dure la bataille, qar ambedui furent assez parengal de pooir et de force. ⁶Messire Kex, qi toutesvoies estoit plus aisez a la bataille qe cil n'estoit, qant il se sunt une grant piece tenuz ensint engalment, porce qe il savoit plus de la [s]crime qe li chevalier – qar a la verité dire il en savoit assez, com cil qi de s'enfances avoit apris –, il comence venir au desus del chevalier et a mener mout malemant a l'espee trenchant, or a destre or a senestre. ⁷Et, au voir dire, cil estoit navrez en plusors leus et plus avoit perdu del sanc qe mestier ne li fust et por ce estoit il ja trop malement menez de doner si granz cox et si pesanz com il fist au commencement. ⁸Qant messire Kex voit et connoist qe li chevalier estoit menez a ce qe il ne pooit mes en avant, il li leisse adonc corre sus de toute la force et le fiert dou cors et de l'escu, si qe il le fet voler a terre tout envers. ⁹Et qant il se velt redrecier, il ne puet, qar messire Kex se lance sor lui et le prent par le hiaume et le tire si fort a soi qe il li arache fors de la teste et le giete en voie. ¹⁰Qant li chevalier sent qe il a la teste desarmee, s'il est adonc espoentez et esmaiez de mort ce n'est merveille, qar il voit tout clerement qe messire Kex ne le vet pas espargant: trop a male pitié de lui. ¹¹Por ce ne set li chevalier qel autre chose il puisse fere a celui point por sauver sa vie fors crier merci. Il set bien qe il n'a encore pas tant mesfet a monseignor Kex qe il n'ait bien merci de lui, puisque il merci demandera. ¹²Et messire Kex, qi ja voudroit estre delivrez de ceste bataille, puisque delivrer le couvient, qant il voit qe li chevalier ne puet mes en avant, il li dit: ¹³«Dan chevalier, ou vos vos tendroiz por outré, ou ge vos corroucerai, se Dex me saut». Et auce l'espee et fait semblant qe il li voille trenchier la teste.

100. 1. combatre] combate L4 6. de la scrime] de la «bataille» crime L4

101. ¹Quant li chevalier voit venir l'espee de haut et il sent qe il avoit la teste desarmee, il a adonc poor de mort et por ce crie il tant com il puet: «Ha! merci, ne me metre a mort, gentix chevalier. Ge me tieng por outrez! – ²Puisque tu te tiens por outré, fet messire Kex, ge te qit atant de toutes qereles. – En non Deu, fet li chevalier, de ce vos merci ge trop durement. Puisque de toutes qereles me qitez, donc me qitez vos ma damoisele, qar ceste estoit la qerele qi entre nos deus estoit et porqoi vos vos combatiez a moi». ³De ceste parole se comence messire Kex a rrire trop fierement. Et quant il parole, il dit au chevalier: «Qe avroie ge gaagné en ceste bataille, se ge n'avoie la damoisele por cui ge me sui combatuz? – ⁴En non Deu, fet cil, ge le vos dirai. Vos i avez assez gaagné quant vos avez mené dusq'a outrance un tel chevalier com ge sui, qar ici avez vos conquist grant pris et grant lox. ⁵Et sachiez, ce qe vos me leissiez vivre me vaudroit assez petit se vos ma damoisele me toliez, qar, se Dex me doint bone aventure, ge ai si mis mon cuer en lui qar ge sai tout veraïement qe ge ne porroie vivre deus jors sanz lui. ⁶Et se vos la me toliez, si m'aît Dex, ge m'ocirroie de m'espee, et ensint me metriés vos a mort, a cestui point qe vos me deistes qe vos me leissiez vivre. – Coment, sire chevalier? fet messire Kex. Amez vos donc tant ceste damoisele com vos dites? – ⁷Oïl, certes, fet li chevalier, et ge vos pramet loiaument qe, se vos la me tolez, tel mal aven[dra] de moi com ge vos ai dit orendroit. – ⁸En non Deu, fet messire Kex, ge ne voill qe vos por moi veignez a mort après qe vos estes eschapez de ceste bataille. Or prenez vostre damoisele, qe ge la vos qit bonement». ⁹Quant li chevalier entent ceste cortoisie qe li fet Kex, il est tant liez et tant confortez adonc qe il ne sent a celui point de plaie nulle ne bleceure qe il ait, ainz se leise il errament cheoir as piez de monseignor Kex et li dit: ¹⁰«Mon Dés, mercis, frans chevalier, de ceste cortoisie qe vos m'avez fet a cestui point, qe bien sachiez veraïement qe vos m'avez orendroit la vie rendue. ¹¹Et certes vos m'avez tant esleez qe, si m'aît Dex, ge ne sent mal ne bleceure qe vos m'aiez fete orendroit en ceste bataille, ne nul mal de mon cors».

102. ¹Lors se torne messire Kex envers les .ii. damoiseles et li dit: «Beles damoiseles, vos est encore avis qe ge soie tel chevalier qe vos doiez tenir apaïees de mon conduit et qe vos me doiez tenir por reïson por vostre ami?». ²Et cele qi ja avoit esté delivree de la chaene

101. 7. tel mal avendra de moi] tel amalaven | de moi L4 9. errament] (?) L4 (*inchiostro evanito*)

respont tout premierement et dit: «Certes, messire Kex, encore ne voi ge en vos bonté ne valor por qoi ge demorasse volantiers en vostre conduit, se ge trouvasse autre chevalier qi en son conduit me vouxist prendre. Et se Dex me saut, il n'a en vos tant de bonté ne de valor qe ge ne me tenisse a trop mal paiee. — ³Et vos, damoisele, fet messire Kex a l'autre damoisele, qe dites vos? ⁷Avez vos volanté de respondre moi en tel mainere com ceste damoisele m'a respondu ou autrement?». ⁸Et cele, qi estoit del tot conseillie a l'autre damoisele, respont:

103. ¹«Missire Kex, or sachiez tout de verité qe ge m'acort trop bien a ce qe ceste moie compeignie a dit. — Beles damoiseles, fet messire Kex, donc m'est il avis qe vos me refuissiez del tout. — Certes, vos dites verité, funt les damoiseles. — ²Damoiseles, fet messire Kex, or sachiez veraïement qe de ce qe vos me dites me fetes vos honte trop grant. Et certes, se vos ne fuissiez damoiseles, vos m'avez tant dit et ore et autre foiz qe, se Dex me doint bone aventure, ge ne leissasse en nulle guisse qe ge ne vos meisse ambedeus a l'espee. ³Mes porce qe damoiseles estes m'en souferrai ge atant, et neporquant, ce vos faz ge bien asavoir qe ge m'en vengerai mout hautement, et vos dirai en qe mainere, qe ce ne vos voil ge mie celer. ⁴Or sachiez tout veraïement qe au premier home qe ge enconterai, qel qe il soit, ge donrai l'une de vos deus, cele qe il mielz amera. ⁵Et l'autre qi m[e] remaindra ge donrai a autre après qe ge enconterai premierement». Les damoiseles responnent errament a monseignor Kex: ⁶«Il ne nos chaut ou nos aillom, mes qe nos soiom fors de voz mains. — Or ne vos chaille, fet messire Kex, qe vos en seroiz fors assez plus tost qe vos par aventure ne vos seroit mestier».

104. ¹Atant monte messire Kex et prent congié au chevalier et se part de lui. Et s'en vet entre lui et ses damoiseles et chevauche en tel guise dusq'a ore de none. Après ore de none droitement li avint qe il encontra un nain sor un grant roncín trouteor. ²Li nainz estoit viell et touz chenuz, auqes grandez, mes il ert tant laide creature durement qe, se nature se travaillast assez de fere une si laide faiture, ele ne peust plus lede fere en nulle guise. Et surtout avoit chiere d'estre felon trop durement, et si estoit il sanz faille. ³Li nainz chevauchoit tot seul, en tel guise com ge vos cont, et tenoit une grant corgiee en une main et en l'autre tenoit son frain. Et q'en diroie? Trop ressembloit bien honie chose et felenesce et de male aire. ⁴Quant messire Kex voit venir le nain, il se comence a sourire. Et quant il est auqes

pres de lui il li dit: «Bien veigniez, sire bachalier». ⁵Li nains, qi bien cuide de voir qe messire Kex li ait dit ceste parole por gaber le et por despit, li dit plein de maltalant et de corrouz: ⁶«Bien sui ge venuz voirement a vostre deshonor, sire mauveis chevalier». Messire Kex comence a rrire et respont tout en sorriant: ⁷«Nainz, porqoi me dis tu vilenie? Certes, encore nel deservi ge envers toi por qoi tu me deuses dire vilenie. Mes ore me dis, se Dex te saut, porqoi chevauches tu si priveemant? — ⁸Et qe volez vos, fet li nains, qe maing en ma conpeignie? Ge ne truis onques damoisele qi avec moi voille demorer. Mon Dés! En truis — et plusors foiz! — qi font toute ma volanté et tout mon desir aconplissement! ⁹Mes ge ne truis nulle sanz faille qi voille venir après moi, por honte de gent plus qe por autre chose, qar bien en avroient volanté. ¹⁰Maintes en truis ge, se ne fust por parole del pople.

105. «— ¹Nainz, ce dit messire Kex, or saches tu veraïement qe ge sui mout corrouciez de ce qe ge te voi aler ensint tout seul sanz conpeignie. — ²En non Deu, sire chevalier, ce dit li nainz, se vos en avez si grant corrouz com vos dites, tost poez le corrouz oster, se il vos plect, qar vos me poez doner tout maintenant l'une des deus damoiseles, se vos volez: adonc avrai ge conpeignie, si n'irai si priveement com vos dites. — ³Nainz, ce dit messire Kex, e l'oseriés tu prendre la damoisele, se ge la te donoie? — ⁴Et porqoi donc ne la prendroie ge? fet li nainz. Se vos la me volez doner de bone volanté et par covenant qe vos après ne la me toullissiez, or sachiez qe ge voudroie orendroit qe vos en eussiez ausint bien la volanté de doner com ge avroie de prendre. ⁵Si m'aït Dex, ge seroie ja mout plus liez au departir qe ge n'estoie qant ge vins ci. — Nains, fet messire Kex, tant as parlé qe ge voill fere ta volanté tout outreement. ⁶Or regarde ces deus damoiseles, et cele qe tu miels ameras por toi et qi miels te plera, cele te doin ge orendroit sanz faille et sanz contredit. Ne ne doutes de ce qe ge te vois disant, qar ge ne t'en faudrai en nulle mainere de riens». ⁷Qant li nains entent cestui plet, il devient tout esbahiz. Et qant il parole, il dit a monseignor Kex: «Sire chevalier, se Dex vos doint bone aventure, me dites vos a certes ce qe vos me dites ou vos me gabez? ⁸Certes, encore ai ge doute qe vos ne le me dioiz par eschar, ce qe vos me dites. — Nains, fet messire Kex, ge te pramet com chevalier qe ge ne te faudrai de ce qe ge te pramet. ⁹Di moi laqel tu velz mielz de ces deus damoiseles, et la te donrrai maintenant. — ¹⁰En non

104. 7. ore me dis] ore me dites L4

Deu, sire chevalier, fet li nainz, donc prendrai ge l'une! Qant vos a choisis m'avez mis par vostre cortoisie, ge voill prendre errament: se ge la plus bele ne preing, ge voill perdre la teste». ¹¹Lors s'en vet maintenant a la damoisele qi de la chaene avoit esté delivree et dit: «Sire chevalier, se il vos plect, ge voill ceste, qar ceste sanz faille est la plus belle de ces deus. – ¹²Nainz, dist Kex, et ge la te doing. Or la pren et t'en va qel part qe tu voudras».

106. ¹Qant la damoisele oï cest pleit, ele est tant fierement iree q'a pou qe li cuer ne li crieve. «Coment! fet la damoisele. Chose vil et deshonorée et ahontee! Me cuides tu donques avoir? – ²Damoisele, ce dit li nainz, ge ne le cuiderai desoremés, ge sui touz hostez de cuider. Ge sai bien qe vos estes moie. – ³Avant fuses tu pendu, fet ele orendroit, qe ge fuse toe! Et li mauveis chevalier trainez, qi done tel damoisele com ge sui. – ⁴Nainz, ce dit Kex, ne gardes a ses paroles: ele est toe. Ge la te qit, veraïement le saches tu, qe jamés jor de ta vie ne la te demanderai. – Nainz, ce dit la damoiseles, or saches tu veraïement qe, se tu aproches de moi, ge te creverai les deus elz. – ⁵Damoisele, se dit li nains, qe feroient donc ces corgiees qe ge tieng? Eles sunt dures et noees. Ja en avrez parmi la face un petit cop, ou vos leiseriez le parler. – Nainz, ce dit messire Kex, or i parra qe tu feras: il n'i a en ceste qerele fors qe vos deus. Qi mienz le porra fere le face desoremés, qar a ce en estes venuz entre vos deus. – ⁶Sire chevalier, fet li nainz, desoremés m'en leissiez chevir, puisque ele est moie. Ge port la plaie et la medicine: veez ci la plaie». Si li moustre adonc sa corgiee. «Et ou est la medicine? fet messire Kex. – ⁷Cele li mousterrai ge bien, fet li nainz, qant il en sera leu et tens. Cele medicine la trera del tout a ma cordele en tel guise, sire chevalier, puisque ele n'avra testee, qe ele leiserait vos por moi, ce di ge tout seurement». ⁸Messire Kex comence a rrire trop fieremant qant il entent ceste parole. Et qant li nainz voit et conoit qe il est sanz faille aseurez del chevalier et qe il ne l'en chaut avoir poor, il dit adonc a la damoisele: ⁹«Metes vos a la voie et ne fetes dangier de venir en ma conpeignie, qe bien sachiez veraïement qe le refuser vos porroit mout tost torner a honte et a domage. – ¹⁰Vil chose, fet la damoisele, home mauveis et despite! La plus leide de tout le monde, qi es de lignage de cinge! Comant oses tu comander en nulle mainere del monde a tel damoisele com ge sui? – ¹¹Damoisele, fet li nains, se vos volez fere sens por vos, ne nos fetes lonc parlement, mes metes vos tost a la voie, ensint com ge le vos comant, ou autrement, se Dex me saut, ge vos ferai leidure et honte de vostre cors, ce sachiez vos bien veraïement».

107. ¹La damoisele, qi encore ne cuidoit en nulle guise qe li nains eust hardement de fere ce qe il disoit, respont assez plus fierement et plus durement q'ele ne feisoit devant. Et qant li nainz, qi estoit pleinz de felenie, voit qe ele ne feroit riens por bien parler, il hauce la corgiee as deus mains et li done parmi le visage un si grant cop com il puet amener, de toute la force qe il avoit, si qe — au retregre de la corgiee — li sanc saut tout errament de la face en plusors leus. ²La damoisele, qi foible estoit, qi n'avoit pas apris ceste duresce ne ceste vilenie a souffrir, est si durement esbahie et si espoentee dou cop q'ele a receu q'ele ne se puet tenir en sele, ainz vole a terre maintenant et gist ilec une grant piece tot autresint com se ele fust morte. ³Et li nainz, qi nulle pitié n'en a, hurte cheval et la comence a doceler si malement q'ele s'espasme de la grant angoise qe ele sent. Qant ele est revenue de pasmeisom, li nainz, qi nulle pitié n'en a, [li dit]: ⁴«Or tost, damoisele, de l'aler, et tout a pié! Or i parra com vos estes isnele! Et, se Dex me doint bone aventure, se vos demorez ne pou ne grant, por morte vos poez conter! Or tost de l'aler, et ge m'en irai, vostre palefroï après moi».

108. ¹Qan la damoisele se voit si malement mener au nain, ele comence adonc a plorer mout tendrement et ele se torne envers monseignor Kex et li dit tout en plorant: «Ha! merci, franc chevalier, ne regarder a ma vilenie et a ma folie! ²Se ge ai encontre vos dit chose qe ge ne deusse dire, ge m'en garderai desoremés. ³Por Deu et por gentilece de chevalerie, ne souffrez qe cist nainz me face plus honte qe il m'a fete, qar certes l'en vos en porroit blasmer, ne vos ne le devez souffrir, atout le meins porce qe vos estes chevalier errant». ⁴Messire Kex respont adonc: «Ma damoisele, or sachiez bien qe desoremés ne m'en entremetrai ge de vos. ⁵Vos avez qist par vos meemes la verge dont vos estes batue, bien vos en couvieng de cest fet, qe vos avez desoremés qi vos donrra vostre reison de toutes [les] males oevres qe vos onques feistes». ⁶Et qant il a dite ceste parole il se torne d'autre part. «Damoisele, ce dit li nains, or tost, metez vos a la voie et ne m'en fetes plus parler, qe il vos porroit tout orendroit torner a damage et a honte. ⁷Et bien sachiez tout veraïement qe ge ne vos irai espargnant com fesoit orendroit cist chevalier. Ge n'avrai ja pitié de vos, ce vos pramet ge loiaument». ⁸Qant la damoisele ot ceste parole, ele n'i fet autre demorance, ainz se met a la voie tantost, plorant et faisant gran

107. 3. doceler] doteler L4 (v. nota) ♦ li dit] om. L4 4. conter] tonter L4

108. 5. verge] vergoigne L4 (v. nota) ♦ les] om. L4 6. Damoisele] Damoise|sele L4

duel qe jamés ne verroiz fere greignor a damoisele. Et cil, qí son cheval li moine, après li voit toutesvoies disant: ⁹«Or tost, damoisele, de l'aler isnelement, ou autrement, se Dex me saut, tantost avriez male aventure sanz demorer». Cele, qí a poor de mort et qí bien voit tout clerement qe cil n'avroit pitié de lui, se travaille tant com ele puet de fere comandant au nain. ¹⁰A celui point n'est ele pas si orgueilleuse d'assez com ele estoit devant, bien la chastie li nainz en petit d'ore. Messire Kex, qí encore estoit avec l'autre damoisele enmi le chemin, qant il voit cele qí s'en vet en tel mainere, il comence a rrire et la moustre a l'autre: ¹¹«Veez vos de vostre compeigne, com ele a tost trouvé bon mestre et home qí li set doner toute sa reison droitement? ¹²Si m'aît Dex, damoisele, un autretel mestre vos faut, et vos l'avroiz prouchainement, se ge onques puis».

109. ¹Qant la damoisele voit cest pleit, ele est tant durement iree q'ele ne se puet tenir q'ele ne die a monseignor Kex: «Certes, fet ele, vil, honi, deshonzorez et hontez, ordure de touz chevaliers, vilté de toute gent et mauvestiez, tant avez fet a cestui point de ceste damoisele qe bien avez moustré la mauvestié de vostre cuer et de vos. ²Et de ce ne doutez mie qe il ne demorra pas granment qe vos vos en repe[n]tiroiz mout chèrement. Mauveis, desloial traïtor! Fist onques mes nul chevalier si grant leidure a damoisele com vos avez orendroit fet a ceste? ³Certes, vos nel deussiez avoir fet por nulle aventure, qar tout fust il qe la damoisele ne vos vouxist amer, por ce si la metés a honte. ⁴Se vos coneussiez honor, vos ne le eussiez fet por gaigner una cité. Mes deshonor, viltez, honte – qí ont en vostre cors meison – vos ont si les elz estopez et avoglé la veue qe vos ne poez gote veoir. ⁵Por ce di ge qe il n'est merveille se vos avez fet celui fet, qar honte [et] viltez vos enseignent toutes voz oevres. ⁶Certes, por la mauvestié qe ge ai veue dedenz vos ne voill ge desoremés venir en vostre conpeignie. Dex me gard de sivre tel honte de siecle et de gent, qar vos n'estes pas home de bien ne de honor, fors qe de honte et de vergoigne». ⁷Qant la damoisele ot parlé en tel mainere, ele n'i fet autre demorance, ainz s'encomence a retourner celui chemin qe ele estoit venue. Qant messire Kex l'en voit aler, il li comence a crier a haute voiz: ⁸«Ha! damoisele, Dex vos mete es mains de Brehuz sanz Pitié! Cil vos savra sanz faille doner vostre droiture, se il vos trouvoit par le chemin. Dex le vos mant, si com vos l'avez deservi. – ⁹Ha! fet ele, mauveis, honiz, honte et vergoigne de toutes gentz, tant estes ore

109. 2. repentiroyz] repetiroyz L4 5. et] om. L4

appareilliez de dire mal! Dex vos mant si dur encontre qi le col vos rompe et le braz autresint, et chiez vos plus souvant qe ne fet autre chevalier!». ¹⁰Et qant ele a dite ceste parole, ele s'en vet outre, q'ele ne tient autre parlement a monseignor Kex. Mes atant leise ore li contes a parler d'eaus et retorne au roi Artus et a ses conpeignons, et vos dirai coment.

III.

110. ¹Or dit li contes qe mout fu li rois Artus corrociez qant il sot certainement la grant honte et la grant vergoigne qe cil de la tor avoient fet au bon chevalier qi Febus avoit non. ²Puisque li rois Artus fu chouchiez en son lit, il pensa trop, qar trop li anuia, si com il dit, se li bon chevalier demore longement en prison. ³Volantiers le delivverroit, porqoi il le peust delivrer par sa proesce com chevalier errant, qar bien set il certainement qe il le deliverra tout errament porqoi il face seulement asavoir qe il soit le roi Artus qi voille sa delivrance. ⁴Ensint le porroit il tantost delivrer, ce set il bien certainement, mes il le voudroit autremant delivrer, se il peust, par sa chevalerie, com chevalier errant porroit le delivrer. ⁵Ceste delivrance ameroit il mielz qe nulle autre. Qant li rois Artus ot une grant piece pensé a ceste chose, il s'endormi dusqe a l'endemain qe li jor aparut et biaux et clers. ⁶Li rois se lieve tout premiers et s'en vet a ses conpeignons et li eüre bon jor et bone aventure, et cil funt autresint a lui. Atant evos venir le seignor de leienz qi lor dit: ⁷«Seignors, bon jor vos doint Dex. Voudriez vos tant fere, por la moie amor, qe vos cestui jor seulement demorisiez ceienz en cest ostel? Or sachiez tout certainement qe ge seroie liez de vostre demorance, si m'aït Dex. ⁸Et ge vos pramet loiaument qe ge vos i feroie fere honor et serveise tant com ge porroie, porce qe chevalier erranz estes». Li rois respont premierement et dit: ⁹«Sire hostes, de ce qe vos dites vos merciom nos trop. Et bien sachiez, se nos deusom a ceste foiz remanoir en cest chastel, qe nos demorissiom plus volantiers avec vos qe en null autre leu. ¹⁰Mes nos n'avom plus valanté de demorer a ceste foiz». Lor demandent lor armes et l'en li aporte tout maintenant. ¹¹Bandemagus s'arme tot premierement, et li rois après. Et qant Herchendins a ses armes prises, il dit au roi Artus: «Sire compeinz, qe ferom nos? Coment porrom nos

departir de cest chastel et leisserom en prison le bon chevalier qe vos savez? ¹²Si m'aït Dex, ce est trop grant honte por nos qi chevaliers erranz somes. Certes, ge sai tout de voir qe se il fust orendroit en son delivre ensint com nos somes el nostre, il ne se partist de cest chastel en tel mainere com nos nos partom, porquoi nos fuisom en son point».

III. ¹Qant li roi Artus ot ceste parole il respont et dit: «Certes, sire conpeinz, ge vos otroi bien ceste chose, et Dex le set, qe se ge veisse coment ge le peusse delivrer par ma chevalerie, ge ne me partisse de cestui chastel si [ge ne] l'eusse delivré. ²Mes, qant ge voi qe ge n'i puis metre si bon conseil com ge voudroie, il me couvient a souffrir dusq'a tant qe ge verrai leu et tens de penser de la delivrance. Or sachiez veraiment qe de sa prison ne me poise mie moins qe il poise a vos». ³Lors demande li rois som hiaume et l'en li aporte errament. Et qant il le voloit metre en sa teste, il demande au seignor de leienz: ⁴«Dites moi, sire hoste, li sire de cest chastel est il en cest chastel orendroit? – Sire, oïl, fet li ostes, il passa tout maintenant par ci devant, qar il venoit orendroit de convoier le bon chevalier qi ersoir passa le pont par sa proesce ensint com vos veistes». ⁵Li rois Artus, qant il entent ceste nouvelle, il n'i atent plus, ainz lace son hiaume en sa teste, et ensint funt li autre dui et maintenant se partent de leienz et preignent congié a l'oste. ⁶Qant il furent fors del chastel, il n'orent pas chevauchié plus d'une archiee qe il encontrerent une damoisele trop bele durement qi chevauchoit un palefroit noir, si vestue et si acesmee de toutes choses com se ele deust maintenant prendre mari. ⁷Ele menoit en sa conpeignie deus autres damoiseles. Li [rois Artus] dit a ses conpeignons: «Ge voill ceste damoisele avoir, non mie por amor de la damoisele, mes por fere honte et deshonor au seignor de cest chastel. – ⁸Savez vos, dient li conpeignon, qi est la damoisele? – Oïl, ce dit li rois, voirement le sai ge: ele est amie au seignor de cest chastel. – ⁹Coment le savez vos, sire? fet Bandemagus. – En non Deu, fet li rois, ge estoie arsoir as fenestres de nostre ostel, et ele passa adonc par devant nos. Et ge demandai adonc qi ele estoit, et il me fu dit qe ele estoit amie au seignor del chastel: or la vois ge reconoisant tout certainement. ¹⁰Se ge faz ce, li bon chevalier sera delivrez por achoison de ceste damoisele».

III.2. ¹Einsint parlant chevauchent tant qe il sunt venuz dusq'a la damoisele, qi chevauchoit si noblement com ge vos cont. Li rois se lance envers la damoisele errament et prent la au frein et dit:

III. 1. ge ne] *om.* L4 7. Li rois Artus] Il L4 (*cambio di soggetto*)

²«Damoisele, ge vos preing com chevalier doit prendre damoisele d'autrui. Ore sachiez qe li sires de cest chastel ne vos deliverra de mes mains se il ne vos avra par force. ³Or li mandez qe un seul chevalier vos a prise. Se il vos puet a cestui point delivrer d'un seul chevalier, delivree estes voirement. ⁴Autrement, vos en amerrai ge com damoisele conqise». Qant la damoisele entent ceste nouvele, ele comence a plorer trop tendrement et dit au roi: ⁵«Ha! sire chevalier, ne me fêtes ceste vilenie de prendre moi en ceste mainere, atout le moins porce qe ge sui damoisele et sanz conduit. — ⁶Damoisele, ce dit li rois, or sachiez tout certainement qe ge ne le faz mie por vos, ainz qe ge voudroie qe li seignor de cest chastel, qi amie vos estes, se vouxist contre moi esprouver. ⁷Ceste prise faz ge por lui et non por vos. Or li mandez, se il vos plect, qe il vos viegne de moi rescorre, ou autrement ge vos enmenrai sanz faille». Qant la damoisele voit et connoist qe ele ne porroit eschaper au roi Artus, ele dit a l'un des escuiers: ⁸«Or tost, va t'en leienz et di a ton seignor qe il me viegne delivrer des mains d'un estrange chevalier qi me tient ici enprisonnee, et conte li bien toutes les paroles qe li chevalier li mande». ⁹Li vallet se part maintenant qe il entent son comandement et entre dedenz le chastel et trouve le seignor de leienz qi alors s'estoit fet desarmer. ¹⁰Li vallet vient devant lui, si li dit a briés parole: «Sire, nouveles vos aport teles». Et maintenant li comence a conter coment la damoisele estoit prise la fors et les paroles qe li chevalier li mande. ¹¹Qant li chevalier, qi Ebrouan avoit non et ensint estoit apelez, entent ceste nouvelle, il est corrouciez trop durement. Et qant il parole il dit: «Li chevalier n'est mie sages qi me fet ore cest outrage. ¹²Bien puet dire seurement qe pechié l'a ceste part amené por avoir honte et laidure. Bien me connoist mauveisement, qant il enprist si grant orgoill a fere et pres». ¹³Lors demande ses armes et l'en li baille maintenant, qar encore estoient devant lui. Et qant il est armez, il descent enmi la cort. ¹⁴Assez avoit leianz chevaliers qi voloient prendre lor armes et aler avec lui por fere lui conpeignie, mes il ne velt: il ne li plect qe null gent aille avec lui, fors deus chevaliers seulement touz desarmez et deus escuers.

113. ¹En tel mainere se part Ebron de son chastel. Et porce qe il avoit en celui païs grant renomee de chevalerie a il en soi si grant fiance qe il ne li est pas avis qe contre lui puisse durer nul chevalier puisqe ce vendra au derain, por ce s'en ist il del chastel tout armez, en tel mainere com ge vos ai dit et a tel conpeignie. ²Et maintenant qe il est fors dou chastel, il voit qe li rois Artus s'estoit ja esloignié dou chastel

plus de deus arbalestees et enmenoit toutesvoies avec lui la damoisele. ³Qant Ebron voit ceste chose, il se haste un pou de chevauchier entre lui et ses conpeignons. Et qant il est pres del roi il comence a crier: «Arrestez vos!». Et li chevaliers s'arrestent, qi a celui point n'atendoient nulle autre chose fors lui. ⁴Et qant il [est] venuz dusqe a els, il lor dit sanz saluer les: «Ligel de vos est qi avec moi se velt combattre por achoison de ceste damoisele?». ⁵Li rois se met avant tantost et dit: «Ge sui cil qi a toi se velt combattre, et non mie tant por achoison de ceste damoisele com por autre chose. – ⁶En non Deu, fet li chevalier, qant vos de bataille avez si grant volanté com vos en mostrez le semblant, or i parra qe vos feroiz».

114. ¹Qant il orent ensint parlé il n'i funt autre demorance, ainz leissent corre maintenant li uns encontre l'autre com il poent des chevaux treere. ²A celui point droitement qe il se doivent entreferir, adonc avint par aventure qe le cheval au chevalier trebucha si malement qe, au cheoir qe il fist a terre, petit s'en faut qe il ne se brisa le col. ³Li chevalier, qi adonc estoit cargiez de ses armes, trebucha maintenant desus le col de son cheval, mes, porce qe il estoit legiers et fort assez, resaut il sus tout maintenant et voit qe li rois Artus estoit ja passez outre, qi a lui n'avoit touchié, et retourne sor lui tout ensint montez com il estoit. ⁴Qant il fu retornez arrieres, Ebron li dist: «Sire chevalier, ne dites pas qe vos m'aiez abatu, qe vos vos dorriez pris por noiant se vos deissiez qe vos abatu m'eussiez. ⁵Mis chevaux, qi desoutz moi cheï, si m'a[ba]ti: ce ne feistis vos pas. – Coment? fet li rois. Volez vos donc dire qe ge ne vos abati pas? – Oïl, certes, fet li chevalier, voiremant le di ge bien. – ⁶Et se vos venissiez ore, fet li rois, a auqun pont ou la costume fust tele qe cil qi abatu i fussent deussent estre emprisonnez, por cestui fet devriez vos estre enprisoné. – ⁷Nanil, certes, fet li chevalier, et qi en prison me meist et vouxisse dire qe, porce qe abatu eusse esté, m'eust mis en prison, bien me feist apertement tout le greignor tort de cest monde. – ⁸Et qi si grant tort vos feroit, ce dit li rois, qe il vos meist orendroit en prison porce qe vos estes trebuchiez par vostre cheval, qel poine devroit il avoir? – ⁹En non Deu, dit Ebron, se vos orendroit me feissiez honte et puis me meissiez en prison, or sachiez qe ge ne me tendroie apaié de l'amende devant qe ge vos veisse trenchier la teste. – ¹⁰En non Deu, sire che-

113. 4. est] *om.* L4

114. 4. m'aiez abatu] m'a. abac... L4 5. si m'abati] si mati L4

valier, fet li rois, donc estes vos venuz a point que vos devez perdre la teste par vostre jugement meemes, qar yer en cel jor droitement fu fete en vostre chastel une vergoigne et une honte trop grant par ceste achoison qi vos est ici avenue. ¹¹Et savez vos a qel chevalier fu fete ceste grant vergoigne et tel honte? Se Dex me saut, [a] qi en bonté de chevalerie vaut tex .c. homes com entre vos et moi vaillom. ¹²Or donc, qant il avint ensint qe vos a home de tel pris com est celui fetes vergoigne et honte si grant devez vos perdre la teste, et par reison!». Ebron devint touz esbahiz, et qant il a pooir de parler il dit au roi: ¹³«Coment, sire chevalier? Avint il donc ensint au chevalier qi yer fu pris et reçut tant de vergoigne et de honte a celui point qe l'en ne l'en peust fere plus? ¹⁴En non Deu, dit li chevalier, ce ne fu mie por moi, ne ge n'en soi rienz, [qe] cestui fet alast ensint. ¹⁵Mes puisque vos le m'avez dit, et ge sai bien, puisqe vos estes chevalier errant, [qe] vos ne m'en diriez se le voir non, il sera maintenant delivrez, qar ge vos faz bien asavoir qe a tort et encontre reison ge ne voudroie chevalier del monde tenir en prison». ¹⁶Maintenant se torne vers un des conpeignons et li dit: «Or tost, alez au chevalier vistement et le fetes maintenant delivrer, celui qi yer soir fu pris, et tout ensint garniz de ses armes com il estoit qant il entra sus le pont, et desus son cheval meemes le fetes venir devant moi. ¹⁷Or tost, retournez ici maintenant. — Sire, fait cil, a vostre comandement».

115. ¹Li chevalier se parti atant de la place por acomplir le comandement de son seignor. Et li rois Artus, qi trop voudroit, se il le pooit fere, qe la costume dou chastel remansist par sa proesce, dit a Ebron: ²«Sire chevalier, porce que vos dites qe vos ne fustes pas abatu por moi, et bien est verité sanz faille, vos plect il qe nos recomençom les jostes entre moi et vos? — Nanil, fet li chevalier, qar mi chevax est blechiez de ceste joste. — ³Donc voill ge descendre, fet li rois, et encomençom la bataille. — Certes, ce dit Ebron, ce me plect mout, puisque autrement ne puet estre». ⁴Li rois descent tout errament et baille son cheval a garder a son escuer. Et qant il est appareilliez de la bataille, il n'i fet autre demorance, ainz leisse corre sor Ebron, l'espee droite contremont, por lui doner sus le hyaume, se il onques puet. ⁵Cil li revint de l'autre part fiers et hardiz com lion. Mout [pou] redoute le roi, qar encor n'avoit il trouvé nul a cui il fust combatuz qe il n'en

11. a qi] qi L4 14. qe cestui] c. L4 15. qe vos] v. L4 17. fait] font L4 (*v. nota*)

115. 5. pou] *om.* L4

venist au desus par force d'armes. ⁶Por ce n'est il pas espoentez dou roi qi encontre lui se combat. Li rois, qi mout estoit hardiz et seur a merveilles, encomence cele barate premierement. Granz cox pesanz, durs et fellons li vait donant, autresint fet li chevalier au roi: il nel vet pas espargnant. ⁷Li rois le fiert et il fiert lui, et ensint se maintient l'estrif durement enmi le chemin si longement qe li bons chevaliers qi fu enprisonnez fu delivrez et amenez dusqe en la place ou la bataille estoit dou roi et del seignor dou chastel. ⁸Il estoit ausint bien garniz adonc de cheval et d'armes com il estoit a celui point qant il vint desus le pont. Qant il fu venuz dusqe la ou la bataille estoit, il n'ot mie grantement regardé qe il voit qe li rois en avoit le meillor. ⁹Et neporquant, il ne savoit pas qe ce fust li rois Artus, mes il connoissoit tout clerement qe ce estoit sanz faille le chevalier qe il avoit veu le jor devant. Bien set de voir qe par cestui est delivrez, grant bien li velt. Mout est joianz dedenz son cuer de ce qe il voit qe il mantient si bien sa bataille. ¹⁰Grant piece dure celui estrif en tel guise com ge vos cont, mes, porce qe il est mestier qe chascune chose viegne a fin et qe le meillor viegne au desus de la bataille, et li rois est li meillor, comence il venir au desus de son enemy et a gaignier sa bataille. ¹¹Ebron s'estoit tant combatuz qe il avoit mout perdu del sanc, et ce estoit une chose qi tant l'avoit afebloié qe il ne pooit mes en avant. ¹²Et q'en diroie? Li rois l'a tant mené qe cil est del tout si conquis et si atainz qe il ne puet mes lever l'espee por ferir cop petit ne grant, dont il soloit tex cox doner, ne son escu ne pooit il soustenir en nulle maniere.

116. ¹Quant Ebron ne puet mes en avant, il se retret un pou arrieres et dit: «Sire chevalier, vos veez bien coment il m'est». Li rois respont: «Vos dites voir, qar vos veez bien qe vos ne poez mes en avant. ²De vos metre a la mort seroit ce grant mal, qar, a la verité dire, vos vos estes defenduz tant com vos peustes. Mes qant ge voi qe vos ne poez en avant, ge vos qit de ceste bataille. ³La damoisele voiremant me remandra, et ele me doit remanoir par reison, qant vos ne la poez defendre». Qant li chevalier entent cest plait, il est tant durement iriez qe il ne set qe il doie dire, et les lermes li viennent as elz dou grant duel qe il a au cuer. ⁴Et qant il a pooir de parler, il dit tout lermoiant des elz: «Coment? fet il. Sire chevalier, si en volez mener ma damoisele et tolir la moi en tel guise? – ⁵Oïl, fet li rois, ele ne vos puet remanoir, qar ge l'ai gaignee, si l'anmerrai voiremant. – Ha! las, ce dit li chevalier, com ci a mauveises nouvelles por moi. – Or sachiez de voir qe il ne puet estre autrement a ceste foiz», ce dit li rois. ⁶Qant li chevalier entent ceste nouvele, il ne se puet tenir en estant por le grant duel qe

il a au cuer, ainz chiet a terre tout envers. ⁷Li rois, qi toutesvoies en a pitié porce qe preudome l'avoit trouvé, qant il le voit gesir a terre il li oste le hiaume de la teste por le vent recoillir et regarde qe li chevalier gisoit come mort del grant duel qe il avoit au cuer. ⁸Li rois, qi conoist dont la grant dolor li venoit et bien savoit qe ce estoit plus por achoison de la damoisele qe por autre chose, qant il voit qe il est revenuz en son pooir il dit: ⁹«Sire chevalier, ge vos comant a Deu. Ge m'en vois atoute la damoisele». ¹⁰Li chevalier, qant il entent ceste parole, il saut en estant tout ensint com s'il n'eust nul mal, et la ou il voit la damoisele, il li cort et la embrace parmi les flans et la comence a baisier tout en plorant et li dit: ¹¹«Coment, ma damoisele? Si velt l'en partir vos de moi? Si m'aït Dex, ce ne puet estre. ¹²Se li chevalier qi avec lui vos velt mener ne fere cest departimant, se il vos velt avoir, il est mestier, se Dex me saut, qe il me trenches les deus braz dont ge vos tieng ici embracee, qar autrement ne vos partiroit il de moi».

117. ¹Qant li rois voit la grant amor qe Ebront avoit a la damoisele, il ne set qe il doie dire. Qant il a grant piece regardé le chevalier qi tenoit la damoisele embraciee, si li dit autre foiz por oïr qe cil li respondroit: ²«Sire chevalier, qar leissiez la damoisele: or sachiez qe ele ne vos puet remanoir. — Si m'aït Dex, sire, fet li chevalier, ne vos ne la poez avoir devant qe vos m'aiez mort ou qe vos m'aiez les braz trenchiez dont ge la tieng embraciee. — ³Coment, sire chevalier, fet li rois, amez vos donc tant la damoisele? — Se ge l'aim? fet li chevalier. Si m'aït Dex, voirement l'aim ge, mes ce est plus qe moi meemes. — En non Deu, fet li rois, or est mestier qe cist grant amor se departe, qar ce vos pramet ge loiaument, qe ge voill avoir la damoisele. — ⁴Or sachiez, fet li chevalier, qe ja ne l'avroiz tant com l'arme me soit el cors. Ocirre me poez vos bien seuremant, se vos volez, et puis avroiz la damoisele. Mes autrement ne l'avroiz vos ja. — ⁵Sire chevalier, fet li rois, puisque ge voi qe vos tant amez la damoisele qe vos ne vos en poez souffrir, et ge voil tant fere a cestui point, par un couvenant qe ge vos dirai, ge la vos qit. ⁶Or sachiez, se vos la volez fere, qe ge voil qe vos me creantez orendroit com loial chevalier qe vos abatrez des hui en avant la costume de vostre chastel dou passage qe vos i tenoiz, ⁷en tel mainere qe desoremés i porront passer franchement li chevaliers erranz et les dames et les damoiseles, ne jamés a vostre vivant ceste costume n'i sera maintenue. ⁸Se vos ensint la volez fere com ge vos di, ge vos qit vostre damoisele debonairemant et adonc voil ge qe ele vos remaigne, se non sachiez qe ge la voill avoir».

118. ¹Quant li chevalier entent qe li rois avoit finé sa reison, il respont: «Dan chevalier, se Dex vos saut, me volez vos ore plus demander, fors qe d'abatre la costume de mon chastel? – ²Nenil, certes, ce dit li rois, il ne vos covint ja autre chose a fere a ceste foiz por moi. – ³En non Deu, sire chevalier, fet Ebron, or sachiez tout certainement qe ma damoisele ne perdroie ge tant com ge la puisse tenir. Porqoi ge di certainement qe de ci en avant abat ge la costume de mon chastel en tout mon aage, en tel mainere qe jamés en tout mon vivant n'i sera arreztez chevalier errant, ne dame, ne damoisele. ⁴Et ce vos creant ge loiaument atout mon aage. Volez vos qe ge plus en face? – Certes, nenil, ce dit li rois, ge vos conois a si loial chevalier qe ge sai de voir qe vos ne faudriez de cestui couvenant puisqe vos le m'avez pramis. ⁵Or vos comant ge a Deu, qe j'ai tant a fere aillors qe ge ci ne puis plus demorer. – Ha! por Deu, sire chevalier, fet Ebron, ne vos partez de moi si tost, mes demorez en cest chastel hui et demain, et bien le poez fere qar assés estes trauvailliez. ⁶Ge, endroit moi, vos pramet loiaument qe ge vos i ferai toute l'onor et toute la cortoisie et la joie qe ge vos i porrai fere. ⁷Certes, vos l'avez bien deservi a la bonté qe vos me fetes, premierement de moi meemes – qe vos peussiez metre a mort – et puis de ma damoisele qe vos m'avez rendue. ⁸La grant cortoisie qe vos me fetes en toutes maineres vos pramet ge loiaument qe ge cortoisie vos ferai, et a voz conpeignons autresint, se vos volez ci demorer». ⁹Li rois respont et dit: «De tout ce qe vos me dites, sire chevalier, vos merci ge. Mes sachiez bien qe ge n'i demoroie pas ici a ceste foiz». ¹⁰Lors se torne li rois vers ses conpeignons et lor dit: «Seignors, vos pleroit il a chevau-chier?». Et il dient qe il sunt orendroit touz appareilliez. «Ha! sire chevalier, dist Ebron au roi Artus, ge vos pri par cortoisie qe vos me dioiz vostre non avant qe vos vos departez de ci. – ¹¹Ce ne vos diroie ge a ceste foiz», fet li rois. Et maintenant qe il a dite ceste parole, il vient a son cheval et monte en la place ou il s'estoit combatuz et se part tot maintenant, et li autres chevaliers s'en vont autresint avec lui. ¹²Quant il furent un pou esloigniez, Febus, qi n'avoit pas oublié la grant bonté qe li rois li avoit fete, qe bien li avoit l'en conté mot a mot coment il l'avoit delivré de la prison, quant il voit qe il se sunt mis a la voie, il s'en vint au roi Artus tout droit et li dit: ¹³«Sire chevalier, ge vos doi mout mercier de la cortoisie et de la franchise qe vos m'avez fete, qar ge connois certainement qe encore fusse ge en

prison, se ne fust la vostre valor. ¹⁴Or sachiez qe ge sui si vostre com ge porroie plus estre, et se Dex par aucune aventure me menast en point qe ge vos peusse rendre le guerredom de ceste bonté qe vos orendroit m'avez fete, or sachiez qe ge m'esforceroie de rendre la». ¹⁵Li rois respont et dit adonc: «Or sachiez, sire chevalier, qe ge me tieng a si bien païé de vostre delivrance qe ge n'en qier jamés avoir autre guerredon. — Moutes mercis, biaux sire», fet Febus. ¹⁶En tel mainere chevaue li rois Artus, et Febus, et Herchendins li Blans, et Bandemagus. Et la laide damoisele, cele qì bien avoit d'aage cinchante anz, chevauche toutesvoies avec eaus, tant liee durement de la delivrance dou bon chevalier qe il ne li est pas avis qe jamés li peust chose avenir dont ele fust iree.

119. ¹Ensint chevauchent tuit li .iiii. conpeignons dusq'a ore de midi, parlant toutesvoies de la bataille qe li rois avoit vencue a celui matin. ²Qant il orent ensint chevauchié qe bien aprouchoit ore de none, lors lor avint qe il encontrerent un naim, cil qì s'estoit partiz de monseignor Kex, qì enmenoit la damoisele devant lui ensint a pié com ge vos ai conté ça arrieres. ³Et a celui point qe il encontrerent la damoisele et le naim, aloit la damoisele encore a pié. Maintenant qe li chevaliers voient ceste aventure, il s'arrestent enmi le chemin. ⁴Et qant il conoissent entr'eaus la damoisele qe il prisoient tant de biauté — et tant l'avoient desiree li auquns d'eaus, et por lui avoient souffert travail — et orendroit la voient mener si honteusement et si vilainement et a si tres vil creature com est cestui qì la conduit, il en sunt tuit ensint esbahiz qe il ne se vent qe il doivent dire. ⁵Et li rois ne se puet tenir qe il ne parout tout premierement et dit: «Dex aïe, n'est ce l'une des deus damoiseles por qì messire Kex se travailla tant yer soir au passage dou pont?». ⁶Et Herchendins li Blans, qì ne la mesconnoissoit, respont tout maintenant et dit: «Sire conpeinz, ce est ele voirement. — ⁷En non Deu, fet li rois, or ai ge de poor assez por amor de Kex, qar il m'est bien avis qe aucun chevalier li tolli ceste damoisele par force et la dona a cest nain». Et tuit li autre dient qe bien porroit estre ensint avenuz. ⁸Atant evos venir la damoisele et le nain. Li rois se met tantost avant et dit: «Damoisele, arrestez vos tant qe aie parlé a vos!». Et cele, qì trop est joianz de ceste aventure, qar bien les aloit reconnoissant, s'arreste enmi le chemin et comence a plorer trop merveilleusement. ⁹Et qant ele a pooir de parler, ele dit: «Ha! seignors chevaliers, or poez veoir la cortoisie des chevaliers erranz, meesment de monseignor Kex le seneschaux. ¹⁰Veoir poez a cestui point laquel cortoisie et gentilece il a fet, de moi livrer en les mains d'un si vil

home qī a si grant honte me moine com vos veez. Ha! mercis, seignors chevaliers! ¹¹Por Deu, recorderz vos de l'honor qe vos me feisiez entre vos et ore veez la grant honte qe messire Kex m'a fete, qī m'a livree entre les mains de si vil home et de si honiz com est cestui».

120. ¹Qant li nainz entent qe la damoisele li dit encore vilenie, il ne se puet tenir qe il ne die: «Coment? fet il. Vil desloial feme de mal et de dolor! ²Encore dis de moi vilenie? Et si te tieng en ma prison, et si te puis fere morir et leissier vivre se il me plest. ³Et encore ne t'ai ge chastiee por tout le mal qe tu m'as fet. Et qant ge voi si fiere chose, qe por mal souffrir ne vels tu leissier de dire moi felenie, si m'ait Dex, il est mestier qe ge te trenche la langue: adonc porrai veoir se tu porras dire mal». ⁴Et qant il a dite ceste parole il se lance avant, com cil qī tout estoit entechiez de maltalent, et li hauce la gorgie qe il tenoit en sa main, et done a la damoisele parmi le visage, si qe il li fait oisir le sanc en plusors parz. ⁵«Ha! nainz, ce dit li rois Artus, male croissance metes tu! Porqoi fes tu mal a ceste damoisele? – Dan chevalier, fet li nainz, ge li faz mal qar ele l'a bien deservi. ⁶Ne veez vos qe ge la tieng en ma prison et qe ge la meing ensint vilment? Et encore ne se puet ele tenir de dire moi vilenie, qar ensint fesoit ele a monseignor Kex, qī la me dona. ⁷Il ne pooit durer a lui, touz jors li disoit ele leide vilenie, et por ce s'en delivra il au mielz qe il pot. Et por ce la me dona il adonc, et est moie, por qoi g'en puis fere a ma volenté de lui fere morir ou leissier vivre. – ⁸Nainz, ce dit li rois Artus, si Kex vos dona la damoisele, il nel pot fere par reison, qar nul chevalier ne doit doner damoisele a nul home qī la maint si honteusement com vos la menez, se il ne l'a prise en traïson. ⁹Ne en traïson ne la prist il mie, si com ge croi: por ce di ge bien qe tu dois la damoisele perdre par reison, qe tu li fes plus de grant outrage qe tu ne li deuses faire.

121. «– ¹Sire chevalier, fet li nainz, vos diroiz qanke vos voudroiz, mes encore dioiz vos einsint, si ne croi ge mie qe il ait chevalier si hardi en ceste place qī me toille la damoisele, qar ge la vos defent tout premieremant par le roi Artus, qī est coronez de la Grant Bretagne. ²Aprés la vos defent de part touz les conpeignons de la Table Reonde, et se vos sor cestui defens me tollez ma damoisele, ge vos pramet loialment qe ge m'en irai a la cort le roi Artus et ferai ilec ma complainte des chevaliers erranz qī encomencent en cest tens a fere force a tel home com ge sui. ³Et ge sai tout certainement qe li rois Artus est tel home q'i m'en fera reison et justisce, se il meemes devoit

120. 3. qe tu m'as fet] qe ge t'ai fet L4

chevauchier ceste part en guise de chevalier errant». ⁴Qant li rois entent ceste nouvele, il se test, qe il ne dit plus. Ausinz se teisent tuit li autre. ⁵Il n'i a nul qi orendroit ose un mot dire. Et qant Febus voit qe tuit sunt si amuï et trespensez porce qe li rois Artus a esté si amenu entr'eaus, il se torne vers la damoisele qe il conduisoit et li dit bas-set: ⁶«Ma damoisele, porce qe nos veom entre nos [qe] ne poom a cest nain orendroit tolir ceste damoisele, par reison couvient il qe nos li leison, qar encontre la costume des chevaliers erranz ne devom nos aler par reison. ⁷Vos voiremant, qi estes damoisele erranz et qi n'estes de nostre loi ne de noz costumes, li porroiz bien tollir se vos avroiz force: ⁸sor lui ja ne trouveroiz home qi vos en blasme, anz vos en dorront pris et lox cil qi l'orront dire, porce qe cele est damoisele et vos autresint. Or tost, alez sor le nainz apertement!».

122. ¹Qant la leide damoisele entent la volenté de son seignor, ele n'i fet autre demorance, ainz crie au nain tant com ele puet: «Vil chose et despit d'ome, fet ele, coment as tu hardemant de fere honte et vilenie a tel damoisele com est ceste? ²Or tost, leisse la moi del tout! Puisqe ge voi qe cist chevaliers n'ont pitié de lui ne ne la volent delivrer, et ge sui cele qi la delivrerai tantost. Tré toi arrieres, ne la touches plus!». ³Qant li nains ot ceste parole, porce qe il cuide tout de voir avoir plus de force et plus de pooir qe la vielle damoisele n'avoit, se met avant et li dit: ⁴«Vielle, fet il, de male part! Chose deshonorée et orde, vil et lede plus d'un maustin, remanant des chiens et des pors, qi onques ne feis escondit de ta char leide et noire et vil a tout mastin qi en vouxist! ⁵Vielle qi as corru le monde plus de .C. anz au mien cuidier, dom te vient ore tel hardemant qe tu me deis honte et laidure? ⁶Vielle, qi desoremés ne te fes fors redouter de jor en jor, et encore vais por ton pechié en guise d'une pucellete! Vielle rodoain qi de veillesce as rascotre, coment te mets tu devant moi? ⁷Si m'aït Dex, se ge te preig, com il ne remandra mastin en cest païs a cui ge ne te face monter! Va t'en de ci, vielle rougnose, ne demorer plus devant moi, qar certes ge te mostreroie vilainement qi plus porroit, home ou feme!». ⁸Qant li rois ot cest plet, il se comence a rrire trop fierement, et plus qe de chose qe il veist ne oïst, ja avoit grant tens qe il ne pot mener si grant feste com il menoit de cest estrif. ⁹Ein-sint s'en rient tuit li autre conpeignons: il n'oïrent onques mes plet qi

121. 6. qe ne] ne L4

122. 6. pechié] pechechié L4 ♦ rascotre] rascotre L4 (*v. nota*) 7. mastin] nastin L4

tant lor pleust fierement. Mes cele, qi ot entendu tout mot a mot la laidure et la vilenie qe li nainz li avoit dite et vit tout clerement qe li chevaliers ne s'en feisoient se rire non, se ele est iree et doulante, ce ne fait pas a demander. ¹⁰Ele soloit estre acostumee et de dire honte et vilenie a touz ceaus qe ele encontroit, ne ele ne pooit trouver home qi tant li seust respondre qe ele ne deist assez plus. ¹¹Mes orendroit a cestui point a ele trouvé si bon mestre de cele art qe ele n'en set taint qe cestui n'en sache assez plus. ¹²Porce qe ele conoist bien tout clerement qe a la force de la langue ne a plaidier ne porroit ele riens gaaignier, dit ele a soi meemes qe ele se metra a la force des braz, si verra qe il en avendra. ¹³Lors se met avant tot errament, tout ensint com ele estoit montee sor son palefroi et cuide prendre le nain par les cheveux. Mes li nain se retret un pou arrieres et puis dit as chevaliers: ¹⁴«Seignors, ge vos voudroie prier qe vos me deussiez asseurer qe, se ge puis par ma proesce venir au desus de ceste vielle, ne m'en façoiz vilenie por ceste vielle de dolor, ne qe vos ne vos entremetez de nos deus. Se ele me puet metre a mort, qe ne vos entremetez ja, ¹⁵et se ge la puis metre a mort, ge voil qe vos me prametez, se il vos plect, qe vos ne vos entremetroiz en nulle guise».

123. ¹Qant li chevalier ententent ceste nouvele, il comencierent a rrire trop fierement. Et qant il respondent au nain, il dient: «Nos ne nos entrometrom de vos deus. Or i parra qe vos feroiz!». ²Lors se torne [li nainz] envers la damoisele et li dist: «Di moi, vielle de male part, te vels tu acorder a un couvenant qe ge te dirai qe nos ferom entre nos deus? – Di, fet ele, fature d'ome, qe vels tu dire? – ³Certes, fet il, desloial vielle, ge le te dirai. Ge voi bien tout clerement qe nos somes a ce venuz qe il est mestier qe ge te mete dou tout a honte, ou tu moi. Or le feison bien, fet cil, einsint qe tu aies par aventure plus pooir de moi et plus de force: tu ne m'ociras pas, ensint me metras tantost a pié et me metras puis après toi en quelqe leu qe tu iras, e touz jors a pié. ⁴Ne ja por home qi t'en prist ne m'osteras de tel travaill, de tant com ge le porrai endurer. Se ge vieng au desus de toi, ge ferai de toi sanz doutance qe ge ne te metrai pas a mort, ce te pramet ge loiaument. ⁵Mes ce meemes qe ge dis orendroit de moi ferai ge de toi sanz faille. Te vels tu a ce acorder? Oil?».

124. ¹Aprés ceste parole respont la vielle damoisele et dit: «Nain, fet ele, de vil nature, a tout ce m'acort ge trop volentiers. Or i parra qe tu feras. – ²Seignors chevaliers, fet li nain, vos acordez vos a cest pleit a

123. 2. li nainz] *om.* L4 4. t'en prist] t'en // t'en p. L4 ♦ te pramet] *ete* (?) p. L4

qoi nos nos somes acordez andui?». Et il dient qe il s'i acordent volentiers, puisque la damoisele meemes s'i acorde. ³Lors fiert li nain des esperons le roncin et s'adrece vers la vielle damoisele et li done de la corgiee noee as deus mains parmi le visage un si grant cop qe il en fait le sanc saillir en plusors leus, et mout pou s'en failli adonc qe il ne li creva un des elz. ⁴Qant cele, qi n'avoit pooir en nulle membres fors en la langue, se sent ferir si malement, ele voloît crier sus au nain por soi revenchier, se ele peust, ⁵mes cil li recouvre un autre cop adès couvert assez plus fort qe il n'avoit fet devant. La damoisele s'escrie a haute voiz: «Ha, merci, signors chevaliers! Ne me leissiez ensint ocirre devant vos, qar a honte vos atorneroit». ⁶Cil, qi creanté avoient qe il ne s'entremetroient de cestui fet por riens qe il veissent avenir, ne dient mot ne ne responnent riens dou monde, ainz regardent qe ce sera. ⁷Et la bele damoisele qe li nainz enmenoît a pié, qant ele voit qe la vielle damoisele aloit ja si tost faillant, ele dit a soi meemes qe mielz velt ele orendroit morir, se morir doit, qe vivre longement et demorer en celui martire ou li nain l'a mise. ⁸Lors n'i fait autre demorance, ainz se lance avant et cort au nain, la meemes ou il estoit montez sor son roncin, et le prent au braz et le tire si fort a soi qe ele le trebuche a terre et l'abat si durement a celui point qe cil a la teste brisee en deus leus et il devint touz estordiz del dur cheoir qe il prist. ⁹Qant la laide damoisele voit ceste chose, ele ne qiert autre delaiement, ainz se leisse choir a terre tout errament et prent le nain par les cheveux a deus mains. ¹⁰Puis le comence a trainer or ça or la et metre li les doiz as elz tout autresint com se ele li vouxist ambedeus les elz trere fors de la teste. La damoisele laide fet qanqe ele puet. ¹¹Et q'en diroie? Tant s'esforce l'une por l'autre de ferir sor le triste nain et sor la creature maldite qe eles l'ont en petit d'ore si atorné qe il a tout le visage taint de sanc, les elz enflés et gros trop durement: de mauveise ore vint il ilec a ceste foiz. ¹²L'une le tret par les cheveux, l'autre le bat d'une grose verge qe li escuer li donerent, tant fiert ceste [et de] tant d'ire qe il ne set ou il est. ¹³Tant le hurtent a destre et a senestre que il puet dire seurement qe li mal jor li est venu. Il crie et brait a haute voiz com se il fust en un feu ardent. ¹⁴«Aidiez, signors chevaliers, ne me leissiez ici ocirre a ces deablez et devant vos!». Mes tout son crier qe li vaut? ¹⁵Assez puet crier: li chevaliers qi ice voient ne se font fors gaber de lui, et font signe as deus damoiseles de batre plus et de [li] lier les mai[n]s.

124. 12. et de] *om.* L4 15. crier: li] *c. <...> li L4 (v. nota) ♦ li lier] lier L4 ♦ mains] mais L4*

125. ¹Qant les deus damoiseles ont tant batu le nain doulant qe eles sunt ambedeus ausint com recreues ne eles ne puent mes en avant – et il estoit tex atornez et si laissez et si travailliez en toutes [guises] qe il gist ilec com se il fust mors – les deus damoiseles, qui voient tout clerement qe li chevaliers lor funt enseignes, prennent une corde qe uns des escuers li done et lient au nain les mains derriere le dos. ²Et li nain crie a haute voiz, mes son crier ne li vaut riens. Puisque les damoiseles andeus voient q'eles sunt au desus, eles n'en ont onques pitié, ainz li funt adés pis et pis. ³Trop malement est arrivez li cheitif nain: onques ne li vint un jor tant mal qe cestui ne li soit encore peor. Qant eles l'ont ensint lié com ge vos cont et eles li ont fet cest mal et ceste honte, eles li dient: ⁴«Drece toi tost, chose onie, et vient après nos tout le cors, et si porrunt adonc veoir cist chevaliers coment tu es bel bachalier». Li nain se drece en son estant, com cil qi amender ne puet, les mains liees derrieres le dos. Et qant il crie, tout en plorant, il dit: ⁵«Ha! merci, seignors chevaliers, por Deu et por gentillesce, ne me leisie dou cors honir, qar tost m'avront honi sanz faille se vos ne m'ostez de lor mains, a ce qe il a pou de pitié en eles!». ⁶Li chevaliers ne dient parole del monde, ançois regardent toutesvoies ce qe les damoiseles funt del nain cheitif. Et qant il voit apertement qe li chevalier n'ont pitié de lui ne ne s'en feisoient se gaber non, il comence adonc a crier a haute voiz: ⁷«Ha! Guron, gentil chevalier, home de valor et de pris, qi de bonté et de valor avez tout le monde passé! Se vos fuisiez a cestui point ou sunt cist autres chevaliers, com souffrisiez a envis qe l'en me feist tel vergoigne com est ceste qe l'en me fet. ⁸Ha! gentil home, or ai ge soufrete de vos. Certes, si a bien tout li mondes, et li mondes en vaut pis de ce qe vos n'estes ore ici entr'eaus!».

126. ¹Qant li rois Artus entent ceste nouvelle, il se met tout maintenant avant: «Di moi, nain, de quoi conois tu celui bon chevalier qe tu as amenteu orendroit? – ²De quoi, sire? dit li nain. Ge le conois de ce qe ge l'ai servi .xx. anz ou plus encore. Il me tenoit si chierement entor lui, por la grant cortoisie qi en lui estoit, com se ge fusse home de grant valor. – ³En non Deu, fet li rois Artus, por l'amor de celui bon chevalier qe tu as orendroit amenteu et qi tu servis si bonement com tu as dit, seras tu orendroit delivré. La haute renomee de celui preudome te delivrera orendroit». ⁴Lors comande a son escuer: «Or tost, va! Delivre le nain por l'amor dou bon chevalier qe il a ici amenteu». Et cil le fait tout errament, puisque li rois le comande. ⁵Qant les

125. 1. *guises*] *om.* L4 8. Ha! gentil home] *rip.* L4

damoiseles voient ceste chose, eles sunt si fierement doulentes q'a pou [qe] eles n'enragent de duel. Et eles ne se poent tenir q'eles ne dient au roi Artus: ⁶«Ha! sire chevalier, com vos nos fetes grant vilenie, qi ensint ostez de noz mains nostre enemy qe nos avom vencu par force. Certes, trop avez fet grant mal et pis, par aventure, qe vos ne cuidez». ⁷Li rois ne respont mot del monde as damoiseles, mes, qant il voit le nain deslié et monté, il li dit: «Di moi, nain, se Dex te conselt, me savriés tu a dire nouvelles de celui bon chevalier qe amenteus orendroit? — ⁸Sire, fet li nain, nanil ore, mes ge croi bien qe avant un mois vos en savroie ge tant dire qe, se vos estoiez mout desiranz de trouver le, vos en porriez adonc aprendre auques enseignes. — ⁹Et ou te porroie ge trouver au chief dou mois? fet li rois. — ¹⁰Sire, fet cil, se vos me deissiez en leu terminé, ou chastel ou cité, ou ge vos peusse trouver a celui terme droitement, qe ge vendroie ilec au jor nommé et adonc vos diroie ge de celui bon chevalier ce qe ge en avroie appris endementiers. — ¹¹Certes, fet li rois Artus, trop bien dis. Ore vien ça et ge te dirai une parole». Lors le tret li rois a une part priveemant. «Or garde qe tu soies d'ui en un mois au chastel de Malohaut, et si maint tout celui jor a une des portes. ¹²Se ge sui adonc en mon pooir, ge te pramet qe ge i vendrai por oïr nouvelles de celui preudome, qar certes ce est orendroit li chevalier del monde qe ge verroie plus volentiers, por les granz biens qe g'en ai oï conter a plusors chevaliers. — ¹³Sire, ce li respont li nain, or sachiez tout veraïement qe ge i serai a celui jor, se Dex me defent d'encombrier».

127. ¹Atant a finé li rois celui conseil et dit a Febus: «Sire, puisque nos avom veue ceste bataille, qi bien a esté la plus estrange qe ge veisse onques en tout mon aage, ore devisez qe nos ferom. — ²Certes, ce dit Febus, ge sui entrez en une qeste com cist chevalier qi ci est, et sachiez qe nostre qeste est de celui bon chevalier proprement qe cist nain rementut orendroit, por cui amor vos le delivrastes. ³Et certes, il me plot mout qant vos por l'amor de celui bon chevalier le feistes delivrer. — Or me dites, ce dit li rois, et savez vos en qel partie vos le devez trouver? — Si m'aït Dex, sire, ce dit Febus, ge ne le sai: ge le vois qerant droitement as aventures. — ⁴Certes, ce dit li rois, et ge me sui mis en une autre qeste d'un chevalier qe ge mout voudroie trouver. — Sire, dit Febus, coment a non li chevalier? Qar, se ge le veoie

126. 5. qe] *om.* L4 (*formula ricostruita sulle altre occorrenze*)

127. 1. et] *rip.* L4

par aventure, ge li diroie nouvelles de vos. – ⁵Sire, ce dit li rois Artus, qant vos son non volez savoir, et ge le vos dirai maintenant, qar a si preudome com vos estes ne le celeroie ge pas a ceste foiz. Or sachiez qe ge vois qerant le roi Meliadus. ⁶Se ge celui eusse trouvé, il m'est avis qe ge seroie delivré de grant travaill et de grant poine». Li chevalier beisse la teste, qant il entent ceste parole, et puis respont a chief de piece: «Or me dites, sire: combien a il qe vos veistes le roi Meliadus? – ⁷Certes, sire, fet li rois Artus, il a ja grant piece, mes il n'a pas grantment de jors qe il fu mout pres de Camahalot. Ge estoie adonc desus la cité, et il me manda paroles qe, por achoison de ces paroles, me parti ge de Camahalot et me mis de celui point en qeste por lui. – ⁸Sire, ce dit Febus, as enseignes qe vos me dites vois ge bien orendroit connoissant qe ge le vi n'a encore .iiii. jors aconpli. ⁹Ge chevauchois adonc en la conpeigne de .iiii. chevaliers, nos l'encontrames [pres] d'une forest, si seul qe il ne menoit adonc en sa conpeigne fors un escuer seulement. ¹⁰Il chevauchoit un destrier noir. A celui point tout droitemant qe ge vi le roi, ge reconui au chevaucher qe il feissoit et au bon corsage [...]. ¹¹Ge dis a moi meemes qe il ne pooit estre en nulle guise qe il ne fust home de valor. Et por ce dis ge a mes conpeignons: ¹²“Veez ci venir un bon chevalier, si com ge croi”. Et il me dient: “Coment savez vos qe il soit bon chevalier? Porce qe il est grant chevalier? – Nanil, certes, por ce nel di ge mie. Mes ge le di por la verité dire. ¹³Se ge en toute ma vie conui chevalier por veoir le semblant dis ge qe cestui est preudome! – En non Deu, dist li chevalier, ce savrai ge orendroit, se il est si bon chevalier com vos dites”. ¹⁴Et maintenant comence a crier au chevalier: “Gardez vos de moi! A joster vos estuet a moi”. Sire, en tel mainere com ge vos ai orendroit conté trovames nos le roi Meliadus sanz faille qe vos alez qerant.

128. «– ¹Sire, ce dit li rois Artus, vos m'avez conté, vostre merci, coment vos trovastes le roi Meliadus, mes encore ne m'avez vos rienz conté coment il se parti de vos, ne coment il se chevi del chevalier qi de joste l'apelloit, en tel mainere com vos m'avez encomencié a dire. – ²Nos estiom adonc .iiii. chevaliers. Le premier qi de joster l'apela fu abatuz, et li segons après, et le tierz autresint. Qant ge vi qe mi conpeignons estoient ensint abatu par un seul chevalier, or sachiez tout veraïement qe ge ne fui trop bien assureur. ³Toutesvoies, porce qe ge connoisoie tout certainement qe a honte me fust torné se ge ne feisse mon pooir de revenchier la honte de mes conpeignons, leissai

9. pres] *om.* L4 12. Porce qe] Porcen qe L4

ge corre maintenant envers le roi Meliadus, et il envers moi autresint. ⁴Et q'en diroie? Nos nos entrebatimes a la premiere joste et la ou nos aviom encomencié la meslee mout dure et mout feleneuse, adonc vint entre nos une damoisele montee mout richement sor un riche palefroï q' dist au roi Meliadus: ⁵«Or tost, leissiez ceste bataille, et t'en vient corrant après moi. Et ne le fë pas autrement, qar se tu demores point, tu i porroies perdre ce a qoi tu ne recovreroies jamés au jor de ta vie, ce saches tu veraïement».

129. ¹«Qant li rois Meliadus entent ceste parole, il se retret tout errament en sus de moi et me dit: “Ha! sire chevalier, ge vos pri ge vos me qitoiz de ceste bataille, qe ge voi bien qe ge ne la porroie pas si tost mener a fin com ge voudroie. Et sachiez, se ge demoroie grantement ici, ge porroie damage avoir trop outrageus”. ²Qant ge entendi qe il voloit la bataille leissier atant, ge fui trop liez, qar ge vos faz bien asavoir qe ge avoie trové en lui si haute proesce et si merveilleuse qe ge vouxisse bien estre fors de la bataille. ³Li rois Meliadus se parti atant qe ge ne le vi puis. Celui jor meemes apris ge por verité qe ce estoit li rois Meliadus sanz faille q' mes .iiii. compeignons avoit abatuz et encontre cui ge m'estoie combatuz, et cele damoisele meemes q' l'en avoit fet departir le me dit. ⁴Et qant ge vos ai finé cestui conte, ge me puis bien tenir a tant. — Certes, fet li rois Artus, vos dites bien verité». ⁵Ensint parlant chevauchent tant qe il vindrent a un chemin forchié q' se partoît en deus voies. Li .iiii. chevaliers s'arrestent qant il vindrent as deus voies et dient: ⁶«Nos somes ici .iiii. chevaliers. Li dui s'en vont en une qeste et li autre s'en vont en une autre. Or preignent li .ii. l'une des voies, et li autre preignent l'autre!». Et il s'accordent a ce tuit trop bien. ⁷Li rois Artus entre lui et Bandemagus se metent en la voie senestre, et li autre se metent cele a dextre, et s'entrecomandent a Deu et en tel guise s'en departent. ⁸Mes atant leisse ore li contes a parler de Febus et de son compeignon et retorne au roi Artus.

IV.

130. ¹Or dit li contes qe, puisque li rois Artus se fu partiz del bon chevalier q' Febus estoit apellez et de celui q' Herchendins li Blans avoit nom, il chevauche entre lui et Bandemagus tout celui jor et tant qe lor chemin les aporta celui soir a une tor q' estoit fermee sor une

130. 1. del bon chevalier] des bons chevaliers L4

grant rivere. ²Cele tor estoit bele et fort de l'oeuvre ancienne. Leianz demoroit une veve dame tout adés atout sa mesniee. Qant ele vit les chevaliers erranz, ele les reçut trop volantiers et trop honorement et lor dis qe bien soient il venuz. ³Qant il se furent desarmé, il s'asistrent devant la dame sus l'erbe fresche q' tout maintenant estoit venue. Qant il furent assis sus l'erbe vert ensint com ge vos cont, la dame, q' trop estoit de bones paroles, lor comence a demander dont il venoient, et il distrent qe il venoient de vers Camahalot et aloient en une lor besoigne. ⁴«Or me dites, seignors, fet la dame, estes vos de la meison le roi Artus? – Dame, fet Bandemagus, de la meison le roi Artus somes nos voirement. – ⁵Puisque vos de celui ostel estes, ce dit la dame, or me fetes sage d'une chose, se Dex vos doint bone aventure. – Dame, ce dit Bandemagus, tel chose me porriez vos demander qe ge la vos savroie a dire, et tel chose dont ge ne vos savroie a dire ne voir ne mensonge. – ⁶Or me dites, fet ele, se vos le savez: repeirent orendroit tant de bons chevaliers en la meison le roi Artus com il repairoient en la meison Uterpendragon som pere? – ⁷Dame, ce dit Bandemagus, or sachiez tout certainement qe de ceste demande ne vos savroie ge pas bien a dire la certanité, qar ge ne fui onques en la meison Uterpendragon, ne ne le vi en tout mon aage. ⁸Encor n'estoie ge nez, si com ge croi, qant il morut. Et por ce ne vos savroie ge riens dire de ce qe vos me demandez orendroit».

131. ¹A celui point qe il avoient encomencié celui parlement, atant evos venir un des vallez de la dame, et li dit: «Dame, la fors est venuz un chevalier errant q' voudroit ceians herbergier, se il vos pleisoit. Volez vos qe il descende et qe il viegne avant? – ²Oïl, certes, fet la dame, mout me plest. Viegne seurement avant, qe bien soit il ore venuz». ³Après ce ne demore guieres: evos venir entr'eaus celui chevalier dont li vallez avoit parlé. Et il le moient maintenant en une des chambres de leienz por desarmer le et puis le remaintent fors entre les chevaliers. ⁴Qant li rois Artus le voit venir, il se drece encontre lui. Autresint fet Bandemagus et la veuve dame, et puis s'aressient et recommencent a parler de plusors choses. ⁵La dame, q' bien voit [qe] le chevalier q' derrainement estoit venuz estoit home de grant aage et bien paroît home qui fust esté de grant valor, lo met en paroles maintenant qe il s'est un petit reposez et li dit: ⁶«Sire, fet ele, ne vos poist de ce

3. sus l'erbe] sus herbe L4 (*v. nello stesso § 130.3 la seconda occorrenza*)

131. 5. qe] *om.* L4

qe ge vos demanderai. — Dame, fet il, demandez seurement. Il me plect mout se ge vos sai a dire ce qe vos me demanderoiz. — ⁷Sire, demorastes vos onques en la meison le roi Uterpendragon? — Certes, dame, fet il, oïl. Ge i demorai voirement lonc tens. Et sachiez veraie-ment qe li rois Uterpendragon me fist chevalier de sa main. ⁸Encore croi ge bien qe ge portai armes au tens le roi Uterpendragon .xx. anz tout enterinmant ou plus. — Or me dites, fet la dame, et en la meison le roi Artus, qi orendroit est rois de la Grant Bretaigne, avez granment repairé? — ⁹Certes, fet il, g'i ai repairé mout petit, porce qe ge ne sui si aisiez de porter armes com ge fui ja en auqun tens. — Or me dites, fet la dame, conoissiez vos le roi Artus? — ¹⁰Certes, dame, ge ne le conuis se mout petit non, qar, ensint com ge vos dis des le comence-ment, ge ne repairai en son ostel se petit non, porce qe ge n'estoie aeissiez de porter armes, ensint com ge fui ja. — ¹¹Or me dites, dit la dame, et en quel hostel cuidez vos qe meillors chevaliers repairent? Ou en l'ostel le roi Uterpendragon, ou en cestui qe tient orendroit li rois Artus? — ¹²Dame, fet il, porquoi me fetes vos ceste demande? Se Dex vos doint bone aventure, dites le moi, et ge vos responderai après ce qe vos me demandez, selonc le mielz qe ge savrai. — ¹³En non Deu, fet la dame, ge vos dirai porquoi ge le vos demant. Anuit sunt deus mois passez qe vindrent ceienz deus chevaliers. L'un de tens et l'autre n'avoit pas .xx. anz d'aage. Et vindrent a parlement de ceste chose droitement qe ge vos demant orendroit. ¹⁴Li geunes chevalier disoit qe li rois Uterpendragon n'avoit onques eu en toute sa vie tant de bons chevaliers en son ostel com avoit li rois Artus orendroit.

132. ¹«Qant li geunes chevalier ot sa reison finée, li viell chevalier dit adonc: “Amis, dit il, qui petit set tost dit. Vos avez dit orendroit ce qe vos savez, et ge vos dirai maintenant une autre chose dom vos ne vos corrouciez mie. ²Or sachiez qe ge vi ja en une grant cort qe li rois Uterpendragon tint a Camahalot tex .xx. chevaliers qe, se il fusesent orendroit en vie et si delivre pooient porter armes com il estoient a celui tens, einsint veirement m'aït Dex com il avoient pooir de chacier fors dou champ le roi Artus et touz les chevaliers qi en sa cort sunt, et qant il tient cort pleniére! ³Or esgardez com bel parlemant vos tenez, qi faites conpeireson des chevaliers qi orendroit sunt en la meison le roi Artus envers ceaus qi portèrent armes au tens le roi Uterpendragon”. ⁴Por ceste parole qe ge vos ai orendroit dite se voloit prendre par corrouz li chevalier qi estoit plus geunes

132. 2. pooient] poo|iitre (?) L4

encontre le chevalier qī estoit plus viell, mes ge me mis tantost entr'eaus deus, et tant priaī l'un et l'autre doucement qe il leisserent ceste rancune. ⁵Sire chevalier, por ce fis ge ceste demande orendroit qe vos oīstes. Or me responnez, se il vos plect, si orrom a cui vos vos acordez de ces deus chevaliers qī ceienz furent». ⁶Qant la dame ot sa reison finée li chevalier respont adonc et dit: ⁷«Ma dame, se Dex me doint bone aventure com ge vos puis mout tost respondre certainement a ce qe vos me demandez. Or sachiez qe li chevalier qī orendroit repairent en la meison le roi Artus ne se porroient de riens prendre a force de chevalerie au regart de ceaus chevaliers qī portent armes el tens le roi Uterpendragon. ⁸Qī bien velt regarder ceaus qī orendroit portent armes en la meison le roi Artus, il ne m'est pas avis qe il i peust trouver un chevalier de grant pris. ⁹Mes a celui tens en peust l'en trouver plusors en celui ostel. Dame, or vos ai dit mon cuidier de ce qe vos me demandastes». Et qant il a dite ceste parole, il se test qe il ne dist plus mot.

133. ¹Qant li rois Artus voit qe li vielz chevalier se test et qe il ne tient plus parlement de ce qe il avoit encomencié, il dit a soi meemes basset, qe nus ne l'oī, qe il seroit trop mauveis se il leisoit tant cest parlemant. ²Ore velt il encom[en]cier, si dit adonc: «Sire, ce dist li rois, porqoi dītes vos qe en l'ostel le roi Artus ne repaire nul chevalier de haut pris? – ³Sire, fet cil, qe ge cuīt dire verité. Et se vos de celui ostel estes et vos les bons chevaliers qī i viegnent conoīsez, se Dex vos saut, nomez en un seulement, si savrai adonc de qel pris il est et de qel bonté». ⁴A ceste parole respont li rois et dit: «Sire, ne tenez vos donc le Bon Chevalier sanz Poor a pseudome des armes? Or sachiez qe cil repaire en la meison le roi Artus, et li rois Meliadus autresint. – ⁵Voire, ce respont li chevalier, mes ce est trop tart. – Et ne dītes vos bien donc, fet li rois, qe il sunt ambedui pseudomes des armes? – ⁶Certes, sire, fet li chevalier, il sunt bons chevaliers sanz faille au regart de ceaus qī orendroit portent armes, mes il fu ja tens qe il estoient plus vistes et plus legiers et plus forz qe il ne sunt orendroit, et plus puisant des armes. ⁷Et neporqant, il n'estoient mie tenuz en la meison le roi Uterpendragon por si bons chevaliers qe l'en n'en trovast trop meillors. ⁸Et por ce dis ge bien qe au tens le roi Uterpendragon furent trop meillors chevaliers cil qī portoient adonc armes et cil qī en son ostel repairoient qe ne sunt li chevalier qī orendroit repairent en la meison le roi Artus. – ⁹Se Dex vos doint bone aventure,

veistes vos onques nulle riche cort qe li rois Uterpendragon tenist? Il m'est avis qe il ne porroit estre qe vos n'en eussiez veue aucune, puis- qe vos portastes armes et repeirastes en la meison le roi Uterpendragon .xx. anz. — ¹⁰Certes, fet li viell chevalier, vos dites verité. Et ge me vois orendroit recordant d'une riche cort qe li rois Uterpendragon tint a Logres, et fu cele cort de la recordance de sa nativité. ¹¹De cele cort di ge bien qe ce fu la plus noble cort de chevalerie qe ge veisse onques qe, si voirement m'aît Dex com ge vi dusqe a .vi. chevaliers qe, se il fussent en vie orendroit et en tel pooir de porter armes com il estoient adonc et il trouvassent en un champ [les] .lx. meillors chevaliers qi orendroit vieignent a une cort le roi Artus, ensint m'aît Dex, qe li .lx. n'avroient ja duree encontre les .vi. qi a cele cort furent qe ge di. — ¹²Sire chevalier, fet li rois Artus, ge croi bien qe vos dioiz trop et qe vos [dioiz] encontre verité. — Si m'aît Dex, non faz, fet li chevalier, ainz di ge moins qe la verité. — ¹³Or me dites, fet li rois, et qui furent li .vi. bons chevaliers qi a cele cort vindrent et qi devoient avoir si grant pris de chevalerie com vos lor donez orendroit? — ¹⁴En non Deu, sire, fet li chevalier vielz, ge vos en nomerai les trois maintenant, et les autres trois vos nomerai ge bien avant qe nos nos partom de ceienz. ¹⁵Or sachiez qe li premiers des .vi. chevaliers fu Galeot le Brun, et celui vos nome ge premieremant et par reison qe ge di bien qe ce fu li meillor chevalier qe ge onques veisse en tout mon aage. ¹⁶Celui fu chevalier sanz faille parfit de toute chevalerie. Cil fu tex chevalier qe encontre lui se doivent bien taire tuit li autres bons chevaliers dou monde. ¹⁷Et q'en diroie? Celui fu li [meillors chevaliers] del monde.

134. ¹«Delez lui s'asist adonc un geunes chevalier qi a celui tens n'avoit pas encore porté armes longement. Et cil estoit appelez Guron li Cortois et estoit conpeignon Galeot le Brun. ²Celui Guron estoit sainz faille li plus biaux chevalier, de toutes biautez qi en chevalier porroient estre, qe ge veisse a celui tens. ³Et sor tout ce qe il estoit si bel estoit il si preudome qe meillor chevalier ne convenist qerre en nulle contree. ⁴Li tierz chevalie[r] avoit non Lamorat de Listenois. Cil estoit si preudome des armes, au voir dire, qe il ne peust trouver meillor se ne fust Galeot le Brun ou Guron li Cortois. ⁵Des autres trois me sui ge orendroit recordez, por ce vos en dirai ge le non tout

11. les] *om.* L4 12. dioiz encontre] *e.* L4 13. fet] *rip.* L4 17. li meillors chevaliers] li nomers L4

134. 4. chevalier] *ch'* L4 (*v. nota*)

maintenant. Li uns estoit apelez Hector li Nobles. Cil estoit un cor-tois chevalier, uns debonere, uns hom trop bien chevauchant. ⁶Cil estoit bien si gracieux de toutes chevaleries qe merveilles peust l'en dire des granz oeuvres qe il avoit fetes par le monde par sa haute chevalerie. ⁷Li autres avoit non Mataban li Blains. Cil estoit li plus blains chevalier qe ge onques veisse. Il estoit toutesvoies ausint simples com une pucelle, mes, puisqe il venoit au beisoing, il n'avoit nul si bon chevalier en tout le monde qe il ne deust avoir poor de li encontre, qar il estoit trop bon chevalier de lance et meilleur d'espee assez. ⁸Li autre qe ge voill metre entre les autres .vi. fu appelez Elieçer li Forz. Cil fu bien home de bonté, cil fu home de valor, cil fu bien home de cui l'en ne porroit dire toute sa bonté legierement, cil fu bien home qui onques ne fist coardie. ⁹Sire chevalier, de ces .vi. chevaliers qe ge vos ai orendroit nomez ici, vos faz ge bien asavoir qe tout le peior de ceaus estoit si bon chevalier qe tout le meilleur q'orendroit soit en cest monde n'a [tant] de bonté seulement qe cil avoit. ¹⁰Por ce vos di ge hardiemant qe, se il fussent orendroit en un champ en si bon pooir com il estoient a cele cort et il trouvassent une des corz qe li rois Artus tient orendroit, si voirement m'aït Dex com ces .vi. chevaliers la torneroient a desconfiture. – ¹¹Sire chevalier, fet li rois Artus, j'ai bien entendu ce qe vos avés conté, mes ore me redites une autre chose: veistes vos onques nulle cort qe li rois Uterpendragon tenist qe il eust tant de bons chevaliers com il avoit a cele qe vos dites? – ¹²Certes, sire, n'enil, fet li veill chevalier. Et coment en puet il plus assembler de bons chevaliers, puisqe tuit li bons i estoient assemblé? Et encore vos dirai ge une autre chose de ceste cort qe vos ne cuidez. ¹³Or sachiez qe celui jor meemes qe tuit cil bons chevaliers estoient assemblé en la meison le roi Uterpendragon, fu demandé au rois Boors de Gaunes, q' a merveille estoit prisiez de chevalerie, et li demanda de ceste chose li rois Bans de Benoïc si freres. ¹⁴Et ceste demande fu fete devant le roi Uterpendragon: “Biaux freres, dist li rois Bans au roi Boors de Gaunes, veistes vos onques nulle plus riche cort de chevalerie qe ceste de hui? – ¹⁵Certes, dist li rois Boors de Gaunes, n'enil. Et neporquant, biaux frere, en ceste cort q' hui fu assemblee n'a esté, si m'aït Dex, fors un chevalier et demi”.

135. ¹«Qant li rois Uterpendragon entendit ceste parole, il devint tout esbahiz. Autresint fist li rois Bans de Benoïc. Li rois Uterpendra-

5. Hector] Herbot L4 (*v. nota*) 7. Mataban] Mathiners L4 (*v. nota*) 9. tant] om. L4

gon dist puis au roi Boors de Gaunes: ²“Sire, si m’aït Dex, ge me merveill mout fieremant com vos onques osastes dire ceste parole, qar il m’est bien avis qe ge n’i vi onques en tout mon aage autant de preudomes en une cort com ge vi en ceste. ³Por ce me merveill ge de ceste parole qe vos deistes orendroit. — En non Deu, sire, dist li rois Boors, a ce qe vos avez orendroit dit m’acort ge bien. ⁴Or sachiez qe ge ne vi onques tant de bons chevaliers ensemble com ge vi hui en ceste cort. Et neporquant, encore vos di ge bien qe ge n’i vi fors un chevalier et demi. ⁵Li chevalier, qi bien est seul en tout le monde, qar a la verité dire il n’i a per ni conpeignon au regart de chevalerie, si est bien Galeot le Brun. Celi apel ge seul, porce qe il n’a pareill ou monde: cestui est chevalier parfit. ⁶Li autres, qe ge apel demi chevalier, si est Guron son conpeignon. Cil est encore si geunes qe ge ne l’apel fors demi chevalier au regart de Galeot le Brun. ⁷Et neporquant, il a ja fet tantes merveilles puiſqe il fu chevalier nouvell qe bien le peust l’en noumer chevalier parfit au regart des autres chevaliers. ⁸Mes qi regarde as tres grans oeuvres Galeot le Brun, le pris Guron n’est si grans com il seroit se il ne fust. ⁹De totz les autres qi ci furent di ge bien qe il n’i a un seul ou ge ne trouvasse a reprendre, fors en ces deus: por ce ne les apel ge chevaliers. Et por ce dis ge, sire rois Uterpendragon, qe ge n’ai veu a ceste cort fors un chevalier et demi. ¹⁰Voirement ce ne di ge mie, sire rois, qe il n’i ait eu des preudomes plus qe en nulle autre cort qe ge onques veisse jor de ma vie”. Ceste parole proprement dit li rois Boors de Gaunes de cele riche cort. ¹¹Il i ot maint bon chevalier qi s’en corroucerent, et maint home qil tindrent a mal. Lamorat de Listenois en fu mout iriez, et li Bon Chevalier sanz Poor: il estoient a celui point ambedui conpeignon et tant s’entraimoient qe, se il fussent freres charnel, il ne se peussent plus entramer. ¹²Li Bon Chevalier sanz Poor en parla a l’endemain au roi Boors et li dist: “Porquoi deistes vos tel parole, qi deistes qe en ceste cort n’avoit eu qe un chevalier et demi? — ¹³Certes, dist li rois Boors, ge le dis porce qe ge savoie qe ge disoie voir. Et ce qe ge disoie ge seroie prest de maintenir por verité devant le roi Uterpendragon, se auquns venist avant qi m’en vouxist blasmer. — ¹⁴Coment fu ce, fist li Bon Chevalier sanz Poor, qe vos meistes encontre ceaus deus le conpeignon Galeot le Brun et leisastes Lamorat de Listenois, qi est tel chevalier com l’en set? Ja savez vos tout certainement qe il est meillor chevalier en toutes maineres qe n’est le conpeignon Galeot le Brun!

135. 8. com] c[.]m L4 13. disoie voir] disoir v. L4

¹⁵Porquoi donc parlastes vos plus de lui, qi est encore un jovencel, qe vos feistes de Lamorat?”. A ceste parole respont li rois Boors de Gaunes: ¹⁶“Certes, sire, ge ne blasme pas Lamorat de Listenois, ainz le lou mout, lui et sa chevalerie, et se ge autrement le fessoie, ge diroie encontre reison. ¹⁷Et encore soit il chevalier de haut pris et de haute renomee com tout li mondes conoist clerement, si di ge bien qe sses oevres ne se porroient prendre au loing aler a la merveilleuse chevalerie et estranges ouvres qe vet conplisant le conpeignon Galeot, encore soit celui jovencel, si com vos dites. ¹⁸Et vos dites bien verité qe jovencel est il mout, et por ce ne remaint il qe il ne face si hautes oevres qe certes nul chevalier qi a ceste cort soit venuz n’i porroit venir se n’estoit Galeot le Brun. ¹⁹J’ai veu des oevres de celui et des oevres qe font li autres chevaliers et por ce parol ge ensint seurement de lui, qe ge meemes l’ai ja esprouvé et a la lance et a l’espee trenchant”.

136. ¹«Qant li Bon Chevalier sanz Poor entendi qe li rois Boors de Gaunes parla si hardiemant des oevres au conpeignon Galeot le Brun, il se test a cele foiz qe il ne tint autre parlement. ²Et qant Galeot le Brun voit qe li auquant tenoient a mal ce qe li rois Boors de Gaunes avoit doné si grant pris et si tres grant lox a Guron, il dit devant touz ceaus qi oïr le voudrent – mes a celui point n’i esto pas Guron presentemant: ³“Certes, ce dit Galeot, seignors chevaliers, ore sachiez tout de voir qe cil qi blasme li rois Boors de ce qe il donoit si grant pris a mon conpeignon, il ne savoit qe il disoit. ⁴Si m’aît Dex, s’il ne fust mon conpeignon ge li donasse greignor pris et greignor lox de chevalerie qe ne li done li rois Boors de Gaune. ⁵Et certes, ce qe ge di ne di ge pas por desprisier les bons chevaliers de ceste cort, mes ce di ge hardiement qe, se ge fusse orendroit apelez d’une bataille ou ge ne peusse metre mon cors por ma teste defendre, einsint m’aît Dex com ge i metroie plus seurement mon conpeignon qe ge ne feroie nul autre chevalier qe ge sacha orendroit en tout le monde. ⁶Et certes, ge di bien qe en ceste cort n’a orendroit nul chevalier qi si bien se prouvast a un grant bisoing com feroit mi conpeignon, encore soit il si joveux com vos veez. ⁷Ge sai sa force et son pooir et por ce parol ge de lui tout ce si hardiement com vos veez”. Ceste parole qe ge vos ai orendroit dite dist Galeot le Brun devant le roi Uterpendragon. ⁸Il meemes, li rois, qi encore ne savoit riens qe Guron fust si preuz des armes com le disoit Galeot le Brun, fu touz esbahiz de ceste parole et

17. sses] asses L4

136. 2. si grant] *rip*. L4 8. le disoit] il d. L4

dist a Galeot: ⁹“Sire, vos me [fe]tes merveiller de ce qe vos dites, qar ge voi qe vostre conpeignon est ensint jovenceaux qe il ne m'est pas avis qe il peust encore estre por nulle aventure dou monde de si haut afere com vos dites. — ¹⁰Sire, dit Galeot le Brun, puisque vos doutez de ceste chose, or le metez en auqune forte esprouve. Et se vos ne le trovez meillor chevalier qe ge ne vos ai dit, adonc poez vos seurement dire qe ge ne conois pas bon chevalier. — ¹¹Or leissiez, dist li rois Uterpendragon, ceste chose sor moi, qe il est mestier, se Dex me saut, qe ge voie par moi meemes prouchainement la droite verité”. ¹²Einsint dist li rois Uterpendragon adonc de ceste chose et s'en test atant. Galeot le Brun se parti adonc de cele cort et mena avec lui Guron.

137. ¹«Aprés ce ne demora mie granment de tens qe li rois Uterpendragon tint une autre grant cort riche et noble a Camahalot. Et vint a cele cort grant gent et mout grant chevalerie. Li rois seoit mout noblement en un faudestol a cort, et après lui seoient deus chevaliers de grant renomee et de grant valor. ²Et chascun d'eaus avoit devant a la table un samit ou s'anjollier. Qe vos diroie? Cele cort estoit de noblesce et de richece et de chevalerie. ³A celui point qe li rois Uterpendragon seoit a la table si noblement com ge vos cont, atant evos entr'eaus venir un nain montez sor un petit roncín. ⁴Li roncín estoit petiz outre mesure, et li nain si petiz dou tout qe il n'estoit plus grant d'un singe. Einsint com li nain estoit montez desor son petit roncín vint il as tables tout droitement. ⁵Assez trouvoit et uns et autres qí li dissoient: “Nain, descent, si feras qe sage”. Ne il ne voloít descendre por parole qe l'en li deist, ançois vint, ensint montez com il estoit, dusqe devant le roi Uterpendragon. ⁶Qant il fu venuz dusqe au roi qí se seoit si noblement a la table com ge vos ai conté, il li dist oiant touz ceaus qí ilec estoient: “Sire rois Uterpendragon, ge sui venuz a vostre cort. Avriez vos tant de hardement qe vos me donisiez un don qe ge vos demanderai?”. ⁷Li rois, qí trop estoit cortois, respondi: “Nain, demande hardiement, qe ge te donrai ce qe tu me demanderas, se ce est chose qe tu doies avoir. — ⁸Rois, en tel guís com tu dis ne te demanderai ge riens, qar einsint ne me donrroies tu niant, a ce qe ge sui si cheitive chose de toutes riens et de toutes faíçons et de corsage qe, se tu a ce regardoies, ge n'avroie jamés de toi ne pou ne grant. ⁹Por ce te voill ge prier, se il te plect, qe tu me dones tout abandonement ce qe ge te voudrai demander, ou tu me dies dou tout qe tu ne le me donras mie”. Li rois respondi au nain et dist autre foíz:

9. me fetes merveiller] me tes m. L4

¹⁰«Nain, encore te di ge ce meemes qe ge te dis: ge sui apareilliez qe ge te doigne ce qe tu me demanderas, porqoi tu le doies avoir. Et se tu ensint ne le velz, or me di qe ce est qe tu me demandes, et ge te respondrai maintenant se ge le te donrai”.

138. ¹«Qant li nain entendi qe il ne pooit prendre autre chose dou roi Uterpendragon, il li dist: “Sire rois, se Dex me saut, or voi ge bien qe vos n’estes pas de si grant cuer d’assez com ge cuidoié, qant vos a si pouvre chose com ge sui n’osez doner un don abandoneement de ce qe ge demander te voloie. ²Et qant ge voi le pouvre cuer qe vos avez si clerement, ce est une chose qi assez me fait esbahi. Et neporqant, por tout ice ne remaindra qe ge ne vos die qele achoison me mena ici. ³Or sachiez qe il a bien un an ou plus qe une moie damoisele morut qe ge amoie par amors, et ele amoit moi autresint. ⁴Puisque cele fu morte qe ge tant amoie, ge n’oi volenté d’avoir autre, qar ge ne trouvoie nulle damoise qi tant me pleust com feisoit cele. ⁵Et neporqant, ore tout nouvellement m’est volanté venue d’avoir damoisele si bele et si cointe com ge la porra trouver, et ce est ce porqoi ge sui venuz a toi, qe tu me doignes cele qe ge te demanderai. Cest don te voil ge demander”.

139. ¹«Li rois Uterpendragon comence trop fierement a rrire qant il entent les paroles dou nain, si firent tuit li autres chevaliers qi ilec estoient. “Coment, sire rois? dist li nain. Vos gabez vos de moi? ²Or sachiez qe ce n’est mie cortoisie, qe ce vos faz ge bien asavoir qe tex s’en gabe qi au darrien porra bien estre corrouciez. – ³Nain, fet li rois, ge me ri de tes [paroles], por ce ne me gab ge mie de toi. Mes or me di, se Dex te saut, qele damoisele demandes tu? ⁴Qi est cele beneuree qe tu velz enrichir de ton riche cors? Moustre, se ele est ceianz, et saches qe ge t’en ferai tout ce qe ge t’en porrai fe[re]. – ⁵Ros, fet li nain, puisque tu velz qe ge te die qele damoisele ge te voil demander, or saches qe ge le te dirai. Vois ici qe ceste proprement te voill ge demander”. ⁶Lors se mist avant et moustre une damoisele qi estoit amie a Lamorat de Listenois, et cele estoit sanz faille la plus bele damoisele qi a celui tens fust en la meison le roi Uterpendragon. ⁷Et por la merveilleuse biauté qe ele avoit l’apelloient li un et li autre Flor d’Avrir. Qant li rois voit la damoisele qe li nain demandoit, il comença a rrire plus estrangement qe il n’avoit fet devant. ⁸Autresint firent tuit li autres chevaliers qi la demande dou nain entendirent. Li rois

137. 10. se ge] se ge // se ge L4

139. 3. paroles] om. L4 4. fere] fe L4

dist au nain: “Coment, nain? E velz tu donc ceste damoisele? — ⁹Oïl, certes, ce dist li nain, voirement la voill ge avoir. Et sachiez, sire rois, se vos ne la me donez, qe il n’est mie trop loing de ci qì la me donrra. — En non Deu, dist li rois, Lamorat de Listenois la te porroit bien doner se il voloit, qar ele est a lui dou tout. ¹⁰Mes, se il ne la te done, ge ne croi mie qe nul autre chevalier la te peusse doner, qar ge sai bien qe il la voudra defendre. Et puisque il defense i metroit, l’en ne li porroit pas legieremant tolir. — ¹¹Sire rois, dist li nains, vos plect il qe vos la me doignez? — Certes, nanil, dist li rois, ge ne la te donrraie por gaaignier une riche cité, qar a toi sanz faille n’apartient nulle si noble damoisele. — ¹²Non, sire, ce dit li nain, donc m’en part ge tout maintenant. Et sachiez qe il ne demorra granment qe ge l’avrai en ma baillie, a cui qe il doie peser”. ¹³Atant s’en parti li nain, qe il ne tint autre parlement a cele foiz. Assez trouve le nain uns et autres qì le gaboient de ce qe il avoit demandé au roi si bele damoisele. ¹⁴Qant cil se fu parti de leienz, il demora pas granment qe li nain retorna, mes il ne vint pas adonc si seul com il estoit venuz devant, qar il amena un tel defendeor, un chevalier qì estoit armez d’unes armes toutes noires sanz autre taint. ¹⁵Li chevalier estoit grant assez et qant il vint entre les chevaliers qì manjoient et qì seoient sor la rivere, il ne descendi, mes tout ensint a cheval com il estoit vint il après le nain. ¹⁶Et qant il fu [venuz] dusqe a la grant table ou li chevaliers de haut pris seoient au mangier, il dist au nain: “Laqel damoisele demandes tu? Et qe t’atalente mielz?”. Et li nain li mostre la damoisele qe il avoit demandee au roi et dist: ¹⁷“Sire, ge voil ceste! Ge n’en voill nulle autre avoir, se vos la me donez. — En non Deu, dist li chevalier, puisque tu la vels avoir, il est mestier qe tu l’aies, se ge onques puis. Et certes, ge me priseroie trop petit se ele ne te remanoit par ma proece”.

140. ¹«Li chevalier s’en ala adonc tout droitemant a la damoisele qì seoit devant Lamorat, qe il la tenoit par s’amie, et li dist: “Levez sus, ma damoisele, et leissiez la table et vos en venez avec moi. ²Ge le vos comant fermemant, ensint com l’en doit maintenir les costumes des chevaliers erranz, qe l’en doit ceianz maintenir sanz riens fauser”. ³Tout maintenant qe la damoisele entendi la parole, ele n’i osa fere autre demorance, ainz se leva maintenant de la table tot en riant, com cele qì ne cuidoit pas qe li faiz deust ensint a ce venir qe il vint. ⁴Maintenant li amena l’en un palefroi et ele monta. Et li chevalier li dist: “Ma damoisele, se il vos plect, or vos en alez dusqe a celui arbre

16. venuz] *om.* L4 ♦ demandes tu] d. tu[s] L4

et ilec vos atendez, qar ge vendrai tost a vos”. ⁵Cele, qi autremant ne le pooit fere qe les costumes dou roi Uterpendragon se maintenissent et sanz fausier de riens, le fist tout einsint com li chevalier as armes noires li dist. Et li chevalier dist autre foiz au nain: ⁶“Nain, regarde encore qe il te plect plus, se il n’i a autre qe tu voilles, qe ge la te donrai tantost. – Sire, dist li nains, encore voudroie ge ceste autre”. Si li moustra une qi estoit le roi Boors de Gaunes. ⁷Tout einsint com li chevalier fist remuer la premiere damoisele fist il remuer l’autre et aler tout droitemant desouz l’arbre. ⁸En tel mainere en fist il remuer .vi. des plus beles: la premiere estoit de Lamorat de Listenois, et la seconde au roi Boors de Gaunes, et la tierce au roi Meliadus, et la quarte estoit au roi Ban de Benoïc, et la cinquesme estoit a un chevalier qi estoit apelez Hector li Nobles, et la sisisme estoit a un chevalier qe l’en apeloit Hermenor del Boschasge. ⁹Cil dui chevalier estoient freres charnel, tant preudomes des armes et tant hardiz et tant vaillans qe por noient couvenist qerre .ii. meillors en tout le monde. ¹⁰Qant li chevalier as armes noires ot einsint pris les .vi. damoiseles et mandees desouz l’arbre, il dist adonc au roi Uterpendragon: “Sire rois, vos est il avis orendroit qe ge soie bien garniz de beles damoiseles? – ¹¹Sire chevalier, dist li rois, se Dex me saut, si estes voiremement, se eles vos remaignent. Mes si m’aït Dex, sire chevalier, il m’est avis, selonc mon sens, qe vos ne les porriez mie mener trop loing de ci. – ¹²Sire rois, ce dit li chevalier, vos verroiz bien maintenant qe il en avendra”.

141. ¹«Atant se parti li chevalier as armes noires devant le roi Uterpendragon. Et atendi tant qe li chevalier de la cort orent mangié et qe les tables furent levees, et puis revint devant le roi et dist: ²“Seignors chevaliers, a il nul de vos qi voille sa damoisele defendre de mes mains par le mainere qe ge deviserai? Qui onques me porra abatre devant qe ge lui, il porra adonc prendre sa damoisele qitemant, mes celui qi sera abatuz par ma proesce perdra dou tout sa damoisele. ³Seignors chevaliers, volez qe ceste couvenance soit entre nos?”. Et il dient tuit ensemble qe il s’i acordoient volentiers. Maintenant vindrent a les armes, qe il n’i ot autre demorance, et se comencierent a armer tuit ensemble li chevaliers de qi les damoiseles estoient saisies. ⁴Et qant li rois Uterpendragon vit qe tex chevaliers com estoient cil preignoient les armes par un chevalier estrange qe il ne conoisoient, il dist au roi Boors de Gaunes: ⁵“Certes, sire, voirement deistes vos bien verité, qe ge le voi tout cleremant. – Sire, ce dit li rois Boors, porquoi le dites vos? – Ge ne le vos dirai pas orendroit, fist li rois Uterpendragon, mes ge le vos dirai!”. Et si ne demorra pas granment.

142. ¹«Qant li chevalier furent tuit armé, Lamorat de Listenois se mist premieremant avant et leissa corre sor le chevalier as noires armes, mes de cele joste avint ensint qe Lamorat fu portez a terre, et lui et le cheval. ²Aprés fu abatuz li rois Boors de Gaunes et navrez durement. Aprés fu abatuz li rois Bans de Benoïc, navrez durement. ³Aprés fu abatuz Hector li Nobles, navrez mout durement: avant fu deus mois qe il peussent porter armes. Aprés fu abatuz Hermenor del Boschage: cil ne fu mie navrez, mes il fu si feleneusement abatuz qe a pou qe il n'ot rompu les col et les braz. ⁴Sire chevalier, toutes ces choses qe ge vos ai orendroit devisees vi ge aconplir a celui chevalier qi portoit les armes noires. Et sachiez qe tout le peior de ces .vi. chevaliers valoit a celui tens mout mielz qe ne fait nul autre chevalier de ces deus qe vos nomastes. ⁵Poez vos ore croire qe il soient a cestui tens si bons chevaliers erranz en la meison le roi Artus com il estoient adonc en la meison le rois Uterpendragon?». ⁶Li rois Artus respont au chevalier et dit: «Sire, ensint m'aït Dex com vos m'avez tant dit a cestui point, qe ge croi bien qe il avoit en la meison au roi Uterpendragon de meillors chevaliers qe il n'a orendroit en la meison le roi Artus. ⁷Mes porce qe ge vos ai otroié vostre volenté des paroles qi estoient entre nos de la meison le roi Uterpendragon et de cele au roi Artus, remaigne, se il vos plect, qe vos ne me dioiz qe devindrent les damoiseles et qi fu li chevalier qi portoit les armes noires. Qar certes vos m'en avez tant dit qe ge sui trop desiranz de savoir certainement qi il fu et coment il se parti adonc de la meison le roi Uterpendragon. — ⁸En non Deu, sire chevalier, qant ce volez savoir, ge le vos dirai maintenant. Or escoutez.

143. ¹«Veritez fu sanz faille qe les chevaliers dont ge vos ai encommencié mon conte furent tuit abatuz en tel guise com ge vos ai devisé. Li rois Uterpendragon, qi de celui fet estoit trop durement esbahiz si q'il ne savoit qe il deust dire, dist a touz ceaus qi entor lui estoient: ²«Si m'aït Dex, il m'est bien avis qe cist preudomes soient enchantez ou qe il ne sachent qe il funt, qi einsint ont esté abatuz par le cors d'un seul chevaliers! ³Ge avoie tantes foiz esprouvé lor haute chevalerie qe il ne m'estoit pas avis en nulle guise qe, se tout li mondes venist sor eaus a armes, qe il peussent estre menez si vilainement a desconfiture com il ont esté par un seul chevalier estrange. ⁴Et por ce, se Dex me conselt, ai ge poor et doutance qe il ne soient tuit enchantez. Et por ce me voill ge esprouver encontre cestui chevalier en cest fet».

142. 3. del Boschage] de la be schage (*riscritto?*)

⁵Lors demande ses armes et l'en li aporte errament, qar mout se fioient li un et li autre de sa chevalerie, porce qe bon chevalier estoit sanz faille. ⁶Qant il fu touz armez, il comence a crier au chevalier qi les armes noires portoit: "Gardez vos de moi, sire chevalier, a joster vos estuet une autre foiz tout maintenant!". ⁷Li chevalier, qi bien reconut errament qe ce estoit li rois Uterpendragon qi metre se voloit en ceste esprouve, respondi maintenant et dist: ⁸"Sire, de joster encontre vos me gart Dex, qe vos ne me feistes onques en tout vostre aage se cortoisie non. Por ce ne me metrai ge pas, sire, se Deu plect, en aventure de fere vos chose qi vos despleise. – ⁹En non Deu, dist li rois Uterpendragon, vostre escondit ne vos vaut: il est mestier qe vos jostez tout orendroit encontre moi. Se ge onques puis, vos ne vos gaberoiz pas de moi com vos ferés des autres qe vos avez abatuz ici. – ¹⁰Ha! sire, ce dist li chevalier as armes noires, encore vos voudroie ge prier, par cortoisie qi en vos doit estre, qe vos ne me façois force de joster encontre vos, qe bien sachiez veraïement qe en vos ne voudroie ge metre main ne a tort ne a droit. – ¹¹Tout ce ne vos vaut, ce li dist li rois. Or sachiez qe il est mestier qe vos jostez encontre moi et tout maintenant. – ¹²Sire, dist li chevalier as armes noires, certes, ce n'est mie cortoisie qe vos me fetes, qe a vos me fetes joster voille ou ne voille et encontre ma volenté. ¹³Or sachiez qe ge ne refusoie pas ceste joste por grant po[o]r qe ge avoie, ne porce qe ge soie encore trop travailliez, mes ge la refusoie por honor de vos, qar ge me recort bien qe vos m'avez ja tantes foiz fet honor et cortoisie qe encontre vos ne vodroie ge pas prendre glaive por nulle aventure dou monde. ¹⁴Et qant ge voi qe vostre volenté est tele qe ge m'esprouve encontre vos, e ge me met. Bien vos gardez huimés de moi, qe bien sachiez qe ge vos porterai a terre, se ge puis".

144. ¹«Aprés cestui parlement il n'i firent autre demorance, ainz leisserent maintenant corre li uns encontre l'autre tant com il porent des chevaux treere. Et qant ce vint as glaives beissier, il s'entreferirent de toute lor force. ²De cele joste fu li rois Uterpendragon feruz si roidement qe il n'ot pooir qe il se peust tenir en sele, ainz vola a terre maintenant, mes tost se relieve et vistement, com cil qi ert garniz de grant force. ³Qant li chevalier as armes noires fu retornez sor lui et il vit qe li rois s'estoit ja redreciez, il li dit: "Sire, vos m'avez fait fere chose qe ge ne vouxisse, si n'en poez tant blasmer moi com vos voirement. ⁴Et por amende de cest outrage qe ge ai fet encontre vos vos

143. **12.** volenté] volenit (?) L4 (*inchiostro evanito*) **13.** poor] por L4 (*v. nota*)

qit ge toutes les damoiseles qe ge avoie conquises. Et fetes en vostre volenté desoremés, qar por honor de vos ne les menroie ge avec moi por nulle aventure dou monde. ⁵Ge vos comant a Nostre Seignor, qe ge m'en vois". Qant il ot dite ceste parole, il hurte cheval des espérons et s'encomença maintenant a aler vers la forest, si grant oire com il pooit del cheval trere, ⁶et se feri dedenz la forest, qe il ne tint a cele foiz autre parlement ne au roi Uterpendragon ne a ceaus qe il avoit abatuz. ⁷En tel mainere se parti li chevalier as armes noires et leissa toutes les damoiseles qe il avoit gaaignees. ⁸Qant il s'en fu partiz, tuit li chevalier qi estoient en la place remistrent si esbahiz qe li uns regardoit l'autre et n'avoient pooir de parler ne plus qe se il fussent amuiz. ⁹Qant li rois Uterpendragon ne pot mes veoir le chevalier as armes noires, il se torna adonc envers le roi Boors de Gaunes et dist: ¹⁰"Par Deu, sire rois, voirement deistes vos verité, qi deistes [qe] a ma cort n'estoit qe un chevalier et demi! Et cil qi ceste parole contredit ne conoissoit pas la chevalerie de mon ostel com vos la conoissiez. ¹¹Or vouxisse ge bien qe cil fust ci orendroit qi contredit vostre parole: ge li feroie conoistre a cestui point qe voirement savez vos conoistre chevalier et demi. ¹²[De]mi chevalier seulement si a desconfite ma cort: dire le porront desoremés tuit cil qi parler en orront. — ¹³Coment sire, ce dist li rois Boors, est donc cestui celui meemes chevalier qe ge ting por demi chevalier? — Certes, fet li rois Uterpendragon, ce est il, voirement le sachiez. ¹⁴Et qant le demi a si desconfit ma cort d'une seule lance, qe peust fere li bon chevalier et li parfit se il fust encontre vos venuz? — ¹⁵Par Deu, sire rois Boors de Gaunes, mielz conoissiez bons chevaliers qe ge ne faz, ne qe ne font cil de mon ostel. ¹⁶Ormés di ge seurement qe il n'a ou monde fors un chevalier et demi, et se cist qi orendroit est demi chevalier puet vivre longement sans de ses membres, bien sera encore parfit au jugement de tout li mondes".

145. ¹"Ceste parole proprement dist li rois Uterpendragon de Guron le Cortois. De ceste aventure furent li dui freres si doulanz et si correciez qe il se partirent de la cort maintenant par corrouz et distrent, qant il seroient gueriz de les plaies, il ne sejourneroient granment jamés devant qe il eussent vengié la vergoigne qe Guron lor avoit fete. ²Qant li rois Uterpendragon oï ceste parole, il dist a Hermenor et a Hector le Noble: ³"Vos avez fet un fol veu, et j'ai poor qe vos ne vos repentez plus tost qe ge ne voudroie, qe ce vos faz ge bien asa-

144. 10. qe] *om.* L4 **12.** Demi] Un L4 (*v. nota*) ◇ si a] qi si a L4

voir et le vos di tout hardiement, qe cestui chevalier qi se part orendroit de ci est bien si preudome de son cors qe il se defendra bien de vos deus se vos l'asailliez. ⁴Et certes, ge croi qe il vos porra plus tost fere vergoigne qe vos ne feroiz a lui". ⁵Ensint lor dist li rois Uterpendragon, qar a celui an meemes les mist ambedeus Guron a mort par mesconnoissance, il ne les reconut devant qe il les ot mis a mort. Si vos ai ore finé mon conte et por ce me puis ge bien tere». ⁶Aprés ce qe li viell chevalier ot finé son conte, l'eve fu aportee, si laverent li chevaliers et s'asistrent a la table, qar la dame avoit fet appareillier a mangier mout hautement. ⁷Qant il orent mangié et les tables furent levees, la dame, qi bien se recordoit qe ele avoit ja veu ces deus freres qe li viell chevalier avoit amenteuz, maintenant qe les tables furent levees, ele met en paroles le chevalier et li dit: ⁸«Sire chevalier, conoissiez vos granment les deus freres dom vos me deistes orendroit paroles? – Certes, dame, fet li chevalier vielz, ge les conoisoie voirement bien. – ⁹Maldites soient lor aumes, ce dit la dame. Benoit soit de Dex qi les ocist. ¹⁰Il me firent ja un jor si grant mal et si grant damage qe encore en sui ge pouvre et deseritee: il me tolirent mon mari, qi estoit de haut pris et de haute renomee et de grant afere, et me tollirent mis deus freres charnex, qi estoient nobles et vaillanz. ¹¹Et tout cest damage me firent il por une damoisele qi estoit en ceste contree. Si m'ait Dex, encore cuidoie ge qe il fussent vif! A chascun jor prioie ge Deu q'i lor donast male aventure e meschance. – ¹²Dame, fet li viel chevalier, desoremés, se Dex me saut, ne vos couvient il plus travaillier a fere ceste priere qe vos feissiez dusqe ci, qe ge vos pramet qe Guron les a mort andeus en un jor et en une place. ¹³Si ne les ocist il mie por sa volanté, mes par mesconnoissance. – Benoit soit l'ore, fet la dame, qe il furent ocis et benoit soit qi les ocist. ¹⁴Dex le defende d'encombrer et de mescheance, qi les mist a mort. Certes, de tant com vos m'enn avez conté sui ge orendroit si rejoiee et si eisiee qe il m'est avis qe ge aie a cestui point gaaigné tout le monde.

146. «– ¹Dame, ce dit li rois Artus, as paroles qe vos en dites m'est il avis qe vos lor voliez trop grant mal. – Sire, si m'ait Dex, fet la dame, se il eussent autant fet de mal a vos com il firent a moi, vos ne lor vouxissiez pas plus de bien qe ge lor voill. ²Sire, sachiez de voir qe il me firent si grant damage en un seul jor qe ge le plaindrai toute

145. 4. qe il vos porra] *rip.* L4 5. celui an meemes] c. «an les» m. L4 ♦ me puis] me p|puis L4

ma vie et a ma mort meemes. — Dame, ce dit li rois, coment avint celui grant damage qe il vos firent? Por quel aventure? — ³Sire, fet ele, porquoi le vos conteroie ge? Trop i avroit ja a conter avant qe celui fet vos eusse conté. — Dame, vos le poez briement conter, se il vos plest. ⁴Un grant conte poez vos dire, se il vos plest, a brieves paroles. — Certes, sire, fet ele, qant vos de cest conte volez savoir la verité, et ge le vos conterai au plus briement qe ge le porrai fere. ⁵Or escoutez com il avint et coment il me firent celui grant damage qe ge vos ai amanteu». Et qant ele a dite ceste parole, ele comence se ci conte:

147. ¹«Sire, ce dit la dame, il avint ja en ceste contree. Mout pres de ci, a .iii. lieues englesches, avoit une damoisele tant bele riens de toutes choses qe cil qi veue l'avoient disoient bien comunement qe ce estoit droite merveille de la biauté dom la damoisele estoit. ²Qe vos diroie, biaux sire? Por la biauté de lui l'ama mis mariz del tout. De ce ne savioie ge riens ne ne m'en prennoie garde. Ge avoie a celui tens .ii. freres qui estoient mi freres charnex de pere et de mere. ³Certes, ge amoie chascun de eaus assez plus qe ge ne fessoie moi meemes, et il amoient moi autresint de tout lor cuer, ce savioie ge certainement. A celui tens avint qe il ot en cele contree un tornoie mant. ⁴Cele damoisele qe ge vos ai dit fu menee a celui tornoie ment porce qe l'en la peust bien veoir, par loisir mes qe por autre chose. A celui tornoie ment vindrent li dui freres Hector li Nobles et Hermenor dou Boschage. ⁵Il estoient andeus si tres bons chevaliers qe touz li mondes en estoit espoentez d'eaus, la ou il venoient. ⁶Li un des .ii. freres amoit la damoisele tant qe il moroit par ses amors et, porce qe il veist la damoisele a loisir, avoit il tant porchacié qe cil tornoie ment estoit ensint asemblés. ⁷Qe vos diroie? La damoisele fu menee au tornoie ment si noblement et si coi[n]tement com l'en porroit mener si vaillant damoisele com estoit cele. ⁸Qant la chose fu a ce venue qe li tornoie manz fu encomenciez, Hermenor del Boschage, qi estoit li ainz nez des deus freres, encomença a fere d'armes et le tornoie ment. ⁹Hector, qi estoit li autres freres, encomença a regarder la damoisele, qe il, a la verité dire, estoit bien chevalier de haut pris et de haute renomee. ¹⁰Puis se mis au tornoie ment et comença a brisier lances si merveilleusement qe tuit cil qi le veoient disoient qe voirement estoit il chevalier de grant afere. ¹¹Et q'en diroie? Il le fist si bien a celui jor qe il n'ot en toute la place chevalier qi si bien le feist, fors Hermenor del Bouschage. ¹²Qant li tornoie ment fu menez a fin, la damoisele se

147. 1. la biauté] sa b. L4 7. cointement] coitement L4

met maintenant au chemin a tel conpeignie com ele avoit. Il dist a son frere: ¹³“Ge voil avoir en toutes guises ceste damoisele. Or sachiez tout veraïement qe, se ge ne l'ai a cestui point, vos ne me trouveroiz pas demain vif. – ¹⁴En non Deu, biaux frere douz, vos ne voudroie ge perdre por nulle aventure del monde, tant com ge vos peuse sauver la vie. ¹⁵Or alez donc, si la prenez maintenant el conduit de touz cels qi la moient, voillent ou ne voillent!”.

148. ¹«Qant il entendi la volenté de son frere, il n'i fist autre demorance, ainz leissa corre la ou estoit la damoisele et dit a ceaus qi la conduisoient: “Arestez vos tuit. Et cil de vos qi ne velt morir si soit en pes”. Et tantost s'en ala [a la] damoisele et la prist au frain, et dist: ²“Ma damoisele, ge vos ai gaignee. Venez vos en a moi, et sachiez bien qe de cestui gaaing me teng ge a plus riche et a plus beneuré qe se ge eusse conqisse la meillor cité qe li rois Uterpendragon ait en tout son roiaume”. ³Cil qi la damoisele conduisoient, qant il conurent Hector le Noble et son frere Hermenor dou Bouschage, il devindrent si hesbahiz durement qe il ne savoient q'il deussent fere, qar il conoisoient de voir qe cil estoient trop bons chevaliers et trop preudomes des armes. ⁴Et il se tindrent tuit coi et comencierent a esgarder qe cil feroient. Qant mis mariz, qi de la damoisele estoit surpris ensint com ge vos ai conté, vit qe deus chevaliers l'enmonnoient ensint prise, il dist a mes deus freres: ⁵“Coment, seignors? Soufrom nos qe cil dui chevaliers nos facent si grant honte et si grant vergoigne qe il preignent ceste damoisele devant nos? Or aie ge dahiez se ge le soefre! ⁶Ge ne sai qe vos en feroiz, mes ge me metrai en aventure de secorre la se ge puis”. Qant il a dite ceste parole, il leissent corre maintenant envers les .ii. freres, et lor comença a crier a haute voiz: ⁷“Leissiez la damoisele, qe vos ne l'an poez mener si legierement com vos cuidez!”. Por ceste achoison qe ge vos cont comença la meslee de mon mari et de ceaus qi la damoisele avoient prise. ⁸Li mienz mariz i fu ocis, mes deus freres i furent mort, et cil enmenerent la damoisele. Et ge remis des celui jor pouvre et deseritee. ⁹Si vos ai ore finé mon conte, qar ge vos ai devisé mot a mot ce qe vos me demandastes». Et qant ele a dite ceste parole ele se test, qe ele ne dit plus a cele foiz.

149. ¹Qant ele a tout son conte finé et ele s'est une grant piece teue, ele dit au viel chevalier: «Sire, vos fiz ge encore bonté ne servise qi vos pleust? – ²Dame, fet il, oïl, se Dex me conselt, qar tout premierement me receustes vos anuit mout bel et mout cortoisement en

vostre ostel. ³Puis, si m'avez doné a mangier si bel et si honourement com se ge fusse en la meison le roi Artus. ⁴Por ce di ge, dame, qe vos m'avez tant fet de cortoisie qe ge sui bien tenuz a vos rendre tel guerredon com vos me savriez demander, porqoi ge le vos peusse rendre. — ⁵Certes, fet ele, en guerredon de celui petit servise qe ge vos ai ceienz fet vos voudroie ge prier qe vos me deissiez coment li dui frere furent ocis, qe bien sachiez de voir qe ge lor voloie si grant mal qe, la meemes ou il sunt mort, qe ge ne puis croire lor mort fermement devant qe vos m'aiez conté coment il morurent et en qel seison, se vos le savez. ⁶Se voz lor mort me devisez, adonc me tieng ge por paiee: autre chose ge ne vos demant a ceste foiz». Qant li chevalier entent ceste priere qe la dame li fet, si s'encomence a sourire. Et qant il parole il dit en sorriant: ⁷«Coment, ma dame? Si avez ore si grant volenté d'oïr recorder coment li dui frere morurent, qi ja sunt mors plusors anz a passé? — ⁸Sire, oïl, fet la dame. — Qant vos en avez si grant volanté de l'oïr, fet li chevalier, et ge vos conterai coment cele mort vint, por aconplir vostre volanté». ⁹Qant il a dite ceste parole, il comence son conte maintenant: «Dame, or sachiez qe, puisque li dui freres se furent partiz dou roi Uterpendragon, qi lor avoit dit apertement qe il porroient mauvement revengier lor honte sor le chevalier as armes noires, il s'en alerent adonc tout droitement a une abaïe qi n'estoit pas loing d'ilec. ¹⁰De cele abaïe se firent il porter a une meison de religion d'une veuve dame qi estoit pres d'une jornee de cele abaïe. ¹¹Tant demorerent en la meison de cele dame li dui frere qe il furent touz gueriz de lor plaies, en tel mainere qe il pooient aaisiement chevauchier et porter armes. ¹²Ge demoroie adonc avec eaus, qar il me voloient andui si grant bien qe, se ge fusse lor frere chernex, il ne me peussent mostrer greignor semblant d'amor qe il me mostrent. ¹³Et por ce lor tenoie ge trop volentiers conpeignie an quelq leu qe il alassent. ¹⁴Qant il orent tant demoré chiés la veuve dame qe il furent ensint gueriz qe il pooient seuremant porter armes et chevauchier, il vindrent un matin a une chapele et jurerent l'uns et l'autre qe jamés ne sejoireroient, porqe il peussent chevauchi[er] aaisiement, devant qe il avroient venchié la honte et la vergoigne qe li conpeinz Galeot le Brun lor avoit fete. ¹⁵Qant ge entendi cestui serement, ge fui touz esbahiz. Ge lor dis adonc lermoiant des elz, qar trop estoie ja esmaiez et espoentez: "Ha! biaux seignors, ce dis ge as deus freres, com vos avez fet une grant folie! ¹⁶Si m'aît Dex, cestui seremant est

149. 6. dame] damoisele L4 (*v. nota*) 14. chevauchier aaisiement] chevauchi a. L4

bien le plus foux qe vos encore feistes et li plus espoentables fet ou vos encore vos meissiez, qar ge vos faz bien asavoir qe celui chevalier sor qi vos volez venchier vostre honte est si estrangement preudome des armes qe certes ge ai poor qe vos ne peussiez a lui durer, encore soiez vos deus. ¹⁷Por Deu, leissiez ceste haatine et cest porposemant et vos metez en un autre fet, qe il ne m'est pas avis qe vos au derreain en peusiez partir honoreement en nulle guise!"

150. ¹«Qant il entendirent ceste parole, il furent trop fierement corrociez vers moi. Si me distrent: "Oremés veom nos bien clerelement qe vos estes coharz et failliz de cuer et por ce ne volom nos plus vostre conpeignie. ²Or vos en alez, qe Dex vos doint bien afere, qar nos ne volom plus chevauchier avec vos. Se il avint par aventure qe vos truissiez celui chevalier dom vos avez si grant poor, saluez le de nostre part tout ensint com l'en doit saluer son enemy mortel, et li dites de part nos qe il puet estre asseur de recevoir novele mort, se nos le poom trouver". ³Por ceste achoison qe ge vos ai orendroit contee me parti ge de lor conpeignie. Puisque ge me fu partiz d'eaus, il ne demora pas plus de deus mois qe ge trouvai sor une fontaine dormant le bon chevalier qi avoit porté les armes noires en la meison le roi Uterpendragon. ⁴Tout maintenant qe ge le vi, ge conui qe ce estoit le bon chevalier qi se dormoit devant la fontaine. Si me tres adonc arrieres et descendi desouz un arbre, qar ge ne le voloie pas esveillier en ma venue. ⁵Pres dou bon chevalier se dormoit un escuer de l'autre part de la fontaine.

151. ¹«Qant li bon chevalier ot dormi une grant piece, il s'esveilla et comença a regarder entor lui. Et qant il me vit il me dist: "Sire chevalier, qi estes vos?". Ge m'en alai maintenant vers lui et li dis: ²"Sire, ge sui un chevalier errant qi tenoie mon chemin ceste partie, ensint com chevaliers erranz sunt acostumé d'aler par le roiaume de Logres. ³Et sachiez, sire, de ce qe ge vos ai trouvé ici me tieng ge a trop bien païé, qe, se Dex me doint bone aventure, vos estes le chevalier dou monde qe ge plus desiroie a veoir por une chose. – ⁴Et por qel chose? dist li bon chevalier, dites le moi. – Certes, dis ge, ce vos dirai ge volentiers. Vos souvient il qant vos portastes les armes noires en la maison le roi Uterpendragon, qe vos gaaignastes les .vi. damoiseles et puis le rendistes au roi meemes? – ⁵De ce me souvient il bien, dist li bon chevalier. Mes porqoi m'avez vos ore recordé ceste chose?". Ge li respondi adonc: "Sire, ge le vos dirai. Vos sou-

vient il des deus freres qe vos abatistes ilec et dont vos gaaignastes les deus damoiseles? — ⁶Oïl, dit li bon chevalier, de ce me souvient il bien. — Sire, dis ge li, or sachiez qe ces deus freres ont juré vostre mort: gardez vos en se vos poez!”. ⁷Li bon chevalier me respondi adonc: “Coment le savez vos? — Sire, dis ge li, ge le sai en ceste maniere”. Et li devisai coment. Qant li bon chevalier entendit ceste parole, il se comença a sourire et dist: ⁸“Certes, il n’ont pas fet loiauté, q’i ma mort ont juree por si pou mesfet. Il sunt bons chevaliers et preudomes des armes, mes certes encore ne sai ge en els si grant proece de chevalerie qe ge aie trop grant poor d’eaus se ge les truis. ⁹Mes or me dites: ou fu ce qe vos les trovastes et qe il vos distrent ceste parole?”. Et ge li contai ou ce avoit esté. “Et ou cuidez vos, dist li bon chevalier, qe ge les peusse trouver? — Certes, sire, ge ne sai”. ¹⁰Tel parlement com ge vos ai conté ting ge au bon chevalier. Qant nos eumes tant parlé ensemble com a lui plot, il se mis au chemin. ¹¹Voirement ge li dis tant adonc qe il souffrist qe ge li tenisse conpeignie, qe il dist adonc: “Bien me plect qe nos chevauchom ensemble, puisque a ce vos acordez”. ¹²Puis chevaucha tant li bon chevalier en une contrees et en autres q’il li avint qe il encontra les deus freres au pié d’une montaigne q’i est a l’entree de Soreloys. ¹³Qant li dui freres le virent, il le reconurent maintenant. Et porce qe il savoient bien qe il estoit de trop haute proece garniz, ne le voudrent il asaillir a cele foiz. ¹⁴Une autre foiz avint sanz faille q’en cele contree meemes menoient il un chevalier mout vilainement a pié: celui chevalier avoit ja fet servir a Guron.

152. ¹«Qant Guron vit qe li .ii. freres menoient le chevalier si vileinement, il se mist avant et lor dit: “Seignors chevaliers, porquoi menez vos si vilainement cest chevalier? Ja savez vos de voir qe il est chevalier com vos estes!”. ²Il respondirent tantost: “Nos se dions autrement chevalier qe il n’est, qar nos somes loiaux chevaliers et il est traïtor. Et por ce le ferom nos morir a male mort, qar il l’a bien deservie. — ³Seignors, dist Guron, [vos] estes si sages et si preudomes ambedeus qe vos savez de voir qe vos le deusiez appeller en la cort au roi Uterpendragon ou en autre noble ostel et prouver l’en ilec, puis fere le morir par jugement. ⁴Mes ce ne fetes vos mie, por qoi ge

151. 7. a sourire] as|sourire L4 13. asaillir] aistalir (?) L4 (*inchiostro evanito*)

14. foiz] fon (?) L4 (*inchiostro evanito*)

152. 3. vos] om. L4 4. Mes ce ne fetes vos mie] rip. L4

di qe vos fetes mal si grant qe nul pseudome ne le doit souffrir. Por qoi ge ne le souffriroie pas plus, se Dex me saut, ançois ferai ge tout mon pooir de delivrer le de vos mains a cestui point». ⁵Qant li .ii. freres entendirent ceste parole, il distrent a Guron: “Encore faciez vos tout vostre pooir de delivrer le chevalier, por ce ne sera il pas delivré. ⁶Ançois le defenderom bien encontre vos, si bien sanz faille qe il ne sera hui delivré por vos! – Seignors, dist Guron, vos savez bien qe vos estes de la meison le roi Uterpendragon et ge autresint. ⁷Entre nos ne devroit avenir bataille en nulle mainere del monde. – En non Deu, distrent li dui freres, ja de nostre part n’i sera bataille encomenciee a ceste foiz qe nos puisom. ⁸Mes se vos par vostre orgoill volez delivrer celui chevalier qe nos tenom por nostre enemi et qe nos volom metre a mort, or sachiez qe nos ne le souffririon pas. ⁹Mieuz nos volom nos a vos combatre, coment qe il en doie avenir, qe delivrer le. – Coment, seignors chevaliers? dit Guron. Si ne me feriez tant de cortoisie qe vos por la moie amor le delivrisiez? – ¹⁰Or sachiez, distrent li frere, qe il n’a nul home el monde a cui nos feisom ceste cortoisie qe vos demandez, et por ce ne la ferom nos pas a vos! – ¹¹Certes, dist Guron, qant vos cortoisie ne me volez fere de ceste chose, ge ne la qier: or vos gardez huimés de moi, qar ge delivrerai tout orendroit cestui chevalier, se ge onques puis!”.

153. ¹«Aprés cestui parlemant il n’i font autre demorance, ainz leissent corre li dui frere sor Guron au ferir des esperons. Et avint qe de la premiere joste ocist Guron l’un des deus freres, mes il fu navrez si durement de cele joste meemes qe il pas[s]a plus d’un mois entier avant qe il en fust gueriz. ²Et neporqant, il moustra mout pou a celui jor, tant com il se combati a l’autre frere, qe il fust navrez si malement com cil qi estoit de grant cuer. ³Qant il ot un des freres ocis, celui meemes qi estoit appelez Hector li Nobles, et il se trouva seu a seul avec l’autre, il dit: “Vos n’avez nul avantage sor moi, sire. ⁴Vos veez bien coment il est: nos somes ormés entre moi et vos seu a seul. ⁵Encore vos loeroie ge en droit conseil qe vos delivrisiez le chevalier avant qe pis vos en avenist, qe ce vos faz ge bien asavoir qe, encore soiez vos pseudome des armez et si renomez de chevalerie com ge sai, si m’est pas avis qe vos en nulle mainere dou monde peussiez durer encontre moi, puisque ce vendroit au loing aler. ⁶Por ce vos loeroie ge qe vos delivrisiez le chevalier avant qe nos en feissom plus a cestui point”.

154. ¹«Qant Hermenor dou Bouschage, qi a la verité dire estoit trop bon chevalier a l'espee et a la lance, entendi le parlement de Guron, il respondi errament: "Sire vassal, se Dex me saut, entre moi et vos ne porroit avoir concorde ne pes por nulle aventure dou monde. ²Mi freres, li bon chevalier qi gist ilec morz devant moi, si defent la pes de nos deus: ou ge revengerei sa mort a cestui point ou vos m'ociriez, si serom adonc andui mis ensemble en une lame. ³Et de pes fere, ne m'en parlez desoremés, qar ele n'i porroit venir en nulle mainere dou siecle!" ⁴Aprés icestui parlement descendent li dui pseudome de lor chevaux, qe il nes oceissent en aucune mainere se il desus se combatissent. ⁵Et qant il furent descenduz et il se furent bien appareilliez et d'asaillir et de defendre, il comencierent la bataille qi dura [de] hore de tierce dusqe a vespres. ⁶Et lors morut Hermenor dou Bouschage com cil [qi] tant avoit perdu del sanc qe merveille estoit coment l'aume li pooit tant avoir demoree el cors. Ensint furent mort li .ii. frere, com ge vos ai conté, e remistrent enmi le champ. ⁷Guron s'en parti maintenant entre lui et le chevalier, mes il fu tel atornez et appareilliez de cele bataille q'il passerent deus mois ou plus avant q'il peust porter armes. ⁸Et qant ge vos ai mon conte finé en tel guise com vos avez oï, ge m'en puis huimés bien tere, qar ge vos ai ore devisé mot a mot ce qe vos me demandastes. — ⁹Certes, sire, fet la dame, vos le m'avez conté, vostre merci, si bien et si bel qe ge m'en tieng bien apaïee. Or poez huimés teire et aler repouser, qar bien en est tens». ¹⁰Cele nuit dormi bien li rois Artus et Bandemagus, qar travailliez estoient assez. A l'endemain auques matin, maintenant qe li solleill leva, il se leverent et alerent au mostier oïr la messe. ¹¹Et qant il orent la messe oïe, si se partirent de leianz. Et qant orent pris lor armes, il trouverent qe li viell chevalier estoit ja touz appareilliez et armez com se il se vouxist maintenant combatre, et il ne menoit en sa conpeignie fors un escuers seulement. ¹²Qant il orent tuit troi pris congié a la dame de leianz, qe il tenoient a trop bone dame, et il furent oïssu dou recet et il vindrent a passer la rivere — et il s'estoient ja mis en l'eve qi estoit assez parfonde —, il regardent de l'autre part de la rivere et voient un chevalier armé de toutes armes qi s'estoit arreztez sor le flum, qi lor crie tant com il puet: ¹³«Ne veigniez avant, seignors chevaliers, qe vos morriez se vos avant veigniez a ce qe ge vos contredi cestui passage! Ne nus qi de vers vos venist ne le porroit

154. 2. andui mis] mis a. mis L4 5. de hore de tierce dusqe a vespres] dusqe hore de t. a vespres L4 6. qi] om. L4

passer, tant com ge le vouxisse defendre. ¹⁴Por ce vos di ge qe vos ne vegniez avant, qar bien sachiez qe ge vos feroie morir avant qe vos fuissiez a terre».

155. ¹Qant li rois Artus, qi devant aloit, entendi ceste parole, porce qe il voit tout clerement qe l'eve estoit parfonde et le passage perilleus, et bien peust defendre celui passage un seul chevalier contre plusor, s'arreste il et dit a Bandemagus: ²«Qe dites vos, ne passerom nos outre? – Sire, ce dit Bandemagus, li passages est mout perilleus, ce poez vos bien veoir tout clerement, mes por tout ce ne remaindra il qe nos ne passons outre, voille ou ne voille li chevalier!». ³Qant li vielz chevalier, qi derrieres venoit, voit qe li rois Artus s'est einsint arreztez enmi dou flum ne avant ne passe, il se met avant et dit: ⁴«Certes, voirement estes vos des chevaliers au roi Artus. Or aie ge male aventure se Galeot le Brun ne passast plus hardiemant cestui passage qe vos ne le passez». Lors hurte cheval des esperons et se met devant le roi Artus et crie au chevalier qi le passage gardoit: ⁵«Sire chevalier, porquoi dites vos qe nos ne devom passer cestui flum? – En non Deu, fet li chevalier qi le passage gardoit, qe vos ne venez pas com chevalier erranz, qar chevalier errant ne doit passer cest flum se il ne moine dame ou damoisele. ⁶La costume de cest passage est tele ja a plus de .xv. annz et encore i est maintenue fermemant. Et ge vos di une autre chose: or sachiez qe se il avenist qe vos le passisiez par force encontre ceste costume qe ge vos ai devisee, vos n'iriez avant granment qe vos vos en repentissiez trop fieremant. – ⁷Or me dites, fet li viell chevalier, se Dex vos doint bone aventure, e qi fu cil qi cest[*e* cost]ume establi premierement? – Si m'aït Dex, dit li chevalier, ce fu Galeot le Brun qi le trouva, et li rois Uterpendragon l'aferma. – ⁸Si m'aït Dex, fet li viel chevalier, puisque si preudome com fu Galeot le Brun, qi fu bien sanz faille le meillor chevalier qi a son tens fust el monde, trova ceste costume, ja Dex ne m'aït se ge de riens vois encontre, qe ge pui! ⁹Ainz m'en retournerai, puisque il est einsint avenu qe ge n'en ai en ma conpeignie dame ne damoisele. ¹⁰Et, si m'aït Dex, se ge fusse si bon chevalier orendroit com fu Galeot, qi ceste costume establi, ge n'iroie encontre, ainz m'en retourneroie arrieres, puisque ge ne sui venuz a cestui passage si noblement garniz de conpeignie com li bon chevalier dist qe l'en i devoit venir».

156. ¹Lors torne le frain dou cheval et s'encomence retorner arrieres. Qant li rois Artus le vit retorner, il ne se puet tenir qe il ne

li die: ²«Coment, sire chevalier? Vos nos blasmez a tort orendroit que nos nos estiom arreztez, et nos veom que vos vos en retornez dou tout! Par Deu, vos ne moustrez pas a cestui point que vos soiez meillors chevaliers que nos. — ³Biaux sire, fet li viel chevalier, au dareain se mosterra vostre proesce et vostre hardemant, et la moie cohaidie autersint. ⁴Or passez, se il vos plect, que Dex vos leisse bien passer, que ge vos pramet loiaument que ja encontre la costume de si bon chevalier com fu Galeot ne me trouverai ge ne ci ne ailleurs, porqoi le puisse autrement fere». ⁵Qant Bandemagus entent ceste parole, il dit au roi Artus: «Sire, que volez vos fere? — En non Deu, fet li rois, ge voill [passer], se ge onques puis: li retorners nos seroit trop ahonteux, qant tant somes venuz avant. — ⁶En non Deu, fet Bandemagus, ge ne voill que vos passez. — Porqoi? ce dit li rois. — Por ce, sire, ce dit Bandemagus, q'il n'apertint a tel home com vos estes que il aille encontre la costume de si preudome com fu celui que l'establi. ⁷Les costumes de celui devom nos en totes maineres maintenir a nostre pooir e non mie rompre. — Coment? fet li rois. Si retournerom donc? — ⁸Voir, en non Deu, fet Bandemagus, dusq'a tant que nos puisom ci revenir honoreement et passer en tel mainere com li bon chevalier comanda que li chevaliers erranz deussent venir. — ⁹Coment, ce dit li rois, dites vos ceste choses a certes ou a gas? Qar encore ne vos puis ge croire, se Dex me saut, que vos aiez si grant volenté de retourner com vos dites. — ¹⁰Sire, ce dit Bandemagus, or sachiez bien que ge le di tout a certes, et de ma volenté ne passerai ge pas en autre mainere que comande la costume dou bon chevalier. ¹¹Voiremant, se vos i passez, moi couvendra passer, voille ou ne voille, qar vos ne leisseroie ge ne a tort ne a droit, tant com ge vos puisse sivre. — ¹²Et a qoi vos acordez vos meuz? fet li rois. — Sire, ge m'acort au retourner, dusq'a tant que nos puisom passer honoreement. — Or retornom donc», fet li rois. ¹³Einsint s'encomencent a retourner et viennent fors de la rivere. Et qant il sunt a terre seche, li rois dit a Bandemagus: ¹⁴«Or que ferom nos? Il m'est avis que nos ne porrom ci passer se chascun de nos n'a en son conduit dame ou damoisele. — ¹⁵Sire, fet Bandemagus, vos dites voir. — Et ou le trouverom nos? fet li rois. — Sire, fet Bandemagus, de qoi vos esmaiez vos? Nos en trouverom tost».

157. ¹A celui point que il parloient en tel mainere, et li viel chevalier s'estoit mis en lor parlemant, il regardent et voient adonc venir vers eaus trois chevaliers qui isoient d'une forest qi estoit pres de eaus

156. 5. passer] *om.* L4 (*v. nota*)

a moins de trois archiees, qe chasqun chevalier menoit en sa conpei-
gnie .ii. escuers por lui servir et une damoisele, et lors escuz estoient
touz blans sanz autre taint. ²Maintenant qe li viel chevalier voit les .iii.
damoiseles venir, il dit au roi Artus et a Bandemagus: ³«Seignors, se
Dex me doint bone aventure, voirement somes nos chevaliers aven-
tureux, qar tot ce qe il nos couvenoit si nos est venu a main. ⁴A chas-
qun de nos failloit une damoisele: veez le ici venir. – Sire chevalier,
fet li rois, se eles venent, por ce ne sunt eles pas nostres! ⁵Il m'est avis
qe eles sunt en tel conduit qe eles ne nos doutent pas granment. Plus
volentiers par aventure eles voudront passer ceste rivere el conduit ou
eles sunt qe eles ne feroient el nostre orendroit. ⁶Et ge crois bien qe
il les voudront contre nos defendre. – Et de qe vos esmaiez vos? fet
li viel chevalier. ⁷Avez donc poor de trois chevaliers? – Coment? fet
li rois. Sire chevalier, a celui tens qe vos estoiez en vostre pooir,
n'aviez vos donc poor de .iii. chevalier qant vos les encontroiez? – ⁸Si
m'aît Dex, sire, fet li viel chevalier, nanil, porqoi ge ne les coneusse.
– Et orendroit, ce dit li rois, en avriez vos poor? – ⁹Certes, fet il,
encore soie ge si viel com vos veez et si debrisieiz de porter les armes,
si n'en ai ge mie si grant poor qe ge ne vos parte un geu maintenant,
et prenez laquel part qe vos voudroiz: ¹⁰ou vos entre vos deus prenez
a desconfire ces .iii. chevaliers qe vos veez venir, ou ge les preing a
desconfire touz troiz. ¹¹Fetes leqel qe vos voudroiz: ou vos prenez
cest fet sor vos, ou ge le prendrai sor moi. ¹²N'aiez pas de moi poor
qe ge n'aconplisse bien cestui fet, si viel com vos me veez, qe ge vos
pramet loiaument qe, encore soient il troiz, si n'avront il pas duree
encontre moi, ce sai ge bien de voir, se petit non».

158. ¹Qant li rois entent ceste parole, il se comence a sourire, qar
il cuide tout certainement qe li chevalier vielz ait dite ceste parole par
folie de teste. Et neporqant, il respont bien tout autrement qe li cuers
ne li dit adonc: ²«Sire chevalier, puisque il est ensint qe vos nos avez le
geu parti, et nos prenom: nos nos volom mielz metre en aventure des
trois chevaliers assaillir qe vos vos i meisiez por nos». ³Lors dit a Ban-
demagus: «Alom ferir sor ceaus trois chevaliers qi ci viennent por savoir
se nos poom conquerer ces .iii. damoiseles qe il conduient. – Sire, dit
Bandemagus, il me plect mout». ⁴Lors s'apareillent de la joste, et qant
il voient les .iii. chevalier pres d'eaus, il lor crient: «Gardez vos de nos,
seignors chevaliers, vos estes venuz as jostes». Qant li .iii. chevaliers
entendirent ceste nouvelle, porce qe il n'avoient adonc trop grant
volanté de joster, s'arrestèrent il enmi le chemin et dient: ⁵«Seignors
chevaliers, nos n'avom orendroit volenté de joster, qar se nos jostom

orendroit a vos en ceste place, ne remaindroit il mie qe il ne nos couvenist joster a l'oisue de ceste rivere. — ⁶Sachiez, fet Bandemagus, qe a nos vos couvient joster tout orendroit. — Or me dites, font li chevalier, porriom nos trouver en vos nulle autre concorde? — ⁷Oïl, ce dit Bandemagus, se vos nos volez voz damoiseles done[r], adonc vos en porroiz vos aler tout qitement. — En non Dieu, dient li chevalier, ce ne vos ferom nos mie: mielz volom nos joster a vos. — ⁸Donc vos gardez huimés de nos, ce dit Bandemagus, qar vos estes venuz as jostes tout orendroit!».

159. ¹Aprés cestui parlemant li rois n'i fet autre demorance, ainz leisse premierement corre sor les trois chevaliers et done un si grant cop au premeirain qe il encontre qe cil ne se puet tenir en sele, ainz voide les arçons tantost et chiet a terre. ²Bandemagus si abat l'autre mout prestemant. Et le tiers, qi ne cuidoit mie qe si conpeignon deussent estre si tost abatuz, qant il les voit andeus gesir a terre, il leisse corre sor Bandemagus et brisse son glaive ³et tant se force qe il l'abat com cil qi de l'autre joste estoit encore desappereilliez des armes. Qant li rois voit Bandemagus a terre, se il est iriez, nel demandez! ⁴A mort se tient et a honi se il ne venche tout maintenant ceste honte. Lors retorne la resne de son cheval et s'adrece vers le chevalier qi Bandemagus avoit abatu et le fiert de toute sa force, qe mout li pesera chierement se il remaint a cest point en sele. ⁵Et q'en diroie? Li chevalier est feruz de cele joste, a ce qe li rois estoit bien fort, qe il ne puet en sele remaindre, ainz vole a terre et est de celui cheoir si estordiz qe il ne set se il est nuit ou jor, ainz gist ilec com se il fust morz. ⁶Qant li rois voit qe il ont les .iiii. jostes menee a fin, il prent le cheval Bandemagus et l'amoine, et li dit: «Montez et vos tenez mielz une autre foiz». Cil monte, honteux et vergondeux trop malement de la parole qe li rois li ot dite: il n'ose drecier la teste tant a vergoigne. ⁷Et li rois s'en vint as .iiii. damoiseles et lor dit: «Damoiseles, Dex vos saut». ⁸Et l'une, qi ploroit ja mout tendrement com cele qi trop estoit iree et doulente de ce qe ses amis gissoit a terre encore, respont tout en plorant: «Sire, tant vos viegne de bien et de bone aventure com vos m'avez fet a cestui point. — ⁹Damoisele, fet li rois, vos porriez mielz dire, se il vos pleust!». Et cele [se] tut, qi plus n'ose parler, qar bien conoist certainement qe ele est orendroit en autre conduit qe ele ne soloit.

158. 7. doner] donc L4 (*errore di anticipo*)

159. 9. se tut] t. L4

160. ¹«Damoisele, ce dit li rois Artus, vos estes ci .iii., et nos somes ci .iii. chevaliers. Chasque de vos preigne de nos celui qui mielz li plera, qar autrement ne porrion nos passer ceste rivere, por la costume dou passage, se chascun de nos trois ne menoit en sa conpeignie ou dame ou damoisele. ²Et cele qi devant venoit et qi au chevalier qi en son conduit la menoit voloit mal de mort, et n'estoit mie de ceste aventure tant correciee d'assez com estoient les autres, qant ele entent ceste parole, ele respont ensint com en sorriant et dit: ³«Sire, qant entre nos somes venues entre vos a tele choiz com vos nos devisez, or sachiez qe nos vos volom veoir a touz trois les visages descouverz, ensint com vos nos veez ci orendroit». ⁴Qant li rois entendi ceste parole, il dit au viel chevalier: «Sire vos acordez vos a ce qe dit ceste damoisele? – Sire, ce dit li viel chevalier, ge entent bien ce qe la damoisele dit. ⁵Or sachiez qe se il peust estre autrement qe en ceste mainere, ge le vouxisse bien, qar j'ai doute qe chasque de ces damoiseles ne me refusent porce qe ge sui vielz. ⁶A vos deus sai ge bien qe eles s'acorderont tout veraïement, qar encore estes vos joveceaus, mes moi refusseront, ce sai ge bien, par ma veillesce. – Sire, fet li rois, no[n] feront, si com ge croi. ⁷Ostez seu-remant vostre hiaume tout premierement, et Bandemagus après et ge autresint». Et la damoisele qi premierement parloit des hiaumes oster dit as deus autres damoiseles: ⁸«Vos plect il qe ge preigne avant celui des .iii. chevaliers qe ge amerai mielz?». Et celes, [qi] n'estoient pas si prestes de parler, dient: ⁹«Damoisele, prenez a vostre sens». Et cele s'en vet tout maintenant au roi Artus, porce qe il li semble mielz home de valor qe ne feisoient li autres. L'autre damoisele s'en revet tout droitement a Bandemagus. ¹⁰Qant l'autre damoisele, qi le tiers devoit prendre, et voit celui qi a sa partie li venoit et ele voit qe il estoit si viel qe il avoit ja passez .LXX. annz, ele se retret arrieres, et dit as autres damoiseles: ¹¹«Vos m'avez eingnie et deceue, qar entre vos avez pris les chevaliers qi vaillent aucune chose et m'avez leissié celui qi riens ne vaut: il est si vielz qe desoremés n'avroit il mestier a dame ne a damoisele. ¹²Ge ne croi pas qe il puisse legierement porter armes ne son escu: coment donc me porroit il defendre a un mal pas, se aventure nos y menoit? ¹³Ge ne le voil! Se Dex me saut, retenez le por vos et me donez un de ces deus qe vos preistes par vostre partie!».

160. 5. Or] Sire ce dit li viel chevalier or L4 (*saut all'indietro*) 6. non] no L4
8. qi] om. L4

161. ¹Quant li viell chevalier entent ceste nouvelle, il est si fiement honteux qe il ne set qe il doie dire. Et quant il parole, il se torne vers le roi Artus et dit: ²«Sire chevalier, ne vos disoie ge voir qe ge seroie refusés par ma veillesce? Encore me vauxisse il mielz qe ge eusse mon hiaume en ma teste, qar ge ne fusse refussee». ³Lor se torne vers la damoisele li rois et li dit: «Ha! damoisile, ne fetes si grant vilenie qe vos refusez dou tout cest chevalier. Or sachiez qe il vos conduira par aventure plus seurement par cest passage qe nos ne feriom. — ⁴Biaux sire, fet la damoisele, ge vos pri qe vos ne m'epri-gniez qe ge doie fere. Or sachiez qe ge [ne] voil viel conduit: mielz voil ge passer par moi meemes cestui passage qe ge demorasse en sa garde. ⁵Se doner me volez conduit, donc me donez qi soit de mon tens. Cest chevalier qe entre vos me volez doner me semble de Viell Testament. ⁶Cuidez vos ore, se Dex vos saut, se il eust bon sens, qe il chevauchast en guise de chevalier errant? Cestui penser ne li partient desoremés. ⁷As jovenceaus qi sunt de .xx. anz ou de .xxx. lest cestui afere, qar a li n'est pas couvenable, qar, se ge le voir en voloie dire, ge croi qe il ait .iiii.^{xx} anz qe il porta primes armes. ⁸Or donc, me volez vos doner a ma partie jovenceaux bien de .c. anz? ⁹Ge ne sai qe vos en diroiz, mes ge di bien qe ge le refus de tout en tout, et mielz voill ge aler sanz conduit qe estre de lui e[n]comb[r]ee».

162. ¹Li rois Artus, quant il entent ceste parole, il ne set qe il doie dire: trop est correciez durement por l'amor del viel chevalier. ²Et neporquant, encore cuidoit il bien qe li viel chevalier eust dit ce qe il avoit dit par folie de teste et par veillesce: il n'avoit pas esperance qe il peust jamés riens valoir a nul besoing. ³Mes qi qe soit liez et joiant, li .iii. chevaliers qi orent esté abatuz si vilainement com ge vos ai devisé sunt tant iriez et tant doulant qe il ne sevent qe il deussent fere. ⁴Et li rois, qi ja voudroit la rivere avoir passee, se torne envers le vielz chevalier et dit: «Sire, qe volez vos fere? Voudriez vos passer la rivere, ou demorer ceste part? — ⁵Sire, fet li viel chevalier, puisque il [est] ensint qe ge ne puis ceste rivere passer si honoreement com ge voudroie, ge la passerai si honteusemant com vos porrez veoir, qar ge la passerai si honteux et si refusez com vos avez veu et entendu. ⁶Desoremés puis ge bien dire qe les damoiseles me vont dou tout refusant. Mon afere ne puet plus en pris monter: folie me fet porter armes, ge le voi bien ore reconoisant». ⁷Aprés ceste parole n'i atent plus li rois

161. 4. ne] *om.* L4 9. encombre] *ecombee* L4

162. 5. est] *om.* L4

Artus, ainz se met dedenz la rivere et tient encoste de lui sa damoisele, q̄i assez estoit bele et avenant. Il se tient bien apaié de cele conpeignie a celui point. ⁸Bandemagus vient après lui. Il ne leissera pas, se il puet, la soe conpeignie, qar mout l'amoit de grant amor. Li autres chevaliers q̄i ja avoient esté abatuz estoient ja remonte et dient qe il passeront outre l'eve ou a honor ou a honte. ⁹Plus ne poent il estre deshonzorez a passer l'eve qe il ont esté de cest encontre. Et li chevalier q̄i de l'autre part estoit tout appareilliez de joster lor crie ha aute voiz qant il les voit aprouchier: ¹⁰«Ne veignie avant nul de vos q̄i joster ne voille». Et il avoit adonc en sa conpeignie bien dusq'a .vi. chevaliers touz appareilliez de joster ensint com il estoit. ¹¹Voiremant il devoit joster avant [...] cil q̄i le passage gardoit fust abatuz, et se abatuz pooit estre, il estoit q̄ites dou passage, einsint com ge vos dirai ça en avant. ¹²Li rois Artus, q̄i venoit devant touz les autres com cil q̄i mout estoit hardiz chevalier, qant il voit qe il a le passage passé tout le fort de l'eve et qe il estoit ensint com a terre seche, n'i fait autre demorance, ainz hurte cheval maintenant des esperons et leisse corre vers le chevalier, tant com il puet del cheval trere. ¹³Et cil li revint de l'autre part, q̄i a merveilles estoit preudomes des armes et bon fereor de lance, et fiert le roi si durement en son venir qe il fet voler en un mont e lui et le cheval en l'eve. ¹⁴Mes estoit si armez qe au cheoir qe il fist adonc il ne fu moilliez se pou non dedenz ses armes.

163. ¹Qant Bandemagus voit trebuchier le roi, ce est une chose dont il est mout doulanz a merveilles. Et neporqant, il voit le roi redrecier tout maintenant, et ce est une chose q̄i fierement le reconforte. ²Il ne s'arreste pas sor lui, ainz leisse corre sor le chevalier, qar volentiers vencheroit la vergoigne dou roi, se il le pooit fere. ³Qant li chevalier q̄i le roi avoit abatu voit venir vers lui Bandemagus, il nel vet pas refusant, ainz li adrece la teste dou cheval et le fiert en son venir si durement qe il fait de lui tout autresint com il avoit fet dou roi Artus. ⁴Et pis li fist il, qar il l'abati en plus parfonde eve qe cele n'estoit ou li rois avoit esté abatu. ⁵Se li rois fu correciez qant il voit Bandemagus trebuchier, nel demandez, mes qant il le voit redrecier, il est un pou reconfortez. Et tout ensint com il estoient abatuz, les damoiseles estoient menees dedenz le paveillon q̄i estoit d'ilec devant. La tierce damoisele, q̄i fu trouvee sanz conduit, fu prise. ⁶Aprés ce qe

11. fust] p fust (sic) L4

163. 5. redrecier] trebuchier L4

li chevalier de l'eve ot le roi abatuz et Bandemagus, abati puis les trois chevaliers pres a pres qi les .iii. damoiseles avoient perdues par devant. ⁷Qant li viel chevalier, qi toutes ces jostes avoit regardees et qi après venoit, [voit] qe tuit sunt abatuz, il demande adonc son escu et son glaive, et son escuer li done. ⁸Et qant il est tout apareilliez de joster, il dit si haut qe li rois l'entendi tout clerement: «Ha! sire Dex, porquoi morurent li bons chevaliers qe ge vi ja en cestui leu proprement ou nos somes orendroit? Com cil estoient voirement d'autre pooir qe ne sunt cil qi orendroit sunt passez!». Et qant il a dite ceste parole, il crie a haute voiz au chevalier qi les autres avoit abatuz: ⁹«A moi te vient esprouver, chevalier. Encore vieng ge a cest pas non mie si honoreement com ge vouxisse, si te faz ge asavoir qe tu ne troveras pas garçons en moi. — ¹⁰Ge voil, fait cil qi le passage gardoit, qe vos soiez chevalier fort et fier et de grant pooir: tant avrai ge greignor [honor] de vos abatre». ¹¹Lors s'adresce li uns vers l'autre au miels qe il le [se]vent fere et s'entreviennent les glaives beissiez. Li chevalier qi les autres ot abatuz atendi tant qe li vielz chevalier est venuz a terre seche. ¹²Qui adonc veist li viell chevalier [venir] a la joste, si asprement et si roidement com se la terre li deust fondre desouz les piez de son cheval, il ne deist pas a celui point qe il fust d'assez si viel chevalier com il estoit. ¹³Et q'en diroie? Il mostre bien a celui point qe voirement estoit il chevalier et avoit autre foiz feru de glaive, qar il fiert le chevalier si roidement qe, encore fust il pseudom des armes et fort assez, si n'a il pooir ne force qe il se puisse tenir en sele, ainz vole a terre maintenant, si estordiz et estonez del dur cheoir qe il prist a terre qe il gist ilec com se il fust morz: il ne set se il est nuit ou jor. ¹⁴Et qant li vielz chevalier a cele joste faite, il ne s'arreste pas sor lui, ainz crie as autres chevaliers qi estoient de la conpeignie au chevalier qi estoit abatuz et qi feisoient ja regarder les damoiseles: ¹⁵«A il nul de vos, fet il, qi joster voille? — En non Deu, fet un des .vi. chevaliers qi de joster estoit ja touz apareilliez, or sachiez qe se vos ne trovez a joster ici, vos n'en trouveroiz a pieça en leu ou vos veignoiz, et plus avez a fere sanz faille qe vos ne cuidez. — ¹⁶Or i parra qe vos feroiz, fet li viel chevalier, a moi avez a fere». Einsint s'entreviennent li dui chevalier au ferir des esperons, et qant ce vient as glaives beissier, il s'entrefierent de toute lor force. ¹⁷Li chevalier qi estoit dou paveillom est si feruz de cele joste qe il voide les arçons andeus et chiet a terre

7. voit] *om.* L4 10. honor] *om.* L4 11. sevent] vent L4 12. venir] *om.* L4
(*cf.* § 90.3 e 92.9) 14. la conpeignie] *sa c.* L4

si feleneusement qe il se brisa le braz senestre. Il giete un grant cri: «Ha! las, ge sui morz!».

164. ¹Li rois Artus, qi ja estoit remonte de piece, qant il voit cele joste qi estoit einsint avvenu, dit a Bandemagus, qi ja estoit remonte: «Qe vos semble de ceste aventure? Vos est il avis qe mielz vaille encore le viel chevalier qe nos qi somes joveceaus? – ²Si m'aît Dex com ge m'aloie orendroit de lui gabant dedenz mon cuer et com ge cuidoie certainmant qe il deist par folie de teste ce qe il disoit! ³Mes or conois ge tout certainement qe ne feisoit mie, mes por la aute bonté qe il sentoît en lui parloit il si hardiement. Ge tieng orendroit moi por fol et lui por sage. – ⁴Sire, ce dit Bandemagus, se Dex me saut, qant il est encore tel chevalier, dire poez seurement qe il estoit de grant afere a celui point qe il estoit de .xxx. anz. – ⁵En non Deu, fet li rois, vos dites voir, et j'ai tant a cestui point veu de lui qe jamés a jor de ma vie ne refuserai chevalier en ma conpeignie por veille[sce] qe ge voie en lui. Cist ne fet pas a refusser por tens qe il ait». ⁶En tel guise com ge vos cont parloit li rois Artus a Bandemagus dou viel chevalier. Et cil, qi mout pou attendoit a tout celui parlement, qant il voit qe il a les .ii. chevaliers abatus, il ne s'arreste pas sor eaus, ainz leissa corre sor les autres qi encore estoient devant le paveillom, toz honteux et touz apareilliez de joster et de combatre. ⁷Et il s'en vient par[mi] eaus ferant des esperons, et tout le premier qe il encontre en son venir il le fet verser a la terre et brise son glaive. ⁸Qant il a son glaive brisé, il ne moustre pas adonc semblant qe il soit de riens espoenté, qar il met main a l'espee, qi bien estoit sanz faille une des greignors espee qi a celui tens fust ou monde, et il meemes estoit granz merveilleusement. ⁹Et qant il la tint, il crie a touz ceaus qi encore estoient a cheval: «Par Deu, fet il, touz estes morz, garçons mauveis!». ¹⁰A tout le premier qe il encontre [done] un si grant cop desus le hyaume qe le hyaume n'est pas si durs qe l'espee n'entre dedenz plus de deus doiz en parfont, ¹¹et li chevalier est si chargiez de celui cop qe il ne se puet pas bien soutenir, ainz est si estordiz fierement qe il ne set se il est nuit ou jor. ¹²Et q'en diroie? Qant il se est un pou maintenuz dedenz la sele, si trebuche a terre toutesvoies.

165. ¹Qant li autres chevaliers qi encore estoient a cheval voient celui cop, il sunt adonc si fierement espoentez qe il ne se vent qe il doivent dire. ²Et il leisse autrefoiz corre sor eaus, l'espee en la main

164. 1. de piece] des p. L4 5. veillesce] veille L4 7. parmi] par L4 10. done] om. L4

toute nue, et est tant vistes et tant legiers en la sele qe, encore reçoive il cox — qar sor lui, a la verité dire, feroient qantqe il pooient li autres chevaliers — si ne sent il cop qe il li doignent se petit non: trop est seur en toutes choses, trop est preudom, trop est aidables des armes. ³Et q'en diroie? Il a tant fet en petit d'ore qe il les met a desconfiture par fine force, si qe il torment dou tout en fuie, ne ne moustrent pas qe il aient talent de retourner, qar il s'enfuient d'autre part tant com il poent des chevaux trete. ⁴Quant li viel chevalier voit qe il a la place voidee, il s'en vient adonc au chevalier qe il avoit abatu, et cil estoit ja remonte, tant doulenz et si fierement correciez q'a pou qe il ne crieve de duel. ⁵«Biaux sire, fet li viel chevalier, vos est il encore avis qe ge aie assez fet por passer honoremant cestui passage? — ⁶Biaux sire, fet li chevalier, vos en avez tant fet qe l'en vos doit tenir par reison por bon chevalier et por vaillant! Et nos doit l'en tenir sanz faille por vilz et por maveis. — ⁷Or me dites, fait li viel chevalier, couvient il qe ge en face plus a cest passage? — Certes, nanil, fet li chevalier, vos en avez fet qantqe preudome doit fere. ⁸Et vos venistes de bone hore por ceaus autres chevaliers qi ci furent abatuz qe, se Dex me doint bone aventure, se vos n'eussiez mis a desconfiture moi et mes conpeignons, tuit estoient mis en prison, et ces damoiseles autresint. ⁹Mes orendroit les avez vos touz delivrez par la desconfiture qe vos avez fete de nos et par vostre haute bonté.

166. «— ¹Puisq'il est ensint, fet li viel chevalier, qe nos sommes touz delivrez par ma venue, or les leissiez donques aler. — Il ne trouveront mie qi les arreste ici, fet li chevalier, aler s'en poent bonement qant il voudront, et les damoiseles autresint». ²Après ceste parole, li viel chevalier n'i fet autre demorance, ainz se met au chemin et se part dou roi Artus et des autres qi encore estoient en la place si esbahiz de ce qe il avoient esté desconfit einsint qe il ne savoient qe il deussent fere ³et, au departement, il se merveillent trop fierement qi pooit estre le chevalier qi si merveilleusement avoit fet cele desconfiture voiant eaus. ⁴Et li chevalier qi le passage avoit defendu encontre les .vi. chevaliers, qant il voit qe li vielz chevalier s'en vait si priveement qe il ne moine en sa conpeignie fors qe un escuer seulement, il vient au roi Artus et li dit: ⁵«Dites moi, qi est cist chevalier qi de ci s'en vet si priveement? Il le fait por soi celer?». Li rois repont tout maintenant: ⁶«Sachiez, sire, ge ne le conois se trop petit non. Il herberja arsoir en nostre hostel par tel aventure». Et maintenant li comence a conter ce qe il en avoit veu. ⁷«En non Deu, fet li chevalier, des qe tant m'en avez conté, sachiez qe ge sui orendroit plus esbahiz de son afere qe ge

n'estoie devant! ⁸Qi qe il soit, et encore m'aie il fet honte et vergoigne grant, si di ge bien qe Dex le conduie. Et entre vos le devriez par reison dire, qar sa venue vos a ostez de prison, qar ce vos faz ge bien asavoir qe vos estiez tuit enprisonnez, et les damoiseles autresint.

167. «– ¹Or me dites, fet li rois, et porqoi estiom nos en prison? N'estoit pas assez de la honte qe nos aviom receue ici? Et sor tout ce deviom estre enprisonnez? – ²Voir, ce dit li chevalier, tele est la costume de cestui passage. ³Et certes, se l'en vos fait honte, ce n'est mie merveille, qar trop estes vils et mauveis qant vos damoiseles prenez en conduit et puis ne les poez defendre encontre un chevalier de ceans. Qi a cestui passage viennent, et sunt si fol et si hardi qe il preignent damoiseles en conduit et puis ne les poent maintenir a lor honor, ⁴a cestui pas est la venjance si cruele qe li chevalier qi est tex qe il n'a pooir de garentir sa damoisele, il est pris et li tout l'en ses armes, et puis le met l'en en prison un an entier avant qe il en puisse estre ostez. ⁵Sire chevalier, ce est la costume de cestui pasage. – Et celui, fet li rois, qi sa damoisele puet conduire sauvement: qel honor li fet l'en? – ⁶En non Deu, fet li chevalier, ce porroiz vos tost veoir a un chastel qi est ci devant par ont il vos estuet passer, voilliez ou ne voilliez, qar il n'i a nul autre chemin qe vos peussiez tenir. ⁷Ilec porroiz vos ja veoir grant feste et grant honor qe cil de l[ei]enz] feront tout orendroit au chevalier qi de ci s'en vet, qe ce vos faz ge bien asavoir qe il savront tout certainement la novelle de sa bonté avant qe il soit la venuz. ⁸Il li feront ja tele honour et grant feste com ce fust propremant li rois Artus. Mes a vos qi après vendroiz il ne feront pas si grant honor, ce vos pramet ge loiaument. ⁹Il le recevront mout plus honorement qe il ne feront vos. – En non Deu, fet li rois, il est mestier, se ge onques puis, qe ge voie cele feste qe l'en li fera». Et lors se torne vers les autres chevaliers et lor dit: ¹⁰«Seignors, volez vos chevauchier après le bon chevalier qi de ci s'en vet?». Et il dient qe voirement voudront il chevauchier après li se il onques poent, il n'ont talent de demorer ilec granment. ¹¹«Seignors, fait li rois, vos poez prendre voz damoiseles, se vos volez. Nos les avom a cestui pas si maveissement defendues qe il ne m'est avis, se Dex me saut, qe nos devom avoir cestes damoiseles ne autres. ¹²Et por ce les prenez, qe nos les vos qitom dou tout. – Granz mercis, dient li chevalier, et nos les prenom volentiers».

166. 8. m'aie] n'aie L4

167. 7. de leieiz] del L4 8. et] [.] L4 (*v. nota* § 167) ♦ vendroiz] venddoiz (?) L4 10. voirement] vo[.]rement L4 12. prenom] prenomi L4

168. ¹Atant se metent a la voie, li rois Artus premierement et Bandemagus après, et li autres .iii. chevaliers autresint. Puisque il se sunt mis a la voie, il comencent maintenant a parler dou chevalier qi ein-sint les delivra hautement et puis se parti d'eaus si soudainement qe il ne prist congié a null d'eaus. ²«Sire, ce dit Bandemagus au roi Artus, qe dites vos? Or sachiez tout certainement qe il est assez de greignor afere, si com ge croi, qe nos encore ne cuidiom. Et [li] chevaliers, se il ne se sentist si bien de soi, si n'eust mie parlé si hautement ne si seurement com il comença hui a parler qant nos encontrames ces chevaliers. ³Nos cuidiom bien qe il deist par folie de teste ce qe il disoit, mes non feisoit: il parloit si hautement por la grant seurté qe il avoit de sa proesce. — ⁴Si m'aït Dex, fet li rois, vos dites verité. Certes, j'ai tant veu en cest voiage qe g'en vaudrai mielz tout mon vivant, qe ge ne prisoie de tant li viel chevalier d'assez com ge [le] priserai desore-més. ⁵Ge conois mielz ore coment il soit a prisier. Se il ne fust a cestui point en nostre conpeignie, nos eussom vergoigne et honte assé plus qe nos ne vouxisom avant qe nos nos partissom de ceste contree. ⁶Mes, Deu merci, nos somes par li delivrez auques aaisieement de ceste cruele aventure et perilleuse».

169. ¹Qant il a dite ceste parole, il se torne vers la damoisele qi ensint vilainement avoit refusé le viel chevalier et li dit: «Ma damoisele, vos est il ore avis qe vos feissiez grant sens de refuser en tel mainere le viel chevalier com vos le refusastes? ²Or m'est avis qe por toute sa veillesce ne remaint qe il ne vaille encore mielz qe nos ne vaillom, qi somes geunes chevaliers. ³Encore vos a mielz valu son conduit qe ne fist toute nostre force, qar il vos a delivré de vilaine prison, et nos autresint. Il se puet mielz gaber de nos qe nos de lui». ⁴La damoisele, qi est tant fierement honteuse por la grant vilenie qe ele avoit dite au chevalier et porce qe tantes foiz l'avoit refusé, ne set orendroit qe ele doie dire, si se test et beisse la teste vers terre et ne respont mout dou monde de parole qe li rois li die. ⁵Et qant li rois la voit si honteuse, il la leisse estre en pes une grant piece et puis li redit: «Dites moi, ma damoisele, vos tenez vos orendroit a sage de ce qe vos refusastes tantes foiz le viell chevalier qi delivrez nos a touz a cestui point de vilaine prison? — ⁶Sire, fet la damoisele, porqoi le me demandez vos tantes foiz? Bien poez savoir certainement qe ge ne me tieng pas a sage. Li tens de lui si me deçut, qar de son tens ne trouve l'en

168. 1. soudainement] soud[...]nement L4 (*taglio*) 2. li] *om.* L4 4. le] *om.* L4
5. soit] tuit [...] L4

pas souvent si bon chevalier com il est. ⁷Encor n'en oï ge parler de nul autre fors qe de lui. Trop plus sage qe ge ne sui l'eust refusé et refuseroit encore, se ele ne le veoît en prouve. – ⁸Damoisele, ce dit li rois, se Dex me saut, or sachiez tout certainement qe ge sui einsint deceu de son afere com vos estiez, qar, qant ge le vi desarmé, ge ne cuidasse mie qe il peust valoir un chevalier a un besoing puisqe ge nel conoisoie. ⁹Ge ne v'en puis pas trop blasmer se vos ne le conoisissez. Et par pardonner vos les vileines paroles qe vos li deistes, se il orendroit si vouxist acorder a vos, ne vos acorderiez vos volentiers a lui? – ¹⁰En non Deu, fet la damoisele, j'ai tant veu a cestui point en lui proesce et hardemant qe ge m'en tendroie a trop mielz paiee de lui, se il me voloît por amie, qe ge ne feroie de null de vos. – En non Deu, fet li rois, vos avez reison».

170. ¹Einsint parlant toutesvoies dou bon chevalier chevauchent il tant qe il sunt alez .iiii. lieues englesches et plus. Et lors voient devant eaus un chastel grant et riche et bien fermé sor cele meemes rivere qe il avoient le jor passee, qar cele rivere aloit cele contree avironant or d'une part or d'autre. ²Tout maintenant qe Bandemagus voit le chastel, il le moustre au roi Artus et li dit: «Sire, veez la un chastel bel et riche. – ³Vos dites bien verité, fet li rois. Cil de leienz feront ja grant feste et grant joie al bon chevalier, ⁴et ge croi qe tout einsint com il le rece[v]ront honoreement recevront il nos honteusement et a deshonor. ⁵Et certes, se il le funt, il n'est pas merveille, qar vilainement nos prouvames au passage, et ge croi qe por celui fet recevrom nos hui vergoigne». ⁶Qant li chevalier entendent ceste nouvelle, il sunt espoentez fierement, ausint sunt les damoiseles. ⁷Mes de cele qe dirom nos, qi le bon chevalier avoit refusé tantes foiz? ⁸Cele est si fortment espoentee qe, se ele s'en peust retourner en nulle guise, ele s'en retornast volentiers. Mes ele ne puet, ce set ele certainement. ⁹Ele cuide bien de voir qe li viel chevalier la face destruire por la vileinie qe ele li ot dite. A tel poor, a tel esmai et a si grant doutance qe ele cuide bien morir chevauche la damoisele dusqe pres del chastel. ¹⁰Mes del bon chevalier qi devant estoit alez, qe dirom nos? Nos n'en

170. 4. recevront] receront L4 5. au passage] *dopo la lacuna segnalata al § 73.19 riprende il testo di X, f. 29va* 7. refusé tantes foiz] et qui si vilainement avoit parlé encontre lui *agg.* X 9. viel chevalier] c. X ♦ destruire] du cors *agg.* X ♦ (que X) ele] ele L4 ♦ doutance] doueance (?) L4 (*indhiostro evanito*); redoutance X ♦ chevauche] a cestui point c. X 10. alez] ja venuz X ♦ qe dirom nos] De celui que porron nous dire? *agg.* X

dirom fors la verité. ¹¹Puisque il se fu partiz dou roi Artus, il chevauché tant en la conpeignie de son escuier qe il vint au chastel. ¹²Et qant il fu pres venuz, il vit adonc qe tuit li mur dou chastel estoient ja tuit couvert de dames et damoiseles et d'omes, qar d'omes y avoit il assez autresint com de femes, et tuit comencent a crier: «Bien viegne, sire, bien veigne!» ¹³Qant il entent ceste parole, il est trop durement honteux et mout li poise dedenz son cuer de la grant honor qe cil dou chastel li font, qar il ne li est pas avis qe il en ait tant deservi com il lui font.

171. ¹Qant il est venuz dusq'a la porte del chastel, il trouve ilec .iiii. chevaliers, dont chascun estoit montez sor un riche palefroi, et il estoient tuit desarmez. Et maintenant qe il le voient bien pres, il descendent et li vont a l'encontre et tout a pié, et dien: ²«Sire, bien puisiez vos venir». Et le font descendre devant la porte et li ostent le hyaume de la teste et son escu qe il portoit a son col. ³Et il le font monter sor un palefroi mout riche et trop cointe, et si montent tuit après et lors entrent dedenz le chastel. ⁴Et la crie comence adonc si grant desus les murs et dedenz le chastel autresint, et dient li un et li autre a haute voiz: «Bien viegne le bon chevalier! ⁵Voiremant est il des bons chevaliers qi après Galeot le Brun sunt venuz a cestui passage!». ⁶A tel honor com ge vos cont enmoient cil de leienz le bon chevalier dusq'a la mestre forteresce. ⁷Et chascun, par la ou il vait passant, li a[n]clinet com se ce fust Dex proprement. Et q'en diroie? Il li font bien tout l'onor qe il li poent fere. ⁸Et qant il est venuz a la mestre forteresce et il est descenduz, il li metent un escu au col et li dient: ⁹«Sire, ce est la greignor honor qe nos vos puissom fere ceianz. — Et qele honor est ceste qe vos me fetes, dit il, de metre moi cest escu au col? — ¹⁰Qel honor? Sire, dient il, or sachiez qe ele est trop grant, qar cest escu qe nos vos metom a vostre col fu au meillor chevalier qi arnes portast a son tens en tout le monde: ¹¹cestui escu fu de

11. roi Artus] qu'il ot ja delivré einsint come je vos ai ja conté ça arieres *agg.* X
12. mur du chastel] de celle part ou il devoit entrer *agg.* X ♦ tuit couvert] c. X
♦ d'omes] et tuit et toutes X ♦ et tuit] li X 13. honteux] et trop vergondeux
agg. X ♦ qe cil dou chastel] qu'il X

171. 1. *no nuovo* § X ♦ .iiii.] dusq'a douze X ♦ bien pres] venir X 2. Sire ...
venir] Sire vous soiez le tres bienvenuz X 3. bons chevaliers] proudoumes X
♦ a cestui passage] honoreemant a cest chastel X 4. mestre forteresce] du chas-
tel *agg.* X 5. anclinet] aclinet L4; vet enclinant X 6. descenduz] illec *agg.* X
7. ceianz] Dex le set *agg.* X ♦ Et qele] Seignor fet il et q. X

Galeot le Brun. Et sachiez, sire, qe il a ja .x. anz passez qe il ne fu mis a col de chevalier, qar puis .x. anz ne vint ceste part chevalier privé ne estrange qi peust au passage dou gué passer si honoreement com vos i estes passez a cestui point. ¹²Sire, por vostre honor qi vos est avenue, vos avom nos fet ceste honor qe vos veistes. ¹³Au derrein nos croisom vostre honor, qar nos metom a vostre col l'escu dou meillor chevalier qi a son tens portast armes en tout le monde».

172. ¹Qant il ont dite ceste parole, li vielz chevalier respont tantost et dit: «Seignors chevaliers, or sachiez bien de voir qe ge ne me tieng mie a honor ce qe vos cest escu metez a mon col. ²Ainz le me tieg a mout grant honte, et vos dirai reison porqoi. ³Or sachiez tout veraieement qe se Dex me donasse tant de grace qe ge fusse orendroit ausint bon chevalier com fu Galeot le Brun ou eusse esté en auqun tens, adonc deisse ge qe ce fust honor por moi ce qe vos me fetes orendroit de cest escu. ⁴Mes qant ge me vois recordant qe ge ne vaill un chevalier de celui tens ne n'en ai vullu en tout mon aage, donc di ge qe ge ne doi porter l'escu, qar ge ne sui de tel bonté ne de tel pris. ⁵Por ce di ge qe vos me fetes honte et vergoigne trop malemant qant vos cestui escu metez a mon col. ⁶Porqoi ge vos pri, tant com ge puis prier, qe vos l'ostez, qar certes il n'a tant de bien en moi qe ge le doie porter. — ⁷En non Deu, sire, dient il, coment qe vos vos alez blasmant, nos diom qe vos estes bien home qi bien le doit porter, et les vestres oevres le moustrent bien apertement. ⁸Nul chevalier qi ne fust bien de trop haut pris ne porroit fere sanz faille ce qe vos avez fet hui». ⁹Einsint parlant, qe li bon chevalier a toutesvoies l'escu au col, vont tant qe il viennent en un grant palais, ou il avoit bien plus de .xl. dames trop beles et trop cointes et vestues si noblement com se chasquene deust celui jor prendre mari. ¹⁰Et tantost com eles voient le bon chevalier entrer ou paleis, eles li enclinent et li dient a haute voiz: ¹¹«Sire, bien veigniez». Et il lor rent lor salu mout bel e au plus cointement qe il le puet fere. ¹²Et lors prenent l'escu de Galeot le Brun et le pendent enmi le paleis. Et puis desarment le chevalier et li aportent un mout bel dras por vestir. Et tant l'onorent com ele le poent plus

11. dou gué] *om.* X ♦ a cestui point] en c. jor X **12.** Sire ... avenue] S. pour honneur qui vous i estes passez X

172. **1.** tieng] torn X **2.** tieg] tor X **3.** honor] bien raison X **4.** di ge qe] en nulle mainere *agg.* X **7.** le mostrent bien apertement] si m. vostre bonté X **9.** a] tenoit et X ♦ noblement] et si acesmés *agg.* X **11.** puet] savoit X **12.** un mout bel dras] une m. rice robe X ♦ l'onorent] au voir dire *agg.* X ♦ ele] il X

honorer ¹³et dient apertement qe ja a plus de .x. anz acompliz qe nul si pseudome com est cestui ne vint au passage. ¹⁴Por ce li feront tant d'onor com il porront.

173. ¹Einsint est avenu a ceste foiz au vielz chevalier qi est honorez et serviz de touz ceaus de leienz tant com il poent. ²Mes des autres chevaliers qi après viennent et des damoiseles n'est il pas avenu einsint. ³Lor afere, il vet bien a ceste foiz autrement, qar, tout maintenant qe il aprouchent des murs, il entendent tout clerement qe cil qi desus les murs estoient lor crient: ⁴«Mal veigniez, seignors chevaliers! Certes, ja sera nostre chastel deshonorez de ce qe vos i entrez. ⁵Male aventure ait la rivere, qant ele vos leissa passer. Avant! seignors chevaliers mauveis, avant! Nostre chastel sera enpiré de vostre venue». ⁶Einsint dient cils des murs encontre le roi Artus et ses conpeignons. ⁷Cil, qi ne sunt pas aseur, ainz ont poor et doute grant, ne responnent mie a parole qe l'en li die, ançois escoutent et beissent lor testes et entrent dedenz la porte dou chastel. ⁸Et maintenant comence la crie a l'entree qe il funt: ⁹«Veez les mauveis! Veez les honiz! Veez les deshonorez!». Et tuit li autres de leianz si lor dient: ¹⁰«Mal veigniez, seignors chevaliers! Nostre chastel est ahontez de vostre venue». ¹¹Einsint crient a fine force cil de leienz encontre le roi Artus et encontre sa conpeignie. ¹²Li bon chevalier, qi estoit ou paleis, entendi le cri. Et por savoir la verité de celui cri demanda il tout maintenant a touz ceaus qi devant li estoient: «Porquoi crie la gent de cest chastel?». ¹³Un chevalier respont tantost et dit: «Sire, n'oïstes vos la gent de cest chastel qi crioient encontre vos et qi vos feisoient si grant honor por la bone chevalerie qe il savoient en vos? ¹⁴Einsint font il orendroit deshonor a ceaus qi après vos i sunt entrez. Il lor funt honte porce qe il ne sunt pseudomes. ¹⁵Et neporqant, il ne les touchent, fors de dir lor vilenie.

13. .x.] douze X **14.** feront] doivent il faire X ♦ porront] quar il l'a bien deservi *agg.* X

173. **1.** *no nuovo* § X ♦ poent] honorer *agg.* X **2.** et des damoiseles] *om.* X
3. afere] fet X ♦ des murs] du chastel *agg.* X ♦ crient] a l'entree *agg.* X **4.** sera] sa X ♦ deshonorez] avillez et d. X **5.** de vostre venue] sanz faille *agg.* X **6.** et ses conpeignons] de ses c. L4; et encontre li autre chevalier qui en sa compaignie venoient X **7.** dou chastel] *om.* X **9.** Veez les mauveis ... deshonorez] V. les honiz et les deshonorez chevalier X **10.** Mal veigniez] *rip.* X ♦ venue] il vaut trop pis de ce soulevant que vous i estes entrés *agg.* X **11.** Einsint] *nuovo* § X **12.** crie la gent] crient X ♦ chastel] si firemant *agg.* X **13.** si grant honor] toute l'h. qu'il pooient? Il vous fesoient honor X **14.** pseudomes] des armes *agg.* X

Se por ce ne fust qe vos les delivrastes, malemant alast lor affere a cestui point. – ¹⁶Or vos pri ge, fet li chevalier, qe vos lor defendez qe l'en ne lor die plus vilenie, et qe vos les façoiz ça amont herbergier avec moi. ¹⁷Se il se sunt hui malemant prouvé, une autre foiz se prouveront mielz par aventure. ¹⁸Einsint vet des chevaliers: orendroit se prouve mal un chevalier et après se prove bien. – ¹⁹Sire, ce dit li chevalier, or sachiez tout veraïement qe nos leïsserom avant abatre cestui chastel qe nos les feïssom venir desus cest paleis. ²⁰Nos portom trop greignor honor qe vos ne cuidez a cest paleis, et savez vos porqoi? Por cestui escu seulesmant q'i adés y est nuit et jor. ²¹Et ge vos di une autre chose, qe, puisqe li bon chevalier q'i fu apelez Galeot le Brun n'oïssi, il n'i entra mes home, ne encore n'i fust entrez, se ne fust por vos fere honor et conpeignie. ²²Il sunt tuit entrez par conduit de vos et par seurté. – Et puisqe home n'entre ceïanz, fet li bon chevalier, et q'i habite donc en si riche paleis com est cestui? – ²³Sire, ill i habitent toutesvoies dames, gentix fêmes q'i gardent cest escu de jor et de nuit. – ²⁴Et qe voudriez vos fere, fet il, des chevaliers q'i sunt la fors en cui conpeignie ge estoie hui matin? Ce seroit trop grant deshonor por moi et por vos se il ne fûsent bien herbergiez. – ²⁵Sire, ce dit li chevalier, puisqe nos veom qe il vos plect, et nos ferom vostre voloir dou tout, sanz ce, voirement, qe il n'entreront mie en cest paleis. – ²⁶Or alez, fet li bon chevalier, a elz et vos meemes les preïgnez et les herbergiez si bien qe il se tiegnent apaïez. – Sire a vostre comandement!», fet li chevalier.

174. ¹Atant se part dou paleis et vient aval enmi la rue, ou la crie estoit encore si grant qe l'en n'i oïst Deu tonant, qar tuit disoient par la rue: «Veez les mauveis! Veez les honiz!». ²Li chevalier li comande qe il se tissent et cil le font tout maintenant. Et puis les fet maintenant herbergier en un bon ostel pres d'ilec ³et comande fermemant qe l'en li face toute l'honor qe l'en li porra fere, qar li bon chevalier le velt et le comande. ⁴Et tantost com cist comandement fu faitz, si

15. a cestui point] orendroit il fust|sent (*sic*) enprisonnez mes vostre bonté les delivre de cestui mal X **17.** Se il ... prouvé] Bien qu'il se prouvast hui malemant X **18.** Einsint vet des chevaliers] *om.* X ♦ mal] bien X ♦ bien] mieuz X **19.** desus] dedenz X **22.** habite] hibite L4 **23.** dames] douze d. X **24.** en cui] enc'o'ni L4 **25.** mie] ceïenz X **26.** a elz] *om.* L4

174. 1. encore] adonc X ♦ mauveis] honiz X **2.** Li chevalier li comande] Quant li c. est entr'elz venuz il lor comande X ♦ Et puis] et il prent les chevaliers et les damoiselles et X ♦ bon] *om.* X **3.** l'honor] h. L4

se remaignent les paroles, qar se l'en lor disoit devant vilenie, orendroit lor vont disant cortoisie et honor assez: en petit lor est lor afere changeiez. ⁵Einsint avint au roi Artus a cele foiz et a ses conpeignons qe, qant il cuiderent estre vilainement herbergiez, adonc furent il honorez de toutes choses si largement com cil de leienz le porrent fere. ⁶Qant il voit ceste chose, il dit a Bandemagus: «Ore poom veoir la grant bonté et la grant cortoisie de nostre viel chevalier errant. ⁷Il ne nos a pas oubliez. Se Dex me doint bone aventure, li cuers me vet adés disant qe il ne porroit estre en nulle guise dou monde qe il ne soit home de trop grant afere et assez greignor qe il ne se moustre. — ⁸Sire, ce dit Bandemagus, si m'aït Dex com ce meemes vois ge disant! Il ne porroit estre autrement en nulle guise».

175. ¹Einsint avint au roi Artus a cele foiz qe, la ou il cuidoit estre mal serviz et mal aaisiez, adonc i fu il honorez et bienvenuz en toutes guises, et touz ses conpeignons autresint. ²Il done mout grant pris et mout grant lox au vielz chevalier et dit a Bandemagus qe il ne porroit estre qe il ne fust auqun des bons chevaliers qi armes portoient au tens Galeot le Brun. ³«Si m'aït Dex, sire, ce dit Bandemagus, vos dites bien verité». ⁴Einsint parolent entr'eaus de celui viel chevalier qe il ne connoisoient se petit non. ⁵Et cil dom il tienent si grant parlement, qe fet il orendroit? Qe il fet? Il est dou tout si esbahiz et trespensez de la grant feste qe il li font qe il se tient a deshonzorez: il voudroit estre en autre leu! ⁶Qant il a une grant piece regardé l'escu, il demande au chevalier qi devant lui estoit: ⁷«Dites moi coment li bon chevalier qi cest escu vos leissa ceianz vint premierement en cest chastel et me contez quel chose il fist entre vos, por quoi vos honorez si fiere-mant son escu. — ⁸Sire, ce dit li chevalier, il avroit ja ci mout a conter, qi tout ce vos voudroit conter. ⁹Et neporqant, puisque ce volez savoir, et ge le vos conterai tout mout a mout, qar encontre vostre comandement ne me trouveroiz vos a ceste foiz por nulle aventure. ¹⁰Or escoutez, se il vos plest, coment li nobles chevalier vint premierement en cest chastel». Et maintenant, qant il a dite ceste parole, il dit:

4. remaignent] remuent X (*v. nota*) ♦ vilenie] honte et v. X ♦ orendroit ... honor X] *om.* L4 5. honorez] herbergiez et h. et serviz X 6. viel chevalier errant] c. ancien X 7. oubliez] a cestui point *agg.* X

175. 1. aaisiez] de toutes choses *agg.* X ♦ bienvenuz] bien serviz X 2. vielz chevalier] c. qu'il ne li puet doner greignor X ♦ bons] trois b. X 4. viel chevalier] *om.* X 5. orendroit] entre les autres *agg.* X; *in X ultime parole del f. 30rb, le foto riprendono dal f. 47ra, § 258.7* 7. contez] dontez L4

¹¹«Sire, fet cil, il avint ja qe ceste montaigne ci devant, vos la peustes veoir hui cleremant, estoit abitee de jaianz. Il avoit adonc un chastel mout riche et mout noble. ¹²En celui chastel manoient .iiii. jaianz, freres de pere et de mere, et avec eaus avoit d'autres jaianz assez. ¹³Mes de tout ceaus qi ilec habitoient [estoient] seignor et mestre li .iiii. freres, et si estoient tuit .iiii. si fort et si vistes et si legiers qe nus d'eaus ne pooit home trouver en nulle contree qi encontre lui peust durer de force ne d'autre chose. ¹⁴Et q'en diroie? Tant firent cil .iiii. freres por lor force qe il conquerent toute ceste contree et la mistrent en lor subjection dou tout, fors qe cest chastel seulemant ou nos somes orendroit. ¹⁵A celui tens qe ge vos di, avoit en cest chastel un chevalier trop vaillant d'armes. De sa proesce ne vos en porroie ge tant dire qe bien n'i eust autant ou plus. ¹⁶Cil chevalier estoit tant preudome des armes qe il ne pooit trouver le cors d'un seul chevalier qi encontre lui peust gramment durer, fors seulement Galeot le Brun. Por la grant proece de lui le doutoient li un et li autre qi de riens le conoisoient. ¹⁷Li .iiii. freres, [qi], ensint com ge vos cont, avoient ja conquesté cestui païs fors seulement cest chastel, n'oserent il aprouchier, tant redou-toient durement le seignor de cest chastel, si com ge vos ai dit.

176. ¹«Qant li jaianz virent qe il ne porroient venir au desus del seignor de ceienz ensint com il voudroient, il [al]erent un jor qe li sires de cest chastel tint une grant cort, et il estoient tuit desarmé com cil qi ne se prenoient garde de l'aventure qi lor devoit adonc avenir. ²La ou il seoient as tables, ne il n'atendoient a riens fors a fere feste et joie, atant evos qe entr'eaus vindrent li .iiii. jaianz et autre genz assez. ³Il furent si coiemant venuz qe l'en ne les vist dusqe il furent devant les tables. Qant il furent venuz as tables, il s'en alerent droit au bon chevalier qi seoit au mangier tout desarmé entre ses homes com cil qi bien cuidoit estre asseur. ⁴Il vit bien venir les jaianz, mes il ne cuidoit mie qe ce fussent il, et por ce ne se remua il de son mangier. ⁵Qant li jaianz furent venuz dusqe a lui, il ne firent autre demorance, ainz mistrent mainz as espees et li corrurent sus et le mistrent tantost a la mort. ⁶Et qant cil qi a cele feste estoient virent qe li bon chevalier estoit morz, il furent si durement esbahiz qe il ne mistrent en eaus defense, ainz tornerent errament et se ferirent dedenz cest chastel. ⁷Cil qi avec les .iiii. jaianz estoient venuz se ferirent ça dedenz avec ceaus de ceienz: en tel mainere pristrent cest chastel. Li chevalier

13. estoient] *om.* L4 17. qi] *om.* L4

176. 1. alerent] *erent* L4

furent pris, et les dames et les damoiseles toutes autresint. ⁸Li .iiii. jaianz pristrent les dames et les damoiseles qī miels les plessoient et les envoierent en la montaigne en lor chastel. ⁹Einsint pristrent des chevaliers touz cels qe il voldrent et les manderent en prison en lor chastel. Et d'ilec en avant fumes nos dou tout en servage des jaianz et en lor subjection. ¹⁰Et sachiez, sire, qe il nos feissoient adonc de noz moilliers et de noz filles toutes les hontes et toutes les deshonsors qe l'en porroit penser. Il nos menoient assez plus vilmant qe se nos fusom sers achatez.

177. ¹«En tel mainere com ge vos cont, biaux sire, nos tindrent li .iiii. jaianz en lor servage bien mais de .xv. anz et si honteusement qe a celui tens ne demandiom fors qe la mort. ²Nos mangiom a celui tens nostre pain en plors et en lermes, ne nos n'estiom si hardi qe nos oisom seulement parler de mal ne de vergoigne qe il nos feissent. Nos disiom bien a celui tens qe Dex nos avoit oubliez. ³La ou nos estiom en si doloieuse vie et en si annuieuse qe nos ne demandiom adonc a Deu fors qe la mort, adonc avint en un yver qe une pluie encomença [en] ceste contré trop grant et trop fere. ⁴Entre nos qī ceste pluie veimes, ne nos recordam pas qe nos en veisom onques si merveilleuse com fu cele. La rivere qe vos hui passastes devint adonc si merveilleusemant grant qe nus home de ceste contree n'i pooit passer ne a pié ne a cheval. ⁵Un matinet avint a celui tens qe deus pescheors alerent pescher par cele rivere. Et la ou il se travaillerent de prendre peisons por la rivere, il troverent sor la rivere un cheva mort qī estoit nouvellement noiez. ⁶Delez le cheval gisoit un chevalier tout armé, le hyaume en la teste. Celui chevalier avoit tant beu de l'eve qe il ne pooit en avant et estoit ilec com mort. ⁷Et li pescheor virent le chevalier, si s'atacherent lor bateu maintenant a la rive et alerent tout droit au chevalier et li osterent le hyaume de la teste et virent qe il estoit encore vif. ⁸Mes il avoit si estrangement beu de l'eve qe il estoit tout enflés et gisoit ilec com mort. Les pescheors le desarmerent et le pendirent par les piés a un arbre. Tant le leisserent ilec qe il ot rendue grant partie de l'eve qe il avoit dedenz le cors. ⁹Li pescheors le mistrent puis en lor batel et le porterent en lor meison, qī encor estoit dedenz cest chastel. Et sachiez, sire, qe encore sunt vif cil dui pescheors. ¹⁰Quant entre nos de cest chastel [entendimes] dire qe einsint estoit avenu as deus pescheors qe il avoient trouvé en le rivere un chevalier perillé, nos alames maintenant a lor ostel por savoir se il

177. 3. en] *om.* L4 10. nos de cest] nos de // de c. L4 ♦ entendimes] *om.* L4

avoit nul de nos qi le peust de riens conoistre, mes il n'i ot ne un ne autre qi conoistre le peust. ¹¹Avant passerent .ii. mois qe li chevalier peust bien guerir dou mal qe il avoit receu por achoison de l'eve et dou grant travaill.

178. ¹«Un jor avint a celui tens qe ge l'alai veoir, celui chevalier, en la meison des pescheors, et trouvaï qe encore n'estoit si bien gueriz dou tout com li fust mestier. Ge vi qe il estoit grant a merveilles et si bien fet de touz membres q'a celui tens ne peust l'en trouver un chevalier mieuz fet. ²Ge li començai a demander: "Biaux sire, qi estes vos? Se Dex vos doint bone aventure, dites moi aucune chose de vostre estre, tant qe ge vos puisse conoistre d'aucune chose, qe ge encore ne vos conois, ³qe ce vos di ge bien, qe il m'est avis qe ge vos aie autre foiz veu, mes ge ne me puis recorder en qel leu. Et por ce voudroie ge savoir, se il vos pleisoit, qi vos estes". ⁴Li chevalier me comença a rregarder qant ge li oi dite ceste parole, et respondi a chief de piece: "Biaux sire, a vos qe chaut de moi conoistre? ⁵Or sachiez qe ge sui un chevalier estrange qe aventure amena en cest pais. Se ge fusse gueriz et ge eusse mené a fin une moie chose por qoi ge ving en ceste contree, ge m'en iroie maintenant, qe ja n'i feroie demore". ⁶Qant ge entendi la response dou chevalier, porce qe il m'estoit avis qe il m'eust respondu plus orgoilleusement qe il ne deust, ge ne me poi tenir qe ge ne li deisse: ⁷"Ha! sire chevalier, porqoi me fetes vos dangier de dire qi vos estes? Or sachiez qe vos estes venuz en tel leu ou l'en prisera pou vostre orgoill et vostre dangier. ⁸Ormés ne seroiz vos a vos, mes a autrui, qar vos estes ci en servage de .iiii. jaianz". Li chevalier me respondi adonc et dit: ⁹"Se ge sui orendroit en servage, ge serai en franchise plus tost, par aventure, qe vos ne cuidez".

179. ¹«Einsint me respondi adonc li chevalier, ne autre parole n'en poi trere a cele foiz. Ge cuidoe certainement qe il fust droit fol, qe autrement ne me voloit respondre. ²Toutesvoies feisoie ge reison en moi meemes, por la bone taille qe ge veioie en lui, qe il ne pooit estre qe il ne fust home de valor, mes voirement ge ne cuidasse qe il fust de si haute valor com il estoit et com nos veimes puis tout apertement. ³Un autre jor ving ge devant le chevalier, qar trop desiroie qe ge le coneuse, et ge li començai autre foiz a demander de son estre. Qant il m'ot une grant piece escouté, il me respondi autre foiz par corrouz: ⁴"Si m'aït Dex, sire chevalier, com vos n'estes mie d'assez si cortois com vos devriez estre, qi par force volez savoir qi ge sui. Or

178. 5. qe aventure] *rip*. L4

sachiez qe il n'a home ou monde a cui ge le deisse par force. ⁵En volez vos plus? Ge sui un chevalier errant et fort et felon. Et qant ire me monte en la teste, ge ne douteroie un autre chevalier. Et sachiez qe ge ne voudroie por grant chose estre si annuieux com vos estes". ⁶De ceste parole fui ge mout corrouciez et respondi par corrouz: "Qel force porriez vos fere, sire chevalier, qi dites qe vos estes forz?". Il me respondi adonc et dist: ⁷"Il n'est ore ne tens ne leu qe ge moustre la moie force, mes bien la moustrerai par aventure". Ge respondi adonc autre foiz par corrouz et dis: "Or aie ge dahez se ge ne vi ja ceienz aucune foiz plus fort chevalier qe vos n'estes. — ⁸Biaux sire, dist li chevalier, porquoi desprisiez vos ma force? Encore ne l'avez vos esprovee! — Si m'aït Dex, dis ge li tantost, et ge sui appareilliez qe ge l'esprove erramant, se vos l'osez moustrer. — ⁹Et a cui la mousterroie ge? dist il. — A moi la moustrez", dis ge li. Il me respondi erramment: "Ce ne seroit pas geu parti qe de moi et de vos, qar vos n'avriez nulle force dou monde encontre moi". ¹⁰Ge fui trop iriez durement de ceste parole, qar il m'estoit bien avis qe il l'eust dite par desprisance de moi et por deshonor, si sailli erramment avant en estant: ¹¹"Or est mestier, se Dex me saut, qe vos vos esprovez encontre moi tout maintenant. Ge voill savoir se vos estes tex com vos dites". Li chevalier se comença maintenant a sourire et dist: ¹²"Or voi ge bien qe vos n'estes mie si sages com il vos seroit mestier". Qant ge vi qe il se rioit de moi, ge le ting a trop grant despit, si li dis adonc: ¹³"Coment, dan mauveis chevalier? Vos gabez vos de moi? Se Dex me doint bone aventure, a pou qe ge ne vos faz honte! Et certes, vos l'eussiez bien deservi, porce qe vos vos alez einsint gabant de moi". ¹⁴Et ge vos di une autre chose, sire, qe il s'en failli mout petit qe ge adonc ne le feri, mes einsint avint qe ge m'en souffri. ¹⁵En tel mainere demora bien .iiii. mois dedenz cest chastel le bon chevalier, ne n'i avoit ne un ne autre qi ne cuidast certainement qe il fust droit fol.

180. ¹«A l'entree del mois de mai tout droitemant vindrent cort tenir li .iiii. jaianz por moustré encontre nos lor grandesce et lor segnorie. Nos les receumes adonc com noz seignors liges, au plus honorement qe nos le peumes fere. ²Il firent lai fors tendre paveillons et firent fere foillees et loges, et manderent par toute ceste contree qe il ne remansist home de valor qi ne venist a cele feste, ne dame ne damoisele ou il eust biauté. ³Et qi cestui comandement n'acompliroit, il perdrait la teste sanz autre merci. ⁴Qant cil de ceste contree entendirent cestui comandement, porce qe il savoient de voir qe toute la cruelté dou monde et toute la felenie estoit es jaianz et qe

il estoient sanz toute pitié et sanz toute merci, il se mistrent a la voie por venir a cele feste. ⁵Dont il avint qe il ot adonc si grant gent en cest repeire qe a poine poient entrer en cest chastel. ⁶Et q'en diroie? Il ne remest adonc en ceste contree dame ne damoisele q' ça ne venist, qar toutes avoient poor de perdre les testes se eles ne venissent a cele grant feste qe li jaianz devoient tenir. ⁷Quant toute la gent fu asemblee la defors es pauveillons, li jaiant firent adonc aporer la defors cestui escu qe vos orendroit veez ici, q' avoit esté de Galeot le Brun. ⁸Il avoit bien alors .vii. anz qe Galeot l'avoit leisé, qar il et le seignor de ceianz avoient esté trop bon ami en pou de tens. ⁹Et por la grant amor q' entr'eaus estoit avoit fet li sires de ceienz a Galeot leissier cestui escu, et il en avoit porté l'escu au seignor de ceienz. ¹⁰Li jaiant le firent aporer devant eaus e distrent qe il voloient fere honore a l'escu porce qe Galeot le Brun avoit esté de lignage des jaianz et de lor meemes.

181. ¹«A celui tens tout droitement qe li escuz fu venuz estoit li bon chevalier dont nos nos gabiom devant les jaianz. Cil, porce qe il les avoit ja mis en maintes reisons, e demanderent a lui dont il estoit venuz, ne il ne li respondoit se trop petit non, si qe li .iiii. jaiant disoient ja tout plainement: ²“Cist hom n'est mie de bon sens: osez le d'entre nos qe ce est un foux!”. Quant il vit venir l'escu Galeot le Brun et il entendit qe li jaiant le voloient fere chacier devant eaus, il lor dist: ³“Seignors, volez vos qe ge aille prendre mes armes? Si vos mostrerai coment l'en porte armes en nostre contree”. Quant li jaiant entendirent ceste parole, adonc cuiderent il certainement qe il fust home sanz reison. Si li distrent adonc: ⁴“Or tost, sire chevalier, aporrez ça voz armes entre nos, si sera la feste greignor, et verrom adonc coment et en quel mainere l'en porte armes en vostre contree”. ⁵Quant li chevalier ot congié de ses armes prendre, il se parti tout maintenant de la feste et vient la ou ses armes estoient et les prist toutes, mes q'escu n'avoit mie, qar il l'avoit perdu en la rivere. Mes toutes ses armes avoit il beles et bones. ⁶Quant il fu armez si bien come chevalier porroit mieaus [s']armer sanz escu, il s'en retorna arrieres, la ou li jaiant estoient q' demenoient a celui point grant joie et grant feste. ⁷Quant il le virent venir sor eaus si armez com il estoit, adonc se comencierent il a rrire e a gaber de lui assez plus fierement qe il ne feisoient devant. Si le firent devant eaus venir et li distrent: ⁸“Sire chevalier, porte l'en en vostre contree armes en tel mainere come vos le portez orendroit? – Certes, seignors, dist il, oïl. – Et ou est vostre

escu? dient li jaianz. Qar sanz escu ne doit pas aler chevalier. — ⁹Seignor, fet il, ge le perdi, veraïement le sachiez vos. — Et qi le vos toli? — Cil qi estoit plus fort de moi. — Et prendrez vos escu qi l'e[n] vos donast? distrent li jaiant. — ¹⁰Oïl, volentiers, dist il, mes bien sachiez qe ge ne prendroie autre escu qe [celui qe] ge ci voi. — Coment? distrent li jaiant. Oseriez vos metre a vostre col l'escu de si bon chevalier com est Galeot le Brun? — ¹¹Porquoi donc? dist il. Ne sui ge ausint bon chevalier com est Galeot le Brun? Li chevalier se mist avant et prist l'escu de la main de celui qi le tenoit et le mist a son col. Et qant il en fu saisiz, il dist as jaianz: ¹²“Or, seignors, volez vos qe ge vos moustre coment l'en fiert d'espee en nostre contree? — Certes, distrent il, oïl, nos le volom bien”. ¹³Lors mist li chevalier main a l'espee et la tret dou fuerre. Et qant il la tint toute nue, il se torne adonc envers ceaus de cest chastel et lor dist: ¹⁴“Seignors, soiez touz liez et touz joianz et reconfortez: vos veez ci Galeot le Brun qi hui en cest jor proprement vos delivrera dou servage de ces jaianz. Et ceste bonté vos faz ge por amor de vostre seignor qi fu mi conpeinz d'armes”.

182. ¹«Lors se torne Galeot le Brun vers les .iiii. jaianz et lor dist: “Si m'aît Dex, traitors, vos estes tuit morz! Veez ci Galeot le Brun, qi encore ne trouva son per: par ses mains vos couvient morir». ²Et maintenant leissa corre a l'un des .iiii., et cil estoit einsint com le seignor de touz. A celui dona il un si grant cop de l'espee qe il li fist la teste voler. Qant li autres freres virent celui cop, il comencierent a crier: ³“Or as armes!”. Et se voloient torner a defendre mes il ne porent, qar li bon chevalier les hasta si durement qe en petit d'ore les ot mis touz .iiii. a mort. ⁴Qant nos veimes qe li .iiii. freres estoient mort en tel mainere et qe desoremés n'en poiom avoir doutance, nos començames a crier: ⁵“Or as armes! Metom a mort les homes as jaianz, qe il n'en eschape nul”. Tout einsint com nos le disiom le feimes errament, qe nos meemes meimes a mort touz ceaus qi estoient dou chastel as jaianz et qi autrefois nos avoi[en]t fet honte et damage. ⁶Qant nos fumes d'eaus delivrés en tel guise con ge ai conté, adonc nos retornames au bon chevalier et ostames toutes noz armes et nos meimes devant lui a genolz. ⁷Et li deimes: porce qe il nos avoit osté de si doloireux servage com estoit celui ou il nos avoit trouvé, nos voliom estre ses homes liges d'ilec en avant. ⁸Il nos respondi errament et dist: “Ne vos ne fustes mi homes, ne mi home

9. qi l'en] qi le L4 10. celui qe] om. L4 14. ces jaianz] cest j. L4

182. 5. avoient] avoit L4

ne seroiz por ceste aventure. ⁹Se Dex vos volt rescorre por moi, li merciez et aorez de ceste bele cheance qe vos a mandee, qe bien sachiez veraiemant qe ge n'ai mie cestui fet mené a fin tant par ma force, com ge ai par la force de Nostre Seignor qi hardemant me dona de ceste aventure enprendre por vostre delivrance. ¹⁰Avant merciez lui de tout cestui fet, ne a moi de cestui fet ne rendez graces, qar ge ne l'ai pas deservi".

183. ¹«Sire, en tel mainere com ge vos ai conté coneumes nos certainement qe ce estoit Galeot le Brun qi entre nos avoit esté si longement et si celeement qe il ne s'estoit fet conoistre a null de nos. ²Si com vos avez oï fumes nos ostenz de celui servage doloireux ou li jaianz nos avoient mis, et d'ilec en avant fumes nos si franc de toute vilaine segnorie com nulle autre gent porroit estre, et toute ceste autre contree autresint. ³La feste comença adonc si grant qe nulle gent ne la peust fere greignor. Noz moilliers et noz filles, qe li jaianz avoient menees en la montaigne en lor chastel, furent delivrees. ⁴Et q'en diroie? Nos fumes celui jor ostenz de la plus vilaine prison ou pouple fust mes onques mis. Et tuit ceaus qi estoient venuz a cele feste par le comandement des jaianz remistrent a nostre joie, et dura cele feste .vii. jors tout enterinement. ⁵Au chief de .vii. jors dist Galeot le Brun: "Seignors, puisque ge voi qe vos estes, la Deu merci, en vostre bon estament et a cele meemes franchise qe vos soliez avoir, et ge voi qe vos n'avez null enemy qi vos puisse fere doma[ge], ormés prent ge congé de vos, qar ge m'en voill aler en une moie besoigne. ⁶De l'onor qe vos m'avez fet vos merci ge si durement com ge le puis fere". Qant nos entendimes ceste parole, se nos fumes correciez ce ne fet mie a demander, qar de tel chevalier com il estoit et qi nos avoit fet si grant bonté ne vouldisom nos jamés le departir. ⁷Si començames adonc a fere un si grant duel com nos aviom fet joie devant. Qant il vit le duel qe nos feisiom, il nos dist: "Se vos ne leissiez cestui duel, ge m'en irai par tel couvenant qe jamés jor de ma vie ge ne retournerai entre vos. ⁸Mes se vos vos reconfortez, einsint com vos devez, a cui Dex envoia si bele aventure com fu la vostre, ge vos pramet qe ge retournerai tost a vos, se Deu plest, et vos donrai adonc seignor selonc mon esciant, qi vos savra maintenir bien et honoreement tout einsint com il vos est mestiers".

184. ¹«Qant nos oïmes ceste response, nos leissames tantost le duel et nos reconfortames par la pramese qe il nos avoit fete adonc

183. 5. damage] doma L4

et li deimes: “Sire, puisque vos avez vole[n]té de chevaucher et de leiser nos en tel guise, or vos priom nos qe vos nos leissiez vostre escu en leu de vos: en cestui escu fumes nos ostenz dou servage des jaianz. ²Quant nos ne vos porrom avoir, et nos avrom le vostre escu. Il nos donrra grant reconfort toutes les foiz qe nos le porrom veoir et regarder. ³Et sachiez, sire, qe nos le garderom si chierement por honor de vos qe onques mes escu ne fu gardé si honoremant qe cist n’estoit gardé encore plus”. ⁴Il nos comença adonc a dire qe son escu ne leroit il mie volentiers arrieres lui. Et neporquant, tant le priames doucement qe il dit qe il nos le leieroit dusqe a son retorn. ⁵Sire, en tel guise com ge vos ai conté fumes nos delivrés dou servage des jaianz por la venue de Galeot le Brun. Des celui tens remest ceienz l’escu qe vos veez. ⁶Si vos ai ore finé mon conte, ce m’est avis». Et quant il a dite ceste parole, il se test qe il ne dist plus a cele foiz.

185. ¹Et quant il ot son conte finé, li vielz chevalier respont en sorriant: «Par Deu, fet il, bele aventure fu ceste estrangement qe vos m’avez contee. Et certes, Dex vos voloit grant bien, quant il si honoremant vos aida et secorrut. ²Mes ore me dites, se Dex vos doint bone aventure: tenistes vos en ceste contree ceste aventure a mout estrange, quant li bon chevalier la mist a fin? — Certes, sire, sanz faille oïl. ³Encore disiom nos bien qe ceste fu bien une des plus hautes qe il meist onques a fin, qe chasquns des .iiii. jaianz qe il ocist avot force encontre .iiii. homes, ce disoient cil q’i la prouve avoient veu de lor force. — ⁴En non Deu, fet li vielz chevalier, or sachiez tout certainement qe se vos eussiez veu des oeuvres Galeot autant com g’en vi ja en auqun tens, vos metriez tost en obli ceste aventure et diriez hardiement qe cestui fet ne doit l’en prisier se trop petit non envers ceaus qe il feisoit adés en touz les leus ou il venoit. ⁵Cestui fet ne doit l’en prisier se trop petit non au regart de ses tres grantz oeuvres. Mes si voiremant m’aït Dex com ge le tieng a trop petit fet envers les autres grantz merveilles qe il fist par le roiaume de Logres!». ⁶Einsint tindrent parlemant entr’eaus deus tant qe li mangiers fu apareilliez biaux et riches et les tables sunt mises tantost. Li vielz chevalier est asis au chief d’une table si hautement et si honoremant qe il ne peussent plus fere de Galeot le Brun qe il funt de lui, tant l’onorent, tant le servent com il poent. ⁷Li palais estoit adonc pleins de dames et de damoiseles et de cheva-

184. 1. et li deimes] [...]imes L4 (*v. nota* § 184) ♦ volenté] [...]olote L4 ♦ en cestui escu] en[...]ui e. L4 (*v. nota*)

185. 4. vielz] [...]elz L4

liers, et tuit servoient devant le bon chevalier, fors que .x. dames seulmant qī manjoient a cele table. ⁸Qant il orent mangié si honoreemant et si noblemant com il porent plus et les tables furent levees, porce qe li bon chevalier ne voloit pas encore dormir, après le mangier met il en paroles autre foiz le chevalier a cui il avoit devant parlé et dit: ⁹«Sire chevalier, vos me deistes anuit coment Galeot le Brun leissa cest escu et coment il vos osta dou grant servage ou vos estiez et vos mist en la franchise, mes encore ne m'avez vos mie dit coment la costume dou passage et dou gué fu comenciee premieremant. ¹⁰Ce voil ge qe vos me contez, et puis nos porrom repouser. — Sire, ce dit li chevalier, a vostre comandement. Or escoutez coment la costume fu encomencee». Et maintenant comence son conte.

186. ¹«Sire, fet il, de celui tens qe nos fumes ostenz dou vilain servage ou les jaianz nos avoient mis, feimis nos metre en escrit le mois et le jor ou cele beneuree delivrance nos estoit avenue par la grace de Deu et par la proece dou bon chevalier. ²Qant il vint au chief de l'an, nos establimes entre noz, tant com cist chastiaux dureroit, qe nos feriom chasqun an ceste feste a celui jor nomeemant en la [re]cordance [de] la bone aventure qī a celui jor nos estoit avenue. ³Et por comencier cele feste au plus honoreement qe nos porrom, mandames nos par ceste contree a touz noz amis et amies, et por touz noz veisin ausint, qe il venissent a nostre feste au plus honoreement et au plus noblement qe il le peussent fere. ⁴Il le firent bien tout einsint com nos le comandames, si qe, a celui jor proprement qe li jaianz avoient comencié la feste la defors, encomençames nos la nostre et la tenimes ilec au plus richement qe nos peumes. ⁵En cest païs avoit a celui tens un chevalier, pres de ci une jornee, qī estoit apelez Esanor li Gais. Porce qe cist chevalier estoit sainz faille uns des plus envoisiez chevalier dou monde et un des plus gais, il estoit trop preudome des armes. ⁶Et por la tres grant proesce dom il estoit garniz avoit il une grant piece de tens esté conpeignons d'armes Galeot le Brun. Mes, por un corrouz qī entr'eaus estoit avenuz, avoit lor compaignie esté depecie par ire et par maltalant, et por ce ne s'entrevoloient mie bien li dui preudomes. ⁷Cil chevalier qī Essanor avoit non et qī estoit si preuz des armes avoit une damoisele avec lui, tant bele riens en toutes guises qe tuit cil qī la veoient disoient plenierement qe ce estoit bien la plus bele damoisele dou monde. ⁸Por la grant biauté qī en lui estoit l'ama

10. ce] *rip.* L4

186. 2. recordance de] concorde L4

Galeot le Brun — et si ne l'avoit encore veue! — et adonc comença a repaier en ceste contree si priveement qe il avoit pou de gent q'i le seust. ⁹Qant il sot qe li tens de nostre feste devoit venir, porce qe il avoit entendu par auquns q'i entor Essanor repeiroient qe Essanor vendroit sanz faille a nostre feste, vint il a nos et nos dist premiere-
mant: ¹⁰“Ge voill qe vos façoiz crier par ceste contree, dusqe a une jornee loing de toutes parz, qe nul chevalier ne viegne a vostre feste q'i n'amoine sa moillier ou sa damoisele. ¹¹Et se auquns vos demande por qe le achoison vos avez mise ceste costume avant, vos poez respondre qe vos volez qe vostre feste soit plus envoisiee que nulle autre”. ¹²Tout ce nos comanda li bon chevalier, et feimes crier et pres et loing por aconplir som comandement, ne encore ne saviom nos porqoi il le feisoit.

187. ¹«Qant il vint au tens qe nostre [feste] devoit estre, nos en feimes apareillier [une] si riche et si noble com nos peumes. Et lors vint entre nos mot priveement li bon chevalier et dist qe il voloit sor la rivere encomencier une costume q'i longement i dureroit. ²Lors prist deus conpeignons avec lui et s'en ala a la rivere et fist ilec tendre un mout riche paveillon en celui leu proprement ou vos veistes hui le paveillon. ³Touz les chevaliers q'i se metoient ou flum et n'avoient en sa co[n]peignie dame ne damoisele, il [les] feisoit retourner arrieres. Et se il voloient passer par force, il joustoit a els et les abatoit et lor rendoit le cheval seulesment, mes les armes lor tolloit il. ⁴Einsint garda deus jors entiers le passage, et il ne le gardoit por autre chose fors porce qe Essanor i devoit venir entre lui et la bele damoisele. ⁵La ou il avoit einsint le passage encomencié a garder por esperance dou chevalier q'i Essanor estoit apellez, atant evos un escuer venir a lui, qe il avoit mandé proprement por oïr nouveles de celui chevalier, q'i li dist: ⁶“Sire, noveles vos aport teles com vos volez. Or sachiez qe Essanor vient et amoine en sa conpeignie la bele damoisele. Ja la porroiz tantost veoir, qe ele est pres de ci”. ⁷Qant li bon chevalier entendit qe Essanor venoit, il fist adonc changier cheval et amener un autre. Sire, cestui conte vos puis ge bien conter hardiemant, qar ge i estoie a celui point. ⁸Or sachiez qe il se fist trop bien appareillier de qantq'e il pooit encontre la venue dou bon chevalier. Il moustra bien a celui point qe cil n'estoit mie chevalier encontre cui l'e[n] deust aler desarmez.

10. vostre] nostre L4

187. 1. feste] *om.* L4 ♦ une] *om.* L4 3. conpeignie] copeignie L4 ♦ les feisoit] f. L4 8. l'en] le L4

⁹Après ce ne demora gueres qe Essanor vint en la rivere. Et il amonoit en sa conpeignie .iiii. chevaliers qe il tenoit por ses conpeignons, et chascun d'eaus menoit en sa conpeignie une damoisele. ¹⁰Qant il furent mis au passer la rivere, et Galeot lor comença a crier: "Ne passez, seignors chevaliers, se vos ne volez aconplir la costume de cestui passage! — ¹¹Volentiers, fet Essanor, mes dites moi la costume de cestui passage". Et Galeot li dist: "Volentiers". Et lors li dist: "Se vos me poez abatre avant qe ge vos, vos avroiz mon cheval et toutes mes armes, et ge m'en irai a pié, et se vos volez fere autre comandement, il est mestier qe ge le face. ¹²Mes se vos estes abatus, vos me leisserez les armes et le cheval et la damoisele. Et se vos estes [touz] abatus fors un seul, et celui puisse autant abatre de nos com nos abatrom de vos, vos estes errament qites de toutes choses. ¹³Se nos n'avom le plus bel, aler vos en poez tout qitemant et franchement. Tel est la costume de cest pasage".

188. ¹«Qant Essanor entendi ceste nouvele, il respondi errament: "Se Dex me saut, dan chevalier, il n'a pas en cest passage trop grant outrage. Bien porront li chevalier errant souffrir ceste costume". ²Lors comande a un de ses conpeignons: "Or tost, encomenciez les jostes!". Et cil le fist tout erramant einsint com Essanor le comanda. Et qant il fu apareilliez, il leissa corre encontre Galeot, mes cil l'abati erramant. ³Qant il fu porté a la terre, maintenant vint un autre, mes tout autant com Galeot fist dou premier, fist il dou secont et dou tiers.

189. ¹«Qant Essanor vit qe tuit .iiii. si conpeignon, qe il tenoit a trop bons chevaliers et a pseudomes d'armes, estoient ensint abatus par un seul chevalier, ce fu une chose dont il fu trop fierement esbahiz, qar il ne li estoit pas avis qe en toute ceste contré eust chevalier q'i ce peust fere, ne il ne cuidoit mie qe Galeot le Brun fust a celui tens en cest païs. ²Qant il vit qe Galeot avoit les .iiii. jostes menees a fin si noblement, si dist: "Seignors chevaliers, coment vos sentez vos? Avez vos plus volenté de joster? — ³Certes, sire chevalier, fist Galeot, se vos vostre damoisele me volez qiter tout franchement, ge vos ferai tant d'avantage qe ge vos qiterai atant de ceste joste. — ⁴Sire chevalier, fist Essanor, or sachiez tout certainement qe il n'a ore chevalier en tout le monde a cui ge qitasse ma damoisele si legierement com vos dites. ⁵Mieuz voill ge joster encontre vos qe qiter la en tel mainere!". En tel guise com ge vos di encomencierent les jostes de li dui bons

12. touz] *om.* L4

188. 1. trop grant] trop o | grant L4

chevaliers. ⁶Galeot, qī estoit a celui tens li soveirain de toz mortez chevaliers dou monde et li plus forz, abati a cele foiz Essanor, qī estoit ausint a celui tens un des meillors chevaliers dou monde, ⁷et fu si grevez dou dur cheoir qe il ot pris qe il gist ilec une grant piece tout einsint com se il fust morz. ⁸A chief de piece, qant il ot pooir de parler et de soi redrecier, il se releva et dist a Galeot le Brun: “Ha! Galeot, deceu m’as: ge ne cuidoe pas qe ce fusses tu, mes or le sai ge tout certainement. ⁹Tu sez trop plus qe ge ne sai: por achoison de ma damoisele gaaignier as tu trouvé ceste costume de cest passage, n’est ce voirs, se Dex te saut? — ¹⁰Certes, ce respont Galeot, por lui seulement gaaignier ai ge trouvé ceste costume, qar ge ne veoie coment ge la peusse avoir a ce qe tu la gardoies si de pres com ge sai. — ¹¹Si m’ait Dex, dist Essanor, tu as trouvé une merveille qe ge ne seusse trouver. ¹²Et puisqe einsint est avenu qe tu par ton engin et par ta bone chevalerie — qar sanz bone chevalerie ne l’as tu pas fet — m’as toloit ma damoisele, et ge voi bien qe ge ne la porroie recouvrer sor toi ne par force ne par engin et ge sui des premerains qī ai perdu a ceste costume, ¹³ore te voudroie ge prier qe, porce qe ge ne voudroie estre seul vergoigniez, qe tu faces qe ceste costume de cest passage durt desore-més toute ta vie, et après ta mort meemes, tant com ele porra durer. Adonc ne se gabela l’en de moi seul. — ¹⁴Certes, dist Galeot, cestui dom vos outroi ge bien et le vos pramet loiaument. — Encore voill ge, fet Essanor, qe vos me doignoiz un autre don. — Or dites, dist Galeot. Se ge le vos puis doner, ge le vos donrai trop volentier. — ¹⁵Ge voil, fet Essanor, qe vos me bailliez cest passage a garder, porce qe j’ai receu honte et vergoigne premierement en toutes maineres, qar ge i ai esté abatuz et y ai perdue ma damoisele qe ge amoie plus qe tout le monde. ¹⁶Et por ce voudroie ge garder cestui leu toute ma vie, tant qe ge soie bien vengiez a ma volenté.

190. « — ¹En non Deu, dist Galeot, cestui don vos outroi ge bien par couvenant qe vos preigniez tout orendroit la seignorie de cest chastel, et ge ferai tant qe tuit li home de leienz vos feront tuit feoté et homage et vos en devendroiz lor seignor. ²Vos estes si bon chevalier, ce sai ge tout certainement, qe bien les savez maintenir a lor honor et a la vostre”. ³Tant parlerent entr’eaus deus a cele foiz qe il s’acorderent dou tout a ce qe il disoient li uns a l’autre et s’en vindrent adonc en cest chastel. ⁴Qant nos veimes qe il plesoit adonc a Galeot le Brun qe nos feisom feoté a Essanor, nos li feimes volentiers por acomplir sa volenté et porce qe nos saviom bien qe Essanor estoit trop bon chevalier. ⁵Por tele aventure com ge vos ai conté fu ceste costu-

me premierement establee. Galeot le Brun se parti de nos et enmena puis la bele damoisele qe il avoit gaignee par force de lance. ⁶Essanor remist entre nos. Tant garda cestui passage qe aventure i amena cest an un chevalier qi portoit un escu tout a or, et estoit cil chevalier un des granz chevaliers dou monde: il estoit bien ausint granz chevalier com vos estes. ⁷Cil chevalier qi portoit l'escu tout a or conduisoit adonc en sa conpeignie une damoisele, la plus leide riens et la plus vilaine de bouche qi onqe mes venist entre nos. ⁸Por achoison de cele leide damoisele comença l'estrif entre le chevalier estrange et Essanor. Et sachiez, sire, tout de voir qe, de celui tens qe Essanor avoit josté a Galeot le Brun, n'estoit nul venuz ceste part qe Essanor n'eust abatu, et qe il ne lor eust tolu sa damoisele. ⁹Mes cil qi portoit l'escu a or si l'abati tout maintenant de la premiere joste. ¹⁰Après ce se combatirent ensemble et Essanor fu morz en cele bataille, qar trop estoit bon chevalier cil [qi] portoit l'escu a or. ¹¹En tel mainere com ge vos cont morut Essanor et fu aportez en cest chastel et mis mout honoreement en terre. Il avoit un fil, mout biaux damoiseil, preuz et legiers et vistes et forz. ¹²Porce qe entre nos veimes qe il porroit estre pseudome, le feimes nos seignor de cest chastel après la mort son pere, ¹³et se fist tantost fere chevalier novel et se mist a garder le passage dou gué, einsint com avoit fet si peres. ¹⁴Si li avint si bien dusq'a ci qe ge vos pramet loiaument qe encore n'i vint chevalier si preuz ne si forz dom il ne venist au desus par force d'armes, fors qe vos seulemant qi a ceste foiz venistes. ¹⁵Si vos ai ore finé mon conte, qar bien vos ai orendroit conté mot a mot tout ce qe vos me demandastes». Et qant il a dite ceste parole il se test, qe il ne dit plus a cele foiz.

191. ¹Qant il est ore de couchier, li viel chevalier s'en vet dormir. Et se repose dusqe a l'endemain, qe li jors aparut et biaux et clers, et il se lieve. Et qant il est vestuz, il demande ses armes. «Sire, dient cil de leienz, porquoi les demandez vos si hastivement? – ²Por ce, fet il, qe ge voudroie ja estre a la voie, qar ge ai une beisoigne enprise qi mout me touche pres dou cuer. Et sachiez tout certainement qe ge n'avrai jamés granment repos ne joie devant qe ge l'aie menee a fin. ³Por ce ne voill ge demorer, ançois me couvient chevauchier, qar ge ai trop aillor a fere». Assez le prient cil de leienz, li meillors chevaliers, qe il remaigne, mes riens ne lor vaut lor priere: il dist bien tout apertement qe il ne remandroit en nulle guise dou monde. ⁴Qant il voient sa volenté et son talent, porce qe il ne feroient a despleisir por nulle

aventure dou monde li aportent il ses armes erramant, et il les prent et vient aval. ⁵Puis demande son cheval, et cil de leienz si ne li amoient pas a celui point le sien, mes un autre meillor li amoient et a son escuer un autre mout bon.

192. ¹Quant li viel chevalier est montez, il demande a ceaus de leienz si encore sunt les chevaliers ceianz, «qi arsoir vindrent un pou après ce qe ge i fui venuz». Et un chevalier, qi bien savoit tout certainement qe il n'estoient encore mie partiz, respont: ²«Sire, or sachiez tout veraïement qe il ne s'en sunt pas alez, mes il s'en fussent ja alez sanz faille des bien matin, se por vos attendre ne fust. ³Et puisqe vos ne volez demorer, chevauchiez seuremant, qe vostre chemin si s'adoune tout droitemant par devant lor ostel. Lors s'en ist li vielz chevalier et s'en vet tot droitemant aval l'eve, tout einsint armez com il estoit. ⁴Et il n'a pas grantment alé avant qe il trouve le roi Artus et les autres chevaliers avec lui qi enmi la voie s'estoient arrestez touz appareilliez de chevauchier, qar bien avoient entendu qe li viel chevalier devoit venir et por ce l'attendirent il ilec. ⁵Quant il est dusq'a eaus venuz, il lor eüre bon jor et bone aventure, et il funt autresint a lui. «Seignors, fet il, plest vos qe nos chevauchom? — ⁶Sire, ce dit li rois Artus, nos füssom auques ore loing de ci se por vos attendre ne fust. — Or donc, fet li vielz chevalier, nos metom au chemin, qe Dex nos conduie». ⁷Atant [is]sent dou chastel et, maintenant qe il sunt fors, li vielz chevalier prent congié a ceaus dou chastel qi le voloient convoier et les en fet touz retorner, voillent ou ne voillent. ⁸Quant il fu partiz de ceaus dou chastel, il se torne adonc vers le roi Artus et li dist: «Sire, coment fustes anuit herbergiez? — ⁹Sire, fet li rois Arus, or sachiez tout de verité qe nos fumes assez mieuz herbergiez qe nos non deüssom estre, qar certes nos nos prouvames assez vileinement au passage dou gué. ¹⁰Por celes mauveises provances qe nos i feïmes, com vos veïstes, eusom nos arsoir assez receu honte et vergoigne se ne fust por vos qi nos en delivrastes, ce sai ge bien. ¹¹Vos moustrates bien tout apertement qe voiremant estes vos chevalier, et nos feïmes mal, qe voiremant somes nos garçons. — Biaux sire, fet li vielz chevalier, or sachiez qe vos ne poez pas estre si tost chevalier parfit. ¹²Encore seroiz vos plus preudomes et plus vaillanz des armes qe vos n'estes orendroit, se vos les usez, et vos poez longement vivre. Por une tele aventure

192. 3. demorer, chevauchiez] d. chevauchier L4 (v. nota) ♦ s'adoune] se doune L4 (v. nota) **4.** appareilliez de chevauchier] a. de chevauchiez L4 (v. nota § 192.3) **7.** issent] sent L4 ♦ qe] rip. L4 **11.** mal] bien L4

com est ceste ne vos devez onques esmaier. ¹³Or sachiez tout veraie-
mant qe ge me parti ja plus honteusement d'aunque beisoigne qe vos
ne fustes de ceste, si sui ore vif et sains, la Deu merci, et ai puis en
aucun fet [fet] chose dont ge avoie pris et lox. ¹⁴Or sachiez tout cer-
taine[ment] qe li chevalier qi garde le passage dou gué fiert bien de
lance et roidement. – Sire, ce dit li rois Artus, ja nos dist l'en arsoir
qe l'en vos mostra l'escu Galeot le Brun et qe l'en vos en conta de
trop granz merveilles qe il fist ja en celui tens en ceste contree, qe il
delivra de servage cestui chastel et tout cest païs. – ¹⁵Certes, sire, fet
li vielz chevalier, si m'en conta l'en assez. ¹⁶Mes l'en ne me dist mie
tant qe ge n'en seusse assez plus devant qe ge venisse en cest chastel,
qar des oevres a celui bon chevalier vi ge assez, et assez en oï conter
de celes qe ge ne vi mie.

193. «– ¹Sire, fet li rois Artus, Galeot le Brun fu il plus grant home
qe vos n'estes? Vos estes mout grant chevalier, ce sachiez vos. – ²Sire,
fet li vielz chevalier, or sachiez tout certainement qe Galeot fu assez
plus grant qe ge ne sui, et selonc la grandesce qe il avoit, si estoit il
si tres bien fait q'a son tens ne fu veuz en tout le monde nul chevalier
qi mieuz fust fet de li. – ³Or me dites, fet li rois, et fu il de si tres
grant force com l'en me fet entendant? – ⁴Si m'ait Dex, fê li vielz
chevalier, il fu de si estrange force garniz qe ge ne pooie croire la
grant force de lui devant qe ge l'esprouvai par moi meemes. – ⁵Sire,
fet li rois, or sachiez qe il me semble qe vos deussiez estre mout fors
tant com vos fustes en vostre grant force. – Sire, ce dit li vielz che-
valier, or escoutez une parole. ⁶Or sachiez qe ge ne le vos voil dire
por moi vanter, mes por la verité metre avant. Ge vos di loiaument
qe, qant ge fui en l'aage de .xx. annz, ge ne trouvoie en nulle cort
ou ge vouxisse venir un chevalier qi se peust prendre a ma force, fors
qe .iiii. seulement. ⁷L'uns de ces .iiii. avoit non Elyezer li Fors, Mata-
ban li Blans avoit non li secont, et li tierz avoit non Galeot le Brun.
⁸En nulle terre ou ge venisse a celui tens ge ne pooie trouver home
qi a moi se preist de force, fors ces .iiii.. Elyezer estoit bien ausint fors
com ge estoie, mes non mie plus. Par maintes foiz nos meimes nos
en l'esprove et trouvames toutesvoies qe nos estiom assez d'une
force. ⁹Mataban li Blans s'esprouva moutes foiz encontre moi, mes
nos estion toutesvoies d'une force et d'un pooir. ¹⁰Mes de Galeot ne
vos puis ge mie ce dire, qar il estoit si estrangement fors et si durs qe
ge ne pooie durer encontre lui ne jor ne demi. ¹¹Ne sa force ne me

13. fet fet] fet L4

14. certainement] certaine L4

moustra il onques si apertement com il me mostra une foiz por une damoisele, et estoit ce por qoi ge di qe il fu plus fors qe tout li mondes et bien le me moustra».

194. ¹Quant li rois Artus ot ceste aventure, il comence a sourire en soi meemes et dit: «Ha! sire, se vos onques feistes cortoisie et servise a chevalier estrange, or nos fetes tant de bonté qe vos nos contez coment vos esprouvastes la grant force de Galeot le Brun par cele damoisele dont vos parlastes orendroit. — ²Coment, fet li vielz chevalier, estes vos donc si desiranz de savoir ceste chose? — Sire, fet li rois, ore sachiez de voir qe ge n'oï encore parler de chevalier de cui ge oïsse si volentiers les aventures com ge faz de Galeot le Brun, qar, a la verité dire, eles sunt si estranges et si merveilleuses qe a poine les peust l'en croire se eles ne fussent avenues a vostre tens et se encore ne fussent en vie maint chevaliers qi les virent. ³Por ce, biaux sire, qe eles sunt si merveilleuses, fieremant sui ge trop desiranz de savoir en aucune chose, voirement le sachiez vos. ⁴Et se ge le puis oïr de vos, ge en serai trop liez et trop joianz. Et ce est ce por qoi ge desir asavoir ce dont ge vos ai prié, et cist autres chevaliers qi ci sunt vos en prient autresint. — ⁵En non Deu, fet li vielz chevalier, ce vos avrai ge tost conté, qar il i a petit a dire. Or escoutez coment ge esprouvai la grant force de Galeot por une damoisele. ⁶Bien fu verité qe, de lors qe ge fui chevalier novel, ge ne doutai nul mortel home tant com ge doutai Galeot, qar ge veioie tot clerement q'encontre lui ne pooit onques durer nul chevalier [de] vers nulle part dou monde.

195. ¹«En une seison qe ge estoie el roiaume de Camalide, et amoie une damoisele en cele contree si merveilleusement com chevalier porroit amer damoisele. Cele damoisele demoroit en une tor pres d'un mout bel chastiaux qui estoit a som pere. ²Il n'estoit riens ou monde qe ge desirasse tant com la damoisele, et volentiers l'eusse prise por moillier se ge la peusse avoir. ³Mes si peres ne la me voloit doner, porce qe li rois de Camelide la vo[lo]it avoir por moillier, qar ele estoit si estrangemant bele qe chascun home qi la veoit se merveillloit de sa biauté. ⁴Et endroit moi ne pooie ge auques parler a la damoisele, qe ele estoit trop fierement gardee. Et neporquant, ge savioie bien certainement qe ele me voloit grant bien et qe ele me vouxist mieuz por mari qe nul autre chevalier. ⁵En cele tor ou la damoisele demoroit avoit un jardin, le plus bel et le plus cointe qe ge

194. 6. de vers] v. L4 (*v. nota*)

195. 3. la voloit avoir] la voit a. L4

encore veisse en nulle contree. Galeot le Brun estoit maledes a celui point et demoroit en celui pais mout pres de la tor a un hermitage. ⁶De tout ce ne savoie ge riens: ge cuidoe de verité qe il fust vers Camahalot. Un jor avint qe Galeot, porce qe il estoit desaitiez, s'ala deportier en celui jardin et einsint com il meemes me conta puis. ⁷Et qant il fu ou jardin, il remanda arrieres son cheval et son escuer et remist ou jardin tout seul. ⁸La damoisele, qi a moi ne pooit parler einsint com ele vouxist, me manda qe ge alasse ou jardin et meemes au pié de la tor desouz une fenestre et ele parleroit a moi et me diroit sa volenté, et me manda a qele ore ge iroie a lui por parler. ⁹Qant ge entendí ceste novele, ge fui trop reconfortez, qar a la verité dire ge moroie por ses amors. ¹⁰Et si me mis a la voie tout maintenant tout seul et entrai dedenz le jardin et atachai mon cheval a un arbre et alai adonc vers la tor au plus priveement qe ge le poi fere.

196. ¹«A celui point droitement qe ge devoie parler a la damoisele, estoit ilec Galeot entre les arbres. Il me vit venir auques de loing et, porce qe il me vit tout seul et tout a pié, il pensa erramen en soi meemes qe il ne pooist estre qe il n'i eust aucune chose por qoi ge venoie cele part en tel mainere, si se mist entre les arbres tout maintenant. ²Les arbres estoient ilec si fierement espés, les uns encontre les autres, qe l'en i peust repondre .c. homes, tout de plain jor, qe li uns ne veist l'autre. ³Por ce avint il a celui point qe Galeot estoit trop pres de moi. Ge ne le veoie pas. ⁴Qant il vint a l'ore droitement qe la damoisele m'avoit mandé par le message qe ele parleroit a moi, ele vint a la fenestre et comença a demander coment il m'estoit, et ge li dis qe il m'estoit bien se non d'une seule chose: ⁵«Ce est de vos, qe ge ne puis avoir, et si en muir. – Coment? dist la damoisele. M'amez vos donc de si grant amor com vos alez disant? – Certes, dis ge li, oïl. Voirement vos aim ge tant qe ge ameroie mieuz avoir vos seulemant qe ge ne feroie tout l'autre monde. – ⁶Or sachiez, fet la damoisele, se vos m'amez, vos n'estes pas deceuz de ceste amor, qar ge vos aim tant com damoisele porroit amer chevalier. ⁷Et porce qe ge voi et sai qe mi peres ne se porroit acorder a vos ne ge ne voill avoir autre qe vos ferai ge une autre chose por vos qe ge ne feroie por tout l'autre monde. ⁸Porce qe la porte de la tor est si estroitement gardee por moi de nuit et de jor qe ge n'en porroie oisir en nulle mainere ai ge pensé qe ge m'en istrai par ceste fenestre et m'an alerai la aval par une corde, et ce sera cestui soir au premier soing droitement. ⁹Vos soiez lors appareilliez d'armes et de cheval si qe vos m'en puissiez porter et qe vos me puissiez defendre se de ce me venist besoing”. ¹⁰Einsint preimes

parlemant entre nos deus. Ge cuidioie qe nul home dou monde eust entendues ces paroles fors qe nos deus, mes si avoit. Galeot le Brun les avoit entendues ausi bien com ge avoie, qar il estoit tres devant moi, et si ne le veoie ge mie! ¹¹Ge m'en retournai maintenant a mon cheval ausint priveement com ge i estoie venuz, et vint a mon repaire Galeot le Brun, qi avoit oï tout nostre parlement, einsint com il me dist puis, ne se volt remuer d'ilec. ¹²Mes qant il vit son escuer qi a lui retornoit por mener l'en, qar il estoit maledes et desaitiez trop fieremant, il li dit: ¹³“Retorne t'en a l'ermitage et m'atent ilec, qar ge vendrai a toi au plus tost qe ge le porrai fere. Et garde qe tu ne te remues devant qe ge vendrai a toi”. ¹⁴Einsint demora Galeot dusqe l'ore droitement qe la damoisele m'avoit mise. Ge vins armez de toutes armes, einsint com ele m'avoit comandé. Et qant vint a cele hore qe ele m'avoit dit qe ele descendroit a moi de la fenestre, ele descendit, tout einsint com ele m'avoit pramis. ¹⁵Qant ele fu a moi venue, ele me dist: “Or tost de l'aler, qar se cil de lasus s'aperçoivent qe ge soie d'eaus partie, vos estes mors et ge sui honie. — Ma damoisele, fis ge, or ne vos esmaiez, qar ge penserai bien de ceste chose”.

197. ¹«A celui point qe ge l'avoie monter et enporter, sailli Galeot le Brun d'entre les arbres ou il avoit demoré tout jor, et il estoit tout desarmé, veraïement le sachiez vos. ²Mes por tout ce ne remist il mie qe il ne fust ausint seurs com se il fust armez, et bien le moustre cleremant qar il vint a moi et me dist: “Leissiez la damoisele, sire vasal, ceste n'est mie por vos”. ³A celui point estoit il un pou corrociez, qe ge avoie esté celui an encontre un sien ami. Si estoit nuit, por ce ne le pooie ge pas bien conoistre et, porce qe ge avoie esté encontre celui sien ami, estoit il envers moi trop durement corrociez, et sor tout ce il avoit sa teste couverte d'un mantel. ⁴Ge cuidioie tout certainement qe il fust armez, qar ge ne cuidasse por nulle aventure qe home desarmé fust de tel ardement, et por ce mis ge main a l'espee. ⁵Qant il vit qe ge traoie l'espee, il me dist trop fierement: “Coment, vassal? Me cuides tu fere poor de t'espee? Certes, ele te sera a cestui point mauveis garant encontre moi”. ⁶Et lors fist un grant saut dusq'a moi et hauça le poing dextre et me feri desus le hyaume si durement qe, si voirement m'aït Dex, ge fui si esordiz de celui cop com se ge fuse feruz d'une grant mace de fer. ⁷Et q'en diroie? Ge me tenoie encore en estant a grant peine, tant fierement avoie esté estordiz. Et qant il vit qe ge me tenoie en piez, il me prist entre ses braz e me rua desus soi plus d'une lance ausi legierement com se ge fusse un enfant de .xiiii. anz ou de .xv. ⁸Se ge estoie devant ce estordiz dou grant cop

qe il m'avoit doné sor le hyaume, adonc ala pis mon afere, qar ge me hu[r]tai a un arbre si durement qe g'en cuidai bien avoir ronpue la chaene dou col. ⁹Et q'en diroie? Ge demorai ilec tout debrisie et decassez. Galeot prist ma damoisele et s'en ala a tel eur qe ge ne vi puis ma damisele, ne ne saz qe ele devint. ¹⁰Quant ge fui venuz en mon pooir, porce qe ge conoisoie donc certainement – par la grant force qe ge avoie trouvé el chevalier – qe ce estoit sanz faille Galeot le Brun, dis ge a moi meemes qe Galeot n'estoit mie home, mes deable proprement! ¹¹Biaux sire, dist li chevalier, par ceste aventure qe ge vos ai orendroit contee conui ge plus apertement la grant force de Galeot et le fer hardemant qe ge ne fis par nulle autre chose. ¹²Et qant ge vos ai conté ceste aventure, ge m'en puis ore bien teire, qar ge voz ai ore conté mot a mot ce qe ge vos promis a dire». Et qant il a dite ceste parole, il se test.

198. ¹En tex paroles chevauchierent cele matinee. La damoisele q'i tantes foiz avoit refusé le chevalier vielz, qant ele voit qe il a finé son [con]te, ele vint devant lui tout einsint com ele estoit a cheval, et li dit: ²«Ha! sire, merci, por Deu et par cortoisie. Pardonez moi ce qe ge vos fis arsoir. Ge conois orendroit tout clerement qe ge fis mal, mes certes ge ne cuidasse mie en nulle guise qe nul home de vostre tens peust avoir en soi tantes bontez com il a en vos. ³Sire, por Deu et por vostre franchise, pardonez moi cest mesfet, et ge vos pramet loiaument qe jamés jor de ma vie ge ne dirai se cortoisie non a chevalier qe ge [ne] conoise. – ⁴Damoisele, ge le vos pardoing per cestui couvenant qe vos m'avez orendroit fet. Et ge vos pri qe vos une autre foiz n'allez si malemant despeisant les viell chevalier, qe tuit li viell ne sunt mie mauveis, ne tuit li geunes ne sunt mie bons. – ⁵Sire, fet ele, or sachiez bien qe por honor de vos sui ge chastiee de ceste chose».

199. ¹Lors se torne li viell chevalier vers le roi Artus et li dit: «Dites moi, sire, fustes vos pieça en la meison le roi Artus? – Certes, fet li rois, il n'a pas encore granment de tens qe ge i fui. – ²Or me dites donc, fet li viell chevalier, et oïstes vos donc dire qe leianz soit venuz par aucune aventure un chevalier q'i porte un escu a or? – ³Certes, sire, ce dit li rois, il n'i vint pas encore, mes bien entendî noveles a

197. 8. hurtai] hutai L4 9. decassez] de[...]ssez L4

198. 1. son conte] sonte L4 2. Ha] Ha[s] L4 4. ge ne conoise] ge c. L4

199. 3. entendî] eitalui (?) L4 (*riscritto*)

cort assez merveilleuses, et les plus estranges sanz faille qe a la cort dou roi Artus venissent de null chevalier qi armes portast el roiaume de Logres puisqe il fu premieres coronez». ⁴Qant li viell chevalier entent ceste novele, il dit: «Qeles merveilles furent celes? Dites le moi. — ⁵Certes, dist li rois, l'en a parlé plus hautement de sa chevalerie et plus estrangement qe de nul autre chevalier qe ge onques veisse ne oïsse. ⁶Encore n'a pas un an compliz qe ge n'avoie encore oï parler dou chevalier a l'escu d'or se mout petit non, ne onques certes n'avoie oï parler devant. ⁷Mes puis demi an sunt venuees tantes noveles de lui a cort qe, si m'aït Dex, qe ge di bien qe se Galeot le Brun, dom l'en conte tantes merveilles, fust orendroit en vie, l'en n'en peust grantement conter plus. ⁸Mes, biaux sire, porqoi me meistes vos en paroles de lui? — Ce ne vos dirai ge mie orendroit, fet li viell chevalier. Voirement ce vos faz ge bien asavoir qe ge le verroie trop volentiers, plus qe nul autre qi soit ou monde. ⁹Et sachiez qe, se ne fust por l'amor de lui, ge ne portasse armes orendroit par ceste contree, qar ge avoie mout aillors afere de tel chose qi mout me touchie pres dou cuer». ¹⁰Einsint parlant com ge vos cont plus dou chevalier a l'escu d'or qe d'autre chose, vont chevauchant celui matin et tant qe il entrent dedenz une forest grant assez et ancienne durement. ¹¹Li tens estoit en cele saison biaux assez et les fuelles estoient si verz en le forest com eles pooient estre et cargiez de diverses flors. Et q'en diroie? Celui tens estoit proprement as chevaliers amoureux et d'ome qi a amor pense. ¹²La ou il chevauchent par la forest, adonc lor avint qe il trouverent un chemin qi departoit en deus parz, et la ou li chemin departoit en deus parz, avoit une chapelle vielle et ancienne. ¹³Et neporqant ele n'estoit pas tant ancienne qe ele ne fust encore de .c. anz, mes, porce qe gens n'i avoient habité bien de .xx. anz, estoit ele dechoite et por ce ressembloit assez plus ancienne.

200. ¹Devant la chapele avoit une fontaine trop bele qi sortoit desus un perrom par deus tuiaux d'arjent et estoit entre deus arbres qi covroient la fontaine si fierement qe jamés force de soloill ne pooit a lui venir. ²Qant li trois chevaliers qi les .iii. demoiseles conduisoient vo[i]ent le chemin forché, il s'arrestent et dient au vielz chevalier:

venissent] (?) L4 (*inchiostro evanito*) ♦ roiaume] roiaum[.] L4 **12.** li chemin departoit] li c. qi d. L4

200. **1.** sortoit] sordoit L4 ♦ tuiaux] rivaux L4 (*v. nota*) **2.** voient] voent L4 (*v. nota*)

«Sire, laquel de ces deus voies volez vos tenir? – ³Certes, porce qe ge voi ceste fontaine qi est si bele, et cist leu est si d[ell]itables por repousser, et ge me sent travailliez un pou por les armes – porce qe ge ne le portai pieça a jornee, ausint com ge ai fet puis un mois –, ge ai talent qe ge me repouse auqun pou en cestui leu. ⁴Se il vos plect a chevauchier, fere le poez, et, en qelqe leu qe vos iroiç, Nostre Sire Dex vos conduie sauvement. – Sire, dient il, or sachiez qe nos avom besoing a chevauchier, et se ce ne fust, nos remansissom bien avec vos et vos tenissom conpeignie tant com vos pleust. – ⁵Ore vos en alez, fet li viell chevalier. – Bon chemin puissiez vos trouver et envoisié, sire», dient li chevalier, et ensint dient les damoiseles. ⁶Et maintenant se metent au chemin a dextre por tenir cele voie ou il devoient aler a lor besoigne.

201. ¹Quant li trois chevaliers se furent partiz dou viell chevalier en tel guise com ge vos ai conté, li rois Artus, qi encore n'estoit entrez en celui chemin ne en l'autre, qant il voit qe li .iiii. chevaliers se sunt partiz et qe li viell chevalier estoit descenduz, il dit a Bandemagus: ²«Qe ferom nos? Chevaucherom nos avant, ou descenderom avec cest chevalier? Que vos plect il: le descendre ou le chevaucher? – ³Sire, ce dit Bandemagus, dou chevaucher ou del descendre est il a vostre volanté. – Se il vos plect nos irom avant: a vostre sens voil ge fere de toutes choses, non pas au mien. – ⁴Si m'aît Dex, fet Bandemagus, il m'est avis qe cil qi trouve si estrange aventure, qe il ne la devroit mie volontiers leissier. – Porqoi? fet li rois. – Sire, ge li vos dirai maintenant, fet Bandemagus. ⁵Or sachiez qe nos avom trouvé la plus estrange aventure et la plus merveilleuse dont vos oïssiez onques mes parler, qar vos avez trouvé un viell chevalier et si ancien qe vos ne cuidiez en nulle mainere, se vos l'eussiez trouvé en autre leu, qe il peust armes porter. ⁶Et vos veez qe il [est] si preuz chevalier et si vaillant com se il fust orendroit en l'aage de .xxx. anz. Oïstes vos encore en vostre cort nulle greignor merveille? – ⁷Si m'aît [Dex], fet li rois, nanil. – En non Deu, fet Bandemagus, qant il vos [est] einsintvenu qe tex merveille nos est eschoite entre les mains et si preudom com est cestui s'est mis en vostre conpeignie, ge ne le lou en nulle guise qe vos le leissiez devant qe vos sachiez certainement qi il est, se vos savoir le poez. ⁸Et qant vos l'avroiz coneu et vos li avroiz tenu conpeignie une grant piece, ge vos lou, se vos le poez mener avec voz dusq'a a Camahalot, qe vos l'i menoiz. ⁹Et se vos le poez tenir

3. delitables] ditables L4

201. 6. est] om. L4 ♦ nulle] nuile (?) L4 7. Dex] om. L4 ♦ est] om. L4

del tout en vostre conpeignie, tenez le, qar ge vos pramet loiaument
 qe vos n'en avrez ja se honor non de tenir le en vostre conpeignie,
 un tel chevalier com est cestui. ¹⁰Et ge voz di tou certainement qe se
 vos desoremés vos partez de lui devant qe vos l'eussiez mieuz coneu
 qe vos encore ne conoissiez, se Dex me doint bone aventure com vos
 vos porriez tenir a cheitif e a mesconeisant. ¹¹Or vos en ai dit mon
 avis et mon sens, si en feroiz desoremés dou tout a vostre volanté». Li
 rois Artus respont et dit adonc: «Tant m'avez dit qe jamés ne me
 partirai dou chevalier devant qe ge sache qi il est, porqoi il le me
 voille dire».

202. ¹Qant a ce se sunt acordez li rois Artus n'i fist autre demo-
 rance, ançoiz descent tout errament et dist au viel chevalier: «Sire,
 se Dex me saut, ge ne voil pas, se il vos plect, qe vos aiez ore einsent
 tout l'aisse de cestui leu tout seul, qe n'en aiom aissent une partie.
²Bien seustes trouver biau leu et delitable por fere aise a nos et a vos,
 et por ce volom nos reposer pres de vos, se il vos plect et atalente.
 – ³Si m'aït Dex, fet li vi[e]ll chevalier, il me plect mot qe vos vos
 reposez. Et certes, se ge m'i peusse ausint bien reposer con vos poez,
 mout me fust ja cestui repos plus delitables qe il ore n'est. ⁴Vos estes
 geunes et encore n'avez pas .xxx. anz, qantqe vos fetes est deduit et
 repos, mes qantqe ge faz desoremés si m'est annuiz et travaill. ⁵Se ge
 dorme ge travail adés, se ge veil ausint, qar ceste onie veillesce, qi me
 vint mout plus tost veoir qe ge ne vouxisse mie, me tient einsint le
 pié sor le col qe ele me fet aler tout corbé. ⁶Li mien ris ressemble un
 plor a ceaus qi sunt de vostre aage. Se ge voill rire de moi, se gaberont
 tant tost li geunes chevaliers qi rire me verront. ⁷Et se ge plor en
 recordant au grant damage qi m'avint ja, li geunes chevaliers diront
 tantost que veillesce m'asote e plors. ⁸Mi ris et mis plors tendront
 desoremés au monde annui, por ce di ge qe ge travaill en dormant et
 en veillant ma vie est desoremés annui. Et neporqant, por tout ce ne
 remandra qe ge ne me confort tant com ge porrai. ⁹Ge sa bien qe
 qant ge vendrai desoremés entre les geunes bachaliers, ge lor vaudrai
 un jogleor de qantqe ge lor dirai et ferai. ¹⁰Il ne se feront se rire non,
 et puiqe il torneront en ris le mien fet et les moies oevres, ne lor vau-
 drai ge un jogleor. Sire chevalier, ceste parole ai ge mis avant por vos
 meemes qi vos volez asseoir delez moi, porce qe ge vos face soulaz de

202. 1. autre] au[...]e L4 **2.** aise a nos] aise a vos L4 (*riscritto*) ♦ volom nos]
 vuolennies (?) L4 (*riscritto*) ♦ et atalente] entalentez L4 (*riscritto*) **3.** viell cheva-
 lier] vill c. L4 (*riscritto*, v. nota) ♦ ore] ne (?) L4 (*inchiostro evanito*) **4.** anz] aiz L4

moi meemes. ¹¹Or vos seez, si orroiz de mes folies. Se ge sens [dirai], ce me vendra tout d'aventure ausint com il avint au fol qant il dit sens et il ne conoist qe il dit. – Ha! sire, merci, fet li rois Artus. Por Deu, ne le dites. – ¹²Ge le voill mieus dire tout avant de moi, fet li viell chevalier, qe vos le deissiez après, e me sui assis sor ceste herbe por soulacier aucun petit ma veillesce. ¹³Mes tout cest soulaz qe me vaut qant ge me partirai de ci? Li soulaz qe ge avrai fet, si s'en sera alez ausint com se ge eusse songié droitement. Cestui leu qe ge voi si bel, si vert, si delitable, me fet oublier ma veillesce orendroit et m'a fet penser a amors. ¹⁴Orendroit m'est il bien avis qe ge soie un bel joven-cel d'encor .xiiii. anz et qe reqiere dame ou dameisele, mes ja bien tost, qant ge serai fors de cestui leu et ge serai sor mon cheval monté, et ge me sentirai pesant et foible fierement au regart de la grant force qe ge oi ja, ¹⁵donc retournerai a mes dolors, qar adonc sentirai ge la veille[sce] qi me fet souventes foiz le cuer corroucier. ¹⁶Sire chevalier, sachiez tout de voir qe veillesce est toute la plus mauveisse chose et la plus sauvage conpeignie qe l'en puisse avoir pres de soi. Or sachiez q'il poise mout qe ele est dedenz moi herbergiee, mes ge ne la puis chacier fors de moi enn nulle mainere».

203. ¹Li rois Artus, qi avoit ostee s'espee et son hyaume de sa teste et la coife dou fer avoit enval lie sor les espaules et s'estoit assis devant le chevalier, qant il ot entendu le parlemant qe cil ot dit de veillesce, il respont et dit en tel guise por reconforter le un petit: ²«Sire, fet li rois, se Dex me saut, il m'est avis qe vos blasmez a tort qant vos alez blasmant veillesce, qar, qi regarderoit voz oevres et en voudroit dire le voir, il ne porroit mie trouver qe veillesce vos eus surpris si durement com vos dites: ³qar veillesce a tel costume et si grant force en toutes guises qe, puisque ele mestroie l'ome, ele ne li leisse riens [...] fors qe les oevres sunt veues. En vos ne sunt pas oevres de veillesce, ainz sunt de force et de grant pooir. ⁴Et de ces deus choses sanz faille n'a riens de veillesce, ce est en pooir et force! ⁵Et qant de ces deus vertuz estes encore si hautement garniz com nos veom, vos avez tort qant vos vos plagniez de veillesce, qar se veillesce vos tenist si agre-mant com vos dites, vos ne tenissiez cele lance si roidement com vos encore la tenez, ne vos n'eussiez passé le gué ou nos fumes abatu si

11. dirai] *om.* L4 **13.** qant ge] q. qe ge L4 **14.** d'encor] [.]encor L4 (*buco*) ♦
 damoisele mes ja] damoisel[...]s ja L4 (*buco*) **15.** retournerai a mes dolors] retor-
 ner[...] m. d. L4 (*buco*) ♦ veillesce] veille L4 **16.** chose] *rip.* L4

203. 5. veom] *in Mn prime parole del f. 5ra*

honoreemant com vos la passastes. ⁶Sire, qe porriom nos dire? Il m'est avis, se Dex me saut, qe vos vos alez gabant de nos qi somes joveuceaus. Et certes, vos vos en poez gaber par reison, qar vos nos feistes cele bonté qe nos vos deusom avoir fet». ⁷Li viell chevalier se comence mout fort a rrrire, qant il entent ceste parole, et puis respont: «Certes, sire chevalier, se ge di qe ge sui vielz, ge ne di se verité non, mes se ge di qe veillesce me mestroie trop durement, ge ne di mie verité. ⁸Encore n'a en moi tel pooir ne si grant segnorie qe ge ne puise bien defendre mon cors encontre un joveuceaus qi ne soit de trop grant pooir. ⁹Et q'en diroie? Se ge ai moutz anz, por ce ne remaint mie qe ge n'aie le cuer mout geune et qe encore ne chantasse par aventure ausint envoiseement com feroit li un de vos deus. ¹⁰Et q'en diroie? Encore cuit ge qe ge amerai par amors».

204. ¹Qant li rois Artus entent qe li viell chevalier se soulace et se deduit si hautemant, il s'en rit trop fieremant et puis li demande: «Dites moi sire, se Dex vos doint bone aventure, combien a qe vos n'amastes par amor?». ²Qant li viel chevalier entent ceste parole, il le comence a rregarder de travers et puis li dit: «Sire chevalier, a celui jor qe l'en me porra trouver sanz amors me viegne honte et deshonor. ³A celui jor puisse ge morir vilainement! Comant, deables, cuidez vos, porce qe ge ressemble vieus, qe ge n'aime par amors et qe l'aie oublié? ⁴Ne place a Deu qe ge jamés oublie amor! Si m'aît Dex com ge proprement por amor fui enprisonnez .xiiii. anz et plus encoire, ne por ce ne leissai ge amor ne oublierai en ma vie. ⁵Si m'aît Dex, ge ne croi pas qe [il i aît] nul chevalier qi soit orendroit en tout cestui monde qi souffrist autant tout son aage por amor com j'ai soufert: ne por ce ne le leiserai, tant com ge vivrai. — ⁶Sire, ce dit li rois, par ces paroles qe vos dites me fetes vos entendant qe vos amez par amors. — En non Deu, fet li viel chevalier, vos dites bien verité: voirement aim ge par amors. Et si voiremant m'aît Dex com ge croi qe il n'aît ou monde si bele damoisele com est cele qe ge aim par amors».

205. ¹Qant li rois Artus entent ceste parole, il se comence a sourire. Ausint fet Bandemagus, qi seoit ilec devant le viell chevalier. ²«Biaux sire, fet li viell chevalier, or ne poez vos pas dire qe vos ne vos gabez de moi, qi si fort vos riez de moi et de mes paroles. — Si m'aît Dex, fet li rois, sauve vostre grace, ge ne me ri mie de vos, ³ainz me soulaz

6. Sire qe] Sire *rip*. L4 ; S. a ce qe Mn

204. 4. proprement por] in Mn *ultime parole del f. 5ra*; il testo manca fino al § 206.10 5. il i aît] *om*. L4 (*cf.* § 89.6)

trop durement de ce qe vos dites, qar ge conois tout certainement qe vos valez .C. tans mielz qe ge ne cuidoie au comencement qe vos vauxissez tant. ⁴Qar, qant ge plus regart et entent vostre parlement, de tant vos pris ge plus, et ce est ce por qoi ge me tieng a trop fol orendroit et a trop mesconnoissant de ce qe ge vos mesconoisoie si dou tout qant ge vos vi en comencement. – ⁵Sire conpeinz, ce dit li viell chevalier, vos me savez auques respondre, mes ce est trestout grace qantqe vos me dites. Et neporqant, ge vos di trestout certainement qe par voz gas ne remandra qe ge ne me soulace adès, ⁶qar amor le me comande, et encontre son comandement ne puis ge fere tort ne droit, qar ele est dame et ge sui sers. Mestiers est qe ge aconplisse qantqe ele me veit comander. ⁷Est il de vos en tel mainere? Amez vos de si loial cuer com ge faz? Dites m'en la certainté, se Dex vos doint bone aventure, et ce qe vos qerez orendroit».

206. ¹Qant li rois Artus voit qe li viel chevalier le tient ausint cort de savoir aucune chose de son estre, il li dit: «Sire, or sachiez veraielement qe encore n'amai ge granment par amor. – ²En non Deu, fet li viell chevalier, donc ne porriez vos riens valoir: por ce fustes vos si mauvés au gué passer. ³Se vos par amor amissiez com ge faz, vos eussiez la joste autrement fete qe vos ne la feistes, qar vos eussiez sanz doute le chevalier porté a terre. ⁴Et qant einsint est avenu qe ge sai tant de vostre estre qe ge conois certainement qe vos n'amez par amor, ge ne voill vostre conpeignie de ci en avant! ⁵Or sachiez qe ge vaudroie assez pis qe ge ne vaill se ge demoroie entre vos, qar chevalier sain et aitié e jovencel qi n'a mis son cuer en amors ne vaut pas mielz d'un home mort. ⁶Or tost, montez isnelement et tenez vostre chemin, qar ge ne voil qe vos soiez desoremés en ma conpeignie. ⁷Vos me feriez en pou d'ore pesant e morne e cheitif et triste, cohart et lent en toutes choses, et chevauchier teste enclinee com cil qi a mal en la teste ou cil qi a son tresor perdu. ⁸Cheitif, doulant, garçon mauveis qi encore estes jovencel! Ou avez vos vostre cuer leissiez? Ge cuit qe vos n'avez cuer en ventre, qant vos encore ne savez qe est amor! Ja estes vos si bel chevalier et legier et vistes et fors, et estes ore si mauveis! ⁹Ceste mauvestié dont vos vient, de vostre pere ou de vostre mere? Se vostre pere fu mauveis, pensez qe vos soiez preudome, et gardez qe le mauveis sanc ne tiengne en vos sa mavestié. – Sire conpeinz! ce dit li rois Artus. – ¹⁰En non Deu, ce respont li viell chevalier, mon conpeignon n'estes vos mie, puisque vos par amor n'amez.

206. 10. puisqe] dopo lacuna segnalata al § 204.4, riprende il testo di Mn, f. 5vb

Trop est meillor vie la moie et plus joieuse et plus envoisee que n'est la vostre. — ¹¹Sire, fet li rois, ge le croi bien et ge le vos outroi dou tout. ¹²Mes, porce qe encore n'amai, ne ne sai encore qe est amor, vos en voudroie ge avoir por mestre, s'il vos pleisoit, si qe m'enseigniez coment ge entendroie a amors et coment ge porroie avoir honor et lox. ¹³Qe ce vos di ge loiaument qe, por le blasme qe vos m'en avez orendroit doné, voil ge desoremés trere mon cuer en amors. ¹⁴Jamés sainz amor ne voil ge estre, mes qe ge truisse voiremant dame vaillant et de haut pris et de trop haute bonté garnie ou ge puisse metre mon cuer, einsint qe il me soit honor de souffrir mal por ses amors».

207. ¹Qant li viel chevalier entent ceste parole, il respont au roi et dit: «Dan chevalier, se Dex me saut, par tel mainere com vos dites porriez vos encore en pris monter et en lox, mes sanz amors ne vaudriez vos ja jor de vostre vie, voiremant le sachiez vos». ²A celui point qe il parloient ensint, atant evos venir un chevalier armé qi menoit en sa conpeignie un seul escuer. Li chevalier estoit montez sor un destrier fort et isnel, bien ressembloit home de guerre. ³Qant il vint sor les chevaliers qui sor la fontaine s'estoient asis en tel guise com ge vos ai conté, il les salue, et cil se drecent encontre lui et li respondirent: ⁴«Sire, bien veigniez. Vos plect il a descendre? — Certes, biaux seignors, fet li chevalier, or sachiez qe por autre chose ne ving ge ceste part fors por moi repouser». Et il dient: «Bien soiez vos venuz». ⁵Li chevalier descent tant tost qe il n'i fet autre demorance et leisse son cheval aler boivre a la fontaine, et pent son escu a un arbre et dreisce ilec son glaive. ⁶Puis oste son hyaume et avale sa coifé de fer. Et a ce l'eussent tost coneu li rois et Bandemagus, se ne fust ce qe il avoit le visage taint et nerci trop durement des armes porter, si avoit li rois Artus meemes et Bandemagus, et por ce nes conois pas le chevalier. ⁷Et se auquns me demandast qi li chevalier estoit, ge diroie qe ce estoit Brehuz sanz Pitié, qi toutesvoies se trauvailloit de fere mal. ⁸Aprés ce qe il fu asis entr'eaus, il comença a dire tout errament: «Seignors chevaliers, se Dex vos doint bone aventure, de quoi teniez vos orendroit parlement qant ge ving entre vos? Se ce est tel afere qe ge doie oïr, dites m'en aucune chose, si me sera par aventure auqun reconfort». ⁹Qant li rois entent ceste parole, il comence a regarder li viel chevalier et li dit: «Sire, vos plect il qe ge li die l'estrif qe vos aviez

vie] *om.* L4 12. lox] hox L4

207. 1. ceste parole il respont] *om.* L4 (*v. nota*) 2. atant] ata|tir Mn ♦ seul]
om. Mn 9. viel chevalier] vil c. L4 (*v. nota*)

orendroit a moi et porquoi vos me blasmez? – ¹⁰Certes, fet li viell chevalier, ce me plect mout. Dites li la vostre reison et la moie, si orrom puis a qele il s'acordera». ¹¹Et li rois Artus li dit: «Sire chevalier, fet il, puisque il vos plect qe ge vos die quel parlemant nos teniom orendroit, et ge le vos dirai. ¹²Or sachiez qe cist chevalier qi ci est me vet trop malement blasmant de ce qe ge li reconui qe ge n'avoie onques amé par amor, et me dist tout apertement qe chevalier ne porroit riens valoir qi par amor n'aime». ¹³Et maintenant li comence a conter toutes les paroles qe entr'eaus avoient esté.

208. ¹Qant Brehus sanz Pitié entent ceste parole, il comence a sourire. Et qant il a une grant piece regardé le chevalier, porce qe il li est bien avis qe il soit viell outreement et qe il ait dite ceste parole par folie de teste, ne se puet il tenir qe il ne li respogne: ²«Par Deu, fet il, sire chevalier, viell estes et foux estes! Et qi sens vos demande, desoremés il a bien le sens perdu. Ha! Dex, qi puet ore estre la dolereuse qi vos aime, la triste? ³La beneuree, est ele si jovencele com vos estes jovencel? Certes, se ele est de vostre tens, bele asemblée a ore en vos. Bele est l'amor e le soulaz de tex enfanz. ⁴Dex, sire chevalier, est ele roine ou duchese, cele rose et cele flor qe vos amez? Ge cuit qe ele ait veu .C. mars et .C. avrils, cele ou vos avez mis vostre cuer. Certes, de bone hore fu nee, qant vos l'amez? ⁵Mes ceste amor, qi entre vos deus est fermee si ententivement, si est amor deramant: il ne porroit estre autrement». ⁶Qant li viel chevalier entent ceste parole, il est plus iriez qe il ne mostre par semblant. Il n'est mie tant amesurez qe il ne responde: «Par Deu, fet il, sire vassal, il m'est avis qe voz paroles ne sunt mie de chevalier, mes de garçon. ⁷Coment, ne savez vos de voir qe, encore soie ge si viell com vos veez, si sui ge toutesvoies chevalier ou bon ou mauveis? ⁸Et puisque ge sui chevalier, vos ne me de[v]riez dire vilenie por nulle aventure. Et se vos a moi ne volez porter honor, toutesvoies la devez vos porter a chevalerie». ⁹Brehuz respont tantost: «Dan chevalier, se Dex me saut, tant com vos fustes chevalier l'en vos deust bien porter honor, mes volez vos orendroit dire qe vos encore soiez chevalier? ¹⁰Se vos le dites, ce n'est pas sens, qar vos ne l'estes desoremés. Trop avez anz, trop avez tens a ce

blasmez (blasmés Mn)] basmez L4 11. Artus] om. Mn

208. 1. sourire] sorrire L4 ♦ Et qant] et L4 ♦ folie de teste] fel[...] de reste Mn
2. dolereuse] in Mn *ultime parole del f. 6ra*; il testo manca fino al § 210.2 6. semblant] qant il entent ceste parole agg. L4 (*ripete l'inizio del periodo*) 8. devriez] deriez L4

que vos fustes chevalier, et cil qi chevalier vos clame se vet de vos gabant sanz faille. ¹¹Et se vos encore cuidez estre chevalier, vostre cui-der vaut un songe, porquoi ge di que se vos desoremés parlez d'amors, l'en ne vos doit pas blasmer, qar veillesce, qi trop durement vos mes-troie, vos en fait parler par folie de vos. ¹²Amors ne se feroit se gaber non de vos et tuit cil qi parler en orront! Et por ce di ge que trop mielz vos en vaudroit teire que parler. Ce est mon conseil et vos le feroiz tout einsint, se vos m'en creez orendroit».

209. ¹Quant li viell chevalier entent ceste parole, il respont tantost et dit: «Dan chevalier, se Dex me saut, de mauvés ne de fol ne puet l'en jamé trouver conseil se mauveis non. ²Ge ai tant oï a cest point de voz paroles que ge sai tout certainement que vos estes bien garniz de deus choses: de mauvestié et de folie. ³Et por ce n'est pas merveille se vos tel conseil me donez, qar il muet de cuer ou la mauvestié est enclose. Se bons fussiez, vos n'eusiez dit se bien non et cortoisie. ⁴Mes porce que vos estes mavés parlastes vos en tel mainere, et mauvestié le vos comande, de qi vos estes et serf et home». ⁵Quant Brehuz ot cest parole, il est trop durement iriez. Et del grant corrouz que il a, q'a pou que ci enrage, dit il: «Dan chevalier! gardez vos bien de sor-parler, que il enuist aucune foiz. Gardez vos que vos dioiz, par mon conseil! — ⁶Certes, ce dit li viel chevalier, por mon parler ne por mon tere ne me porroiz vos nule nuisance fere [ne] nul contraire dou monde, qar vos n'estes pas chevalier qi peust nuire ne ennoier a nul home. — ⁷Dan chevalier, dit Brehuz, gardez que vos dites. Il m'est avis que vos venistes en ceste place por avoir repos et haiese, mes ge vos faz bien asavoir que, se vos ne frenez vostre langue, vos y avrez fini le repos que encore n'eustes peior. ⁸Et sachiez bien que por toute vostre veillesce ne remaindra que ge ne vos face et honte et lat par aventure bien tost».

210. ¹Li viel chevalier drece la teste qant il entent ceste parole et puis respont mout corrouciez: ²«Vassal, fet il, se Dex me saut, ge vos conois tant que ge sai bien que vos n'estes pas de tel force ne de tel pooir que vos poissiez riens nuire, et por ce m'esmai ge mout pou de tout ce que vos m'alez disant. — ³Voir, ce dit Brehus, or i parra que voz feroiz!

209. 5. conseil] consilli L4 (*riscritto*) ♦ enuist] (?) L4 6. nule] trere (?) L4 (*riscritto*) ♦ ne nul] nul L4 7. ne frenez] refrenez L4 (*riscritto*) ♦ avrez fini le repos] a[.]rez fini el r. L4 (*riscritto*) 8. vostre] vos[...] L4 (*buco*)

210. 2. pou de tout] *dopo lacuna segnalata al § 208.2 riprende il testo di Mn, f. 6vb*

Venuz estes a la meslee, se Dex me saut: il est mestier qe ge voz face conoistre qi ge sui». ⁴Qant il a dite ceste parole, il n'i fet autre demorance, ainz se drece en son estant et dit au viel chevalier: «Sire veillart, armez vos tost! Tant avez dit a cestui point qe il est mestier qe ge vos en face repentir. ⁵Or tost, si vos apareilliez de defendre encontre moi, qar ge vos apell a la bataille». De ce qe Brehus dit, li veill chevalier ne s'en fet se gaber non voirement. ⁶Porce qe il voit bien qe Brehus ne se gabe mie et qe il s'apareille de la bataille, ne il ne voudroit pas qe Brehus le trovast dou tout desgarniz, prent il son hyaume et le fet lacier en sa teste et prent s'espee et son escu. ⁷Et qant il est appareilliez de la bataille, il dit a Brehus: «Ore, vassal, qe vels tu fere? Vois moi tot apareillié de ce dont tu orendroit m'apeles si fierement. ⁸Combatre me voil encontre toi, si faz ma honte, bien le sai, qar tu es home si cheitif qe encontre toi ne me deusse ge combatre por nulle aventure dou monde». Se Brehus sanz Pitié est doulant et irriez qant il entent ceste parole, il ne fait pas a demander. ⁹Il n'i fet autre demorance, ainz se dreice vers le viell chevalier, l'espee nue en la main. Cil li vient de l'autre part, qi pou le doute e moins le prise. ¹⁰Brehuz giete le premier cop et fiert celui sor son escu, mes il a tost le guerredom de celui giet, qar il li done desus le hyaume de l'espee trenchant un si grant cop com il puet amener d'en haut de toute sa force. ¹¹Einsint encomence l'estrif des deus chevaliers droitement devant la fontaine. Or fiert li un et puis l'autre, et se travaillent ambedui tant com il poent. ¹²Mes il n'ont mie granment maintenu celui estrif qe Brehus dist a soi meemes qe il ne cuidait en nulle guisse dou monde qe li viel chevalier encontre cui il se combatoit fust de si grant force ne de si grant pooir com il estoit. ¹³Il se repentist volantiers de ceste enprise, se il peust, mes il ne puet, ce voit il bien, qar li fet est alé tant avant desoremés qe il ne porroit leissier qe il ne li fust dou tout torné a mauvestié et a cohardie. ¹⁴Et por ce mist il en aventure cuer et cors, et ore aille desoremés cest fait com aler porra. Et neporqant, il reçoit souva[n]t et menu de si pesanz cox qe il ne trouva en pieçamés qi si asprement le menast com fet cestui, et ce est ce qi le met en toute poor et en toute doutance. ¹⁵Mes toutesvoies il se vet si bien defen-

3. sui] suil L4 (*riscritto*) 4. en son estant] da son e. L4 (*riscritto*) 5. De ce ... dit li veill chevalier] Ce qe ... dit au vielz chevalier il Mn 7. Ore vassal] Orend[...] Mn 9. e moins] e moins | et meins L4 10. un si grant] et done un si g. Mn 11. fontaine] [...]ntaine L4 (*buco*) 12. grant force] in Mn *ultime parole del f. 6vb; il testo manca fino al § 217.5* 14. reçoit] rip. L4 ♦ souvant] souvat L4

dant qe nus ne le veist adonc en cele esprouve qi bien ne deist par reison qe il [estoit] trop bon chevalier a merveilles.

211. ¹En tel guise com ge vos cont se combatent li chevalier devant la fontaine. Et tant dure cele bataille qe li rois Artus et Bandedmagus voiant tout apertement qe Brehus en a le peior et qe au darreain ne se porra il partir de cest estrif sanz avoir vilenie et honte, se li chevalier encontre cui il se combatoit n'a pitié de lui. ²Qant li premier asaut ot tant duré qe li chevalier voit tot apertement qe Brehus estoit mout fort navrez et q'i avoit perdu dou sanc ja assés, porce qe il ne le tient pas a si mortel enemy qe il le voille encore metre a mort, il se tret un pou arrieres. ³Et Brehus se tient a beneurez de ceste reetre, qar il estoit a ce menez qe l'aleine li failloit desoremés et tout le cors. ⁴Et por ce se retret, einsint com ge vos cont, li viell chevalier, qi un pou estoit tresuez dou chaut de la bataille. Qant il s'est un pou [repou]sez, il dist a Brehus: «Dan chevalier, vos veez coment il est. — ⁵En non Deu, sire, dit Brehus, vos dites voir. Ge voi bien tout apertement qe entre moi et vos [somes] deus musart et deus fols chevaliers. — Coment somes nos fols? dist li viell chevalier. — ⁶Ne veez vos, dist Brehus, qe entre moi et vos nos combatonz et por noianz? Qele achoisom aviom nos ore trouvé de fere bataille a cest point? — Il i a si grant achoison, dit li viell chevalier, qe vos me deistes avant vilenie. — ⁷Coment, sire chevalier, fet Brehus, somes nos garçons et enfanz? Li enfant petit se combatent por paroles seulemant: ausint feisom nos, ce me semble. — ⁸En non Deu, fet li vielz chevalier, ainz i a greignor achoison en ceste bataille qe vos ne dites, qar vos deistes qe ge n'estoie chevalier qi deusse parler d'amor. Ceste honte et ceste vergoigne qe vos me deistes voill ge venchier tout orendroit, se ge onques puis. — ⁹Ore sachiez, sire chevalier, fet Brehus, qant ge ce dis, ge dis trop mal, si m'en repent: une autre foiz me garderai ge qe ge ne die contre amor, ne contre vos, ne bien ne mal. ¹⁰Qant ge voi reconnoissant le mien mesfet, me poez vos demander plus? — Nenil, fet li viell chevalier, qar cestui fet n'est mie de mort d'ome. — Donc puet bien nostre guerre remanoir, ce dit Brehus. — ¹¹Coment? fet li viell chevalier. Volez vos donc qe ele remaingne a si petit? — Corrouz avom encore, fet [Brehus], mes porquoi en ferom nos plus, puisque la pes i puet venir? ¹²Ge n'ocis mie vostre pere, ne vos le mien, ce sai ge bien

15. estoit] *om.* L4

211. 4. un pou repousez] un pousez L4 (*saut*) 5. somes] *om.* L4 11. Brehus] *om.* L4

tout seurement. Por ce di ge qe bien puet la nostre bataille remanoir atant, et serom ambedui ami com nos estiom devant. – ¹³Dex aïe, fet li viell chevalier, et devant ce, qel amistié avoit entre moi et vos? – Coment, fet Brehus, n’avit il amistié entre moi et vos, qant vos me feistes orendroit asseoir devant vos por reposer moi et por asseoir en vostre conpeignie? – ¹⁴Vassal, fet li viell chevalier, vos savez plus qe ge ne vos ai apris, por la foi qe ge vos doi! Et qant ge voi qe nostre bataille ne vos plect, et ge vos en qit: ja autre force ne vos en ferai». Et Brehuz respont: «Sire, ge vos en merci mout».

212. ¹Qant Brehus se voit delivré de ceste bataille dont il se tenoit trop encombré, il dit a soi meemes qe il fet une des meillors jornees qe il feist onques, qar il ne se recorde qe il fust si pres de trouver honte ne doumage dou cors com il a fet a ceste foiz. ²Qant il voit qe il est dou tout delivrez qe il puet desoremés fere la volenté de soi meemes, il pense une grant piece tout einsint en estant com il estoit. ³Li viell chevalier si s’estoit ja assis sor l’erbe en celui meemes leu ou il s’estoit assis devant, et li rois Artus, qui voit penser Brehus et qi conoist qe il est trop duremant iriez, li dit: ⁴«Sire chevalier, il m’est avis que mielz vient amer par amor qe sanz amor vivre. Amor est de grant pooir, ce voi ge bien: a cestui point defendistes vos malement la vostre partie. – ⁵Dan chevalier, ce dit Brehus, vos parlez ore de saine teste. Vos vos poez gaber de moi, qar vos n’avez fet a cestui point fors qe regarder nostre contraire et nostre annui, et les granz cox qe nos nos entredonniom. ⁶Legieremant avez passé la bataille, mes por la foi qe ge doi a Deu, se vos y eussiez la pel [doulante] si com ge oi la moie, vos n’eussiez talent de rire com vos vos riez orendroit. Et q’en diroie? Bien vos poez rire de nos a cestui point. ⁷Dex voille qe nos nos puisom autresint rire de vos prochainement! – Sire chevalier, fet li rois, il m’est avis qe vos vos corrouciez. – Non fâz, biaux sire, fet Brehus, ainz voi orendroit saillant de joie. ⁸Tel joie vos envoit Dex avant qe nos nos partom de ceste place. – ⁹Ha! ce dit li viell chevalier, or voi ge bien tout certainement qe cil qi n’aiment par amor ne vaillent riens, ançois sunt doulant et tristes soir et matin: par vos meemes le poom dire et veoir orendroit tout cleremant, qar por un petit de travaill qe vos avez orendroit souffert estes ja mors et recreuz. ¹⁰Se vos par amor amissiez, ja n’eussiez travaillé de si povre bataille com nos avom orendroit entre nos fete. – Sire chevalier, ce dist Brehus, ore voi ge bien qe vos vos alez gabant de moi, si n’est pas trop grant cortoisie, se Dex me

212. 3. et qi] et qe il L4 6. doulante] om. L4

saut. — ¹¹Sire, fet li viell chevalier, or voi ge bien qe tout adés sunt corrouciez cil qi n'aiment par amors. Jamés ne funt bele clere ne bel semblant. Tout adés sunt mornes et pensis, tristes et doulanz, et si ont elz et si ne voient. ¹²Et de qantqe il vont disant il se corroucent. Ausint fetes vos orendroit: por chasque parole vos alez corrouçant a moi. ¹³Grant damage est sanz faille qe vos n'amez par amors, qar voz fussiez d'autre guise et d'autre mainere qe vos n'estes. Vos fussiez adonc liez et baut et joianz, jolis et envoisiez com nos somes orendroit.

213. «— ¹Dan chevalier, ce dit Brehus, se Dex vos doint bone aventure et joie de ce qe vos plus desiriez a avoir, dites moi vostre non, por savoir se ge vos porroie conoistre. — ²Et porquoi volez vos savoir mon [non]? fet il. Or sachiez tout certainement qe, qant ge le vos avrai dit, ja por ce ne me conoistroiz vos plus qe vos me conoisoiz orendroit. — ³Coment, sire, ce dit Brehus, estes vos donc de si grant renomee qe l'en ne conoist encore vostre non? — Oïl, ce dit li viel chevalier. — ⁴En non Deu, dist Brehus, tant ai ge plus deshonor qant chevalier qi n'est de renomee m'a fet vergoigne et honte orendroit. Mes toutesvoies vos pri ge qe vos encore me dioiz vostre non. — ⁵Certes, volantiers, fet li viell chevalier. Or sachiez veraïement qe cil qi me conoisent m'apelent Helianor de la Montaigne. Ja a passé mainz anz qe mis non ne fu mai por moi nomez a chevalier estrange. — ⁶Dan chevalier, ce dit Brehus, or sachiez qe il n'a pas granment de tens qe ge oï parler de vos a un chevalier de vostre tens qe tint de vos tout un soir parlement trop grant. Vos estes un des plus anciens chevaliers qi orendroit soient en la Grant Bretagne. ⁷Vos estes bien des premiers chevaliers seul. Vos estes bien de l'un testament et de l'autre. Se ge vos coneust ausint com ge vos conois orendroit qant ge vos vi a ceste fontaine, cestui afers fust bien alez autrement. ⁸Bien porroit dire li rois Artus, se il fust ici, qe li mort sunt resuscité a son vivant! Certes, ja a passé .xxx. anz, si com ge croi, qe vos ne portas[tes] armes, selonc ce qe l'en m'a conté. ⁹Et qant vos, qi de celui tens ne portastes armes, avez ore encomencié cestui mestier, bien poom seurement dire qe les estranges aventures et les merveilles se comencent. ⁹Cestui fet se porroit conter a la meison le roi Artus por aventure merueilleuse et estrange.

214. «— ¹Sire chevalier, fet Helyanor de la Montaigne, or sachiez veraïement qe il n'a pas encore .xxx. anz qe ge leissai porter armes, mes certes il a bien .xv. anz et plus encore. Et se ge armes ne portai

213. 2. non] *om.* L4 8. portastes] portas L4

en cestui tens, l'en ne m'en puet mie blasmer, qar ge fui adés en prison. ²Et qant einsint est avenu qe ge vos ai fet tant de cortoisie qe ge vos ai dit mon non maintenant qe vos le me demandastes, se Dex vos saut, or me fetes tant de bonté qe vos me dioiz vostre non ausint com ge vos dis le mien. – ³Dan chevalier, ce dit Brehus, qant vos mon non volez savoir, et ge le vos dirai». Lors vint a son cheval et monte. Et qant il est montez il dit: ⁴«Sire chevalier ancien, or sachiez tout certainement qe ge ai non Brehuz sanz Pitié. Ce ne sai ge se vos onques en oïstes parler». Et qant il a dite ceste parole il s'en vet outre, tant com il puet dou cheval trere. ⁵En tel guise com ge vos cont se parti Brehus de Helyanor et dou roi Artus et de Bandemagus. Et se il les eust coneuz, a cestui point il lor eust dit lor reison, en tel mainere qe il ne l'oubliaissent a pieçamés. ⁶Mes il ne les reconut mie, et por ce remest il et se parti d'ilec navrez et malmenez fortmant. A cestui point li fu bien fortune contraire: il en a bien eu a cestui point mauveis encontre et felleneux, mes, se il puet, encore vengera il ceste honte et cest damage sor auqun autre. ⁷Il s'en vet tant fort corrouciez qe il maldit Deu et tout le monde, et dit qe il n'avra jamés joie devant qe il ait fet aucune honte et vilenie ausint com il a receu a cestui point: se il tost ne s'en venjoit, il creveroit de duel. ⁸Et q'en diroie? Il vet criant et forsenant ansint com se il fust enragiez et fors doulens, et regarde amont et aval por savoir se il peust trouver auqun ou il revenjast son corrouz et celui duel. ⁹Et en cele ire et en cele forsenerie qe Brehus aloit demenant, li avint adonc droitemant qe il encontra par aventure Henor de la Selve. Il estoit trop biau chevalier, si com ge vos ai dit, e li pires et li plus cohart dou monde. ¹⁰A celui point tout droitemant qe Brehus l'encontra, menoit il en sa conpeignie une damoisele et un nain et un chevalier si viell qi pooit bien avoir sanz faille .c. anz d'aage. ¹¹Li chevalier, qi estoit si vieuz com ge vos di, chevauchoit tout desarmé, fors qe il portoit espee sanz plus.

215. ¹Qant Brehus voit venir Henor de la Selve, il nel reconut pas. Et neporqant, porce qe il estoit trop durement corrociez et volentiers revengeroit sa vergoigne et sa honte ou sor cestui ou sor autre, se il peust, li comence il a crier: ²«Dan chevalier, gardez vos de moi, a joster vos estuet!». Cil, qi de joster n'avoit onques talent, respont et li dit: «Dan chevalier, or alez qerre joustes en autre leu, qar a moi avez vos failli. Or sachiez qe ge n'ai talent de joster. – ³En non Deu, fet Brehus, si feroiz: ou ge vengeraï sor vos ma vergoigne ou ge la ferai grei-

gnor». Lors hurte cheval des esperons et lesse corre sor Henor tant com il puet, et le fiert einsint en son venir qe il li fait voider les arçons et le fet trebuchier a terre. ⁴Et legierement le puet fere, qar seulesment dou glaive qe cil [veoit] venir vers lui fu il touz espoentez qe, ja n'en eust il esté feruz, si fust cheoiz de la grant poor q' il prist. ⁵Qant il a Henor abatu, il ne s'arreste mie sor lui, ainz retorne vers le viel chevalier et li crie: «Ha! fait il, veillart larron traïtor! Certes, vos estes mors, en despit de l'autre larron veillart qe ge leissai orendroit la devant a la fontaine». ⁶Et il giete le braz et l'aert au col et le tire si fort a soi qe il le giete de la sele. Et l'abat si feleneusement qe au cheoir qe il fait petit s'en faut qe il ne se rompi le col, et il gist ilec au travers dou chemin com se il fust mors. ⁷Qant Brehus voit qe il a en tel maniere les deus chevaliers abatuz adonc est il reconfortez et dist a soi meemes qe de ces deus est il ja venuz au desus.

216. ¹Lors torne sor Henor, q' il ja s'estoit relevez tant espoentez sanz faille qe il ne cuide jamés veoir autre jor qe cestui, et il s'en voloit ja foïr ausint a pié com il estoit et ferir dedenz la forest, la ou il la veoit plus espese et ou il peust garentir sa vie. ²Mes Brehus, q' il devant li vient, ne li leisse pas aconplir ce qe il voloit, qar il le fiert dou piz dou cheval si durement qe il le fet cheoir a la terre. ³Qant cil se voit si malmener, il comence a crier tant com il puet: «Ha! merci, sire chevalier, por Deu, ne m'ociez pas. Ge sui appareilliez de fere tote vostre volaté. — Or t'arestes donc, fet Brehus, et garde qe tu n'aïles avant se par mon comandement non. — Sire, fet il, volantiers». ⁴Lors regarde Brehus qe li viel se relevoit, mes il estoit encore trop fierement estordiz. Et Brehus comande au nain et li dit: ⁵«Or tost, descent, vil creature!». Et li nainz descent errament, q' il mortelment est espoentez. Et après comande il ausint a la damoisele qe ele descende, et ele descent maintenant. ⁶Qant il furent tuit .iiii. a pié, Brehus dist au nain: «Or tost, prent un de ces chevestres». Et cil le fet. Et qant il l'ot pris, Brehus li dist: «Or tost, lie a cest chevalier les mains darrières le dos». Et li mostre Henor. ⁷«Ha! biau sire, fet Henor, ja sui ge chevalier, porqoi me fetes vos tel honte? — Por ce, fet Brehus, qe vos estes des chevaliers amoureux. — Ha! biaux sire, dit Henor, or me leissiez a ceste foiz et ge vos pramet loiaument qe jamés a jor de ma vie por amor n'amerai, ne por chevalier amoureux ne me tendrai. — ⁸Tout ce qe vos dites ne vos vaut, ce dit Brehus, souffrez ce qe li nains vos velt fere ou autrement, se Dex me saut, vos estes mors». Et il fet adonc

215. 4. veoit] *om.* L4

semblant qe il li voille la teste tollir. ⁹Qant Henor voit le semblant qe feissoit Brehus, porce qe il ne muire encore crie il: «Ha! merci, sire chevalier, ne m'ocie! Ge souffrai tout ce qe vos me volez fere. – ¹⁰Or tost, nain, ce dit Brehus, orde creature!». Et cil, qī poor a de mort et qe il ne l'ose refuser, le fet einsint com Brehus le comande. ¹¹Après lie au viell chevalier les mains darrieres le dos, et après a la damoisele, et après ce les atire touz troiz elié. ¹²La damoisele vet devant, si liee com ele estoit, et après li viell chevalier, et puis après Henor de la Selve et il n'avoit pas a celui point le hyaume en la teste: li nainz li avoit osté par le comandement Brehus et si li avoit abatu la coifé dou fer sor les espauls. ¹³Qant il furent tuit trois liez en tel guise com ge vos cont, et lors chevaux estoient atachiez ilec, Brehus dist au nain: «Or tost, va t'en de ci tout droitement cest chemin qe ge sui venuz et amoine ceste gent tout einsint com il sunt tout orendroit sanz deslier les. ¹⁴Et qant tu seras venuz a cele fontaine qī est la devant, qe tu i troveras .iiii. chevaliers qe ge i leissai orendroit, au vielz chevalier qe tu verras diras teles paroles com ge te dirai de ma part». Et li dit adonc celes paroles a mot a mot qe il velt qe li nainz li die. ¹⁵«Et bien te garde, ce li dist Brehus, qe tu nes deslies – si chier com tu as ton cors! – qe si voiremant m'aît Dex, ge te couperoie la teste, qar ge serai dusqe la si pris de toi toutesvoies qe tu ne porroies fere qe ge ne le veisse. – ¹⁶Sire, dist li nainz, ge ferai vostre comandement, puisqe ge voi qe il ne puet estre autremant».

217. ¹Atant se part li nainz a tel conpeignie com il menoit. Et li rois Artus, qī encore estoit a la fontaine, qant il voit qe Brehus est partiz de ceaus en tel mainere, il dit au viell chevalier: ²«Sire conpeinz, oïstes vos encore parler de Brehus sanz Pitié fors qe orendroit? – Certes, nanil, fet Helianor de la Montaigne. Et qel home est il, qī a si felon non? – ³Li sornon s'acorde trop bien a lui, qe certes il est home sanz pitié et sanz misericorde, dist li rois, et plus sunt venues pleintes de lui en la meison le roi Artus en pou de terme qe de touz les autres chevaliers erranz qī orendroit soient ou roiaume de Logres. ⁴Et q'en diroie? Ce est la mort des dames et des damoiseles». Et maintenant li comence a conter mot a mot la vie de Brehus sanz Pitié et tout ce qe l'en en disoit. ⁵Qant li viell chevalier, ce est Halianor, entent ceste parole, il dit: «Dex aïe, sire conpeinz, puisqe cist chevalier est si fellons, coment soefre li rois la mauvestié et la felenie de cest deable qe il n'i met auqun conseil? ⁶Si m'aît Dex, il ne deust mie tel

217. 5. Qant li viell] *dopo la lacuna segnalata al § 210.12 riprende il testo di Mn, f. 77b*

fet souffrir en nulle mainere, qar les dames et les damoiseles ne sunt en autre conduit fors le roi Artus, et cil qi lor fet vilanie, si la fet au roi Artus proprement. ⁷Et certes, se li rois recordast un fet qe li rois Uterpendragon en fist ja, ge croi qe il metroit en cest chevalier autre conseil qe il n'a encore mis. — Sire, ce dist li rois Artus, qel fait en fist li rois Uterpendragon? — ⁸En non Deu, sire conpeinz, il i avroit ja ci un grant conte qi tout ce vos voudroit dire. — Et ge vos pri, dist li rois, qe vos le me dioiz par couvenant qe ge ferai tant qe li rois Artus le savra. ⁹Et ge croi, sire, qe il i metra puis bon conseil, puisque ge li metrai avant cest exemple de som pere. — ¹⁰En non Deu, fet Helianor, donc vos conterai ge ce qe li rois Uterpendragon en fist ja d'un tel chevalier». Et qant il a dite ceste parole, il comence son conte en tel mainere.

218. ¹«Sire conpeinz, fet Helyanor, bien a ore encor .XIII. anz qe il avoit ou roiaume de Nohonbellande deus freres, dont li uns estoit apellez Brun li Fellon, et estoient andui chevaliers. ²Cil qi estoit apellez Brun ne demoroit pas ou roiaume de Nohomberllande, ainz demoroit en autre leu. ³Li autres avoit non Passehen et demoroit toutesvoies en Nohombellande, et il estoient andui si fellom qe il feisoient andui anui et contraire a touz ceaus q'i poent, ausint a dames com a damoiseles et ausint a chevaliers desarmés com a ceaus qi armez estoient. ⁴A celui tens avint sanz faille qe li rois Uterpendragon tint une grant cort, et il vindrent esforceement tuit li grant home qi de li tenoient terre. ⁵La ou la cort estoit plus pleniére, atant evos qe devant le roi vint un chevalier tout a pié sanz armes. Li chevalier avoit esté autre foiz a cort et estoit coneuz en plusors leus par sa proece. ⁶Qant li roi le vit a cort venir en tel mainere et si povrement, il li dist: "Sire, porquoi venistes vos a ma cort en tel mainere? Vos me fetes vergoigne et honte. Or sachiez qe vos en repentiroiz chieremant. — ⁷Coment, sire, dist li chevalier, por si pou de vergoigne com vos avez de moi si me voudriez fere mal? — Oïl, dist li rois. — ⁸Et qel reison devriez vos fere de vos meemes, dit li chevalier, se ge porroie mostrer qe vos m'avez fet greignor honte a .c. doubles qe n'est ceste qe vos me dites? — ⁹Certes, dist li rois, se ge la vos ai fete ou se ele vos est avenue por achoison de moi, ge sui appareilliez tout orendroit qe vos façois de moi meemes si grant reison qe tuit cil qi parler en orront, de l'amende qe ge vos en ferai, si le conteront par merveille par tout le monde.

9. avant] ausint Mn 10. en fist] ensint Mn

218. 5. devant le roi] devers lai Mn 9. se ge] se e Mn

¹⁰Or dites devant ces barons coment ge vos ai mesfet et puis verroiz qele amende ge vos en ferai. – Rois, dist li chevalier, qant vos volez qe ge vos die porqoi ge me plaing si durement de vos, et ge le vos dirai tout maintenant: or escoutez.

219. ¹«Sire rois droiturers, vos savez bien certainement qe, puisqe li chevalier se partent de lor ostels par le vostre comandement et por venir a vostre cort, se il reçoivent honte et vergoigne et damage par la voie, la honte torne sor vos dou tout et le damage devez vos amender. ²Ce savez vos certainement, qe ce est la reison dou roiaume. ³Ore, sire rois, [de]puis qe li comandement qe vos feistes nouvellement par toute la Grant Bretagne, qe a ceste cort venissent tuit li chevalier qi tenoient terre de vos, me mui ge de mon ostel qi est en la fin de Norgales ⁴et venoie a vostre cort en tel mainere com devoient venir chevaliers erranz, au plus honoremant et au plus noblement qe le pooie fere. ⁵Pres de ci a deus jornees, la ou ge cuidoe estre aseur de nul home, m'asailli un chevalier de ceste contree qe l'en apelle Passehen. ⁶Tant com ge pooie me defendi contre lui, mes, porce qe il est assez meillor chevalier qe ge ne sui, vint il au desus de moi par sa force et m'ocist un mien fill et me tolli une moie damoisele qe ge menoie avec moi. ⁷Et me toli mes armes et mon cheval et m'en fist aler a pié einsint com vos veez. ⁸Sire rois, de ceste honte et de cestui tres grant damage qe ge ai receu a cestui point voil ge qe vos me façoiz amende si hautement com l'en doit fere a chevalier, qar ceste honte et ceste vilenie ai ge bien receue por vos».

220. ¹A celui point qe li rois Artus escoutoit cestui conte et li bon chevalier en avoit ja conté ce qe ge vos ai dit, atant evos le nain venir, celui qi conduisoit Henor de la Selve et la damoisele et li viel chevalier. ²Et encore estoient il liez en cele mainere qe Brehus l'avoit comandé, qar li nainz, qi avoit poor de mort, si ne l'osoit fere autrement. ³Brehuz s'en estoit ja partiz et s'en aloit sa voie grant oirre com cil qi n'estoit pas a celui point tres bien aseur, qar grant poor avoit et grant doute qe après lui ne tornassent li chevalier qe il avoit leissié a la fontaine. ⁴Qant li rois Artus voit la damoisele si liee com ele estoit et puis le viell chevalier et après Henor, et tuit .iiii. estoient liez, ce est une chose dom il est trop fierement esbahiz, qar encore n'avoit il pas apris a veoir sifaite asemblee. ⁵Et il les mostre touz .iiii. au bon chevalier et li dit: «Sire, ja orroiz noveles, il ne porroit estre autrement».

219. 3. depuis qe] puis qe L4; [...] puisqe Mn ♦ qe vos feistes] qe vos fe// Mn, *ultime parole del f. 7va; il testo manca fino al § 223.5*

Lors se drecent tuit .iii. et attendent tant qe li nain est venuz dusqe a eaus. ⁶Et maintenant qe il voit Helianor de la Montaigne, il conoist qe ce est celui chevalier a cui il est envoiez, et por ce li dit il: «Sire, saluz vos mande Brehus sanz Pitié ausint com il puet mander au plus mortel enemy qe il ait ou monde. ⁷En guerredon de la honte qe vos li feistes hui vos mande il ceste damoisele si cortoisement com vos veez. Porce qe vos amez dames et damoiseles vos en fait il present. ⁸Après ce dom vos mande il cest chevalier qi est einsint jovencel com vos estes: bien poez andui estre freres. Et se vos ceste damoisele qi tant est bele ne volez par vos retenir, doner la poez a vostre frere qi est ici. ⁹Trop se tendra bien apaïe la damoisele qi avra un tel jovencel com vos estes por suen ami, ou qi avra cest vostre frere por son dru. Cest autre chevalier de ça, porce qe il aime par amors et porce qe il est de voz conpeinz de druerie, vos mande il tout autresint. ¹⁰De ces .iii. vos fet il un presant, et si vos mande encore qe il n'avra jamés joie au cuer devant qe il avra fet de vos tout autretant. Por despit et por deshonor de vos a il fet ceste chose. ¹¹Or les desliez, se il vos plect, et se vos les volez leissier liez touz jors, si les leissiez: de ceste chose feroiz vos a vostre volanté». Et qant li nain a dite ceste parole il se test, qe il ne dit plus a cele foiz.

221. ¹Qant Helianor entent ceste nouvelle, il est tant durement iriez qe il n'a pooir de respondre d'une grant piece, ainz beise la teste vers terre et comence a penser. Et qant il a pooir de parler, il regarde le roi Artus et dit: ²«Ha! sire conpeinz, com ci a grant honte por moi. Si m'aït Dex, desoremés me puis ge bien tenir por honté malemant. Voirement me deissiez vos verité, qi me deistes qe li chevalier qi de nos se part est li plus desloial chevalier dou monde! ³Certes, vos ne deistes verité non, qe, se il ne fust voirement desloial plus qe nul autre chevalier, il n'eust fete ceste vergoigne a ceste gent. ⁴Et q'en diroie? Il m'a honi et vergoignié trop malement. Mes, se Dex me defent de mal et d'encombrer, encore vengerai ge ceste vergoigne sanz faille. Certes, ge voudroie mieus perdre la teste qe cest fet remansist ensint. — ⁵Ha! sire, fet li rois Artus, ne vos corrouciez si durement, qe il ne puet estre, se vos granment en ceste contree repairez, qe vos encore ne veignoiz en leu de revengier ceste vergoigne. — ⁶Certes, fet li bon chevalier qi estoit apellez Helianor de la Montaigne, ge me tendroie a deshonoré se ge encore ne la venjasse». Lors comande au nain qe il

221. 5. contree] contrie (?) L4 (*riscritto*) ♦ vergoigne] vergoignes L4 (*riscritto*)
6. apellez] ap[...]lez L4

les deslie, et il le fet trop volentiers. ⁷Tost les deslie et les delivre. Et qant li bon chevalier voit Henor de la Selve, qi estoit si bel chevalier et si grant qe a poine peust l'en trouver en tout le monde plus bel chevalier de lui, il ne se puet tenir qe il ne li die: ⁸«Dex aïe, bel sire, ja estes vos si bel chevalier et si grant. Coment fu ce qe vos ne peustes vostre cors defendre encontre Brehus sanz Pitié? ⁹Ja n'est il mie chevalier qi ait en lui trop grant bonté de chevalerie. Si m'aït Dex, au bel corsage qe ge vos voi devriez vos par reison metre tels .iiii. a desconfiture com il est. Dex aïe, coment vos leissastes vos fere si grant vilenie com est ceste? ¹⁰Ja voi ge qe encore n'avez vos plaie petite ne grant. Si m'aït Dex, vos me fetes tout merveillier de vos meemes». Henor de la Selve ne respont mot dou monde, com cil qi n'ose dire riens, il n'ose seulement lever la teste. ¹¹Et li bon chevalier demande son hyaume et l'en li done. Et qant il l'a lacié, il s'en torne vers ceaus qe il avoit fet deslier et lor dit: ¹²«Or sachiez qe ge sui tant doulant de vostre vergoigne qe ge ne porroie avoir greignor duel, qar ge ne di pas qe la vergoigne soit fete a vos seulement, ançois di ge tout apertement qe ele fu fete a moi. ¹³Or vos en torné la ou vos leissastes vos chevauche[u]res, qe ge croi bien qe vos les troveroiz, et ge m'en irai après celui qi ceste vergoigne vos fist. ¹⁴Et se ge le truis par aucune aventure, ge vos pramet loiaument qe ge vos vengerai einsint de son cors, se ge onques puis, qe jamés au jor de sa vie il n'avra pooir de fere vilenie a vos ne a autre. ¹⁵Or vos metez a la voie, qe a cestui point ne vos puis ge fere autre chose ne autre amendement».

222. ¹Lors se torne Helianor de la Montaigne vers le roi Artus et li dit: «Sire conpeinz, qe voudriez vos fere? ²Or sachiez qe ge sui si corrouciez de ceste aventure qe avenue m'est en tel mainere com vos veez qe, si m'aït Dex, ge me tendroie a mort se ge leissase cestui fet en tel mainere qe ge plus n'en feisse. ³Et endroit moi voill aler tout maintenant après Brehus. Ge le qerrai par cest païs .ii. jors ou .iii. ou .iiii. ou .v. ou plus. Or sachiez qe ge vengerai ceste honte, se aventure ne m'est trop durement contraire. ⁴Et se ge ne le truis, ge me metrai puis au chemin et m'en ira cele part ou ge doi aler. Et vos, sire, qe baez a fere? Vos savez bien qe vos qerez et quel part vos devez aler». ⁵Qant li rois Artus entent ceste parole, il tret Bandemagus a une part et li dit: «Qe ferom nos? – Sire, ce dit Bandemagus, se Dex me doint bone aventure, ge ne vos leiseroie en nulle mainere dou monde, ne

7. Henor] Honor L4 (*riscritto*) 13. chevaucheures] chevaucheres L4

222. 3. aler] alor L4 4. baez] batz L4

ge ne loueroie qe vos leississiez la conpeignie de cest chevalier. ⁶Or sachiez qe il est si preudome en toutes guises qe, se vos poez tant fere qe il s'en viegne a vostre ostel, si m'ait Dex com vostre cort sera plus honoree seulement de lui qe de tex .cc. chevaliers qi i porroient venir. — ⁷Sire, por Dex, ne le leissiez aler, qe ge vos pramet loialment qe vos avroiz plus honor de sa conpeignie tant qe de nul autre chevalier qe ge veisse pieçamés. ⁸Certes, se vos jamés devez trouver le bon chevalier a l'escu d'or qe vos tant desirez a veoir si com vos dites, vos le trouverez par cestui, qar ausint le vet il qerant. ⁹Sire, por Deu, ne le leissiez encore si tost: ge ne le vos leu en nulle guise, ainz le vos deslou.

223. ¹Qant li rois entent ceste nouvelle, il se torne vers le bon chevalier qi Helianor avoit non et li dit: «Sire, puisque vos alez après Brehus sanz Pitié, or vos pri ge, se il vos plect, qe vos me doignoiz un don qi assez pou vos costera. — ²Biaux sire, fet li bon chevalier, ge le vos doing trop volantiers, porqoi ce soit chose qe ge doner vos puisse. — En non Deu, fet li rois, de cestui don vos merci ge trop durement. ³Et savez vos qe vos m'avez outroïé vostre merci: vos m'avez otroïé sanz faille qe ge vos ferai conpeignie en cest voiage et qe vos me tandroiz por vostre conpeignon, se il vos plect. — ⁴En non Deu, sire, fet li bon chevalier, puisque il vos plect qe vos veigniez en ceste besoigne, et ge le vos otroi. Or sachiez qe ge ai veu en vos tante bonté et tante cortoisie, puisque nos venimes ensemble, qe ge sui liez et joianz de vostre conpeignie a avoir assez plus qe vos ne cuidez. ⁵Or tost, prenez vostre hiaume et si nos metom a la voie, qar ge croi bien qe encore par aventure porrom trouver celui qi ceste vergoigne m'a fete». ⁶Tot einsint com li bon chevalier le comande le fet li rois Artus. Et qant il sunt tuit appareilliez et monté, il n'i font autre demorance, ançois se metent a la voie cele part droitement ou Brehus s'en estoit alez. ⁷Einsint s'en vont entr'eaus .iiii. après Brehus, qi assez savoit et plus qe il ne savoient tuit .iiii., et qi trop estoit iriez et doulant de ceste vergoigne qe il avoit le jor receue. ⁸Et qant il se fu partiz dou nain, il se hasta dou chevauchier tant qe il vint a un suen repaire qi pres d'ilec estoit. ⁹Et ce estoit une bele tor et riche qe un suen parant avoit ja

5. qe vos leississiez] a vos l. L4 7. Dex] de | ri (?) L4 9. deslou] «deslou L4 (si reintegra la lezione espunta dal copista)

223. 5. tost] dopo la lacuna segnalata al § 219.3 riprende il testo di Mn, f. 8ra ♦ enco-
re] om. Mn 6. Brehus] sanz Pitié agg. Mn 7. entr'eaus .iiii.] entre eaus tout
Mn ♦ tuit .iiii.] t. Mn ♦ ceste vergoigne] v. L4 9. une bele tor et riche] une
bele et tor et riche L4

fete. Cil estoit mors et avoit bien .ii. anz passez, de par celui estoit la tor remesse a Brehus, ¹⁰et Brehus avoit la tor garnie mot richement de tout ce qe mestier l'estoit, qar a la verité dire Brehus yert riche home en plusors parties dou roiaume de Logres.

224. ¹Qant Brehus sanz Pitié fu a la tor venus, il se fet desarmer au plus isnelement qe il puet et trove qe il estoit sanz faille si navrez et si malmenez en toutes guises qe, se il ne fust de si grant force et de si grant pooir com il estoit, il couvenist maintenant couchier ou lit. ²Qant cil de son ostel le voient si malement appareillié, il comencent a fere duel trop grant. Il lor dist: «Taisiez vos tuit, gardez qe vos ne façoiz duel. ³Si m'aït Dex, se vos plorez ge vos metrai touz a la mort. Apportez moi mes autres armes vistement et donez moi un autre cheval et autre escu». Et cil le font tout einsint com il lor comande: il n'osent de riens refuser son comandement. ⁴Qant il est touz armez bien et bel, il prent un escuer avec lui, si dit: «Monte tost et porte mon escu!». Et cil le fet einsint com si sires le comande, et maintenant se partent de leienz. ⁵En tel guise s'en vet Brehus sanz Pitié, li enragiez. Se il ne fust de trop grant cuer, il ne peust ore souffrir le chevauchier. Einsint s'en ist de son ostel et chevauche tant le chemin qe il estoit devant venuz droitement. ⁶A cele hore estoient vespres passees et li soleaux estoit ja tornez a declin. Et q'en diroie? La nuit aprouchoit durement. ⁷A celui point qe il chevauchoit en tel guise, il li avint adonc sanz faille qe il encontra les .iii. chevaliers qi l'aloient qerant. Qant il les voit, il les reconoist errament, dom il estoit trop durement reconfortez en soi meemes. Et [qant] il les voit aprouchier il lor dit: ⁸«Seignors chevaliers, bien vegnant. – Biaux sire, font il, bone aventure vos doint Dex. Por Deu, nos savriez vos a dire noveles d'un chevalier qe nos alom qerant? – ⁹Biaux seignors, fet Brehus, coment a non le chevalier qe vos alez qerant? – Certes, biaux sire, fet li rois Artus, l'en l'apele Brehus sanz Pitié. Celui alom nos qerant et non pas autre». ¹⁰Qant Brehus entent ceste novele, il respont ausint com home qi trop se merveillast: «Coment? fet il. Seignors chevaliers, alez vos querant Brehus? Vos alez qerant le deable, qi qer[e]z Brehus sanz Pitié. ¹¹Si m'aït Dex com ge l'ai qist plus de mi an entier, porce qe l'en me disoit qe il venoit soventes foiz par ceste contree, ne encore

10. riche home] richeme (*sic*) L4

224. 1. se il ne fust] il ne f. L4 ♦ si grant force ... pooir] tant grant force et de si grant cuer Mn 4. Monte tost] in Mn *ultime parole del f. 8ra; il testo manca fino al § 225.8* 7. Et qant] et L4 10. qerez] qerz L4

ne l'i pooie trouver! Et si ai ja veu maint home et encontré qi disoient
 qe il l'avoient veu. ¹²Quant vos celui alez qerant, bien poez seurement
 dire qe vos alez qerant deables, qe jamés ne l'avroiz trouvé! — Sire, fet
 li rois, ore sachiez tout veraïement qe il s'en parti de nos hui en cest
 jor, et por ce le cuidom nos tost trouver. — ¹³Coment, fet Brehus, vos
 estez vos donc mis en qeste por lui? — Oïl, certes, fet li rois. — En non
 Deu, fet Brehus, donc voill ge demorer en vostre conpeignie et che-
 vauchier desoremés avec vos, qar por celui meemes qe vos alez qerant
 sui ge entrez en qeste ja pieça. ¹⁴Il m'a tant fet, li desloial, qe certes ge
 ne me tendroie a vengié de lui se ge ne li trenchasse la teste dou tout».

225. ¹Li bon chevalier regarde envers le roi Artus: «Ore, sire
 conpeinz, ne vos est il bien avis qe ce soit grant honte et grant let por
 le roi Artus, qi souefre tel chevalier en son roiaume com est cestui qe
 nos alom qerant orendroit? — ²Ha! sire, fet Brehus, se vos seussiez les
 granz maux qe il vet feissant, celui Brehus, as dames et as damoiseles
 por le roiaume de Logres, com vos le tendriez a grant merveilles! ³Si
 m'aït Dex com vos ne diroiez pas qe ce fust home, mes deable pro-
 premant! — ⁴Or ne vos esmaiez, fet li bon chevalier qi Helianor estoit
 appelez, qe, si m'aït Dex, se il me chiet entre mes mains une autre
 foiz ausint com il estoit hui, qe ge vos pramet qe ses folies reman-
 dront. — ⁵Ha! sire, ce respont Brehus, com vos le conoissiez male-
 mant. Or sachiez bien: puisqe il a tant d'avantage qe il vos conoist, il
 ne se metra pas pres de vos se il n'i voit son avantage. — ⁶Sire, dist li
 rois Artus au bon chevalier, qe ferom nos? Il est tart, il seroit bien hui-
 més tens de herbergier, porqoi nos trovisom ostel ou nos peussom
 remanoir. — Certes, ce dit li bon chevalier, au remanoir m'acort ge
 bien volantiers. — ⁷Seignors, ce lor dit Brehus, or me dites, se il vos
 plest: ceste part dont vos venez, trovastes vos ou vos peussiez her-
 bergier?». Et il dient qe il n'i trouverent ostel nul. ⁸«Et vos, biaux sire
 chevalier, ceste part dont vos venez, trovastes ou chevaliers erranz
 peussent herbergier? — En non Deu, fet Brehus, ge trouvai orendroit
 ça devant un pou ça fors del chemin une tor mout bele et mout riche,
 mes ce ne vos sai ge a dire se l'en vos voudra herbergier leianz. — ⁹Ha!
 fait li rois, est ele loing? — Certes, ce dit Brehus, nanil, ainz est mout
 pres. — Por Deu, donc nos i menoiz, dient li chevalier, puisqe il est si
 pres. Il ne sunt ja leianz si dure gent qe il ne nos herbergent, puisqe
 il verront qe nos somes chevaliers erranz. — ¹⁰En non Deu, fet Brehus,

225. 1. conpeinz] conpeinez L4 6. ostel] [...]stel L4 (*macchia*) 8. sire] *dopo la lacuna segnalata al § 224.4 riprende il testo di Mn, f. 8vb* ♦ ceste part] c. autre p. Mn

ja por mener ne remaindra, qe il m'est avis qe ge sache trop bien la voie dusqe a la tor qe ge vos dis orendroit».

226. ¹Atant se metent a la voie, qe il n'i font autre demorance. Et Brehus conseille a son escuer, et cil se met a la voie maintenant. ²«Seignors, fet Brehus, ge mant mon escuer por savoir qel cortoisie il porra trouver en cels de la tor». Et cil respondent qe il feisoit trop bien. ³En tel guise set decevoir Brehus le bon chevalier qi estoit apelez Helyanor de la Montaigne et le roi Artus et Bandemagus. Il les moine dedenz sa tor et les herberge ilec a son voloir. ⁴Il aloient qerant Brehus et trouvé l'ont, mes ne l'ont mie trouvé qe il le tiengnent por Brehus: ainz cuident veraïement qe il soit un cortois chevalier et mout debonaires. ⁵Il cuident assez savoir, mes a cestui point il ont trouvé plus sage d'eaus en toutes guises. Il set tant mal qe par malice nel porra home decevoir se a poine non.

227. ¹Ensint chevauchent entr'eaus tant qe il vienent pres de la tor. Lors encontrent l'escuer Brehus qi lor dit: «Seignors, bones noveles vos aport: cil de la tor sunt cortoise gent durement et dient qe il vos herbergeront volantiers. – ²Seignors chevaliers, fet Brehus, icestes sunt bones nouvelles et teles dom nos aviom bien mestier a cestui point. – Certes, vos dites bien verité», font li chevaliers. ³Einsint parlant entr'eaus sunt venuz dusqe a la tor et il trouvent la porte overte et bien .x. serjanz qi seioient a la porte qi lor dient, maintenant qe il les voient aprouchier d'eaus: ⁴«Bien veignant, seignors chevaliers, bien vegnant. Il vos est bien venuz d'ostel: en ceste contree ne peussiez vos orendroit trover meison ou vos fuissiez si bien herbergiez com vos estes ceianz». Li chevaliers entrent dedenz la tor et troevent une cort mot bele et il descendent ilec. ⁵Brehuz descent avec eaus et soefre qe cil vont en un grant paleis de leianz. Il ne vet pas avec eaus, ançois s'en entre en une chambre et ilec se fait desarmer et regarder ses plaies au mieus qe il le puet fere et puis fet laver son col et son vis. ⁶Et qant il est remés en une cote a armer, einsint com li chevaliers estoient vestuz qant il portoient les armes, il fait vestir un sien chevalier mout richemant et mout noblemant, ⁷et puis li comande qe il s'en aille au paleis et face acroire as chevaliers qe il soit li sires de leianz, et puis comande a touz les autres qe il le servent come seignor. ⁸Et q'en diroie? Tout lor einseigne mot a mot ce qe il feront et

226. 5. savoir] trouver L4

227. 1. durement et] in Mn *ultime parole del f. 8vb* 2. Seignors chevaliers] S. chevaliers | chevalier L4

coment il se prendront au derrein trop legierement les .iii. chevaliers. ⁹Einsint app[ar]eille son fet Brehus. Il ne mangera jamés de bone volenté devant que il tendra en sa prison Helianor de la Montaigne, qi hui li fist si grant contraire. ¹⁰Brehus s'en entre dedenz le paleis tout autresint com se il n'i eust onques esté. Cil de leienz li font autretel semblant com se il ne l'eusent onqe mes veu, et il tro[v]e que li .iii. chevaliers estoient ja desarmez. Et la clarté estoit par leianz mout grant, qar chandoiles et tortiz de cira i avoit a grant planté, porce que la nuit estoit obscure durement.

228. ¹Qant il virent venir entr'ea[u]s Brehus, il le reçoivent mout honoreement et l'asistrent en lor conpeignie. Atant evos venir entr'eaus le chevalier qi venoit en leu de Brehus. Tout maintenant que li chevalier le voient venir, il se drecent encontre lui et dient entr'eaus: ²«Cist est le seignor de ceianz sanz faille». Et li dient: «Sire, bien veigniez. — Seignor, fet il, bone aventure vos doint Dex. ³Or vos seez, et vos le devez fere par [r]eison, qar ge sai tout certainement que vos estes travailliez et lasiez. Et ge, por fere vos conpeignie, me seirai entre vos». Li chevaliers s'asient et cil entr'eaus, et maintenant comencent a parler d'unes choses et d'autres. ⁴«Biaux seignors, fet li chevalier, dom venez vos orendroit? Et que alez vos qerant par ceste contree? Et quele aventure vos aporta ore a ceste [tor]? — ⁵Sire hostes, respont tantost Helyanor, qant vos volez savoir l'achoisson de nostre venue, et ge la vos dirai maintenant. Ore sachiez que nos alom qerant un tel chevalier qi bien est a mon esciant li plus desloial chevalier qi orendroit soit en tout le monde. ⁶Certes, ge ne cuidasse mie que en tout le monde peust orendroit avoir un si desloial chevalier com est celui que nos alom qerant. — Et coment a il non? fet li chevalier. — Certes, fet Helianor, l'en l'apele Brehus sanz Pitié. — ⁷Ha! fet il, de Brehus ai ge bien oï parler. Dire poez seurement, qant vos celui alez qerant, vos qerez deables proprement! ⁸Celui qerez vos por noiant, qar jamés nel trouveroiz, tant com il se voille celer». Einsint parloit celui chevalier qi estoit en leu de Brehus al bon chevalier qi Helianor avoit non. [...] ⁹Qant il l'a grant piece regardé, il dit a soi meemes que cestui chevalier a il sanz faille veu autre foiz, mes il ne li puet sovenir en qel leu, ne il ne se puet recorder ont. A chief de piece, evos un valet de leianz, ausint com se il ne le coneust, qi li dit:

9. appareille] appeille L4 10. trove] troe L4

228. 1. eaus] eas L4 3. par reison] pareison L4 4. tor] om. L4

¹⁰«Sire chevalier, ne vos poist mie, ge vouldroie un [pou] parler a vos priveemant, et ça en une des chambres, se il vos pleisoit». Brehuz se lieve maintenant, et cil le moine en une chambre. ¹¹Et qant il sunt leienz andui, li vallez li dit: «Sire, savez vos qi vos avez herbergiez orendroit? – Nenil, certes, ce dit Brehus. Ge ne sai riens de eaus, fors qe il sunt chevaliers estranges. Et tu en ses autre chose? – ¹²Sire, oïl. Vos estes vos encore pas gardé des deus geunes chevaliers qi sunt la fors? Savez vos qi est li plus grant? – ¹³Certes, nanil, ce dit Brehus, ne ge n'ai pas tant ente[n]du a regarder d'e[us] com ge entiendi a regarder le viell chevalier. ¹⁴Or sachiez, sire, veraiemant qe vos n'eustes encore nul si riche chevalier et noble ceanz com est celui. – Qi est celui? Di moi, vallet, fet Brehus. – Sire, ore sachiez qe ce est li rois Artus». Lors s'avertis Brehus et dist: ¹⁵«Par mon chief, tu dis voir! Orendroit le vois ge reconoisant tout certainement. Or te tes, ce dit Brehus, de ceste aventure et garde qe tu n'en dies parole. – Sire, fet li vallet, a vostre comandement».

229. ¹Lors s'en retorne Brehus en la sale et s'asist devant les autres chevaliers, et tout einsint com se il fust un chevalier estrange. Et comence adonc a regarder le roi Artus et conoist maintenant qe ce est il voiremant, dom il est liez mout durement, et assez plus qe il ne mostre le senblant. ²Qant il est ore de mangier, cil de leienz metent les tables et dient as chevaliers: «Seignors, venez laver». Et cil le font tout einsint com l'en lor comande et maintenant s'asient au mangier as tables. ³Li chevalier qe il tenoient a segnor de leienz manja adonc avec le viell chevalier. Li rois Artus et Bandemagus mangierent ensemble, et Brehuz manja a cele foiz avec un chevalier de leianz. ⁴Il se tint a la table autresint com se il ne coneust home de leianz et fait semblant qe il soit honteux et vergondeux trop fieremant. ⁵Il pense bien tout autrement qe il ne vet orendroit disant. Il a tant regardé Bandemagus a la table qe il conoist certainement qe cist est Bandemagus, qi niés estoit au roi Urien. Or est plus liez, qar plus est riches de prison qe il ne cuidoit. ⁶Au roi Artus ne velt il mal fere ne nul contraire en nulle mainere dou monde, mes au viell chevalier velt il si grant mal qe ce est une grant merveille, qe il dit bien qe il ne se tient por home se il ne li rent le guerredon de tout le mal qe il li a fet

10. pou] om. L4 ♦ moine] moine L4 13. entendu a regarder d'eus] en ta dui (?) aregarder de L4 (*riscritto*) 14. et noble] anosier L4 (*riscritto*) ♦ s'avertis] sahertis L4 (*riscritto*)

229. 2. au mangier] ai m. L4 (*grattato un jambage*) 3. viell] vieli L4 (*riscritto*)

ainz qe il se parte de leianz: sor celui torne bien Brehus tout son corrouz et toute sa ire. ⁷Aprés ce qe il orent mangié et il est ore de couchier, l'enmoine le roi et Bandemagus en une mout bele chambre et riche et mout fort, et bien fermee d'uis de fer et d'autre bones fermeures, qe bien puet dire seurement cil qi dedenz est qe il n'istra ja, porquoi li huis soit fermez, se cil defors ne l'oevrent. ⁸Et q'en diroie? Qe cele chambre sanz faille valoit une fort prison, fors qe tant i avoit de reconfort qe ele estoit trop bele. ⁹Et en cele chambre vait couchier li rois Artus et Bandemagus, et en une autre chambre couchent, bien pres de cele, le bon chevalier mout noblement et mout richement. ¹⁰Se l'autre chambre estoit bien fort, ou li rois Artus estoit mis, ceste n'estoit mie moinz fort, mes plus encore. Et q'en diroie? Enprisoné sunt a cestui point. Li chevaliers encore ne s'en prenent garde, li escuer sunt tuit enprisoné.

230. ¹Qant Brehus sanz Pitié voit qe il est venuz au desus en cele mainere des chevaliers qi le qeroient por metre lui a mort, et ore les tient il entre ses mains qe il les puet metre a la mort qant il li plera, il dit a ceaus de sun ostel: ²«Seignors, or del conforter. Par cele foi qe ge doi a vos, nos avom hui fet bone jornee et meillor assez qe ge ne cuidoie, qar ge ai en ma prison le roi Artus. Il finera a mon voloir plus qe au suen avant qe il n'ise mes, por chose qe il me sache dire». ³De ceste novelle sunt fierement reconfortez cil de leianz. Encore ne cuidoient il pas qe il eussent le roi Artus entre lor mains, mes qant il sevent qe il l'ont, il en ont mout grant confort et mout grant joie et si sunt plus liez qe il ne soloient estre. ⁴A l'endemain auques matin s'esveille li viell chevalier, et porce qe il veoit qe il estoit tens et ore de chevauchier se lieve il. ⁵Et qant il s'est vestuz, il vient a l'uis de la chambre, mes il ne voit ne un ne autre qi li oevre li huis ne qi li responde de riens. ⁶Il apele par plusors foiz, mes celui apeler ne li vaut, ne il ne trove qi li die mot ne plus qe s'il n'eust home leianz. ⁷Li rois Artus, qi pres d'ilec estoit en une autre chambre, entendoit bien tout clerement coment li viell chevalier apelloit, ne nus ne li voloit respondre.

231. ¹Li rois se vest et chauce par soi meemes et apela Bandemagus qi encore dormoit. Et puis vient a l'uis de la chambre et comence apeler. Il ne trove qi li die riens. Il bote assez, mes tout son boter ne

7. chambre] chambre | bre L4 10. diroie] droit L4 (*riscritto*)

230. 1. mainere des chevaliers] mainer«e»eg c. L4 (*riscritto*) 2. cuidoie] cuidoit L4 (*riscritto*) 6. qe s'il n'eust] qe iseil (*sic*) n'e. L4

li vaut neant, qar li huis des chambres estoient de fer. ²Qant il voit ce, adonc primes li chiet il au cuer qe il sunt pris, et ce est une chose qi mout les desconforte. Lors retorne li rois vers Bandemagus et li dit: ³«Qe vos semble de ce qe nos ne poom oisir de ceianz? – Certes, sire, ge ne sai qe vos en die, fors qe il m'est avis qe ce soit trop grant semblant d'amor qe cist de ceste tor nos vont mostrant. – ⁴Or aille com il porra aler, ce dit li rois. Se il plect a Deu, nos enstrom de ceianz si sauvemant com nos y entrames. Mes tant me dites, se il vos plect, peustes vos arsoir veoir ne conoistre qi estoit li chevalier qi avec nos vint ceianz en ceste tor, cil qi disoit qe il aleit qerant Brehus? – ⁵Sire, ce dit Bandemagus, porqoi le dites vos? – Si m'aït Dex, ce dit li rois, qe il me semble merueilleusement felon et desloial! Et il m'estoit avis qe ge l'avoie ja veu, mes ge ne me puis mie arecorder en qel leu ce fu. – ⁶Sire, ce dit Bandemagus, ne vos esmaiez de nulle autre chose dou monde. Or sachiez tout certainement qe il n'a orendroit home en toute ceste contree qi osast fere granment de chose encontre vostre volenté, puisque il vos conoistroit». ⁷La ou il parloient entr'eaus en tel mainere et il estoient encore a l'uis et regardoient, il voient une damoieie qi passoit par devant l'uis por aler a une de cele chambres. ⁸«Ha! damoisele, fet li rois, se il vos plect, venez ça». Et cele vient tantost au roi et li dit: «Sire chevalier, qe volez vos dire? – Qi est seignor de ceste tor et coment a il non? – ⁹En non Deu, fet la damoisele, ce vos dirai ge bien, puisque voz estes tant desirant de savoir le. Or sachiez qe li chevalier qi arsoir vos amena ceianz herbergier en est seignor et est appelez Brehus sanz Pitié. – ¹⁰Or me dites, damoisele, fet li rois, et set il encore qi nos somes? – En non Deu, fet ele, oïl, mout bien. Il set mout bien qe li uns de voz deus est li rois Artus et li autre est Bandemagus, li niés au roi Urien de Carlot. ¹¹A vos deus ne fera il se cortoisie non, mes a vostre autre conpeignon croi ge bien qe il fera anui et contraire et celi vet il fortement menaçant, ne sai parqoi».

232. ¹Qant ele a dite ceste parole, ele n'i fet autre demorance, ainz s'en vet outre. Li rois resset en son lit, et Bandemagus ausint. Qant li rois a pensé une grant piece, il comence a sorrire et dist: ²«Veistes vos onques me qi tant seust de mal com set Brehus, qi si malicement nos sot arsoir decevoir et metre dedenz sa prison? ³Veistes vos coment il sot remuer ses armes et canchier son cheval? Si m'aït Dex qe n'oï

231. 10. set il encore] souuos eicore L4 (*riscritto*) ♦ qe] qeqn L4 ♦ de Carlot] neu de Carloi L4 (*riscritto*) **11.** fortement] fortro int (?) L4 (*riscritto*)

232. 2. malicement] meleement (*riscritto, v. nota*)

onqe mes parler de chevalier qi tant seust de mal qe Brehus n'en sache encore plus. — ⁴Sire, ce dit Bandemagus, Brehus vit apertement qe si avoit honte receue et qe il ne se pooit revengier par force. Si pensa qe par son enging se vengeroit, puisqe il ne se pooit vengier par armes. ⁵Bien est voirs qe il set mal assez, et trop plus qe ge ne cuidois, porqoi ge di qe mout nos covendra savoir se nos li volom escaper sanz fere sa volenté outreement. — ⁶Certes, ce dit li rois, vos dites verité. Et neporquant, ge sai bien qe nos eschaperom. Il n'avoit hardement en nulle guise qe il nos feist trop grant honte ne trop grant contraire». ⁷A celui point qe li rois parloit en tel mainere, vindrent noveles a Brehus qe li escuers estoient eschapez et foiz en la forest. ⁸Qant Brehus ot ceste novele, il maldit Deu et tout le monde et dit qe il a ore perdu le riche gaanh qe il avoit fet, qar li escuer qi sunt eschapé de la prison feront assavoir par la contree qe li rois Artus est en prison, si s'assembleront tuit maintenant, si sera la tor abatue et prise par force. Einsint dist Brehus a soi meemes. ⁹Il se tient a mort et a desconfit de ceste aventure, qar trop li estoit bien venu, mes orendroit a tout perdu par male garde. Il est tout enragiez de maltalant. Qant il voit qe il ne puet autre chose fere, il s'en vient au roi Artus et li dit: ¹⁰«Sire rois, coment vos est? — Il m'est bien, la toe merci, mes encore me sera mieus qant tu voudras [nos delivrer]. — Sire rois, qe vos avoie ge mesfet, qi arsoir m'aliez qerant por moi ocirre? Certes, ce n'est mie cortoisie ne honor, qi avez pris estrif encontre un povre chevalier. ¹¹Se Dex me saut, se vos ne fussiez mon seignor, ge m'en venjasse si de vos, avant qe vos oississiez de ma prison, qe bien me tenisse a vengé. — ¹²Brehus, ce dist li rois, nos somes ore en ta manoie, tu nos puéz fere, se il te plect, honor et cortoisie et deshonor autresint. De la honor porras tu avoir bon guerredon qar, encore me tiegues tu en ta prison, si sai ge bien qe ge n'i porrai demorer longemant, qar tost le savront l'en par ceste contree. — ¹³Ha! sire rois, ce dit Brehus, deceu estes. Or sachiez qe a ceste foiz venistes vos ceianz si priveemant qe certes vos i porroiz demorer .x. anz devant qe cil de fors vos i sseussent.

233. «— ¹Ha! Brehus, se tu ice me voloies fere, donc seroies tu plus desloial qe nul autre chevalier, qar tu ses bien de voir qe tu es mes hom. ²Et se tu aloies regardant a aucune cortoisie qe ge te fis ja, si com tu ses, et fu cele cortoisie en mon ostel, puisqe aventure m'i amena, et tu meemes m'i as conduit: ce sez tu bien. — ³Ha ! sire rois,

3. encore plus] encort puis L4 (*riscritto*) 5. qe ge ne cuidois] qe il ne cuidoit L4
8. gaanh] gaauh L4 10. nos delivrer] om. L4

ce dit Brehus, se ge vos eusse trouvé par aventure par ceste contree, por mon bien ausint com ge fis por mon mal, ge vos feisse ceiantz tant d'onor com ge deusse fere a mon seignor lige. ⁴Mes qant ge sai tout certainement qe vos m'aliez qerant por ma mort, quel cortoisie vos puis ge fere? Bonté por bonté, mal por mal doit l'en rendre a son enemí. Ore qe diroiz sor ceste chose? – ⁵Brehus, ce dit Bandemagus, se tu es chevalier errant, tu ne dois regarder sanz faille a ceste aventure, qar ce vois tu communement entre les chevaliers erranz qí sunt orendroit enemí mortel et maintenant sunt recordé par eaus meemes. Or donc, qant il sunt pareill conpeignon, vient la concorde après mortel enemistié. ⁶Qe doit donc venir entre le seignor et le vassal? ⁷Encore te mesface ti sires, tu li dois tantost pardonner. – ⁸Sire chevalier, tout ce qe vos m'alez disant ne vos vaut riens. Ore sachiez tout veraiemant qe au roi mon seignor ge ne feroie nule concorde se il ne me creante avant qe il me fera ma volenté de ce qe ge li demanderai. – ⁸Brehus, ce dit li rois, or sachiez tu tout certainement qe tu me porroies bien tel chose requerre qe ge ne te feroie mie en nulle mainere dou monde. – Sire, ce dit Brehus, ge n'en puis mes. Or sachiez qe vos n'istroiz de mes mains devant qe vos aiez fet parti de ma volenté. ⁹Ge vos tieng ore et vos ne tenez mie moi: avantage a qí tient et [non] qí est en saisine. – En non Deu, Brehus, fet li rois, tu dis bien voir! Mes ce me di, se Dex te saut: quel chose me vels tu requerre? – En non Deu, dit il, ge le vos dirai. ¹⁰Or sachiez qe ge voill avoir trives de vostre cors .x. anz touz aconpliz, en tel mainere qe vos ne seroiz encontre moi de nulle chose dou monde. ¹¹Se ge estoie pris et amenez par aventure en vostre cort, vos ne me tendroiz en prison, ainz me delivreroiz le jor meemes, ne ne soufferroiz qe ge aie damage de mon cors en leu ou vos soiez, porqoi vos me peussiez delivrer.

234. ¹«Une autre chose vos reqier ge, qe ge voill qe vos me façoiz herbergeages par vostre regne la ou ge vos deviserai, et chasqun soit ausi bon et ausi riche com est cestui ou nos somes orendroit. ²Ne jamés, tant com ge vive, vos ne m'en toudroiz mie, ne ne soufferroiz a vostre vivant qe autre le me toille. Vos ne feroiz sor moi assemblee por moi fere damage ne honte, ne ne soufferroiz qe autre le me face a vostre pooir. ³Toutes les foiz qe ge vendrai la ou vos seroiz, vos me donroiz armes et cheval, porqoi vos soiez aaisiez dou doner. Tout ce voill ge qe vos me creantez a doner et a tenir, ou autrement, ce sachiez, vos ne seroiz delivré de ma prison tant com ge vos i puisse

tenir. Mes ensint sanz faille poez vos estre delivrés orendroit». ⁴Qant li rois ot ceste nouvele, il ne set mie trop bien qe il doie respondre. Et Bandemagus, qi le voit penser et qi aperçoit [qe] cestui couvenant n'otroie il pas dou tout a sa volonté, li dit adonc: ⁵«Sire, qe pensez vos? Tout ce qe Brehus vos requiert poez vos seuremant dire a honor de vos. Voirement une chose voudroie ore qe il vos creantast qe, tout ensint com il velt avoir trives de vos, qe il doint orendroit trives as dames et as damoiseles a cui il a fait anui et contraire plus souvent qe il ne devroit. — ⁶Certes, ce dit li rois Artus, se il lor velt trives doner en tel mainere com vos li avez orendroit devisé, ge sui apareilliez qe ge li face tout ce qe il me vet demandant. — ⁷Certes, fet Brehus, et ge lor doig orendroit trives dusqe a .x. anz! Se il n'estoit voirement qe eles me feissent si grant mesfet qe eles servissent mort, a celui point ne lor donroie ge trives fors de la mort. — ⁸Ge ne voill, fet li rois, qe vos autre chose me creantez. — Et ge vos creant loiaument, ce dit Brehus, ceste chose. — Donc me delivre orendroit, ce dit li rois, qar tout ce qe tu m'as demandé te ferai ge trop volantiers, et ce te creant ge loiaument. — ⁹Sire rois, fet Brehus, donc estes vos delivrés et vostre conpeignon autresint. Mes li viel qe ge tieng ceianz en prison qi yer me fist le grant contraire et le grant annui qe vos veistes ne met ge pas en ceste delivrance. ¹⁰Ce vos faç ge bien asavoir: celui voill ge ceianz tenir por vengier moi de la grant honte qe il me fist. A vos, qi ne m'avez encore mesfet se trop petit non, vos outroie ge bien la delivrance, mes a lui non. Ge vengerai sor lui, se ge onques puis, ce qe il m'a fet.

235. «— ¹Brehuz, ce dit li rois, or sachiez tout certainement qe il est mestier qe il soit delivrés avec moi ou ge n'istrai de la prison. Ge ne voudroie estre delivrez sanz lui. — Or vos souffrez donc, fet Brehus, tant qe ge aie parlé a lui. — Va, dist li rois, et retorne tost a nos». ²Brehus s'en vait a l'autre chambre et trouve qe li bon chevalier estoit a l'uis, regardoit ou paleis par un pertus qi estoit a l'uis dou fer. Tout maintenant qe Brehus le vit, il li dit sanz saluer le: ³«Coment vos est, dan chevalier?». Et celui, qi bien reconoist Brehus, li respont: «Encore m'est bien, la Deu merci. — Certes, ce dit Brehus, ce me poise». ⁴Et li bon chevalier se test atant, il n'ose pas a ceste foiz dire qantqe il pense, qar grant poor a de Brehus, porce qe grant contraire li avoit fet le jor devant. ⁵Il ne chei pieçamés en nule prison dom il eust si grant

234. 4. qe cestui] c. L4

235. 5. chei] chel L4 (*ritoccato da mano seniore?*)

doutance com il a orendroit de ceste, qar il set tout certainement qe Brehus si est trop fellon et si li velt mal de mort et si le tient en tel prison dom il n'eschapera a pieçamés, se il meemes ne le delivre. ⁶Por ce se test il et escoute tout ce qe Brehus voudra dire orendroit.

236. ¹«Sire veillart de male part, ce dit Brehus, vos souvient il dou grant anui et dou grant contraire qe vos me feistes yer? – ²Brehus, ce dit li bon chevalier, se vos eu avez autre chose qe vos ne vouxissiez, vos ne devez tant blasmer auqun com vos meemes, qar vos savez tout de verité qe ge ne començai mie le fet, mes vos l'encomençastes. ³Ge n'avoie nulle volanté de combatre a vos ne a autre qant vos me meistes en la bataille, vouxisse ou non. Vos vos feistes fere mal a fine force. – ⁴Certes, veillart, fet Brehus, vos estes mors. Jamés a jor de vostre vie n'istroiz de ma prison ou vos estes orendroit. – Se ge muir ici, fet li bon chevalier, ge ne serai pas le p[re]mier qi soit mors en autrui prison. Ce ne me fet nulle poor. ⁵Vieigne la mort desoremés, qant ele voudra venir, qar ge la desir chasqun jor. – Veillart, ce dit Brehus, vostre reconfort ne vo[s] va]ut, vos morroiz ici honteusement. – ⁶Non ferai, fet il, mes se ge fusse venuz honteusement et ge de tele bataille mort fusse par auqune aventure, adonc morisse ge sanz faille honteusemant. Mes se ge muir en tel mainere come tu dis qe tu me feras morir, ja en tel mort n'avrai ge desonor. ⁷Se tu me fas ici morir, encore sera ma mort vengee, bien le sai tout certainement, qar tu en morras.

237. «– ¹Veillart, se Dex te doint bone aventure, ne tendroies tu a merveilles se ge te delivrasse de ceste prison? – Nenil, fet li bon chevalier, et si t'en dirai raison porqoi. ²Tu fas mal a chasqun dont tu puéz venir au desus, toutes tes oevres sunt de mal. Et qant ensint est avenu qe onques ne feiss se mal non, ce ne seroit mie merveile trop grant se tu, entre .c. mile mels qe tu as fet, feisoies orendroit auqun bien. – ³Veillart, ce dit Brehus, mout ses arrie[r]es et avant. – Se ge granment seusse, tu ne me tenisses orendroit en ceste prison, ce dit li bon chevalier, einsint com tu me tiens. – ⁴Or me di, veillart, qe vouldroies tu vers moi fere par covenant qe ge te delivrasse? – ⁵Certes, Brehus, ce dit li bon chevalier, or saches tout certainement: il n'est

236. 2. eu avez] eussiez L4 4. premier] pmier L4 5. vos vaut] vout L4
6. venuz honteusement] v. honteusement L4 (*riscritto*) ♦ mort fusse] mortssse L4 (*riscritto*) ♦ morisse] moiusse L4 (*riscritto*) ♦ ja] ieu L4 (*lezione del copista*)

237. 1. t'en dirai] tondrou (?) L4 (*riscritto*) 2. est avenu] est avenit L4 (*riscritto*)
3. arrieres] arrees L4 (*riscritto*) ♦ ne me] ne [.ne L4

riens qe ge peusse fere a mon honor qe ge ne fesse volantiers por oisir de tes mains. ⁶Qar ce te faz ge bien asavoir, qe en ta prison ne en autrui ne demorroie ge mie volantiers, qar tant ai autre foiz demoré en prison qe il n'est ore nul mortel home a cui il ne peust anuier qi tant y eust demoré com ge ai fet. — ⁷Veillart, fet Brehus, porce qe ge te voi si viell qe a nul home de tom aage ne vi ge onques porter armes, ai ge pitié de toi sanz faille. Et por ce te delivrerai, se tu vels, par un covenant qe ge te dirai. ⁸Se tu orendroit me vels creanter loiaument qe tu jamés jor de ta vie ne metras main en moi por aventure qi aviegne tant com tu me conoistras, ne mon damage ne souffreras tant com le puiestes destorner [et] a touz les besoing qe ge te reqerrai tu m'aideras de ton pooir, ge sui appareilliez qe ge te delivre. ⁹Autremant pués tu remanoir en ceste prison touz les jors qe tu vivras mes. Qant li bon chevalier entent ceste requeste, il se tient a mout reconfortez et dist a Breüz: ¹⁰«Me vels tu delivrer se ge te pramet loiaument a tenir covenant de ce qe tu me demandes? — Oïl, ce dit Brehus. — Et ge le te pramet loiaument, ce dit li bon chevalier. — ¹¹Et ge te delivrerai orendroit», ce dit Brehus. Et maintenant fet venir les clés de la chambra et oevre l'uis et dit: «Or poez venir seurement, qar ge vos qit de toutes choses». Et puis s'en vait au roi Artus et le delivre maintenant par les covenances qe entr'eaus deus estoient.

238. ¹Aprés ce qe il sunt delivré, Brehus comande maintenant qe les tables soient mises, et l'en le fet tout einsint com il le comande. Et il s'aseient maintenant, qe bien estoit tens de mangier. ²«Sire chevalier, fet Brehus au viell chevalier, savez vos qi est cest seignor qe vos viez?». Si li mostre le roi Artus. — Certes, nanil, fet li viell chevalier, ge ne le conois fors qe seulemant de veue. — ³Non? fet Brehus. En non Deu, ge le vos ferai conoistre. Or sachiez tout certainement qe ce est li rois Artus qi fu fill au noble roi Uterpendragon. ⁴Desoremés ne vos tendrai ge a si sage com ge fesoie devant, qi chevauchiez avec le meillor home del monde et si ne le conoisiez. ⁵Qant li bon chevalier qi Helianor avoit non entent ceste nouvelle, il devint tout esbahiz et regarde le roi et dit: «Sire, por Deu, dites la verité de ce qe Brehus dit, qar encore ne croi ge mie». ⁶Li rois comence a rrire et beisse la teste et dit: «Brehuz, vos me fetes honte en vostre ostel, ce n'avoie ge mie deservi. — Ha! sire, fet Brehus, de ce ne vos devez vos pas corroucier. ⁷Cist bon chevalier qi ci est, por les bones noveles

8. et] *om.* L4

238. 1. Brehus] *bic* L4 (*riscritto*)

qe ge li ai dites de vos, si a orendroit oublié la vilenie qe ge li ai fete a ceste foiz dedenz mon ostel, ⁸et desoremés se tient il vostre, porce qe il ne fessoit mie devant. Sire, ge vos faz avantage, et si ne m'en savez gré. – Certes non, fet li rois, ce sachiez tout certainement».

239. ¹Lors se met li viell chevalier qi Helianor avoit non a genollz devant le roi Artus et li voloit beisier les piez. Mes li rois ne li soufre mie, ainz le relieve vistement et li dit: ²«Sire, ne me fetes vilenie, ge vos en pri. Encore soie ge rois, si n'a en moi tant de bontez qe ge doie ce souffrir d'un si bon chevalier com vos estes, ³qe, si m'aît Dex, il a en vos tantes bontés et tant de valor qe vos seriez miels digne de corone porter qe ge ne sui. Et por ce ne voill ge mie qe vos me façoiz ceste honor, qar ce seroit trop. – ⁴Sire, fet li bon chevalier, or sachiez qe ge sui tant liez de ce qe ge vos conois qe, si voiremant m'aît Dex, ge ne fusse si liez ne si joieux orendroit se ge eusse gaigné un bon chastel, qar ge vos conois einsint com ge voloie conoistre. ⁵Ge desiroie fieremant qe ge vos peusse trouver tout einsint com ge vos ai trouvé. Et qant ge voi qe vos, en cestui voiage ou vos estes orendroit, avez vos encomencié maintenir la vie des chevaliers erranz si bien et si celeemant, ce est une chose qi me doine droite certainté de vos, qe vos ne faudroiz en nulle guise d'estre preudome. ⁶Et certes, sire, vos le devez bien estre par reison, qar vostre pere ot tantes bontés en soi com nos savom, et com encore recordent cil qi entor lui repeiroient. Et qant einsint est venu qe ge sai, biau sire, qi vos estes, or vos pri ge, se il vos plect, qe vos me dioiz qi est cist seignor». Si li mostre Bandemagus. ⁷«Certes, volantiers, fet li rois. Or sachiez qe il a non Bandemagus et est niés le rois Urien de Carlot. – Sire, fet li bon chevalier, il devra bien estre preudome, se aventure ne faut en lui. ⁸Beneoit soit Nostre Seignor qi m'amena en cest païs, qar certes ge ai trouvé assez plus bele aventure qe ge ne cuidoie trouver. Se ore avoie trouvé celui bon chevalier qe ge aloie qerant, donc seroit ma qeste finee». ⁹Lors s'assient et comencent a mangier. Orendroit sunt mout plus reconfortez qe il n'avoient devant esté. Brehus lor sert trop noblement et trop richemant. Li rois demande ou sunt si escuers: ¹⁰«En non Deu, dit Bandemagus, il s'enfoïrent. – Voirement s'enfuïrent il anuit, ce dit Brehus. Se ge ne les eusse perduz einsint com ge les perdi, ge vos pramet loiaument qe encore vos tenisse ge en prison: lor delivrance vos a aidie a cestui point». ¹¹Li rois s'en rit qant il entent ceste nouvele et puis dit: «Brehus, qi t'a [a]pris tant de mal com tu

239. 5. la vie] laine (*sic*) L4 11. t'a apris] t'a pris L4

sez? Sainte Marie, ja es tu encore jovencel, et porqoi te delites tu si merveillement de fere mal? ¹²Toutesvoies ge sai bien qe tu es vaillant des armes et preuz et hardiz: porqoi te delites tu tant de fere mal as dames et as damoiseles? ¹³Ja sez tu bien qe il n'appartient a chevalier a fere si grant felenie, ne si grant vilenie com est ceste qe tu fes. Por Deu, garde t'en desoremés! ¹⁴Et tu sez bien qe autre foiz le prameis tu ja et orendroit le m'as tu pramis. Or saches qe se tu le fes en tel guise com ge di, tu feras sens et ge t'en rendrai guerredon».

240. ¹Quant li rois ot parlé einsint, Brehus li respont: «Sire rois, fet il, merveille ai de ce qe vos m'alez disant! Mes coment et en quel mainere porroie ge amer les damoiseles et les dames? ²Touz mis linnages en est mors por eles, et ge meemes sanz faille en a receu honte et mainte vilenie por qoi ge ne les puis amer. Voiremant, porce qe ge [ne] voudroie dou tout aler encontre vostre volanté, lor doing ge bien trives de moi, mes bien sachiez qe a celui point qe eles me feront vergoigne ne traïson recomencerai ge la guerre, et faudront les trives de moi. — ³Si m'aït Dex, dist li rois, ge te lou en toutes guises qe tu les leisses desoremés, tes males costumes. Et se tu le fes por amor de moi, ge te pramet de ci en avant de fere amor et cortoisie de tout ce qe tu me reqerras. — ⁴Moutes mercis, sire, ce dit Brehus, et ge m'en garderai, puisque ge le vos ai pramis. Mes ge vos faz asavoir qe se mal me vient de lor part premierement, ge ne lor tendroie puis ne trieve ne pes». ⁵A celui point tout droitement qe li rois parloit a Brehus, atant evos leianz venir .ii. chevaliers armez et avec eaus venoient les escuers qi cele nuit estoient eschapez de la prison. ⁶Li dui chevalier, qi ja dedenz estoient entrez, leïsserent lor chevaux la defors dedenz la cort, et els vindrent a pié, garniz mout richement de lor armes, et furent entrez la dedenz, qar bien cuidoiert sanz faille le roi Artus trouver en prison. ⁷Quant il virent le roi seoir a la table si noblement et si richement et Bandemagus pres de lui, il li dient: «Sire, Dex soit a vostre mangier. ⁸La Deu merci, nos veom qe vos avez assez meïllor prison qe nos ne cuidiom, qar vos avez plus trouvé en Brehus cortoisie qe l'en ne nos disoit». ⁹Li rois Artus, qi encore ne conoisoit les deus chevaliers, dit: «Seignors, bien veigniez vos. Desarmez vos, si venez mangier. Nos nos poom plus loer de Brehus qe plaindre. — ¹⁰En non Deu, sire, dient li chevalier, de ce somes nos mout joiant». Lors ostent li dui chevaliers lor hyaumes. Et quant il ont lors testes desarmees, li rois

14. qe autre foiz] qe tu a. f. L4

240. 2. ne] om. L4

est adonc trop fierement reconfortez, qar il veoit qe li uns des chevaliers estoit messire Gauvains et li autres estoit Sagremors li Desreez.

¹¹Et sachent tuit qe a celui tens estoit messire Gauvainz trop preuz des armes, et li dura bien cele grant proesce dusqe atant qe Galeot, li sires de Lointanes Ilhes, assembla em champ encontre le roi Artus, einsint come l'*Estoire de Lancelot dou Lac* le devise tout apertement, et nos meemes en dirom aucune chose en cest livre. ¹²Mes atant leisse de lui et retourne a nostre estoire, et dit einsint.

241. ¹Qant li rois Artus voit monseignor Gauvains son neveu et Sagremor li Desreez, qu'il tant amoît, il est trop liez, trop joianz. «Ha! fet il, seignors chevaliers, vos soiez li tres bienvenuz. Et coment eustes vos noveles de moi, qi venistes ore si a point? – ²Sire, fet messire Gauvainz, cist escuers nos i firent venir, qar il nos distrent qe Brehus vos tenoit ceianz en prison. Nos eumes poor de vos et doutance mout grant et por ce venimes nos ceste part. – ³En non Deu, fet li rois, ge sui mout liez de vostre venue. Or tost, asseez vos». Et il le font tot einsint com il le comande et mangent mout eforceement. ⁴Qant messire Gauvainz ot mangié, il comence a regarder le viell chevalier. Et qant il l'a un pou regardé, il li dist: «Sire chevalier, or sachiez qe ge vos aloie qerant. Ja a plus d'un mois, se Dex me doint bone aventure, qe ge ne vos finai de qerre. ⁵Tant en ai soufert poine et travaill qe il me tornoit a grant anui. Mes qant ge vos ai trouvé ci, ge ne vos irai querant plus en autre leu. Et q'en diroie? Ce ne vos puis ge plus celer. Or sachiez tout veraïement qe ja si tost n'istroyz de ceianz com vos seroiz a la meslee». ⁶Qant li rois ot ceste novele, ce est une chose dont il n'est mie joiant, qar il ne vouxist en nulle mainere dou monde veoir la meslee de son neveu et dou bon chevalier qi Helyanor avoit non, a ce qi il li estoit bien avis qe Helyanor estoit si preuz des armes et si puisant q'a encontre lui ne peust messire Gauvainz a loing durer. ⁷Et por ce a li rois poor et doutance de cest estrif, et por ce demande il a monseignor Gauvainz: «De quoi conoisiez vos cist chevalier? – ⁸En non Deu, sire, fet messire Gauvains, ge le conois de grant desonor qe il me fist n'a encore mie mout grant tens. Il me tolli une damoisele qe ge conduisoie, puis l'ai ge qise mout longemant, et si fu tele m'aventure qe ge ne la poi trouver. ⁹Et qant ensint est avenu, la Deu merci, qe ge l'ai trouvé, a cestui point il est mestier, se Dex me saut, qe il me rende la damoisele ou qe il se combatte a moi».

10. Sagremor li Desreez] S. li desirez L4 (*così anche in seguito, v. nota*)

242. ¹Quant il a sa reison finée, li viell chevalier parole et dit: «Comant avez vos non, biaux sire, qe si grant volenté avez de combattre a moi?». Et cil respont: «L'en m'apelle Gauvains. Ge ne sai ge se vos encore oïstes parler de mon non. — ²Certes, fet li viell chevalier, de vos ai ge bien oï parler autre foiz. Mes si veraïement m'ait Dex com ge n'i trovai pas d'assez en vos si grant cortoisie com l'en conte, ainz i trovai plus d'outrage qe ge n'i deusse trouver. ³Vos savez tout certainement qe de cele damoisele qe vos demandez aviez vos fet tort et force a celui chevalier a cui ge la rendi, qar, a celui point droitement qe vos vos prouvastes avec lui, estoit il si navrez qe il ne se pooit defendre de vos ne d'autre. ⁴Vos ne regardastes pas a ce, ainz li correustes sus et li touxistes la damoisele. Fu ce raison, se Dex vos saut, de tolir au chevalier q'i aidier ne se pooit sa damoisele? ⁵Por Deu, messire Gauvains, ore sachiez tout certainement qe se Galeot le Brun fust orendroit en vie et vos trovast orendroit, il ne vos feist une tel cortoisie com cele fu por gaaignier une bone cité. ⁶Et certes, il n'a orendroit en tout le monde nul si loial chevalier q'i bien seust la vostre reison et la moie qe il ne vos en donast le blasme. — ⁷Sire, fet messire Gauvains, au derrein se prouvera la vostre cortoisie et la moie. Il est mestier, se Dex me saut, qe vos la damoisele me rendoiz, se ge onques puis, ou qe ge face mon pooir de revengier la honte qe vos me feistes a celui point qe vos me tolistes la damoisele par vostre outrage».

243. ¹Li rois est de cestui estrif doulenz et iriez durement, qar il ne vouxist en nulle guise dou monde qe messire Gauvains se preist au viell chevalier ²a ce qe il li estoit bien avis qe de greignor pooir assez estoit li viell chevalier qe messire Gauvains, por ce demande il ses armes et l'en li aporte tantost. ³«Coment, sire? ce dit Brehus. Avez vos donc en volenté qe vos si tost vos departoiz de mon ostel? Or sachiez tout de voir qe ge fusse trop joianz se vos vouxissiez demorer hui toute jor et demain encore. — ⁴Certes, Brehus, dist li rois, ge ai assez demoré orendroit. Mes bien saches de voir qe ge n'avoie talent de demorer ci, et por ce m'en voill ge partir». Li autres chevaliers prennent lor armes. Et quant il [sunt] appareilliez, il viennent en la cort aval et montent et s'en issent fors de leianz. ⁵Brehus les convoie un petit et puis se remet en la tor, et cil se metent au chemin. Tout maintenant qe il furent un petit esloigniez de la tor, li rois, q'i en nulle maniere ne voudroit mie veoir la meslee dou bon chevalier et de mon-

242. 3. prouvastes] trouvastes L4 7. Sire] Sire Sre L4

243. 4. sunt] om. L4

seignor Gauvains son neveu, qe il n'amoit mie moins de soi meemes, il se torne vers le bon chevalier et li dit: ⁶«Sire compeinz, ge vos pri qe vos me dioiz la verité de la damoisele. Dites moi le commencement et la fin. – Sire, fet cil, qant il [vos] plect qe ge vos en die le voir, et ge le vos en dirai tout. ⁷Et sachiez, sire, qe ge ne vos en dirai se la verité non. Or escoutez com il avint. Bien est verité sanz doute qe il avint, or a un mois conpli et plus un pou, qe ge m'aconpaignai a un chevalier qi estoit dou roiaume de Nohombellande. ⁸Qant ge me mis en la conpeignie dou chevalier, assez li demandai souvent qi il estoit, mes il ne me voloit riens dire fors qe il estoit un chevalier errant. ⁹Et neporqant, ge n'oi mie avec lui gramment demoré qe ge conui certainement qe il estoit preudome del cors, et vaillant et si cortois de tout en tout qe il ne m'est pas avis, se Dex me saut, qe ge peuse orendroit trover nul plus cortois chevalier de lui. ¹⁰Li chevalier menoit en sa conpeignie une trop bele damoisele et cortoise assez. Un jor avint qe nos venimes a un pont qi est pres de Norgales. ¹¹A celui pont est tel costume qe il est mestier qe chascun chevalier qi ilec vient et qi conduisse damoiselle combate. Il est mestier qe il combate ilec a deus chevaliers, ou il couvient qe la damoisele remaigne. ¹²Se il est outrez, l'en li tout le cheval et les armes, et se il se puet delivrer, il s'en passe outre et enmoine sa damoisele avec soi.

244. ¹«Qant nos venimes pres dou pont, porce qe savoie mieuz la costume dou passage qe il ne savoit, li dis ge: “Ge vos pri qe vos me leisiez conduire vostre damoisele a cestui passage”. ²Li chevalier fist adonc semblant qe il fust trop corrociez et respondi adonc: “Sire chevalier, vos me fetes honte et deshonor qe ce me dites, qe ge ne me cuidois mie avoir deservi qe vos me deissiez se cortoisie non. ³Or sachiez tout veraïement qe se ge fusse orendroit navrez de .ii. plaies ou de .iii., ou de .iiii., ou de .v., si ne bailleroie si tost ma damoisele a garder ne a conduire a nul chevalier qe ge sache orendroit en cest païs com ge feroie a moi meemes, qar encore me fis ge plus en ma lance qe ge ne faz en nulle autre”. ⁴Ge respondi au chevalier: “Ore sachiez, sire conpeinz, qe ge ne le disois pas por deshonor de vos, mes por l'amor qe ge avois a vos, et porce qe ge vos feroie volantiers aaise et ci et alors”. ⁵Sire, tel parlement com ge vos cont eumes nos, entre moi et le chevalier, avant qe nos venissom au pont. Qant nos fumes venuz au pont, nos trovames .ii. chevaliers touz appareilliez de prendre la damoisele, par la costume dou passage, ou de combatre au

6. il vos plect] il p. L4

chevalier qi la conduisoie. ⁶Et q'en diroie? Il n'i ot autre [de]morance puisqe nos fumes venuz au pont. Li chevalier leissé corre tout premie-
 rement encontre les deus et en abati un de la premiere joste, mes tant
 li avint adonc qe il fu de la premiere joste navrez. ⁷Et puis, ou toute
 la nafre, il leissa corre sor l'autre et s'entrebatièrent de cele joste. Sire,
 porqoi vos feroie ge lonc conte? ⁸Tant se travailla mon conpeinz a
 celui point qe il mist a desconfiture les deus chevaliers, qi estoient
 assez preudome, se Dex me saut. ⁹Mes bien sachiez, qantqe il fust
 venuz au desus bien dou tot fu il navrez et si malmenez en toutes
 guises qe il ne pooit [chevauchier] se petit non. Et la ou nos estiom
 partiz dou pont, nos avom bien chevauchié sis lieues englesches.
¹⁰Adonc avint qe nos encontrames monseignor Gauvains, qi ci est.
 Tout maintenant qe il vit la damoisele, il dist a mon conpeignon:
¹¹“Sire chevalier, ge preing ceste damoisele par la costume dou roiau-
 me de Logres: ou vos la me qitez dou tout, ou vos la defendez dou
 tout encontre moi”. ¹²Li chevalier, qi de grant cuer estoit, ne velt pas
 dire a cele foiz qe il nel pooit fere. Por ce leissa il corre sor monsei-
 gnor Gauvains, et messire Gauvains sor lui. [Et messire Gauvains], qi
 adonc estoit fres et reposez et sainz de ses membres, feri le chevalier si
 roidement qe il le porta tantost a terre, si qe il gisoit en paismeson et
 non avoit pooir de soi remuer.

245. ¹«Messire Gauvains, qi ci est, qant il ot abatu le chevalier, il
 ne le regarda pas, ainz s'en ala tantost a la damoisele droitement, si la
 prist et s'en parti atant. ²Ge, qi avoie celui fet veu tout apertement,
 assez estoie plus corrouciez dou chevalier qi ne se remuoit qe ge n'es-
 toie de la damoisele qi s'en aloit avec cist chevalier qi ci est. ³Ge des-
 cendi et vins et li ostai le hyaume de la teste, et il me comença adonc
 a rregarder. Et il estoit si foibles durement qe il ne valoit gueres mieuz
 d'un home mort. ⁴Qant il ot pooir de parler, la premiere parole qe il
 me dist [fu]: “Ou est ma damoisele alee?”. Et ge li dis qe li chevalier
 l'enmenoit avec lui. “Voir? dit cil. Donc sui ge mors. ⁵Or sachiez tout
 veraïement, sire conpeinz, qe se vos ne la me rendez, ge m'ocirai tout
 maintenant, qe ge meemes m'ocirai devant vos: qe ge vos di loiaue-
 ment qe de la damoisele ne me porroie ge souffrir en nule mainere de
 cest monde. ⁶Or est en vos de ma mort et de ma vie. Se vos ma
 damoisele m'amenez, vos me rendez ma vie, senon ge sui morz sanz

244. 6. demorance] morance L4 9. chevauchier] om. L4 12. Et messire
 Gauvains qi adonc] qi a. L4 (saut?)

245. 4. fu] om. L4

doutance”. ⁷Qant ge entendi la requeste de mon conpeignon, porce qe il m’estoit bien avis qe autrement estoit il mors, ge me parti tantost de lui et vins errament après monseignor Gauvains, et fis tant en quelqe mainere qe ge recouvrai la damoisele et la rendi au chevalier qi moroit por la soe amor. ⁸Sire, or vos ai conté mot a mot einsint com il avint. Or en donez, se il vos plest, le vostre esgard, se ge doi estre blasmez ou non et se messire Gauvains fist a cele foiz cortoisie ou vilenie. ⁹Et neporqant, ge ne l’oseroie mie dou tout, monseignor Gauvains, blasmer de celui fet, qar ge sai tout certainement qe il ne conoisoit mie qe li chevalier fust navrez qant il l’asailli. ¹⁰Mes certes, se il le seust, il en deust avoir grant blasme. Sire, ore vos ai finé mon conte. Dites en vostre pleissir, qar ge sui toz appareilliez de fere a vostre comandement». Et qant il a dite ceste parole, il se test et escoute qe li rois Artus en voudra dire.

246. ¹Qant il a finé son conte, li rois Artus se torne envers monseignor Gauvains. «Coment? fet il. Por ceste achoison qe cist sires orendroit a devisé si vos volez a lui combatre? En non Deu, biaux niez, ceste est male reison qe vos avez encomencié a maintenir! ²Or sachiez qe ce n’apertient a vos ne a null chevalier qi voille a honor venir. Porqoi ge vos defent, tant com ge le vos puis defendre, qe une autre foiz ne vos aviegne tele aventure, qe bien sachiez qe ge m’en tendroie encontre vos dou tout». ³Messire Gauvains ne set qe il doie respondre qant il voit qe son oncle parole si fieremant encontre lui. Il se test et ne dit plus a cele foiz, einsint chevauchent ensemble cele matinee. ⁴Li rois demande a monseignor Gauvains: «De quel part venez vos? – Certes, sire, fet il, n’a pas encore mout qe ge fui en la fin de Norgales, mout pres de Soreloys. – Or me dites, fet li rois, oïstes vos pieçamés parler dou roi Meliadus? – ⁵Certes, sire, il a bien deus mois conplis qe ge le vi, ne puis n’en oï parler granment. – ⁶Or me dites, fet li rois, vos qi avez ore une grant piece repairé entre les chevaliers, a cui s’acordent il orendroit? Qi sunt les meillors chevaliers qi armes portent en ceste saison? – ⁷Sire, fet messire Gauvains, ore sachiez tout certainement qe en cest país puet l’en bien trouver de bons chevaliers qi armes portent en la Grant Bretaine [et] de si bons qe l’en n’i porroit amender. – ⁸Or me dites, fet li rois, de quel est plus parlé. – Sire, fet messire Gauvains, li rois Meliadus de Loenois en est li uns, et li Bon Chevalier sanz Poor en est li autres, et Aroan de Sessoigne autre, et li rois Leodagans de Carmelide autre, et li rois Oel

246. 2. tele aventure] cele a. L4 7. et] om. L4

autre, et li Morehouz d'Yrlande autre, et messire Lac autre, et Audanain li Rous autre, et Hervis de Rivel un autre: ⁹tuit cist pseudome qe ge vos cont, si ont porté armes tout cest yver par la Grant Bretagne. Avec ces porta armes un chevalier qi porte un escu tout a or. ¹⁰De cestui vos puis ge bien, sire, dire et conter merveilles, qar certes ge en vi merveilles en plusors leus». Qant li rois ot ceste nouvelle, il est einsint com touz esbahiz, qar trop grant merveille le vient de ce qe messire Gauvains li dit dou roi Leodegan, ¹¹qar, porce qe il estoit si riche rois et de si grant pooir, ne cuidast il en nulle mainere qe il vouxist porter armes entre les chevaliers erranz. Mes orendroit, qant il entent ceste nouvele, il devient touz esbahiz et merueilleus mout.

247. ¹Après ce qe messire Gauvains ot sa reison finee, li rois li dist: «Veistes vos ces chevaliers de qi vos avez parlé ici? — Sire, oïl, ge les vi sanz faille. — Et qe vos semble dou roi Leodegan? Le veistes vos en aucune fort esprouve? — ²Sire, fet messire Gauvains, si m'aït Dex com ge le vi un jor en une si fort esprouve et si fort enprise qe ge ne cuidase pas qe il se peust delivrer honoreement! ³Et toutesvoies, s'en oïssi il par sa proesce si noblement qe a grant honor li porront atoner tuit cil qi le virent. Sire, qe diroie autre chose? ⁴Or sachiez tout veraïement qe li rois Leodegans est si preuz des armes et si vaillant de son cors qe, se ge ne l'eusse veu, ge n'en creise home dou monde. De tel home puet l'en bien dire seuremant qe il est bien digne de corone. ⁵Sire, q'en diroie? Si m'aït Dex, ge ne croi pas qe au tens le roi Uterpendragon fussent fetes en un yver plus estranges chevaleries qe l'en a fet en cest yver par le roiaume de Logres. ⁶L'en vos en porroit conter les plus merveilleuses aventures qe l'en oïst conter. Li chevalier a l'escu d'or a fet merveilles en toutes les contrees ou il vint. ⁷Si m'aït Dex, ge ne croi pas qe l'en peust dire greignors merveilles de Galeot le Brun qe l'en porroit de lui. Et q'en diroie? Sire, ge vos faz assavoir por verité qe li chevalier a l'escu d'or est tout le [meillor dou] monde».

248. ¹Qant li rois Artus entent ceste parole, il dit a monseignor Gauvains: «Vos loez mout le chevalier. — Sire, fet il, einsint voiremant m'aït Dex qe ge ai tant veu de lui qe ge ne cuidasse qe un chevalier peust avoir tantes bontez com il a seulemant. ²Et se ge ne l'eusse [veu]

10. grant merveille] m. g. L4 ♦ roi Leodagan] roi de L. L4

247. 3. toutesvoies] [.]outesvoies L4 (buco) 4. armes] rip. L4 7. meillor dou] om. L4

248. 2. veu] om. L4

ainsint com ge le vi, ge n'en creisse tout le monde. Sire, de celui vos puis ge dire droites merveilles, a sa proesce ne se prent nulle autre chevalerie. ³Cil est bien et pris et honor de toute chevalerie de cest monde. – Or me dites, fet li rois, qel chevalier est il a certes? – Biaux sire, fet messire Gauvains, ge ne le vi onques a ma volanté se armé non. ⁴Mes cil qi ont herbergié avec lui et qi l'ont veu a loissir dient bien qe ce est li plus biaux chevalier qe il onques veissent, et si estrangement [fort] qe a sa force ne puet nul autre home durer. ⁵Et est bien ausint grant chevalier com est li rois Meliadus de Loenois, ou greignor encore. Il s'est esprouvez cest yver encontre les plus renomez chevaliers qe vos sachiez orendroit, mes nus ne puet a lui durer se petit non. ⁶Danayn li Rous, qi tex chevalier est com vos savez, ne puet avoir a lui duree». Li rois, qi de ceste nouvelle est trop merveillant, se torne envers le bon chevalier et li dit: ⁷«Sire, a vos qi le conoissez, si com ge croi, voill ge demander de celui bon chevalier a l'escu d'or. Dites moi se vos savez qi il est et de qel lignage il est estraiz, qar ge sui trop desiranz de savoir qi il est. ⁸Por les granz merveilles qe ge en ai oï conter ne porroit il estre en nulle guise qe il ne fust de haut lignage. Por ce vos pri ge qe vos me dioiz aucune certanité, se vos le savez». ⁹Aprés ceste parole respont li bon chevalier et dit: «Sire, ore sachiez veraïement qe a vos ne voudroie ge mentir ne dire nulle chose qe ge ne seusse certainement. ¹⁰Ce vos faz ge bien asavoir qe ge le vi si noble chevalier qe il n'avoit pas encore .iii. mois qe il avoit receu l'ordre de chevalerie, et le vi adonc a l'entree de Nohombellande. ¹¹Et de ce vos di ge qe ge me vois bien recordant qe il estoit a celui tens si bel chevalier qe il ne m'est pas avis, qant ge vois pensant a sa biauté, qe Dex feist onques un plus bel home de lui. ¹²Certes, sire, ge ne croi pas q'en tout le monde eust nul damoiseil plus simple de lui ne plus homble dusq'a tant qe il prenoit les armes, mes puisque il venoit as armes prendre et il laçoit son hyaume, il estoit adonc d'autre mainere. ¹³Sire, des lors le conois ge, qar de celui tens, ce vos faz ge bien asavoir, avoie ge bien porté armes plus de .xx. ans. ¹⁴Mes, se Dex me doint bone aventure, onques ne poi savoir de qel lignage il fu, qar, qant il venoit entre nos, il ne disoit jamés parole. ¹⁵Et ge croi bien se ne fust Galeot le Brun qi le comença a blasmer de ce qe il estoit toutesvoies si cois et si muiz q'encore ne seust il parler si com sevent autres chevaliers. Mes des lor sanz faille ne se pooit prendre [a lui] nul

4. fort] *om.* L4 7. Sire] *rip.* L4 12. nul damoiseil] nulle damoisele L4 15. a lui] *om.* L4

autre chevalier, fors seulemant Galeot le Brun. ¹⁶Sire, or sachiez qe de celui qe vos me demandastes ge ne vos sai dire autre chose de son lignage, mes de sa chevalerie vos sai ge bien a dire tout certainement qe ce est sanz faille le meillor chevalier qi orendroit soit en tout le monde et le plus [gentil] et le plus bel. ¹⁷Ne a sa cortoisie ne se porroit prendre nulle autre cortoisie. — Or me dites, dist li rois, et savez vos coment il a non? — ¹⁸Certes, sire, oïl. Or sachiez qe l'en l'apele Guron li Cortois. — Si m'aït Dex, fet li rois, g'en ai oï parler autre foiz. ¹⁹N'a mie encore granment de tens qe ge oï dire tantes merveilles de lui et tantes bontez qe, se Dex me doint bone aventure, qe se ge le peusse trouver en aucune [part], ge li partiroie avant la moitié de tot ce qe ge ai ou monde qe ge ne fesse mon conpeignon de lui, ²⁰qar certes de si bon conpeignon com il est me tendroie ge a mieuz paié, se ge l'avoie a conpeignon, qe se ge gaaignasse orendroit un bon chastel.

249. «— ¹Sire, fet messire Gauvains, ge ne sai riens de son lignage. Ge ne l'ai encore granment veu. Mes de tant com ge vi de lui, et de tant com vont [disant] li bons chevaliers qi veu l'ont novelement di ge bien qe ce est li meillor chevalier qi orendroit soit ou monde. — ²Si m'aït Dex, fait li rois, encore ne parla a moi de li nul home qi ce meemes ne me deist. Si en ai ore oï tant de vos et des autres qe certes ge voudroie orendroit avoir doné un bon chastel, qe ge fusse orendroit si pres de lui com ge sui de vos. — ³Sire, fet messire Gauvains, l'en ne puet pas legierement avoir chose de grant pris avant qe ele soit chierement achatee. Or sachiez qe vos ne porroiz pas avoir si bon chevalier com il est si legierement com un autre. ⁴Il est mestier qe vos en soufroiz travaill et poine avant qe vos l'aiez, se vos le volez avoir avec vos. — Si m'aït Dex, fet li rois, et ge en tout ce me voill metre. Or sachiez qe por travaill ne remaindré il mie qe ge ne l'aie en ma conpeignie, se ge onques por travaill le puis avoir, ne tenir a mon ostel».

250. ¹Endementiers qe il aloient ensint parlant de Guron, et li rois escoute si volentierz le parlemant qe il ne desire a celui point nulle autre chose a oïr. Il se tenist adonc a beneuré se il le peust trouver en aucune mainere. ²Et q'en diroie? Il fait tant celui matin qe il met concorde et bone pes entre monseignor Gauvains et li bon chevalier qi Helianor de la Montaigne estoit apelez. ³Il sunt orendroit bons chevaliers et bons amis et dient andui qe il ne voudroient en nulle

16. gentil] *om.* L4 (*v. nota*) 19. part] *om.* L4

249. 1. disant] *om.* L4

mainere qe il ne fussent entracordé, qar de lor ire et de lor corrouz ne peust venir se mal non a l'un et a l'autre. ⁴A celui point qe il chevauchioient en tel mainere entr'eaus, adonc avint qe il encontrerent un chevalier sor un grant destrier ferrant. ⁵Li chevalier estoit armez mout bien et richement, et menoit en sa conpeignie deus escuers et une damoisele a merveilles bele, montee sor un palefroi noirs, et estoit vestue e acesmee trop noblemant. ⁶Li chevalier portoit unes armes toutes blanches, fors tant voiremant q'en mileu de l'escu avoit une barre noire dou travers auques large. Tout maintenant qe Sagremor vit la damoisele, dit a ses conpeignons: ⁷«Ge voil joster a celui chevalier qi ci vient por gaaignier ceste damoisele, se ge onques puis, et entre vos m'otroiez ceste joste, se il vos plest». ⁸Et il li otroient volantiers, porce qe premieremant l'avoit demandee, et s'arrestent tuit por veoir la joste a loisir. Qant il se furent arreztez, Sagremor prent son escu et son glaive et s'apareille de la joste. Et dit au chevalier qi de l'autre part venoit: ⁹«Sire chevalier, gardez vos de moi. A joster vos estuet!». Qant li chevalier entent ceste parole, il n'i fait autre chose, ainz s'arreste enmi le chemin. Et qant il est touz appareilliez de la joste, il crie a Sagremor: ¹⁰«Sire chevalier, porqoi jostez vos a moi? Ou por esprove de chevalerie, ou por ma damoisele gaaignier? – En non Deu, fet Sagremor, por gaaignier la damoisele qe vos conduisiez voill ge joster a vos. – ¹¹Biaux sire, fet li chevalier, e ge josterrai a vos por la damoisele defendre, en tel mainere qe [se] il avint qe vos la damoisele puissiez gaaignier sor moi par force d'armes, qe vos la tendoriez avec vos par tel mainere com ge la tieng orendroit, ne le couvenant qe ge ai a lui ne li changeroiz en nulle guise. ¹²Et ce voill ge qe vos me creantez loiaument com chevalier tout avant qe nos jostom».

251. ¹Qant Sagremor li Desreez entent ceste novele, il dit au chevalier: «E ge voill joster a vos, sire, tout einsint com vos le devisez». ²Aprés ceste parole il n'i font autre demorance, ainz leissent corre li uns encontre l'autre tant com il poent des chevaux treere. Et s'entreferirent si roidement qe Sagremor n'a pooir ne force qe il se puisse tenir en sele, ainz vole a tere maintenant et chiet mout fieremant. ³Qant li chevalier voit qe il [a] la joste finnee, s'en retourne a sa damoisele qi s'estoit arreztee desouz un arbre, qar bien pensoit qe cestui fet ne remandroit einsint et qe li autres chevaliers voudroient vengier lor conpeignon, se il onques porront. ⁴Qant li chevalier qi cele joste

250. 11. se] *om.* L4

251. 3. il a la] il la L4

avoient regardé virent Sagremor a terre, or sachiez tout veraïement qe il ne sunt mie trop joianz de cele aventure. ⁵Bandemagus, qi Sagremor amoit assez et qi trop estoit iriez de ceste joste, dit a ses conpeignons tout premierement: «Seignor, ge voill vengier Sagremor, se ge onques puis». Et maintenant se garnist de la joste et puis crie au chevalier a plaine voiz: ⁶«Sire chevalier, gardez vos de moi: a joster vos estuet! – Biaux sire, fet li chevalier, porqoi volez vos joster a moi? – ⁷Por ce, fet Bandemagus, qe ge voill vengier le deshonor de mon conpeignon. – En non Deu, fet li chevalier, por achoison de vostre conpeignon ne me verroiz vos hui escu prendre encontre vos por joster por vostre conpeignon. – ⁸Qant vos por ceste achoison, fet Bandemagus, ne volez joster encontre moi, or sachiez qe il vos couvient defendre vostre damoisele, se vos poez, qe bien sachiez veraïement qe ele ne vos remandra, se ge onques puis. – ⁹En non Deu, fet li chevalier, por ma damoisele voill ge bien joster volantiens, puisqe autrement ne puet estre. Voïremant ge vos faz asavoir tout avant, qe qe vos me façoiz, ge voill celui meemes creant qe m'avoit orendroit fet vostre conpeignon avant qe ge comence joster a vos. – ¹⁰Sire chevalier, fait Bandemagus, et ge vos faz volantiens cestui meemes creant, puisqe autrement ne puet estre. – Donc somes nos as jostes venuz», fet li chevalier.

252. ¹Après cestui parlement il n'i funt autre demorance, ainz leissent corre li uns encontre l'autre maintenant tant com il poent des chevaux trere et s'entreferirent de toute la force qe il ont. ²Bandemagus n'est pas tant fort qe il n'ait trouvé plus fort et meïllor chevalier de li assez. Et bien apert a cele joste, qar il est feruz si roïdemant qe il ne se puet tenir en sele, ainz vole a terre maintenant et chiet si durement qe il est si estordiz et estonez qe il gist ilec au travers dou chemin sanz remuer ne pié ne main se petit non. ³Qant li rois Artus voit ceste aventure, il est doulanz et correciez outre mesure, qar Bandemagus et Sagremor amoit il mout fieremant. ⁴Qant Bandemagus fu abatuz en tel guise com ge vos cont, li chevalier s'en retourne maintenant a sa damoisele et s'arreste ilec por veoir se li autre conpeignon l'apeleroient encore de joste. ⁵Et messire Gauvains, qi trop durement est correciez de ceste aventure, qant il voit ses deus conpeignons abatuz, il dit a soi meemes qe a grant honte et a grant vergoigne li atorneroit se il ne feisoit son pooir de eaus revengier. ⁶Lors s'apareille de la joste au mieuz qe il puet et dit au chevalier as

8. fet] *rip*. L4

armes blanches: «Sire chevalier, defendez vostre damoisele encontre moi, se vos poez, qar bien sachiez veraïement qe ge [la] voill avoir, se ge onques puis. — ⁷Sire, fet li chevalier, or sachiez bien qe il me pesera se ele vos remaint. Et qant vos de joster m'apelez por amor de li, ge ne vos faudrai a ceste foiz, se ge onques puis». ⁸Lors leissent corre li uns encontre l'autre sainz fere trop long parlement et s'entrefierent de toute lor force. ⁹De cele joste avint einsint: tout fust messire Gauvains bon chevalier et bon fereor de lance, si n'a il pooir ne force qe il se puisse tenir en sele encontre le grant cop qe li chevalier as blanches armes li done. ¹⁰Mes ce qe li vaut? A voidier li couvient les arçons, voille ou ne voille. Mes atant li avint d'onor a celui point qe li arçons deriere li brisa, si qe il vint a terre, les jambes dusqe a la terre. ¹¹Et il se relieve mout tost et vit adonc qe Bandemagus se relevoit. Sagremor estoit en estant grant piece avoit, et ja voloit monter.

253. ¹Qant li rois voit ceste aventure, il est si dolanz durement qe il ne se puet tenir qe les lermes ne li viegnent as elz. Adonc se torne envers le bon chevalier et li dit: «Sire, qe vos est avis de ceste aventure? — ²En non Deu, sire, fet li bon chevalier, vos poez veoir l'aventure ausint bien com ge la voi. Or sachiez qe li chevalier as bla[nche]s armes est trop bon fereor de lance. ³Et certes vos le poez veoir si bien fet et si bien taillié de membres, et si bien seant en sele et si grant chevalier estrangement qe se il ne ferist bien de lan[ce], l'en le devroit par reison tenir au plus failli chevalier dou monde et au plus noiant. ⁴Sire, or sachiez qe ge ai tant veu de lui a ceste foiz qe ge di tout seurement qe il me semble home de grant valor et de grant pris. — ⁵En non Deu, fet li rois, qi qe il soit, il a bien mostré apertement ici qe il a feru de la lance autre foiz. ⁶Or aut com aler porra, qe ge me voill orendroit metre encontre lui por vengier la vergoigne de mes conpeignons, se onques puis». Lors demande son escu et son glaive. ⁷«Coment, sire? fet Helianor de la Montaigne. Volez vos donc metre vostre cors en ceste aventure? — Sire, fet li rois, porquoi ne le feroie ge? De quoi sui ge meillor de ceaus qi ci sunt abatuz, fors de corone seulement? ¹⁰Or sachiez, sire, qe ge ne le leiseroie por un chastel qe ge ne feisse a cestui point mon pooir de revengier lor vergoigne. Et por ce m'i metrai ge, coment qe il m'en doie avenir. — ¹¹Sire, ce dit Helyanor, or sachiez tout veraïement qe ceste enprise ne fu pas fet trop sagement, qar ce n'est mie sens d'enuier en tel mainere un chevalier estrange qe l'en

252. 6. la] *om.* L4 10. deriere] de voire L4 (*cf.* § 65.31)

253. 2. blanches] blas L4 3. lance] lan L4

ne conoist. ¹²Or sachiez qe, se ne fust por l'amor de vos, ge ne m'i meisse en nulle guise, qar, se Dex me doint bone aventure, il ne m'est avis qe ge i peusse granment gaagnier en ceste enprise, a ce qe li chevalier sanz faille est si preudom com vos veez. ¹³Et neporquant, ge m'i voill metre, coment qe il m'en doie avenir, por maintenir la vostre honor, se ge onques puis, ¹⁴qar en si fiere aventure com est ceste ne leroie ge vostre cors metre por nulle mainere dou monde, tant com ge fusse si sainz de mes membres com ge sui encore, la Deu merci».

254. ¹Lors se torne Helyanor de la Montaigne vers son escuer et li dit: «Or tost, bailliez moi mon escu et mon glaive». Et cil li baille maintenant. Et qant li rois le vit ensint appareillier de la joste, il dit tout lermoiant des elz: ²«Ha! sire, com ge ai grant doute de vos. — Sire, ce dit li viell chevalier, se Dex me doint bone aventure, encore en ai ge trop grant poor, qar ge voi tout apertement qe li chevalier fiert si bien de lance qe nus n'i porroit amender, et bien l'a devant nos mostré tout clerement. ³Mes avant qe nos encomençom ceste joste li voill ge demander une autre chose». Lors se met enmi le chemin, qant il fu tout appareilliez de joster, et dit au chevalier: ⁴«Sire chevalier, defendez vostre damoisele encontre moi, se vos le poez fere, qe bien sachiez qe ge la voill avoir, se ge onques puis. — En non Deu, fet li chevalier, ge croi qe ce n'est mie sens qe vos enprenez. ⁵Vos devriez regarder, se il vos pleisoit, coment est venu a voz conpeignons qe vos ci veez abatuz. Et si devriez regarder qe, puisque ge ai fetes .iiii. jostes, nul chevalier ne me porroit huimés abatre, qe il i peust conqester ne pris ne lox. — ⁶Si m'aüt Dex, fet Helyanor de la Montaigne, vos dites verité. Et por ceste parole qe vos avez orendroit dite ne me trouvisiez huimés encontre vos, se ne fust ce qe force le me fet fere et la grant amor qe ge ai a ceaus chevaliers qe vos avez abatuz. ⁷Por ce vos di ge qe vos vos defendez de moi, se vos le poez fere. — Certes, ce dit li chevalier, et ge me defendrai, se Deu plest, et josterrai encontre vos par les couvenances dom ge ai parlé autrefois».

255. ¹Qant li viell chevalier qi Helianor estoit apellez entent ceste novele, il s'arreste tot maintenant et dit: «Ge voill oïr le couvenances, avant qe ge en face plus. — En non Deu, fet li chevalier as armes blanches, et ge le vos deviserai, puisque vos le volez oïr: ²or sachiez qe, se vos me poez abatre, ceste damoisele vos remaigne en tel mainere qe ele soit dou tout vostre. ³Mes covendra qe vos la gardez un an en vostre conpeignie si sauvement com ele a esté gardee dusqe ci, qe ce

254. 5. ne pris] *rip.* L4

vos faz ge bien asavoir q'encore est ele pucele. ⁴Puisque vos l'avroiz gaaignee, il vos couvendra chevauchier tout seul, en tel mainere qe il n'avra en vostre conpeignie fors la damoisele et deus escuers. A touz les chevaliers qi la damoisele demandront, il vos couvendra joster. ⁵Se vos dusqe a un an poez la damoisele conduire sauvement en touz les leus ou si chemin l'amenrra encontre touz ceauz qi la vos demandront, a chief d'un an porroiz vos donc de la damoisele voiremant fere a toute vostre volanté outreemant, mes devant celui terme non en nulle guise. ⁶Or sachiez qe cestui covenant couvient qe vos le teigniez tout cestui an et qe vos orendroit le me creantez com chevalier. Encore y a autre chose qi plus est fors. ⁷Se vos la damoisele conqestez sor moi et vos la poez defendre tot cestui an en tel guise com ge vos ai devisé et li anz sera aconpliz, adonc ne porrez vos avoir les amors de la damoisele se ele ne l'otroie, qe vos [n']en peussiez vostre volanté fere se vos ne la preigniez tout avant por moillier. ⁸Ainz covendra qe vos la conduisiez sauvement dusqe la ou ge la pris, et ilec la qiteroiz adonc de toutes qereles. ⁹Toutes ces couvenances qe ge vos ai devisees sunt entre moi et vos [et] la damoisele. Et toutes ces couvenances couvient qe vos le creantez loiaument com chevalier avant qe nos jostrom ensemble».

256. ¹Qant Helyanor de la Montaigne entent ceste nouvele, il devint tout esbahiz si fieremant qe il ne dit mout d'une grant piece. Et il se torne vers le roi Artus, qi devant li estoit, et li dit: «Sire, entendez vos cest parlemant? – ²Oïl, certes, ce dit li rois, mout bien. Dire puis seuremant qe de toutes les couvenances qe ge oïsse encore deviser cestui est annuieux et perilleux et grief. Il desiroit fierement la damoisele qi en ceste aventure se mist por ses amors premierement. – ³Sire, ce dit li chevalier qi Helyanor estoit apelez, or sachiez tout certainement qe se ne fust por vostre honor maintenir, ge ne me metroie en ceste aventure por gaaignier un bon chastel, qar ge n'i voi de nulle part se trop mal non. ⁴Se ge sui abatuz de ceste joste, ge recevrai honte et vergoigne. Et se ge abat par aventure, si grant feis me vient sor le col qe a poine en porrai mes oissir honoreement, et après me covendra il maintenant leissier la vostre conpeignie. Si m'aït Dex, ge ne sai qe ge en doie fere. ⁵Et neporquant, puisqe ge voi qe il ne puet autrement estre, qar vos sanz faille ne leisseroie ge mie metre en ceste aventure tant com ge fusse si sainz com ge sui, or m'i metrai voirement. Or aut com aler porra». Lors dit au chevalier: ⁶«Sire, ge voill la joste avoir et la damoisele gaaignier sor vos, se ge onques puis. – En non Deu, fet li

255. 7. n'en] en L4 9. et la] la L4

chevalier, donc voill ge qe vos creantez loiaument com chevalier qe vos a la damoisele tendroiz ces couvenances qe ge vos ai ici ameneues, s'i avient en tel mainere qe vos abatre me peussiez. — ⁷Certes, fet Helianor de la Montaigne, et ge le vos creant einsint loiaument, puisqe ge voi qe il ne puet estre autrement. Ore començom huimés les jostes. — Ce me plect mout», ce dit cil as armes blanches.

257. ¹Quant il out finé son parlement en tel guise com ge vos cont, il s'entreloignent et puis leissent corre li uns encontre l'autre tant com il poent des chevaux trere. Il furent andui preudome et tant savoient des armes qe a celui tens lor en peust l'en pou aprendre. ²Chascun se force de tout son pooir de metre a terre son conpeignon, se il onques puet. Et q'en diroie? Il s'entrefierent a celui point si roidement qe li uns porte a terre l'autre et andui voident les arçons, voillent ou ne voillent, et chient si feleneusement qe il gissent enmi le champ si estordiz qe il ne sevent se il est nuit ou jor. ³Messire Gauvains estoit ja remonte, et Sagremor et Bandemagus. Et qant il voient les deus chevaliers geisir a terre en tel mainere, il ne sevent qe il doivent dire, fors qe il dient entr'eaus voirement qe ceste fu la plus dure joste qe il veisent pieçamés. ⁴Il lor corrent as chevaux qi s'en voloient foïr et les preignent, et attendent tant qe li chevaliers se furent relevez. A chief de piece, qant li chevalier furent revenuz, il se relievant, mes il sunt andui si estordiz et debrisie de cele joste qe il s'en sentent tout autrement qe il ne vouxissent. ⁵Quant il sunt revenuz en pooir, il parolent entr'eaus. Et cil as armes blanches dit tout premierement: «Dan chevalier, se Dex me saut, bien m'avez moustré a cest point qe vos avez autre foiz feru de lance. — ⁶En non Deu, fet li viell chevalier, ce meemes puis ge bien dire de vos. Et qant ensint est avenuz qe vos m'avez abatuz et ge vos, ne li uns ne li autre n'a encore plus bel, or me dites, se il vos plect: qe volez vos qe nos façom de ci en avant? ⁷Volez vos qe nos nos combatom as espees ou qe nos recomençom les jostes? — Certes, fet cil as armes blanches, il m'est avis qe encore sunt noz glaives entiers. ⁸Il ne nos est pas honors qe il remainaissent si entiers. Or remontom tost une autre foiz et recomençom les jostes, si verrom adonc a cui Dex en dorra l'onor. — Certes, fet li viell chevalier, ce me plect mout orendroit».

258. ¹Quant a ce se sunt acordez, il n'i funt autre demorance, ainz remontent tot maintenant et reprenent lor glaives et s'apareillent de la joste autre foiz. ²Et qant il en sunt appareilliez au mielz qe il

pooient, il leissent corre li uns encontre l'autre si roidement et de si grant force com il poent des chevaux trere. Et qant ce vient as glaives beissier, il s'entrefierent de toute lor force. ³Et q'en diroie? A celui point ne furent li auberc si bons qe il andui ne se desmaillent: ⁴les fer des glaives les rompent et la force des chevaliers, qi feisoient tant com il pooient de fere mal et anui l'un a l'autre et contraire et mal. ⁵Li chevalier sunt navrez andui fortment de cele joste, li un plus qe l'autre. Li viell chevalier est navrez ou costé destre en tel guise qe a piece mes n'avra pooir de porter armes, qant il eschapera de ci. ⁶Li chevalier qi portoit les armes blanches fu de cele joste feruz, qe por l'escu ne por le hauberc ne remaint qe il n'ait le glaive enbatu parmi le cors, si qe il li piert par derrieres, et dou fer et dou fust. ⁷Li chevalier as armes blanches est si chargez en toutes guises dou fellon cop qe il ne se puet tenir en sele, ainz vole dou cheval a terre, voille ou ne voille, et au cheoir qe il fet adonc brise il li glaives, si qe il remaint touz enferrez. ⁸A celui point qe li chevalier trebucha, porce qe il sentoitoit tout apertement qe il estoit ja mortelment navrez, giete il un cri mout doloireux et dit: ⁹«Ha las! ge sui mort». Et gist ilec enmi la voie, qe il ne remue ne pis ne main. Et après ne demore gueres qe la place d'entor lui fu coverte de son sanc. ¹⁰Li rois Artus, qi bien ot coneu apertement qe andui li chevaliers estoient navrez de cele joste, qant il voit celui trebuchier, il s'en vient tantost au viell chevalier et li dit: ¹¹«Sire, coment vos sentez voz? – Sire, dit li bons chevalier qi Helianor de la Montaigne avoit non, or sachiez tout certainement qe ge sui navrez autrement qe ge ne voudroie. ¹²Trop est preudon li chevalier encontre cui ge ai josté et de trop grant force. Il m'a tant de sa bonté moustrez qe ge m'en sent durement grevez. ¹³Se il est si preudom a l'espee com il est au glaive, bien est home de grant force. – En non Deu, sire, fet li rois, ge croi qe vos l'avez ocis. – ¹⁴Si m'ait Dex com ce seroit trop grant damage se ge avoie mort un si bon chevalier com est cestui. Certes, ge ne le voudroie por nulle chose dou monde.

258. 7. li glaives] *dopo la lacuna segnalata al § 175.5 riprende il testo di X, f. 47ra*
 8. A celui point] *nuovo § X ♦ navrez] feruz X* 9. la voie] le chemin X ♦ coverte] vermoille X 11. qi Helianor ... non] *om. X* 12. et de trop grant] [...] X (*macchia, v. nota*) ♦ moustrez qe ge m'en] mo[...] X (*macchia*) ♦ grevez] «navrez» g. L4; navrez X 13. preudom a l'espee] pro[...] X (*macchia*) ♦ bien] bieu L4 (*risritto*) ♦ est home de grant force] [...] X (*macchia*) ♦ li rois, ge croi] [...] X (*macchia*) ♦ ocis] mort X 14. Si m'ait Dex ... cestui] Si m'a [...] se le [...] chevalier come ce seroit grant doumage se [...] oie mort X (*macchia*) ♦ por nulle chose dou monde] *om. X ♦ monde] mondes L4 (risritto)*

259. «— ¹Sire, ce dist li rois Artus, estes vos mout navrez? — Sire, fet il, navrez sui ge trop durement. Et porquoi le vos celeroie ge? Celer n'i avroit mestier. ²Et neporquant encore ne sui ge si durement navrez qe ge ne puise bien mon cors defendre encontre lui, si com ge croi». ³Lors descent a grant poine, com cil qi durement estoit navrez, et il voit adonc qe del sanc qe dou cors ly yssoit estoit ja la terre couverte entor li. ⁴Et li rois estoit trop durement iriez qant il voit ceste chose, qar il conoist bien orendroit qe li chevalier est grevez assez plus qe il ne cuidoit. Il descent, et tuit li autre conpeignon autresint. Et viennent vers lui et li demandent com il se sent. ⁵«Ge me sent auques bien, la Deu merci. De ce qe ge sui eschapez einsint de ceste joste me tieng ge a mout bien païé, qe bien puis seuremant dire qe de haut afere est li chevalier encontre cui ge ai josté orendroit. — ⁶En non Deu, fet messire Gauvains, ge ai doute qe il ne soit mort, qar ge voi qe il ne se remue se trop petit non». Lors s'en vont tuit la ou li chevalier estoit et trouvent qe toute la place estoit environ lui tant chargiee de sanc com se l'en i eust maintenant un buef mort. ⁷«Ha! sire, fet li rois, cist chevalier est mors sainz faille. Et se il n'est mors, si morra il tout maintenant. Il a ja tant perdu dou sanc qe desoremés ne porroit il vivre en nulle mainere dou monde. ⁸Lors s'abaisse li rois vers terre et delace au chevalier as blanches armes son hyaume et li oste de sa teste. Et li abat la coïfe dou fer desus les espaules et li demande: ⁹«Sire chevalier, coment vos sentez vos?». Li chevalier oevre les elz qant il ot le roi qi l'apele, non pas por q'il coneust qe ce fust li rois Artus, et il comence a rregarder le roi. ¹⁰Li rois li dit autre foiz: «Sire chevalier, coment vos sentez vos? — Sire, ge me sent malemant. Le mien celer n'i vaudroit riens: mors sui. ¹¹Por Deu et por gentillesce de vos, fetes moi tant de cortoisie qe vos me portez, mort ou vif, a un hermitage qi est pres de ci et ilec me fetes enterrer einsint com crestien doit estre mis en terre».

260. ¹Qant li rois Artus ot ceste novele, il ne se puet tenir en nulle mainere qe les lermes ne li vieignent as elz, qar grant pitié a dou che-

259. 1. *no nuovo* § X ♦ Sire ... navrez] *om.* X ♦ Celer (celes L4) n'i avroit] celle (?) n'i arait X 3. navrez] grevez X ♦ del sanc qe] *om.* L4 (*saut*) ♦ couverte entor li] gra[.]ee environ lui X 4. autresint] descendant a. X ♦ vers lui et] *illeg.* X 6. chargiee] tainte X ♦ mort] ocis X 8. as blanches armes] *om.* X (*anche nei § successivi*) ♦ et li oste de sa teste] de sa t. et li o. L4 10. coment vos sentez vos?] Cil respont au mieuz qu'il puet et dit en tel mainere *agg.* X ♦ le mien celer] la m. c. L4 (*riscritto*) 11. por Deu] pour poa (*sic*) et pour Dieu X ♦ de vos (vous X)] deinos (*sic*) L4 ♦ en terre] entree (?) L4 (*riscritto*)

valier. Et li chevalier li dit autre foiz: ²«Por Deu, sire chevalier, desarmez moi, si en morrai pas si tost, ce m'est avis. Ces armes me grevent si durement qe il me semble bien qe ele me feront plus tost morir si ge les ai qe se ge ne les ai». ³Lors se met messire Gauvains avant et Bandemagus autresint et Sagremor li Desreez, et deferrent le chevalier premierement. ⁴Cil crie fort com home a cui l'en trasist l'aume dou cors, qant il se sent desferrer. «Ha! por Deu, seignors, vos m'ociez! ⁵Por Deu, aiez pitié de moi! Encore porrai ge par aventure vivre une piece, qi entre ces moies dolors me sera le derrain confort». ⁶Lors le lesse un pou repousser messire Gauvains, après qe il l'orent deferré, et puis le desarmant. «Sire, fait messire Gauvains au roi Artus, qe ferom de cest preudome? ⁷Il morra tout maintenant, veoir le poez». Lors comande li rois as escuers qe il facent une bere chevaleresce, et cil le font tout errament. ⁸«Seignors, fet li rois Artus a ses conpeignons, savez vos cel hermitage dom cist chevalier nos parla orendroit? – Sire, fet messire Gauvains, ge le sai bien: il est pres ça devant en ceste valee». ⁹Li viell chevalier s'abesse envers le chevalier as blanches armes et li dist: «Sire chevalier, qi estes vos? Dites nos aucune chose de vostre estre, se il vos plect». ¹⁰Et li chevalier giete un sospir de cuer parfont et dit, si com il puet: «Ha las! qe puet chaloir deshoremés? Tost est finee ma bonté. En petit d'ore est ci estainte ma renomee: qe me vaut a dire mon non? ¹¹Qe me vaudroit arecorder a cestui point ma proesce ne ma bonté? Fortune, qi me fu amie dusqe a cest point, m'a ci trahi vileinement. ¹²Et q'en diroie? Mescheance et mesaventure me m'a fet morir orendroit par pou de chose.

261. «– ¹Sire, ce di Helyanor de la Montaigne, ge vos pri qe vos me dioiz vostre non et tant de vostre estre qe ge vos puisse conoistre. – Sire, ce dit li chevalier, qant vos mon non volez savoir, et ge le vos dirai. Or sachiez qe ge ai non Finoés de la Montaigne». ²Et

260. 1. autre foiz] plaignant soi trop durement *agg.* X 2. sire chevalier] *om.* X 3. avant] *om.* X ♦ Desreez (Desreés X)] Desreez L4 (*v. nota* § 240.10) 4. vos m'ociez] ne m'o. si tost X 5. Por ... de moi] *om.* X ♦ une piece] u. grant p. L4 (*v. nota*) 6. Lors le] Lors L4 ♦ le desarmant] les d. L4; de totes ces armes *agg.* X 7. veoir (veoire X) le poez] veoit li p. L4 (*riscritto*) 8. savez vos] pres de ci *agg.* X ♦ devant] bien pres *agg.* X 9. li viell chevalier] le rois X ♦ s'abesse] *om.* L4 10. et dit] quant il entent ceste parole et puis respont X ♦ chaloir] qui ge sui *agg.* X 11. bonté? Fortune] bone f. X ♦ amie] fortunee X 12. m'a fet] me font X (*v. nota*)

261. 1. *no nuovo* § X ♦ ce di Helyanor de la Montaigne] fet li rois X ♦ vos pri qe] *rip.* L4

sachent tuit cil qī cest conte escoterunt qe cist Finoés proprement estoit filz a Helianor de la Montaigne, de celui viell chevalier qī si durement l'avoit feru. ³Et il avoit plus de .vii. anz aconpliz qe li uns n'avoit veu l'autre. Li filz cuidoit de voir qe si peres fust mort piece mes, li peres savoit qe li filz estoit encore en vie. ⁴Quant li chevalier qī Helyanor avoit non entent ceste nouvelle, il ne set qe il doie dire. Et quant il a pooir de parler, il dit a Finoés de la Montaigne: ⁵«Sire chevalier, fustes vos fill de Helyanor de la Montaigne?». Et Finoés giete adonc un souspir de cuer parfont, quant il entent ceste parole, et respont si com il puet: ⁶«Sire, or sachiez veraïement qe Helyanor de la Montaigne fu mi peres». Et quant li bon chevalier entent ceste parole, il chiet arrieres tout envers et gist ilec une grant piece en pasmoïsons, qe il ne puet dire riens. ⁷Quant li rois Artus le voit ensint gesir, il li fait deslacier le hyaume. Quant li preudom est revenuz de pasmoïsons et il a pooir de parler, il s'escrie a haute voix: ⁸«Ha! filz, com male desaventure et male destinee et male mescheance et maleur m'amenèrent en ceste place an cest jor d'ui! ⁹Filz, dire poez seurement qe vostre pere vos a ocis, et tout li mondes le puet bien dire». Li chevalier qī Finoés de la Montaigne avoit non, quant il entent ceste parole, il comence a plorer trop fort. Et quant il a pooir de parler, il dit: ¹⁰«Coment? fet il. Estes vos ce biaux peres? — ¹¹Filz, fet li peres, je sui li peres mescheanz, li peres tristes et doulenz a cui Dex ne volt onques bien, et bien apert tout cleremant par ceste aventure. Qar certes, se ge ne fusse plus mescheanz qe touz autres chevaliers, ge ne vos eusse ocis en tel mainere com ge vos ai mort. ¹²Filz, ge vos aloie qerant par le roiaume de Logres, ge vos desiroie a trouver sor toutes les mortex choses dou monde. Or vos ai trouvé, biaux chier filz, par mon pechié et par ma tres grant mescheance». ¹³Quant li rois Artus entent ceste nouvelle, il est si fieremant esbahiz qe il ne set qe il doie dire. Il se torne a chief de piece envers monseignor Gauvains et dit: ¹⁴«Avez vos veu grant mescheance et grant pechié qī entre nos est avenuz de ces

2. sachent tuit cil] s. t. qe cil L4; chascun sache X ♦ escouterunt] escoute X ♦ Helianor] Lianor X 3. .vii. anz] .vii. L4; .xvi. anz X 4. Quant] *nuovo* § X ♦ li chevalier ... non] Li vieuz chevaliers X ♦ a Finoés de la Montaigne] au chevalier nauvré X 5. Finoés] li chevalier X 6. or] on L4 (*riscritto*) ♦ bon] vieux X 7. preudom (proudoume X)] pierdom L4 (*riscritto*) 8. male desaventure ... maleur] male destinee come male heur et mescheance X ♦ destinee] tessiiner L4 (*riscritto*) ♦ m'amenèrent] m'amerent L4 10. peres] sire X 11. je sui li peres mescheanz] mescheance L4 (*saut*) ♦ et bien apert] et [...] apert L4 (*inchostro evanito*) ♦ eusse] ouese (?) L4 (*riscritto*) 12. aloie] ala (?) L4 (*riscritto*)

deus preudomes? – Sire, fet messire Gauvains, einsint est dou pechié dou monde et de la meschance des mortex homes. ¹⁵Or sachiez bien qe cestui fet tieng ge bien a trop grant mescheance. Et si m'ait Dex com ge voudroie orendroit avoir doné la moitié de qantqe ge ai en tout le monde qe il ne fust ensint avenu, qar de cestui fet sainz faille morront ambedui cist preudome. ¹⁶Cil qui gist navrés en morra hui ou demain, li peres en morra de duel encore, et einsint en morront ambedui sanz faille».

262. ¹Li bon chevalier qi Helyanor de la Montaigne avoit [non], qi de ceste aventure est tant durement iriez et doulanz q'a pou qe li cuers ne li part el ventre de dolor, qant il ot une grant piece son fil regreté, il dit: ²«Filz, qe porrai ge fere de ceste tres grant mescheance qi m'est avenue a cest point? – Per, ce dit li chevalier, ici ne sai ne puis ge conseil metre. ³Li fet est tant alé avant qe nulle riens ne le porroit jamés amender, fors Deu seulement. Ge ai tant fet qe ge sui mors par ma folie. A vos ne doing ge pas le blasme, mes a moi meemes le doing ge voiremant dou tout. ⁴Ma folie si fait ma vie finer avant reison. Ge n'i voi autre fors qe la mort me vet chachant, qi dedenz moi est herbergiee. ⁵Or sachiez tout veraielement q'en ceste mort ne serez vos pas tout seul, qar ge vos ferai conpeignie. Ge voill ci morir avec vos. ⁶Sanz moi certes ne morroiz vos mie, puisque il est einsint avenu qe ge meemes vos ai ocis. Il est mestier, se Dex me saut, qe la vostre mort se revenge de moi meemes! – ⁷Peres, ce dit li chevalier, cestui fet n'ira pas einsint, s'i Deu plest, ainz ira tout autrement. Vos avez dusqe ci vescu en joie en bone aventure, a honte de voz enemis et a honor de vos amis. ⁸Encore vivrez vos, se Deu plest, de ci en avant. Se ge sui mors, ce est por moi, non pas par vos. Nus n'en doit tant estre blasmez com ge meemes propremant. ⁹Puisque vos avroiz fet porter mon cors a l'ermitage qi est ci devant, vos me feroiz la enterrer come crestien.

15. mescheance] et a trop grant mes[...] *agg.* X (*macchia*, v. nota) ♦ voudroie ... doné] voudro[...]e X (*macchia*) ♦ ai en tout le] [...] X (*macchia*) ♦ fust] f[...] X (*macchia*) ♦ avenu qar] [...]ar X ♦ morront ambedui] mor[...]dui X (*macchia*)
16. encore] orroiz ce conter *agg.* X ♦ sanz faille] *om.* X

262. 1. *no nuovo* § X ♦ qi Helyanor ... avoit non*] qi H. de la M. avoit qi L4; *om.* X ♦ regreté] regardé X 2. mescheance] mesaventure X ♦ a cest point] en cest leu *agg.* X ♦ ne puis] *om.* X 4. vie] jovenecé X ♦ me vet chachant] qui me vient hastivement X 5. Or] Fill fet li peres or X 7. vescu en] ves|cuer en L4 8. vivrez vos] mieuz *agg.* X ♦ de ci en avant] a honor de vous *agg.* X ♦ blasmez] de ceste mort *agg.* X 9. feroiz ... crestien] metroiz leienz en terre X

¹⁰Tantost com ge serai mors et mis en sepulture partez vos de leienz et vos metez au chemin et chevauchiez par ceste contree et demandez toutesvoies noveles dou bon chevalier qi porte l'escu miparti de vermoill et d'alzur. ¹¹Se vos le trovez par aucune aventure, gardez qe vos ne vos combatiez a lui por nulle aventure del monde, qe il ne m'est pas avis qe vos peusiez a lui durer au loing aler. Il est trop preuz, il est trop fort, il est trop pseudome des armes. — ¹²Filz, fet li peres, or me di: porqoi le m'as tu amenteu, celui chevalier? — Sire, fet il, qe cil est vostre filz ausint com ge sui. ¹³Ce est Ezer, vostre ainnez filz, li plus bel chevalier et li meilleur qe ge sache orendroit en nule contree. Après ceste grant mescheance qi vos est ci avenue, einsint com vos puez veoir, vos reconfortera il. ¹⁴Vos troveroiz en cestui tantes bontez et tantes valor et tantes bones graces qe regardant le soes oevres tost avriez ma mort oubliee. ¹⁵Cil vos reconfortera sanz doute en touz corrouz et toutes ires, qar cil est en toutes maineres home de valor et de pris et il sera trop liez de vos. Or sachiez tout veraïement q'il a grant tens passé qe il cuidoit veraïement qe vos fuissiez mors, et ge autresint le cuidoiie, et tuit li nostre parant le cuidoiient bien certainement. ¹⁶Pere, por Deu, reconfortez vos et si metez ma mort en oubliance. Ne vos chaille de duel mener, qar a si bon chevalier com vos estes n'est pas honor de mener si grant duel».

263. ¹Quant li peres ot ceste paroles et il vet son filz regardant qe il meemes avoit ocis, se il est doulanz outre mesure, ce n'est mie merveille. Adonc dist li filz as chevaliers: ²«Ha! seignors, fet il, por Deu et por gentilece de chevalerie, hastés vos de porter moi dusqe a l'ermitage, se vos le puez fere. Ge voudroie mieuz morir leianz qe ci». ³Li rois fait tantost atirier deus chevaux a la biere chevaleresce, un devant, autre derriere, et puis fait metre le chevalier dedenz. Et maintenant se metent a la voie por aler a l'ermitage, et tant vont en tel mainere qe a l'ermitage sunt venuz. ⁴Quant il furent leianz descenduz, il troverent

10. mors ... sepulture] mis ou sepulcre X 11. aucune aventure] dou monde agg. X 13. Ce est Ezer] il est L4 14. tantes valor] et tante cortoisie agg. X ♦ qe (que X) regardant] qi regarderoit (*anacoluto* in L4, qui regarderoit ... tost avriez) 15. sanz doute en] s[...]n X (*macchia*) ♦ et toutes ires] et en t. [...] X (*macchia*) ♦ qar cil est en] [...] X (*macchia*) ♦ valor et de pris et] [...] X (*macchia*) ♦ sachiez tout veraïement] sac[...]raiem[...] X (*macchia*) ♦ passé] [...] X (*macchia*) ♦ le cuidoiient bien certainement] om. X

263. 1. ot ceste paroles] ot c.nouvelle et qui escoute ces paroles X ♦ Adonc ... chevaliers] om. X 3. atirier] entrer L4 ♦ aler a l'ermitage] a. dusqu'a l'e. X

que il y avoit une petite chapele mout bele et mout cointe et qatre hermite qi tuit avoient esté gentix homes et de grant afere, mes por corrouz et por damage qi lor estoit avenü en chevalerie s'estoient leianz rendu et feisoient ilec lor penitence tel com il la pooient fornir. ⁵Tout maintenant qe li chevalier fu leianz descenduz en la petite chapele, adonc parole et dit: «Faites moi venir le prestre». Cil vint tantost. Et qant il s'est fet confès de ses pechiez et il a receu ce qe la foi crestiaine comande, il se torne envers son pere et li dit: ⁶«Sire, ge muir. Qant vos verroiz Ezier mon frere, ne vos chaille de conter li ma mort dou-lente et triste. Il m'amoit de si grant amor qe, se il savoit la moie mort, il en porroit de duel morir. Por Deu, ne li dites cest fet. ⁷Se vos veez le roi Artus par aucune aventure dou monde, dites li qe il face qerre par tout le roiaume de Logres le bon chevalier a l'escu d'or: il fu enprisonnez sanz faille nouvellement, ce me dist une damoisele qi certainement le savoit. ⁸Cil est si preudom de tout qe, se il muert en la prison ou il est, touz li mondes en vaudra pis. Dom ge vos pri qe li rois Artus le face qerre en toutes guises».

264. ¹Qant il a dite ceste parole, il joint ses mains desus son piz et dit tout en plorant: «Ha! sire Dex pleins de pitié, aiez merci de moi. Ne regardez a mes pechiez ne a mes granz fellenies, mes a vostre grant misericorde». ²Et maintenant qe il a dite ceste parole sainte, l'ame li depart dou cors et muert en tel mainere. *Anima eius requiescat in pace. Amen.* ³Qant li bon chevalier qi Helyanor de la Montaigne estoit ape-lez voit qe si filz est en tel mainere mors, se il en fait duel estrange ce ne fait pas a demander. ⁴Et li rois Artus, qi il n'appartenoit de riens, en fait duel si estrange com se il fust si parenz charneux, et tuit li autre qi ilec estoient en sunt tuit corrouciez. ⁵La damoisele por cui fu enco-mencié cestui fet n'estoit pas adonc leianz avec eaus, ne en lor

4. et de grant afere] et chevaliers de g. a. X 5. chapele] chambre X 6. mon frere] vostre fill X 8. Dom ... guises] om. X

264. 1. Ha! sire ... grant misericorde] Ha! sire Dieux, qui feistes le ciel et la terre et toutes autres choses et l'ome formastes a vostre figure, et qui souffristes mort et passion sus la crois pour li mondes sauver et netoier de touz pechez, aiez merci de moi a cestui point. Ha! douce Verge Pucelle, proiez vestre douz fillz qui est plains de pitié et de misericorde, qu'il digne moi recevoir en son benoit regne et qu'il ne regarde pas a mes granz foliez et a mes grans pechiez, mes a sa grant debonairité X 2. sainte] om. X ♦ Anima ... amen] om. X 3. fait (fet X) pas] fai[.] p. L4 (*buco*) 4. estrange] merveilleux X ♦ qi ilec ... tuit corrouciez] en demenent duel quar fortmant en sont c. X 5. La damoisele] in X ultime parole del f. 48rb, le foto riprendono dal f. 75ra, § 382.19

co[n]peignie, qar, tout maintenant qe ele conut qe li peres avoit ocis son filz por achoison de lui et ele vit qe il entendoient a fere la biere chevaleresce, ele se parti d'ilec maintenant ausint come emblee et sis escuers ausint, et prist son chemin d'autre part ab son escuer.

265. ¹Qant li conpeignon qi a l'ermitage estoient venuz virent tout apertement qe li chevalier estoit mors, il comencent un duel si merueilleux et dient apertement qe il ne virent a pieçamés avenir, en leu ou il fussent, une si fiere mescheance com ceste fu. ²A cestui point fu bien fortune mortel enemie a l'un et a l'autre. Leianz fu mis le chevalier as armes [blanches] dedenz terre, desouz une lame ou un chevalier avoit ja esté mis en terre. ³Qant il fu mis en sepulture en tel guise com ge vos cont, li [bon] chevalier, qi durement se sentoit navrez, dit as conpeignons: «Seignors, ge vos prieroie, se il vos pleisoit, qe vos regardisiez ma plaie, qar ge sent bien qe ge sui durement bleciez». ⁴Et un des hermites de leianz, qi chevalier errant avoit esté lonc tens et savoit de plaies guerir, qant il entent ceste parole il dit au preudome: ⁵«Sire mostré moi vostre plaie, qe se nul chevalier dou monde vos en puet doner guerison, ge vos en guerirai, se Deu plest». De ceste novele sunt durement reconfortez li conpeignon, qar il avoient grant doute de lui, a ce qe il conoisoient bien qe il estoit durement navrez. ⁶Qant il l'orent tout desarmé, et li hermites li regarda sa plaie. Et qant il l'ot bien regardee et veue la parfondesce, il dit au bon chevalier: «Sire, ne vos esmaiez. ⁷Ge vos pramet loiaument qe vos garrez dedenz un mois si sainement qe vos porroiz adonc aaisielement chevauchier et porter armes, se autre maladie qe ceste ne vos venoit entre ci et la. ⁸Voiremment tant vos covient fere qe vos vos gardez de corroz, qar li corrouz si vos porroit fere contraire trop malement. — ⁹En non Deu, sire frere, fet li rois Artus, por ce vodroie ge mout, se il li pleisoit, qe il se partist de cet hermitage et alast en autre leu por sejourner, qar ge sai tout certainement qe il ne porroit onques estre sainz corrouz et sainz dolor, tant com il demorast ceianz, ¹⁰qar ne porroit estre en nulle guise qe il ne veist chascun jor le leu ou si filz gist en terre. Por ce di ge qe il se departira de ceianz, se il fet a mon conseil». ¹¹Li bon chevalier respont au roi et li dit: «Sire, moutes mercis de ce qe vos me dites. Ge sai tout veraielement qe toutes ces paroles qe vos me dites sunt por le mien preu, mes bien sachiez qe ge

conpeignie] copeignie L4

265. 2. blanches] *om.* L4 3. bon] *om.* L4 5. vos en puet] vos || vos en p. L4
8. corrouz] correiz L4 (*riscritto*)

ne m'en partirai de ceianz dusqe ge puise armes porter. — ¹²Voir, ce dit li rois, mes vos porroiz endementiers si grant duel preindre a vostre cuer qe il vos sera pis asez plus qe la plaie qe vos avez. — ¹³Sire, ce dit Helianor de la Montaigne, coment qe il m'en doie avenir, ge demorrai ceianz. Or sachiez qe ge ne m'en partirai dusqe ge soie touz gueriz, s'aventure ne me fesoit partir».

266. ¹Quant li rois Artus entent son voloir, il ne li osse plus parler de ceste chose, ainz se test atant et recomence a parler d'autre chose. Einsint demora li rois Artus leianz .iiii. jors tout enterinement por reconforter le bon chevalier. ²Avec lui demorerent li conpeignon et encore y eussent demoré, se ne fust li bon chevalier qi tant les pria qe il s'en partissent qe il distrent qe il s'en partiroient. ³Puisque il voient qe li rois Artus estoit appareilliez dou partir, il dit: ³«Sire, souviégne vos de la priere qe mi filz me fist a la mort, ce est dou bon chevalier a l'escu d'or. Vos entendistes bien qe il estoit enprisonez. ⁴Se vos peussiez tant fere en aucune mainere qe il fust delivrés por vos ou por vostre porchaz, or sachiez, sire, qe celui fet vos torneroit assez a grei-ignor honor qe se vos conquerriez une bone cité. ⁴Et vos en porroit venir trop grant honor et trop grant bien, qar certes, se vos eussiez en vostre ostel un tel chevalier com il est, vos en seriez trop plus fort et plus doutez en toutes guises. ⁵Sire, pensez de ceste chose et leissiez toutes autres beissoignes por ceste, qar de cestui fet, se vos venir en poez a chief, porra vostre honor acroistre assez plus qe vos ne cuidez orendroit. — ⁶Or me dites, ce dit li rois Artus, coment vos est il avis qe ge le puise trouver? Qar bien sachiez veraïement qe il n'est orendroit null chevalier qe ge tant desir a veoir com ge faz lui. — ⁷Si m'aît Dex, sire, fet Helianor de la Mo[n]taigne, de ce ne vos sai ge doner si bon conseil com ge voudroie. ⁸Voirement une chose ai ge aprise: se vos la volez fere, cele vos dirai ge bien. Il m'est avis qe il ne puet estre qe vos n'en oïez aucunes nouveles adonc. ⁹Ge sai de voir qe entre lui et Danayn le Rous, qi est seignor de Malohaut, furent conpeignon d'armes cestui yver et ensenble furent adés et tant qe a Malohaut vint plusors foiz li bon chevalier a l'escu d'or dom nos par-lom orendroit. ¹⁰Sire, se vos a Malohaut alez, ge croi bien qe il ne puet estre qe ilec ne puissiez aprendre aucune nouveles qi vos pleront. ¹¹Se vos ne le trouvez ilec et vos trouvez Danain, cil vos en dira par aventure aucune chose. — ¹²En non Deu, fet li rois, tant m'avez dit qe ge vos pramet loiaument qe jamés ne serai a aise devant qe ge serai a

266. 1. ceste chose] c. chos[.] L4 (*inchiostro evanito*) 7. Montaigne] Motaigne L4

Malohaut. – Or vos en alez, fet li vielz chevalier, qe Dex vos conduie. – ¹³A Deu soiez vos», fet li rois Artus. Et en tel mainere se departent. Helyanor de la Montaigne remaint navrez mout durement: a mort se tient en toutes guises de ce qe il a son filz mis a mort en tel mainere. ¹⁴Mes atant leisse ore li contes a parler de lui et retourne au roi Artus et a ses autres conpeignons por conter partie de lor aventures.

V.

267. ¹Or dit li contes qe, puisqe li rois Artus se fu partiz de l'hermitage ou li bon chevalier fu remés navrez durement, il chevaucha cele jornee entre lui et ses conpeignons sanz aventure trouver q'i face amentevoir en conte, et vi[n]rent la nuit a un chastel desus la rivere. ²Li chastiaux estoit biaux et riches et fet auques novelement, et estoit sainz faille au roi de Nohombellande, q'i l'avoit ilec fermé n'avoit encore pas lonc tens. ³Cele nuit dormirent leianz en la meison d'un viell chevalier et se tindrent leianz si coiemment et si priveement qe il ne furent auques coneuz ne d'un ne d'autre. Au soir, qant il orent mangié, lors comença li sires de l'ostel a demander: ⁴«Seignors chevaliers, se Dex vos doint bone aventure, estes vos de la meison le roi Artus?». Li rois respont premierement et dit: «Sire hostes, porqoi le demandez vos? – ⁵Ce ne vos dirai ge mie, fet li sires de leianz, devant qe ge sache certainement se vos estes de celui ostel ou non. – Sire osten, fet li rois Artus, et ge vos en dirai la verité, puisqe ge voi qe vos estes de ce savoir si desiranz. ⁶Or sachiez qe nos somes de la meison le roi Artus et chevaliers de celui ostel. – En non Deu, fet li osten, de tant vos pris ge plus et de tant vos aim ge mes. Et puisqe vos estes de cele meison, or me dites une autre chose, se Dex vos doint bone aventure: q'i est le meillor chevalier de la Table Reonde?». ⁷Li rois comence a sourire qant il entent ceste parole et respont: «Si m'aït Dex, biaux sire osten, de ce ne vos sai ge bien dire la droite verité, qar assez y a des bons. Mes porqoi le demandez vos? Ice me dites, se il vos plest. – ⁸En non Deu, fet li preudom, ge le vos dirai, qant vos demandé le m'avez. Or sachiez qe ge vos mis avant ceste parole por monseignor Kex li seneschal, qar ge, endroit moi, ai cuidé tout de voir qe cil fust orendroit le meillor chevalier de la Table Reonde, et li plusors de ceste contree li cuident bien sainz tout faille.

267. 1. vinrent] virent L4

268. «— ¹Sire hostes, ce dit li rois Artus, qant il est einsint avenu qe vos avez si hautement encomencié a parler de monseignor Kex li seneschal, or vos pri ge qe vos me dioiz porqoi entre vos de ceste contree li donez si grant pris et si grant lox. — ²En non Deu, fet li ostes, qe il l'a bien deservi! Or sachiez qe il venchi yer en cest chastel ou nos somes orendroit une bataille perilleuse durement. — Et coment estoit ele perilleuse? fet li rois. — ³En non Deu, sire, fet il, qe ele estoit partie si malement come d'un chevalier encontre .ii., por ce di ge qe la bataille estoit trop perilleuse. Mes por tout le perill ne remest il qe messire Kex ne venquist la bataille des .ii. chevaliers et qe il ne menast par force d'armes a outrance ambedeus ces chevaliers».

269. ¹Qant li chevalier entendent ceste nouvele, il se comencerent a sourire et regarder l'un a l'autre. «Sire, fet messire Gauvains au roi, qe vos semble de ceste aventure? — ²En non Deu, dist li roi, ge ne sai autre chose dire fors qe ge di qe il m'est avis qe puis pou de tens est messire Kex amendé des armes merveilleusement, il ne soloit estre d'assez si bon chevalier com il est orendroit. — ³Sire, fet messire Gauvains, encore n'est pas .vii. jors passez qe g'en oï conter merveilles, qar ge oï dire qe il abati devant un chastel .vi. chevaliers et gaigna .vi. damoiseles, et estoient tuit .vi. chevaliers [preudomes]. ⁴Et qant il ot toutes les .vi. damoiseles conquistés, il fist adonc tant de cortoisie qe il les rendi toutes .vi. a lors chevaliers. — En non Deu, ce dit li rois, ge le vi si bien prouver a un pont qe ge ne cuidasse en nulle mainere qe il fust si preudom com il est, se ge ne l'eusse veu. ⁵Mes ge le vi, et por ce le porrai ge hardiement conter en touz les leuz ou ge serai. Et il est bon chevalier de pris et de valor, tout autrement qe maintes gens ne vont parlant». ⁶Lors se torne li rois envers le seignor de leianz et li dit: «Or me dites, sire ostes, la verité de ceste bataille, et coment ele fu encomenciee et por qele achoison et coment il la fina. — ⁷En non Deu, fet li ostes, ce vos conterai ge volantiers, puisque vos savoir le volez. Or escoutez coment il avint». Et maintenant qe il a dite ceste parole, il comence son conte: ⁸«Sire, ce dit li ostes, il est bien veritez q'en ceste contree a un chastel plus bel et plus riche d'assez qe n'est cestui ou nos somes orendroit. En cel chastel avoit deus chevaliers et une damoisele qi en tenoient la seignorie par reison de pere et de mere. ⁹Or puet bien avoir demi an qe li dui frere orent conseil entre eaus deus, et tant qe il s'acorderent a ce qe il chaceroient dou tout lor

268. 3. ambedeus ces chevaliers] ambedeus ces c. ambedeus L4

269. 3. preudomes] *om.* L4 4. toutes] tou[...]*s* L4 (*buc*) 8. ce dit] *oe d.* L4

seror fors dou chastel et le tendroient por eaus: ¹⁰porce qe ele estoit damoisele ne devoit ele avoir chastel, qar maintenir ne le porroit. Il li donrroient autre chose dont ele porroit vivre. ¹¹Por ceste achoison qe ge vos cont en chacierent li dui frere la damoisele dou chastel et li distrent qe ele ne fust si hardie [de] plus retorner la dedenz cel chastel.

270. ¹«[Q]ant la damoisele se vit si malement apareillier et si deservitier de toutes choses, ele s'en ala maintenant au roi de Nohombellande, qi seignor est de cestui país, et se clama a lui de ses deus freres, qi einsint la deser[i]toient encontre reison. ²Li rois manda tout maintenant por les deus chevaliers qi freres estoient de la damoisele, et cil vindrent devant le roi. ³Et qant li rois lor ot fet asavoir porquoi il les avoit demande, il distrent qe li chastiaux estoit lor dou tout et qe la damoisele n'i devoit avoir part, ⁴et il estoient appareilliez de defendre ceste chose encontre celui qi les apelerait. Li rois dist a la damoisele: ⁵“Oiez vos bien ce qe responnent vostres freres? Se vos poez trouver chevalier qi por vostre droit maintenir se voille combatre a eaus, ge sui appareilliez qe ge vos tiengne reison. – ⁶Sire, dist la damoisele, puisqe il ne doit estre autrement, ge m'en irai de ci et porchacerai chevalier, se ge onques puis, qi me conqerra ma reison”. ⁷En tel mainere com ge vos cont se parti adonc la damoisele de la cort le roi de Nohombellande, si desconfortee qe jamés jor de sa vie ne cuidoit trouver reconfort, qar ce savoit ele tout certainement qe des chevaliers de ceste contree ne trouveroit ele un seul qi por lui se vouxist combatre encontre ses deus freres, ne des estranges ne conoisoit ele nul. ⁸Or a .iii. jors droitement qe li rois de Nohombellande estoit en cest chastel et tenoit cort, et en cele cort estoient li dui freres qi lor seror deseritoient en tel guise com ge vos ai conté. ⁹La ou li rois estoit asis ou paleis entre ses barons, atant evos leianz venir la damoisele qi menoit en sa conpeignie monseignor Kex. La damoisele dist au roi, qant ele fu devant lui venue: ¹⁰“Sire, veez ci un chevalier qi por Deu et por pitié de gentilesce velt ma qerele en tel mainere desreinier qe ge ne soie dou tout deservitee com mi frere le volent fere. ¹¹Qant li rois de Nohombellande entent ceste novele, il dit a monseignor Kex: “Sire chevalier, ceste damoisele me dit ele verité de ce qe ele me fait entendre? – ¹²Sire, fet messire Kex, ele vos dit verité. Viegnent a veoir li dui frere qi la deseritoient com ge sui appareilliez qe ge me combatre encontre eaus por l'amor de la damoisele qi est orfeline,¹³ qar entre

11. de] om. L4

270. 1. Qant] ant L4 (*l'iniziale non è stata non disegnata*) ♦ deseritoient] deservitoient L4

nos chevaliers erranz somes tenu par seremant a maintenir lor reison, des veuves dames et de les puceles et de les damoiseles. ¹⁴Et por ce, sire rois, me voill ge combatre, por la droiture de ceste damoisele, encontre cel qi la velt desheriter a tort et encontre reison”.

271. ¹«Qant li rois de Nohombellande entent ce qe messire Kex li disoit, il li respondi: “Sire chevalier, vos estes estranges, ce voi ge bien. Por ce vos faç ge bien asavoir qe vos enprenez a cest point plus fort chose et plus perileuse qe vos ne cuidez par aventure. – ²Coment, ce dist messire Kex, me covendra il donc combatre a plus de deus chevaliers? – Certes, fet li rois, nenil. Vos semble il ore si pou? – ³Sire, fet messire Kex, il ne me semble mie pou, ainz me semble trop. Mes toutesvoies, porce qe ge ai entendu certaineté qe la damoisele a reison de par soi me metrai ge en aventure de combatre encontre les deus freres l’un après l’autre. ⁴Dex aide touz jors a droiture, et ce est qi me reconforte en ceste aventure”. Sire chevalier, en tel mainere com ge vos ai conté orendroit parla messire Kex devant le roi de Nohombellande, et sachiez qe encore estoit il armez de hyaume et de chaucses et de hauberc. ⁵Qant il parloit si fierement, li dui freres se mistrent tantost avant por cele qerele defendre et distrent q’il estoient appareilliez a combatre a l’endemain. Messire Kex se parti maintenant dou roi et s’en ala a son ostel avec la damoisele. ⁶Qant nos oïmes par cest chastel q’un chevalier errant estoit venuz qi encontre les deus freres de la damoisele se devoit combatre por defendre la, nos començames tuit a dire qe il n’avoit onques fet si grant folie en tout son aage com cele qe il avoit a celui point enprise. ⁷Et q’en diroie? Il n’i avoit ne petit ne grant qi ne s’en alast gabant de lui, qar, a la verité dire, li dui frere estoient andui de haute renomee par cest país. Yer matin oïssimes nos tuit de cest chastel por garder ceste bataille. Li rois meemes s’en oïssi et tuit li autres chevaliers qi avec lui estoient. ⁸Et q’en diroie? Li champ estoit appareilliez et li dui frere estoient ja venuz, armez de lor armes mout noblement et mout richement, la ou estiom tuit fors oïssuz. ⁹Et nos deisiom tuit entre nos, porce qe messire Kex demoroit tant, qe il ne vendroit mie et qe il avoit trouvé bon conseil qant il avoit trouvé conseil de remanoir. ¹⁰Atant evos de cest chastel oïssir messire Kex armez de toutes armes, et il amenoit avec lui la damoisele por cui il se devoit combatre. ¹¹Son escuer li portoit son glaive et son escu, autre conpeignon il n’avoit a cele foiz. Qant il fu

271. 6. defendre la] damoisele *agg.* L4 (*rip. di damoisele*) 7. de cest] [...]e c. L4 (*buco*) 8. fors] *rip.* L4 11. cele] cel[...] L4 (*inchiostro evanito*)

venuz devant le roi, il dit: “Sire, ge sui appareilliez de fere ce por qoi ge ving en ceste place. – ¹²Sire chevalier, ce dit li rois, vostre enemisunt appareilliez des hui matin. Or i parra qe vos feroiz!”. Lors furent mis li dui frere dedenz le champ et messire Kex autresint. Et maintenant leissa corre li uns des deus freres vers monseignor Kex. ¹³A celui point mostra bien messire Kex sa grant force et son grant pooir, qar dou premier cop seulement feri il le chevalier si mortelment qe il le porta mort a la terre, en tel mainere qe cil ne se remue se petit non puisse il fu versez a terre. ¹⁴Qant il ot celui tué en tel mainere com ge vos cont et si legierement conquis, il dist a l’autre frere: “Vos veez bien coment il est avenu de vostre frere, tout autresint porroit il bien avenir de vos, se aventure me voloit aidier. ¹⁵Por Deu, avant qe nos en façom plus recorder vos de cortoisie et rendez a vostre seror sa reison”. Li chevalier respont adonc et dit: ¹⁶“Dan chevalier, se Dex me saut, or sachiez tout veraïement qe ce qe ge voi de mon frere, de sa mort, ne me desconforte, ainz me reconforte, qar il me done volenté de revenchier la soe mort et de defendre ma reison qe vos me volez tolr”.

272. ¹«Qant il ont einsint parlé com ge vos cont, il n’i font autre demorance, ainz leissent corre li uns encontre l’autre tant com il poent des chevaux trere et puis s’entrefierent en tel mainere qe il firent lor glaives voler en pieces. ²Qant il orent brisie lor glaives, il mistrent main as espees et comencierent la meslee mout cruele et mout dure a merveilles. ³Mes ele ne dura mie mout longement, qar messire Kex, qi trop estoit bon chevalier et de haut afere, hasta si fort le chevalier a l’espee trenchant et dure et tant li done cox a dextre et a senestre qe le mist a mort en petit d’ore. ⁴Qant il ot les deus freres mis a mort en tel guise com ge vos cont, il prist maintenant la damoisele et la mena devant le roi et li dit: “Sire rois, vos est il avis qe ge encore aie conquesté la reison de ceste damoisele? – ⁵Certes, dist li rois, oil, si bien qe vos ne le poez mieuz fere, et ge li rent tot l’eritage de son pere et de sa mere. – Sire, ce dit messire Kex, de ce vos merci ge mout. Or vos comant a Deu desoremés, qar ci ne voill ge plus demorer. – ⁶Ha! sire chevalier, dist li rois, por Deu, vos pri ge, qant il vos est ensint avenu qe vos avez devant nos mostré si apertement vostre proesce, qe vos ne nos fetes tant de vilenie qe vos vos partoi de nos si tost, ⁷mes demorerez hui avec nos, se il vos plect, tant seulement,

14. tué] dus L4

272. 6. avenu] avenit L4 (*riscritto?*)

et ge vos pramet qe ge vos ferai toute l'onor et toute la cortoisie qe ge porrai. — ⁸Sire, ce dist messire Kex, de ce qe vos me dites vos merci ge mout, mes, sire roi, sachiez veraïement qe a ceste foiz ne demor- roie ge en nulle mainere. — Ha! sire chevalier, si ne feriez tant por ma priere? — ⁹Sire, ce dist Kex, or sachiez qe por vostre priere feroie ge qantqe ge porroie, mes au demorer orendroit ne me trouverez vos acordez en nule mainere. — ¹⁰Or me fetes tant de cortoisie, dist li rois, puisqe au remanoir ne vos acordez, qe vos, se il vos plect, me dioiz vostre non avant qe vos vos partoiz de moi. — ¹¹Certes, ce vos dirai ge bien volantiers, fet messire Kex, puisqe ge voi qe vos en estes si desira[n]z de savoir le. Or sachiez, sire, veraïement qe ge ai non Kex, li seneschal au roi Artus. ¹²Ge croi bien qe de mon non oïstes vos par- ler aucune foiz”. Et qant il ot dite ceste parole, il s'en vet outre a tel eur qe nos ne le veimes puis. ¹³Sire, ceste aventure qe ge vos ai oren- droit contee avint yer dedenz cest chastel, et einsint nos moustra mes- sire Kex partie de sa proesce. ¹⁴Et por ceste merveille qe il fist devant nos vos demandai ge orendroit se ce estoit le meillor chevalier de la Table Reonde». ¹⁵Qant li rois Artus ot ceste parole, il respont tout maintenant et dit: «Certes, sire hostes, il est bon chevalier, mes il n'est pas si bon qe l'en ne trovast nus meillor en la maison le roi Artus, qi qe ne le voudroit. — ¹⁶En non Deu, dist li ostes, ce est mout grant chose qe vos dites orendroit».

273. 'Einsint parlent celui soir de monseignor Kex. Il n'i a oren- droit un seul qi n'en die grant bien. A l'endemain auques matin s'en partirent de leianz et chevauchierent cele matinee tant qe lor che- mins les aporta a une voie forchiee en trois voies. ²Qant li rois Artus est ilec venuz et il voit tantes voies qi estoient tout ensemble, il dit a ses conpeignons: «Seignors, nos somes au departir, qar se nos ne nos departiom a cestui point, donc ne seriom nos pas chevaliers erranz. ³Or tost, preigne chascu[n] de nos sa voie. Por ce voirement qe il ne seroit pas bien qe ge demorasse longement qe ge ne seusse noveles de chascun de vos, vos doing ge terme: ⁴de hui en un mois tout droitement soit chascun de vos a Malohaut la cité, et ilec pren- drom conseil qe nos devrom fere d'ilec en avant». Qant messire

8. Sire roi] li roi L4 11. desiranz] desiraz L4 13. avint yer] a. il y. L4 15. tro-
vast nus] trovast (?) vos L4 (*riscritto*) ♦ qe ne le voudroit] qel (?) de (?) te (?) v. L4
(*riscritto su macchia*)

273. 3. chascun] chascu L4 ♦ terme] fine L4 (*v. nota*) 4. Malohaut] Camahalot
L4 (*v. nota*)

Gauvains entent ceste nouvele, il ne se puet tenir qe il ne die au roi: ⁵«Sire, coment? Vos plect il donc qe nos doiom departir? Vos est il avis qe il soit sens de fere cest departiment?». Li rois respont: ⁶«Coment, Gauvains? Ne volez vos donc qe nos aillom tuit com chevaliers erranz? – Sire, fet messire Gauvains, ce poom nos bien veoir, mes coment sera ce qe vos ailloiz seul en la conpeignie d'un seul escuer? ⁷Certes, sire, il m'est avis qe ce n'apartient pas a ssi pseudome com vos estes, qar les aventures sunt perilleuses par cest païs et li chevaliers sunt fortz et estranges, einsint com vos avez ja veu tout apertement. – ⁸En non Deu, fet li rois, ge di bien qe se ge menoie toutesvoies chevalier en ma conpegnie, donc ne seroie ge pas chevalier errant, ainz mostreroie seignorie plus qe nul autre chevalier. ⁹Et de ce fere n'ai ge ore nulle volanté, qar, la Deu merci, ge me sent bien ausint fort et ausint legiers de toutes choses com est un autre chevalier. Porqoi ge voill a ceste foiz aler com chevalier errans, en la conpeignie de mon escuer seulement, si verrai qe il m'en avendra. – ¹⁰Sire, fet messire Gauvains, Dex voille qe il vos en aviegne bien, qe ge vos di seurement qe ceste voie ne ferez vos mie de ma volenté ne de mon conseil, qi est einsint». Ce dit li rois: ¹¹«Avant, veiroment, qe nos nos partom de ci di ge a vos tous qe, en quelqe leu qe chascun de vos vendra, travaille soi en toutes guises de demander nouveles dou bon chevalier a l'escu d'or, qar ge voz faz asavoir qe a ceste foiz ne vois ge qerant autre qe lui. ¹²Qant ge me parti de Camahalot ore novelement, ge me parti por trouver le roi Meliadus de Lyonois, qar il me manda la un mesage, ¹³et porce qe ge ne le puis trouver et ge voi qe touz li chevalier errant vont parlant a merveilles dou bon chevalier a l'escu d'or, si voill ge entrer en qeste por lui et savoir se ge le porroie trover en aucune mainere, et vos autres l'aloiz qerant en touz les leus ou vos vendroiz. ¹⁴Et au jor qe ge vos ai mis, venez sainz faille a Malohaut si priveement qe cil de leianz ne vos puissent conoistre. Ge vendrai ilec sainz faille, se Dex me defent d'encombrer. – ¹⁵Sire, dient li conpeignon, bien puissiez vos venir!». Qant il orent einsint parlé, il ostant lor hyaumes et s'entrebeissent au departir, et tantost se met chascun en sa voie. ¹⁶Mes atant leisse ore li contes a parler des conpeignons et retorne au roi Artus, por conter parties de ses aventures.

9. errans en la conpeignie] errens «en»[con] la c. L4 (*riscritto*, v. nota) 10. ferez] feroz L4 (*riscritto*) 14. Malohaut] Camahalot L4

VI.

274. ¹Or dit li contes qe qant li rois Artus fu partiz de ses conpei-gnons, il chevaucha tant entre lui et son escuer tout celui jor sanz aventure trouver qì face amentevor en conte. ²Celui soir dormi li rois chiez une veuve dame qì mout honoreement le reçut et mout lor fist grant cortoisie en son ostel, qe chevalier erranz estoit. ³A l'endemain auques matin le rois se parti et entra en une grant forest qì trop estoit bele et verdoienz de toutes parz et chargie de foilles et de flors. ⁴Li rois comença a penser et a chevauchier un pou plus lentement. La ou il chevauchoit, il escoute et oï une voiz de damoisele chanter si doucement qe ce estoit un grant deduit d'oïr si tres bone voiz com avoit la damoisele.

275. ¹Maintenant qe li rois entent la voiz de la damoisele, il s'arreste enmi le chemi[n] et comence ad escouter mout ententivement. Et qant il ot une grant piece escouté et la damoisele ot finé son chant, il se torne adonc vers son escuer et li dit: ²«Di va, se Dex te doint bone aventure, ois tu onques mes damoisele si bien chanter? – Si m'aît Dex, sire, fet li vallez, nenil. – En non Deu, fet li rois, il est mestier qe ge la voie, se ge onques puis». ³Li rois descent et oste son hiaume et atache son cheval a un arbre et dit au vallet: «Atent moi ici tant qe ge viegne. – Sire, fet li vallet, a vostre comandement». ⁴Li rois s'en vet tot errament vers la damoisele qì si doucement avoit chanté. Il n'ot mie granment alé qe il trova adonc le rui d'une fontaine. Il comença adonc aler einsint com li ruisseux le menoit, qar il fet bien reison en soi meemes qe a la fontaine trouvera il la damoisele. ⁵La forest estoit tant espese en cele partie qe il ne pooit granment veoir devant lui ne darrieres. Li rois s'en vet mout coiemment et au plus plainement qe il le puet fere. Il n'ot granment alé qe il voit devant lui un palefroï mout bel atachié a un arbre. ⁶Qant li rois voit le palefroï, il dit a soi meemes: «Cist palefroï est a la damoisele». La ou il parloit a soi meemes, il se regarde et voit devant soi une damoisele vestue d'un vert samit trop noblement et trop richement. ⁷La damoisele avoit ses treces par ses espaulles si blondes qe chascun chevoill ressembloit un fil d'or. Se ge la façom de la damoisele devisase ge feroie lonc conte, qar

274. 1. fu partiz] fu c | p. L4 2. et mout] a mout L4 (*riscritto*) 4. lentement] lenteneiment L4 (*riscritto*)

275. 1. chemin] chemi L4 ♦ et la damoisele] et la damusele L4 (*riscritto*) ♦ son escuer] soci e. L4 (*riscritto*)

ele estoit droite merveille de sa biauté, mes ge m'en voill passer brievement: ⁸la damoisele estoit tant bele qe sa biauté ne puet l'en de riens reprendre. Biau vis, biau cors et biau semblant: ele estoit bele en toutes guises. ⁹La damoisele estoit asisse desus la fontaine droitement et avoit la teste sor l'eve, si qe ele se pooit mirer dedenz la fontaine et regarder sa biauté q' si grant estoit com ge vos cont. ¹⁰Et sachent tuit qe la damoisele estoit ilec si priveement qe il n'i avoit home ne feme q' conpeignie li feist.

276. ¹Qant ele se fu grant piece miree et regardee en la fontaine, ele dresce adonc la teste et comence a regarder ses braz et son cors. ²Et qant ele s'est grant piece [regardee], ele se beisse une autre foiz, la teste vers la fontaine, et se comence a remirer. Et qant ele [s'est] grant piece regardee, ele comence adonc a parler a soi meemes en tel maniere: ³«Biauté, fet ele, riche chose a tout le monde, povre a moi plus qe a tout le monde, de qoi me sers tu? Qe me vaus tu? Porqoi me fus tu outroiee? Qel bien m'en vient il? Et quel preu? Et quel deduit m'en vient? Et quel feste et quel honor oi ge onques por toi? ⁴Biauté, Biauté, si m'aït Dex com ge ne voi qe tu m'aides! Com ge ne voi qe tu me vailles ne pou ne grant! Biauté, Biauté, porqoi me venis tu veoir, qant tu ne fais preu ne aise? ⁵Qe me vaut ore la toe conpeignie? Ta segnorie qe m'aide? Biauté, tu fas ces dames rire, en pris et en honor monter, en joie et en bone aventure. ⁶Tu fes bien de povre riche, tu fes cortoise d'une mal nourie et mal enseignee, tu fes d'une vileine duchese, q' est estraite de vilain sanc et de basse gent et la fes dame de valor. ⁷Ces pucelles de bas pris fes tu joier, dancer et rire, et le fes bien aventureuses. Tu le fes en yver joier et en esté le fes joier et rire. Biauté, qe diroie de toi? ⁸Tout li mondes se puet loer de ta segnorie, qar tu fes bien a tout le monde, fors qe a moi seulement. A moi ne fes tu se mal non. A moi ne dones tu fors ire et corrouz et dolor. ⁹La ou les autres sunt en joie, adonc me mez tu en tristece, en plor et en lermes et en sospirs. Biauté, qe dirai ge de toi? Tu me fes sanz faille outrage por fere moi damage et perte et por moi metre fors de joie. ¹⁰De qoi donc me sers tu? Biauté, ge n'oi onques de toi nul preu, ne n'ai encore, qar ge aim et ne sui amee. Ge pri et si ne sui oïe. Ge reqier et si n'est fete ma requeste. ¹¹Ge plor par devant mon ami, ne il

10. il] *rip*. L4

276. 2. regardee ele se] ele se L4 ♦ remirer. Et quant ele s'est] r. Et q. ele L4
3. povre] poute (?) L4 (*inchiostro evanito*) 6. de povre riche] de p. bien r. L4 (*rip. di bien*) ♦ cortoise d'une] d'une c. L4 ♦ sanc] sano L4

n'a pitié de mes lermes. Si dis mal et fause parole, qant ge mon ami le clamai, qar il n'est miens ne me aime. ¹²Por ce n'est il pas mon ami, dire le puis seurement. Biauté, qe me vas tu donc feissant? Se ge vieng par devant celui qi bien est le meillor chevalier dou monde, li plus vaillant, li plus cortois, il ne me velt point regarder. ¹³Il ne torne ses elz vers moi, ne plus qe se ge fusse la plus leide riens dou monde. Biauté, por ce di ge de toi qe tu ne me fes preu de riens. ¹⁴Plus me fes domage qe preu, qar j'ai esperance de toi qe mieuz me deust estre, mes tout mon esper[er] ne me vaut, qe ge aim de fin cuer et de verai. ¹⁵Cil qi me fera morir sanz fälle, cil ne me vaut qi ge desir plus qe ge ne faz tout le monde: il me het, a mon semblant, plus qe il ne puet riens haïr. Ore vos puis ge bien dire seurement qe vos me servez de noiant. ¹⁶Mieuz me venist a mon avis qe ge fusse laide et mal fete, qar adonc n'amasse ge pas en si haut leu ne en si noble com est celui ou ge ai mon cuer mis».

277. ¹Qant la damoisele ot parlé en tel guise com ge vos cont, ele se test, et puis recomence a parler trop fierement. Li rois estoit a celui point entre deus arbres si repost qe cele ne le pooit veoir, mes li rois veoit ele tout clerement et entendoit tout mot a mot qantq'ele disoit a soi meemes. ²Qant il l'ot un pou regardee, la damoisele, il dit en soi meemes, entre ses denz, qe trop estoit orgueilleux li chevalier qi tel damoisele refusoit. ³Ceste n'est mie damoisele qe l'en doie refuser por nulle aventure dou monde, qe ceste est la plus bele et la plus covenable qe il veist ja a grant tens. ⁴Qant la damoisele se fu remiree une grant piece sor la fontaine sainz dire mot, ele recomence sa complainte et drece la teste et dit tout lermoiant des elz: ⁵«Lasse, fet ele, maleuree, doulente et triste, plus mescheans qe toutes les autres femes et damoiseles, porquoi fus tu onques si bele? Porquoi eus tu si biau vis, si beles mains, si bel cors et si bele façom dou tout? ⁶Les autres puceles sanz faille si sunt priees et reqises, et touz li mondes se vet travaillant por eles. Et qant eles sunt plus priees, et eles plus fort s'escondissent. ⁷Et ge, lasse, maleuree, qi sui bele de cors et de vis et de façom plus qe toutes autres damoiseles, pri et repri plus de mil foiz, et si vois reque- rant ou lermes qe il me tiegne por s'amie, ne il ne me velt escouter. ⁸Lasse! Ge le tieng en prison et si le puis fere morir qant ge voudrai. Ne por prison, ne por menace, ne por poor qe ge li face, ne por biau-

14. esperer] esper L4

277. 1. veoit ele] v. lui L4 3. la plus covenable] la plus la plus c. L4 4. teste] teile L4 6. s'escondissent] ses contissent L4 7. me velt] mel velt L4

té qi en moi soit, ne por deable, ne por Deu ne me velt outroier s'amor, li desloial! ⁹Or donc, Biauté, qe dirai ge donc de vos, fors qe de noiant me servez et por noiant m'estes donee? Ge n'en dirai desormés autre parole, si dirai verité sainz faille orendroit».

278. ¹Quant la damoisele se fu une grant piece dementee sor la fontaine en tel guise com ge vos cont, ele beisse la teste vers terre et comence a regarder en la fontaine et a regarder sa biauté qi granz estoit a merveilles. ²Et quant ele [s']est une grant [piece] remiree, ele dit a soi meemes: «Sire Dex, qe porrai ge dire? Fu onques mes en cestui monde nulle damoisele si mescheanz dou tot com ge sui, qi sui plus bele qe n'est li lis, qe n'est la flors? ³Mes certes, se dex deust amer por biauté nulle damoisele, il m'ameroit plus tost qe autre, porquoi il conoist biauté. Qar certes Venus, la deese d'amor, ne Palas, la deese de sapience, ne Diane, la deese des bois, se eles fussent orendroit toutes ensemble, il n'avroit mie en toutes eles tant de biauté qe il n'en ait assez plus en moi! ⁴Or donc, qe puis ge, qe ge sui tant bele et tant gente de toutes choses? Porquoi sui ge si mescheans qe ge aim et ne sui amee? ⁵Amor, vos mi fetes ceste nusance, vos me fetes tout cest contraire por mostrer tout apertement qe dames ne damoiseles ne sunt pas amees por biauté, mes por vostre comandement. ⁶Vos comandez, quant il vos plect, qe eles aient joie d'amors, et eles l'ont de cele ore pleinement. Et se vos comandez qe eles aient d'amor dolors, et eles l'ont tout errament.

279. ¹«Amor, Amor, en tel mainere est ore de moi avenu, qar ge ai de vos toutes les maus et toutes les dolors qe cuer d'ome porroit penser. Onques voir Dido de Cartage, qi tant ama ja Eenees, n'ot plus dolors d'amors com ge vois souffrant nuit et jor. ²Se ele en morut au derrien, et ge en morrai. Se ele meemes s'en ocist, et ge meemes m'ocirrai tout maintenant». ³Quant la damoisele ot parlé en tel mainere, ele comença adonc a plorer mout durement. E quant ele ot ploré une grant piece, si qe ele avoit moillié des lermes toutes les faces, qi plus estoient vermoilles qe rose, ele dit adonc autre foiz: ⁴«Dex, fet ele, qe ferai ge? Qe atent ge? Porquoi ne fine ma dolor? Qe me vaut toute ma priere? Ge pri, mes tout est. Piere dure plus tost, voir, movroit. Une roche plus tost avroit pitié de moi qe celui qe ge vois priant. ⁵Or donc, qe porrai ge metre en mes dolors, fors qe ge

278. 2. s'est une grant piece remiree] est une g. r. L4 3. Palas] Dido L4 (v. nota) 5. vos mi fetes] vos vos mi f. L4

279. 1. Dido] Helene L4 (v. nota) 4. Piere] priere L4

meemes m'ocie? Certes, puisque il est einsint qe ge ne puis en mes dolors metre autre fin et ge voill tantost metre ceste, ge me voill ocirre a mes deus mains. ⁵Mes qant ge me serai ocise, qi le savra qe ge soie por amor morte? Qi le contera au monde? Coment savra la verité de ceste chose li chevalier por qi ge me voill metre a mort? ⁶Lasse, com ge ai de toutes parz male partie. Se ge m'oci, lasse, orendroit, et ge seuse por verité qe auquns alast a dire a celui qe ge aim qe ge fusse por s'amor morte, a grant confort me tornast ceste mort. ⁷Si me semble qe joie me fust grant, mes ge sui orendroit si seule qe riens nés si ne voit ma dolor, fors cest forest et ceste herbe et cestes flors qi sunt devant moi et ceste fontaine: nulle de ces choses non ont langage qi me peust tesmoing porter qe ge soie por amor morte. ⁸Se li oisel, qi entor moi sunt, orendroit voient ma mort et ma dolor et il en font puis lor regrés, lor chans et lor enveseures, il ne sera qi les entende. Adés porront dire en lor chant qe ge soie morte por amors, mes nus ne les entendra. ⁹Li arbres ne le porront dire. Voiremant, se il feissent tant por duel de moi qe il ne portassent flor ne fruit de deus anz ou de .iii., ce me fust un grant reconfort. ¹⁰Et encore feissent tant por moi, si ne conoistroit li mondes qe il ce feissent por moi. Or donc qe porrai ge dire? Coment porroie ge penser qe après ma mort seust li mondes qe ge soie por amor morte? Coment? ¹¹Certes, ge sui trop fole qant ge vois pensant a cest fet: se ge faz cest hardement qe ge m'ocie por amor, Amor meemes le dira a tout li monde. ¹²Li oisel en feront lor vers, lor chanz, lor deduit, lor soulaz, et finiront avironant et chantant environ mon cors. ¹³Li bois en leisera sa verdor, la forest en changera, la fontaine qi ci est en sera apelee en autre guise qe ele ne fu dusqe ci. Amor meemes, ce sai ge bien, si en sera moins felesse et moins cruele a toutes autres damoiseles, qar ele avra poor et doutance qe eles ne facent autresint com ge faz. ¹⁴Donc di ge bien qe ma mort sera trop [pro]fitable as dames et as damoiseles qi en amors ont mis lor cuer».

280. ¹Aprés ce qe la damoisele ot parlé en ceste mainere, ele n'i fait autre demorance, ançois se drece en son estant et voit qe pres de lui estoit l'espee et la tret dou fuerre toute nue et la comence a regarder, et a plorer trop fieremant. ²«Espee, dit la damoisele, cil qi te fist premierement ne te cuida mie fere por ma mort, ne por mort de nulle autre damoisele, si com ge croi. ³Ne ge meemes sainz faille ne cuidoise pas morir, mes qant m'aventure est tele et si fort et si annuiesse qe

13. forest en] f. non L4 14. profitable] fitable L4

morir m'estuet por espee, ge voill trop mieuz morir par toi qe par nulle autre dou monde, por l'amor dou bon chevalier de qi ge main te pris. ⁴Ore face desoremés Amors tout le mal qe ele porra, qar a moi n'en fera ele plus: ici fineront mes dolors tout a un cop». ⁵Qant ele a dite ceste parole, ele met la pointe de l'espee ou crues d'un arbre et ele le ferme la dedenz a deus pieres. ⁶Ormés i puet ele venir tout le cors et ferir soi dedenz la pointe de l'espee, qar ele ne se tornera de nulle part, tant estoit bien fermee en l'arbre. ⁷Qant la damoisele a ce fet et sa mort appareilliee com ge vos cont, ele revient a la fontaine et comence a rregarder dedenz et a plorer trop fierement. ⁸«Lasse, fet ele, qe dirai? Qel damage et qel dolor, qe si bele pucele muert com ge sui! Se Dex fust orendroit en terre et vouxist pucele avoir, certes il me prendroit por lui et me tendroit a tou le monde. ⁹Mes qe me valent ces paroles? Qe valent toutes ces enplaintes, puisqe ge voi qe Biauté ne m'aime de riens? Ne Dex ne home ne me vaut, et ge ai tant dolor au cuer com ge porroie souffrir ne sentir: ge voill ceste dolor finer. Or aut com il porra aler, ma biauté fine a grant dolor».

281. ¹Qant la damoisele ot dite ceste parole, ele s'esloingne de l'espee et vait sorlevant le samit qi li estoit entre les piez por corre plus legierement. Qant li rois voit ceste aventure, il dit a soi meemes qe ormés porroit il trop demorer. ²Il ne voudroit en nulle guise qe si bele damoisele com est ceste se meist a mort por nulle aventure, porqe il le peust destorner. ³La damoisele, au voir dire, estoit ja toute appareilliee dou ferir dedenz l'espee et de metre soi a mort, mes li rois, qi estoit derrieres les arbres si repost, ne velt qe la damoisele en face plus, qar il voit qe ele venoit por ferir soi dedenz l'espee. ⁴Il saut avant et crie a cele tant com il puet crier: «Ha! damoisele, soufrez vos, ne venez avant!». Qant la damoisele voit le roi, si armé de toutes armes com il estoit, porce qe ele ne cuidoit qe ele eust pres de lui home ne feme et ele le voit sor lui venir si soudainement, ele devient si esbahie merueilleusement qe ele ne set qe ele doie dire. ⁵Ele n'a pooir de parler ne de fere plus. Ele n'a pooir d'aler avant ne arrieres, ainz est ilec si trespensee com une beste. Ele a orendroit toute la color muee et morte, et a poor et doute mout grant qe li rois ne li face anui. ⁶Li rois, qi la veoit eschauffer et qi la veoit changier color, conoist trop bien qe ele a doutance, et por ce li dit il por reconforter la: ⁷«Damoisele,

280. 6. tout le cors] t. del c. L4

281. 2. bele] be | bele L4

n'aiez poor, mes reconfortez vos! Ge sui un chevalier estrange qe aventure a aporté sor vos. Ge ai escouté mot a mot tout ce qe vos avez ci dit. Or sachiez qe ge ne voudroie, por un bon chastel, qe ge n'eusse oï vostre complainte einsint com ge l'ai oïe. ⁸Et qant einsint est avenu qe ge sai tant de vostre pensee et de vostre estre com vos avez ci devisé, or ne vos desconfortez, qe ge vos pramet loiaument com chevalier qe ge ne ferai riens encontre vostre volenté, ne ne vos dirai parole q'i vos doie desplere, qe ge puise. ⁹Et une autre chose vos faz asavoir, qe ge vos pramet loiaument qe ge metrai en voz dolors finer tout le conseil qe ge porrai. ¹⁰N'aiez nul poor de moi, mes soiez aseur qe il me targe, si m'aït Dex, qe vos puissiez fere chose q'i vos plaise, qe bien sachiez veraïement qe ge ne vi damoisele, ja a grant tens, q'i eust tant [dit] de bones paroles et de sages com vos avez. ¹¹Et por ce vos pri ge qe il ne vos torne a anui de ce qe ge ving sor vos en tel mainere. Encore n'i fuse ge venuz, mes ge vi qe vos voliez tel chose fere qe Dex ne la deust souffrir ne home mortel. ¹²Et por ce, ma chiere damoisele, ving ge sor vos si soudainement com vos veistes, qar ge ne voloie sainz faille qe vos encore morisiez en nulle guise».

282. ¹Qant la damoisele entent ceste novelle, ele se comence a reconforter, et la color li comence toutevoies un pou a revenir. Et qant ele a pooir de parler, ele dit tout lermoiant des elz: ²«Dex aïe, biaux sire chevalier, coment peustes vos venir sor moi si celeement qe ge ne soi vostre venue? – Ma chiere damoisele, einsint est ore, mes, por Deu, dites moi se vos venistes si seule com ge vos y ai trou-vee ou si autre vos i conduist». ³Qant la damoisele oï ceste parole, ele comence a penser ausint durement com ele fesoit devant. Et qant ele parole, ele dit: «Certes, sire, ge ving si seule com vos m'i avez trou-vee, mes bien sachiez de voir qe grant poor m'i fist venir si priveement com vos poez veoir. ⁴Sire, sachiez veraïement qe a tel pucele com ge sui ne couvendroit mie venir si seule en tel leu, mes poor, q'i fet maintes choses fere, m'amena a cest hardement einsint com vos veez. – ⁵Damoisele, fet li rois, or sachiez de voir qe, por le bon parlement qe ge ai oï de vos, orendroit sui ge trop desiranz de vos conoistre et de savoir coment vos venistes ici et en qel mainere. ⁶Et q'i est le chevalier qe vos tant amez de si grant amor et q'i vos vait si refusant en toutes guises? Qe bien sachiez tout veraïement qe ge sui touz appareilliez de metre conseil en voz amors, qe vos en avrez autre joie qe vos n'eustes dusqe ci. ⁷Dites moi, chiere damoisele, ce

10. dit] *om.* L4 11. torne a anui] tort a a. L4

qe ge vos demanderai, et ge vos pramet qe ge ferai tout mon pooir de tenir vos le couvenant qe ge vos dis. ⁸N'aiez doute de moi porce qe ge sui estrange chevalier qe, si voirement m'aît Dex, qe ge ne vos dirai chose qi soit encontre vostre volanté en nulle guise».

283. ¹Qant la damoisele entent ceste parole, ele est assez plus asseuree qe ele n'estoit devant. Ele se comence a reconforter petit a petit, et li rois, qi trop desire asavoir qi ele est, li dit: ²«Damoisele, or vos asseez, se il vos plect». Et cele s'as[sis]t devant la fontaine, et li rois s'assist de l'autre part un pou desus de lui. ³«Sire, ce dit la damoisele, qe vos plect il qe ge vos die? – Ge vos pri, fet li rois, qe vos me dioiz ce qe ge vos demant: coment vos venistes ici si seule com ge vos y ai trouvee, et qi est li chevalier qe vos amez de si grant amor et qi vos vet refusant en tel mainere com vos dites, ge vos en pri. – ⁴Sire, ce dit la damoisele, qant vos de ceste chose oïr estes si desiranz, et ge vos en dirai le voir: or escoutez. Bien est verité qe ge ai pere, assez riche home en son païs et assez redoutez de ses voisins, ce m'est avis. ⁵Or a .iii. mois, et se il a moins ce est petit, qe mi peres prist un chevalier, ne sai coment, ne sai se il le prist par bataille ou en autre guise, mes il le mist en sa prison, et une damoisele avec lui qi estoit grosse d'enfant. ⁶Qant ele fu en la prison mise, et en la prison meemes se delivra ele de l'enfant, ele morut a l'enfanter. Mi peres prist apris l'enfant et le fist norrir et norir le fet encore. ⁷Mi peres me comanda puis qe ge alasse chascun jor porter a mangier au chevalier prison, et ge le fis tout einsint com il me comanda. Et tant reparaï, sire, entor le chevalier prison, qe ge le començai a amer. ⁸Et se ge l'amai, ce ne fu mie merveille, qar ge di bien hardiement qe ce est sainz faille li plus biaux chevalier dou monde et li mieuz fet. Et moutes foiz dis ja mi peres qe il n'a orendroit en cest monde si preuz des armes com il est. ⁹Tant le loa mi peres et tantes merveilles en dist qe ge, por la grant biauté de lui, mis tout mon cuer en lui amer et toute ma volanté autresint. ¹⁰Et q'en diroie? Tant l'amai qe amor me mena a ce qe me força qe ge li dis apertement qe ge l'amoie tant qe ge moroie por ses amors. Il me respondi maintenant: ¹¹«Damoisele, Dex vos otroit qe vos metez mieuz a autre part vostre amor qe vos ne feroiz en moi, qe certes ge ne sui tel chevalier si vaillant ne si riche qe ge fusse digne d'avoir les amors de si noble damoisele com vos estes. ¹²Ge sui un povre chevalier qi vif en poine et en dolor com vos veez, qar en prison sui nuit et jor. Or sachiez bien qe il ne me apertient d'amer par amors ne vos ne autre damoisele, qar ge ai mout mon cuer aillors».

283. 2. asseez] asse[.]z L4 ♦ s'assist] sast L4

284. ¹«En tel mainere com ge vos cont me respondi le chevalier
 qe ge aim toute la premiere foiz qe ge le priaï d'amors. Une autre foiz
 ge li requis ses amors, et il me respondi adonc tout autresint com il
 m'avoit respondu devant. ²Sire, mout est greveuse chose de celer le
 semblant d'amor de l'home ou de la feme, mout se mostre legiere-
 ment, porqoi ele soit dedenz le cuer. ³Tout einsint avint il de moi,
 sire chevalier: ge ne poi tant celer l'amor qi dedenz mon cuer estoit
 entree qe mi peres n'aperceust tout clerement. Il m'apela dedenz sa
 chambre et me dist: ⁴“Fille, ge vois reconoisant tout de voir, au sem-
 blant qe tu as, qe tu aimes par amors. Di moi tost qi tu ames et qi est
 celui, ou tu es morte sainz faille. Ton escondit n'en vaudroit, qar ge
 sai de voir qe tu aimes”. ⁵Qant ge entendi le parlement de mon pere,
 ge oi adonc grant doutance de mort, qar ge savioie tot certainement
 qe il estoit si fellon et si cruel en toutes guises qe il m'ociroit legiere-
 mant, et si li dis adonc tout le fet. ⁶Por ce li dis ge tot mot a mot qe
 ge amoie le chevalier prison, et coment il m'avoit respondu par deus
 foiz. Autre chose ne pooie ge trouver en lui.

285. ¹«Qant mi peres entendi cest couvenant, il fu trop durement
 iriez et dit: “Certes, pou s'en faut qe ge ne te faz orendroit morir
 vilainement. Et saches qe se tu ves plus au chevalier por dire a lui ne
 bien ne mal, ge te ferai morir de male mort”. ²Einsint me dist mi
 peres et me defendi dou tout qe ge n'alasse des lor en avant au che-
 valier por nulle aventure dou monde. ³Por la grant doute et por la
 grant poor qe ge avoie de mon pere me tieng ge bien deus jors ou
 trois qe ge ne vi le chevalier, mes au derrein ne valut qe ge m'en
 peuse tenir dou tout. ⁴Amor me dona hardement et m'osta toute
 poor. Ge m'en alai au chevalier et le requis autre foiz de ce meemes et
 il me respondi sor cele chose ausint com il m'avoit ja autre foiz
 respondu. ⁵La ou ge tenoie tel parlement avec le chevalier, ne sai qi
 le dist a mon pere: il s'en vient maintenant a me, si me prist et dist qe
 il me trencheroit la teste. ⁶Et q'en diroie? Il me mist tantost en une
 autre chambre et me tint ilec en prison .vi. jors entiers si estrangement
 et si malement qe il me dona pou a mangier et moins a boivre. ⁷Qant
 il m'ot einsint tenue en prison, il me fist venir devant lui, si me dist:
 “Es tu encore chastiee des amors dou chevalier prison?”. Ge, qi tant
 amoie celui qe autant me chaloit de ma mort com de ma vie, dis a

284. 3. et me dist] et eme d. L4 4. vois] voi[.] L4 (*inchiostro evanito*)

285. 5. parlement] malement L4

mon pere: ⁸“Or sachiez tout certainement qe des amors dou chevalier prison ne me porroit null chastier, ne Dex ne home ne riens fors qe il seulement. Or poez vos fere de moi ce qe vos voudroiz, ou de l’ocirre ou del leissier vivre, qar Amor me fet parler en tel mainere com vos veez”. ⁹Qant mi peres entendì ceste parole, il devint touz esbahiz, si qe il ne sot qe il deust dire. Il me fist metre une autre foiz en la prison. Et qant il m’ot tenue une semaine entiere, il fist devant lui venir le chevalier et li demanda se il me voloit prendre por moillier. ¹⁰Et il respondi errament et dit qe il n’avoit talent de moillier, et mi peres le fist metre arrieres en prison einsint com il estoit devant. ¹¹Et puis appareilla maintenant son oerre por chevauchier et prist .iii. escuers avec li et moi et deus damoiseles por moi fere conpeignie. En tel guise com ge vos di nos partimes nos de nostre contré. ¹²Au soir avint qe nos venimes a l’entree d’une forest mout bele et mout grant et trovames une fontaine sor le chemin ou nos descendimes. ¹³Ge avoie .iii. foiz demandé a mon pere ou il me menoit, et tant qe il me dist qe il [me] menoit vers Camahalot a un chevalier qi la demore a cui il me voloit doner por moillier. ¹⁴Qant ge entendì ceste novele, ge me ting a morte, qar ge savoie certainement qi estoit celui chevalier. Ge ne vouxisse lui avoir en nulle mainere dou monde por mari ne por chevalier.

286. ¹«Qant mi peres fu desarmés, com cil qi chevauchoit armez toutesvoies, il s’assist devant la fontaine. Nos nos asseimes devant lui ausint par son comandement et ilec manjames, et il estoit ja nuit aqes obscure. ²Mi peres s’endormi tantost après ce qe il ot mangié, et les damoiseles ausint qi por moi estoient venues, et les escuers autresint de l’autre part. Ge avoie fet semblant de dormir des le commencement, mes ge ne dormoie mie, ainz pensoie mout a atre chose qe cil ne cuidoient qi avec moi estoient. ³Qant ge vi qe il dormoient tuit, ge ne fis autre demorance, ainz me levai et alai droit a mon palefroi et ge le mis le froin, qar la sele avoie ou dos, et puis montai maintenant et dis a moi meemes qe ge ne feneroie ici mes d’esfoir devant qe ge avroie perdu mon pere dou tot, si qe il ne me porroit trouver. ⁴Et ge voiremant, porce qe ge avoie volanté de moi metre a mort, pris ge l’espee qi mi peres portoit et dis a moi meemes qe de cele morroie ge et fineroie mes dolors en tel mainere. ⁵Puisqe ge fui partie de mon pere en

13. a mon] aa m. L4 ♦ me menoit vers] menoit v. L4

286. 3. et alai] alung L4

tele guise com ge vos cont ge ne finai de chevauchier toute la nuit, qe ge n'oi repos ne pou ne grant. ⁶Hui matin au point dou jor me trouvai ge a ceste fontaine, et porce qe ge la trouvai si bele ge descendi, qar il m'estoit bien avis qe ele estoit si fors de voie et de toute gent qe jamés ne seroie trouvee ici, si me porroie plus priveement metre a mort qe en autre leu, et por ce descendi ge. ⁷Si vos ai ore finé mon conte, qar ge vos ai ore devisé mot a mot tout ce qe vos me demandastes asé». Qant ele a dite ceste parole, ele se test atant, qe ele ne dist plus.

287. ¹Qant la damoisele ot finé son conte en tel mainere con ge vos ai devisé, li rois dit: «Or me dites, damoisele, qe vos a vostre foi ferez. Voudriez vos retorner au chevalier qe vos tenez en prison? ²Qar ce vos fas ge bien asavoir et le vos pramet loiaument qe se vos puez tant fere qe ge puise parler au chevalier prison, ge ferai tant qe il s'acordera a vos de ce qe vos tant desirez. – ³Sire, dist la damoisele, se ge cuidasse qe vos peussiez aconplir ce qe vos me prametez, or sachiez qe ge retorneroie, mes ge ne voi en nulle guise coment vos puisiez parler a lui, ne [le] veoir seulement, qar il est gardez de pres. ⁴Por ce di ge qe vos ne porriez pas attendre ce qe vos m'alez pramétant. – Damoisele, ce dit li rois, ore vos metez en aventure de ceste chose, se il vos plect, et retornez vers la contree dom vos venistes ceste part, et ge croi qe ge le ferai en aucune mainere». ⁵A celui point tout droitement qe li rois Artus parloit a la damoisele en tel mainere com ge vos cont, et ele s'acordoit ja de retorner, atant evos venir entre eaus un chevalier armez de totes armes. ⁶Et si auquns me demandast qi il estoit, ge diroie qe c'estoit li peres a la damoisele, celui meemes chevalier qi tenoit Guron en prison, don nos avom parlé ça arrieres aucune foiz. ⁷Celui chevalier avoit non Calinans. Cil estoit bien au voir conter li plus fellon chevalier et li plus desloial qi a celui temps portast armes en la Grant Bretagne. ⁸Et q'en diroie? Il estoit peior de Brehuz sanz Pitié en toutes guises, qar en Brehuz trouvoit l'en cortoisie assez aucune foiz, mes en cestui Calinans ne peust l'en jamés trouver se felenie non. ⁹Qant il est venuz dusq'a eus si armez com il estoit et il voit le roi ilec et sa fille devant lui, porce qe il cuidoit tout

7. demandastes asé] demandescas asé (?) L4 (*riscritto*, v. nota) ♦ dite] dites L4 (*riscritto*) ♦ dist] dite (?) L4 (*riscritto*)

287. 1. qe vos a vostre foi ferez] qee vos vos a volstre fe fere (?) L4 (*riscritto*) ♦ en tel mainere] [cters] mainere L4 (*riscritto*) ♦ vos] rip. L4 ♦ Voudriez] Venidriez L4 (*riscritto*) 3. le] om. L4 ♦ gardez] ga[.]dez L4

certainement qe li rois Artus ait eu afere a sa fille hurte il cheval des esperons et s'en vient sor le roi corrant et li dit: ¹⁰«Vassal, vos estes mors, se Dex me saut! Defendez vos oremés de moi, se vos le poez fere! Ge voi bien et conois de voir qe vos m'avez fet honte et vergoigne de ma fille. Vos en perdrez la teste!». ¹¹Qant li rois ot ceste nouvele, encore fust il seur chevalier assez et legier si a il toute dou-tance. Porce qe il se voit a pié et la teste desarmee, il se tret un pou arrieres et met main a l'espee et la tret dou fuerre. ¹²«En non Deu, fet Calinans, ge te cuit trenchier la teste, et si ferai ge sanz faille ainz qe tu eschapes de mes mains. — ¹³Vassal, ce dit li rois Artus, se tu te vels a moi co[m]batre descent a pié, qar se tu vels venir sor moi einsint a cheval com tu es orendroit, tu me feras fere vilenie et chose qe ge ne voudroie, qar tu me feras ocirre ton cheval maintenant».

288. ¹La ou li rois Artus estoit einsint a pié — et il s'estoit acosté a un arbre, si qe Calynans ne li puet venir sus a sa volenté, qar li rois se couvrist de l'arbre qant il vouxist —, atant evos entr'eaus venir l'escuer le rois Artus qi li amenoit son destrier, qar il ot oï tout clerement le parlement la ou il estoit. ²Et porce qe il avoit poor de son seignor, s'en vint il corrant cele part. Li rois monte a cheval maintenant et prent son escu et son glaive autresint. Qant il est garniz de ses armes, il se torne adonc envers Calinant et li dit: ³«Sire chevalier, or sui ge apareilliez qe ge me combate encontre vos, se vos avez si grant volenté de combattre com vos en fetes le semblant. — ⁴En non Deu, fet Calynans, et vos estes a ce venuz? Onques ne cuidez vos pas qe ge voille leissier cest fet en tel mainere! Huimés vos gardez de moi, qe ge vos abatrai se ge onques puis!». ⁵Qant il a dite ceste parole, il n'i fet autre demorance, ainz leisse corre maintenant envers le roi Artus tant com il puet del cheval trere. Et li rois li vient de l'autre part, qi li fera annui et contraire s'il onques puet. ⁶Einsint s'entreviennent andui li chevalier au ferir des esperons. Et qant ce vient as glaives beisier, il s'entrefierent de toute la force q'il ont. ⁷Calinans, qi n'estoit pas si bon chevalier ne si preuz des armes com estoit li rois Artus, est de cele joste feru si roidemant qe il n'a pooir ne force qe il se peust tenir en sele, ainz vole a terre maintenant estordiz del dur cheoir qe il prist a celui point.

289. ¹Qant li rois voit le chevalier trebuchier, ce est une chose dom il ne li chaut mie granment. Se il li eust rompu le col, il n'i don-

9. vient] vier L4 (*riscritto*) 10. me saut] masaut L4 ♦ conois] conoist L4 (*riscritto*) 13. combatre] cobatre L4

roit mie une maille. ²Lors se torne vers le vallet et li dit: «Or tost, lace moi mon hyaume en la teste». Et cil le fet tout einsint com si sires li comande. ³Qant li rois est garniz de hyaume, lors est il dou tout assureur et il atent tant qe li chevalier se relieve. ⁴Qant il s'est redreciez, il vint sus tout maintenant, tout einsint a cheval com il estoit, et li dit: «Sire chevalier, qe volez vos fere? Vos veez bien coment il est: ⁵qant il est einsint avenuz qe vos ne vos poez encontre moi defendre au fer dou glaive, ge ne cuit pas qe vos vos peusiez bien defendre au trenchant de l'espee». ⁶Calynans, qi bien conoist tout certainement qe encontre le roi ne porroit il mie defendre son cors au loing aler, qant il voit qe il se vet appareillant de la bataille, il respont: ⁷«Dan chevalier, se Dex me saut, ge n'ai ore talant de bataille. – En non Deu, fet li rois, se vos n'en avez talant, et ge la voill de part moi. Or sachiez tout certainement qe vos ne poez de mes mainz eschaper si qitement com vos cuidez. – ⁸Et porqoi? ce dit Calinans. Qel qerele a entre nos deus por qoi ge ne puisse eschaper de voz mains qant ge voudrai? – En non Deu, fet li rois, ge le vos dirai, qant vos ne le savez. ⁹Ge ai tant apri de vostre estre qe ge sai tout certainement qe vos tenez en prison un chevalier errant. Or sachiez qe vos celui chevalier me rendrez quitemant avant qe vos oissiez de mes mains. – ¹⁰Comant, vassal, ce dit Calynans, me cuidez vos donc avoir pris, qi einsint me volez comander? Or sachiez qe avant me combatroie ge a vos qe ge celui prison vos rendisse qe vos m'alez ci demandant. – ¹¹En non Deu, fet li rois Artus, donc estes vos venuz a la bataille. – Et a la bataille soiom, fet Calinans. Ce est une chose sanz faille dom ge ai mout pou de poor». ¹²Li rois descent tout erramant qant il entent ceste parole, et baille son cheval a garder a son escuer. Et puis enbrace l'escu et tret s'espee dou fuerre et la leve encontremont, et li done desus le hyaume un grant cop tant com il puet amener de haut a la force dou braz. ¹³Cil est si estordiz dou cop q'il s'en tient a trop grevez, et por ce se tret il arrieres un pou. Qant li rois voit celui semblant, il conoist dedenz son cuer qe Calinans a esté grevez de cest encontre. ¹⁴Et por ce ne le velt il leissier en tel mainere, ainz li leisse corre l'espee nue autre foiz droite et amoine un autre cop de haut de si grant force com il a et fiert Calinant desus le hyaume. ¹⁵Cil, qi encore sainz faille estoit touz estordiz et estonez dou premier cop, ne puet pas le cop soustenir, qar il vint de plus grant force qe li autre n'estoit venuz. ¹⁶Et por ce trebuche il dou tout et fiert a la terre des

289. 9. un chevalier] [un] c. L4 (un *aggiunto nel margine da mano superiore*)

paumes et des geneux, si grevez estrangement qe il n'a pooir de soi relever. Et gist ilec, la teste [p]endente vers terre, et l'espee qe il tenoit li est volee dou poing tout maintenant.

290. ¹Qant li rois Artus voit qe Calinans ne se muet, il n'i fet autre demorance, ainz li leisse corre dou tout et le prent a l'hyaume, et le tire si fort a soi qe il li arrache fors de la teste et le gite en voie si loing com il le puet giter. ²Puis li avale la coife del fer desus les espauls. Et qant il l'a einsint desarmé, il li comence a doner parmi la teste dou pont de l'espee grandismes cox, si qe il en fait le sanc saillir après les cox qe il li done. ³Qant li chevalier se sent mener si malement, porce qe il a poor et doute qe li rois ne l'ocie maintenant, qe bien en mostre le semblant qe il le voille fere einsint, il li crie merci a haute voiz tant com il puet: ⁴«Ha! merci, sire chevalier. Ge sui appareilliez qe ge face outreement qantqe vos me comanderoiz. Por Deu, ne m'ociez!». Qant li rois entent ceste parole, il le leisse un petit en peis et puis li dit: ⁵«Dan chevalier, se Dex me saut, vos estes mors tot orendroit se vos ne me creantez loiaument a fere toute ma volenté!». Et cil, q'i jamés ne cuide eschaper de celui point des mains au roi, qar bien cuide perdre la vie, li dit: ⁶«Ha! sire chevalier, encore cri ge merci. Por Deu, ne m'ociez, qar ge ferai outreement qantqe vos voudroiz». ⁷Et lors le leisse li rois dou tout, puisque il ot dite ceste parole, et li reedit: «Sire chevalier, ge voill qe vos me creantez orendroit qe vos me menroiz au plus droit qe vos porroiz dusqe a vostre ostel, la ou li chevalier est en prison qe ceste damoisele aime de si grant amor. ⁸Et qant nos serom la venuz, vos deliverroiz de prison le chevalier et le me bailleroiz maintenant. Après creanteroiz qe vos a ceste damoisele ne rendroiz mal guerredon de ce qe ele se parti yer soir de vos. ⁹Tout ce voill ge que vos me creantez a tenir loiaument, sanz fausier riens. – Certes, sire, fet Calinans, et ge le vos creant loiaument, qar ge conois bien qe a ceste foiz ne porroie ge autrement eschaper de voz mains. – ¹⁰Or poez vos armes reprendre, ce li dit li rois, et monter sor vostre cheval. Ge monterai, et ceste pucelle ausint, et puis nos metrom a la voie. Ge ne qier mes sejourner puisque nos nos partimom de ci, devant qe ge puisse veoir le chevalier qe vos tenez en vostre prison. – ¹¹Sire, ce dit Calynans, ge sui appareilliez qe ge face de ceste chose dou tout a vostre volanté tout maintenant».

16. teste pendente] t. endente L4

290. 9. voill ge que] v. ge [que] L4 (que *aggiunto nel margine da mano seniore*)

291. ¹Lors montent errament, qe il n'i font autre demorance. Li rois aide a monter la damoisele. Atant se metent a la voie et tornent au grant chemin, et qant il sunt venuz a la grant voie, li rois se torne vers Calinant et li dit: ²«Ou leistes vos vostre conpeignie? – ³Sire, fet Calynans, ne vos esmaiez, bien le troverom. – Or me dites, fet li rois, se Dex vos doint bone aventure, coment a non li chevalier qe vos tenez en vostre prison? – Sire, fet Calynans, ge ne le sai mie veraie-ment». ⁴Et de ce mentoit le deables, qe il savoit tout certainement qe il estoit appelez Guron, mes il le celoït porce qe il pensoit bien qe li rois l'aloït qerant. ⁵Et il savoit tant de mal qe il feïssoit bien reison en soi meemes qe il eschaperoit des mains le rois assez tost: ja si bien ne le savroit li rois garder. ⁶Qant li rois voit qe par cestui ne savra il le non dou bon chevalier qe la damoisele amoït si merveillement, ce est une chose q'li torne mout a grant contraire. Il demande a Calinant: ⁷«Combien puet il avoir qe vos meistes en prison celui bon chevalier? – Certes, sire, fet Calynans, il a bien .vi. mois entiers. – Dex aïe, fet li rois, et qel mesfet vos fist li chevalier qe si longement le tenez en prison? ⁸Certes, ce est grant damage et trop grant vilenie de tenir en prison chevalier estrange q' n'a trop mesfet».

292. ¹Calynans, q' trop savoit de mal, respont com cil q' avoit trop grant poor dou roi Artus: «Sire, or sachiez tout certainement qe li chevalier don nos parlom m'a tant mesfet qe certes, se il vos eust tant mesfet com il a a moi, ge sai de voir qe vos ne le tenissiez en prison, ainz li eussiez trenchee la teste. ²Il mist a mort un mien neveu qe ge n'amoïe gueres moins de moi meemes. Et por ce le ting ge en prison si longement. – ³Qel preu vos en porra venir? fet li rois. Certes, des lor qe vos l'eustes enprisonnez .xv. jors ou un mois entier le deusiez vos avoir gité fors de prison. – Sire, ce dit Calynans, ire et corrouz qe ge avoïe de mon parent me fist fere cest outrage. ⁴Une autre foiz me garderai de fere un si grant forfet, qar bien conoïs orendroit qe ge fis mal. – Or me dites, ce dit li rois, cel chevalier dont nos parlom, est il mout grant? – ⁵Certes, sire, respont Calynans, grant est il voirement. Dire puis seurement qe il est un des plus granz chevaliers dou monde. ⁶Et est bel chevalier fortment et si fort chevalier en toutes maineres qe ge ne crois pas, si m'aït Dex, qe il ait orendroit en tout le monde un si for chevalier com il est». ⁷Li rois est trop liez durement qant il entent ceste novele, qe bien li vet disant li cuer qe ce est sainz faille celui chevalier qe il vet qerant. ⁸Il tient bien a trop grant aven-

292. 6. si m'aït Dex] si m'a. [Dex] L4 (Dex aggiunto nel margine da mano superiore)

ture et a trop bone cheance de ce qe il trova a ceste foiz la damoisele. Li rois demande autre foiz a Calynant: ⁹«Dites moi une chose qe ge encore ne vos avoie demandé. — Sire, fet Calynans, dites vostre volanté. — ¹⁰Or me dites, se Dex vos doit bone aventure, quel escu portoit li chevalier qant vos le trovastes en cest mesfet, qar por ceste chose porrai ge bien savoir, si com ge crois, se ce est celui chevalier qe ge vois qerant. — ¹¹Sire, fet Calynans, ce vos dirai ge volantiers. Or sachiez qe il portoit un escu d'or. — En non Deu, fet li rois, donc poez vos dire seurement qe ce est celui chevalier qe ge vois qerant. — ¹²Sire, ce dit Calynans, donc avez vos vostre qeste finée, qar ge ne qier qe vos vos partez mes de moi devant qe ge le vos rendrai. — ¹³En non Deu, fet li rois, benoit soies tu Dex qi ceste part m'amenastes, qar ge ai ma qeste finée assez plus legierement qe ge ne cuidoiel!».

293. ¹Einsint parlant chevauchent dusqe ore de none, si font il tout le jor entier et au soir si herbergerent en la meison d'une veuve dame qi mout bien les herberja et mout honoreement. ²A l'endemain, qant il fu ajorné, il se mistrent au chemin et chevauchierent cele matinee sanz aventure trouver qi face amentevor en conte. ³Et qant il ont chevauchié dusqe a midi droitemant, adonc lor avint qe il trouverent un home dormant encoste le chemin, et devant lui estoit un escuer qi le gardoit. ⁴Et li hom estoit armez de toutes armes fors de hyaume, mes en leu de l'hyaume avoit un chapel de fer trop bel et trop riche qe il metoit en sa teste qant il li plesoit. Pres de li estoit atachaiez a un arbre un bon destrier fort et delivres et bien corrant. ⁵Qant li destriers, qi assez estoit sejournez, vit de lui aprochier les autres chevaux, il comença a henir et a ferir a terre des piez devant. Cil qi dormoit s'esveille et saut sus mout vistement, et met le chapel en sa teste et vient au cheval et saut sus de terre, et si estoit li chevaux granz et merveilleux. ⁶Qant li rois voit qe cil n'avoit pas hiaume en sa teste, il conoist tout certainement qe il n'estoit mie chevalier, si le dit a Calynant: ⁷«Veez ci un escuer. — En non Deu, fet Calynans, ne sai se il est escuer ou non, mes de cors est il si bien fet et si bien forniz a mon avis qe il ne me semble pas qe ge encore veisse un si grant home com est cestui, se ce n'est celui chevalier seulement qe ge tieng en ma prison. — ⁸Coment, fet li rois, est donc ausint grant com est cestui li chevalier qe vos tenez en vostre prison? — Sire, oïl, selonc mon avis. — En non Deu, fet li rois, donc est il a merveilles granz, qar cist est grant a merveille!».

293. 2. mistrent] [.]istrent L4 (*bucu, si legge solo il primo jambage della m-*)

294. ¹La ou li rois parloit einsint a Calinans, cil qi portoit le chapel se fu arrestez enmi le chemin. Et il avoit le glaive ou poing et l'escu au col et li escuz estoit couvert d'une houce toute noire. ²Maintenant qe il vit la damoisele aprouchier de lui, qi estoit bele estrangement com ge vos ai dit, il dit a ceaus qi la conduisoient: «Arrestez vos, seignors». Calynans s'arreste errament, et li rois ausint. ³«Seignors, fet il, porce qe vos conduisiez ceste damoisele – et ge la voi si bele a merveille et qe ele me plect trop durement –, vos faz ge une partie, et provez laqel vos ameroiz mieuz: ou vos vos combatroiz a moi, ou vos la me donez franchement». ⁴Li rois respont tout premierement et dit: «Or sachiez, biaux sire, qe la damoisele ne poez vos avoir si qitement com vos dites, qar nos la cuidom bien defendre encontre vos, et bien en avom volanté. ⁵Trop seriom dou tout mauveis se nos einsint la vos qitium. – En non Deu, fet cil, ge voill bien qe vos la defendez encontre moi, se vos fere le poez. ⁶Or i parra qe vos feroiz entre vos deus, qar vos estes a la meslee». ⁷Qant il a dite ceste parole, il n'i fet autre demorance, ainz hurte cheval des esperons et s'adrece envers le roi. Et li vient einsint roidemant et einsint tost com muet li qarel de l'arbaleste, qar li cheval sor qoi il estoit montez estoit si isneux com une yrondele. ⁸Li rois Artus, por verité, n'estoit pas encore appareilliez de la joste, et cil, qi nul bien ne li velt, le fiert si roidement en son venir dou glaive devant le piz qe il le fait voler tout en un mont, et lui et le cheval, a terre. ⁹Li rois est de celui cheoir si estordiz et estonez, ne ce n'est mie merveille, qar il ot esté abatuz de si grant force qe il gist ilec enmi la place tout ausint com se il fust mors. ¹⁰Onques mes en tout son aage il ne trova si roide lance com ceste a esté. Qant il ot le roi abatu, il ne le vet pas regardant, ainz leisse corre a Calynant tant com il puet dou cheval trere. ¹¹Cil, qi a poor de morir, qar bien voit tout apertement qe encontre cestui ne porroit il durer por nulle aventure dou monde, qant il le voit vers lui venir il ne l'ose pas dou tout attendre, ançois li crie: ¹²«Ha! sire chevalier, ne m'ocie! Avant vos qiteroie ge la damoisele qe vos me meisiez a mort». ¹³Qant cil voit et conoit qe il avoit la damoisele conqise si legierement et sor deus chevaliers, il s'en vient a la damoisele, si li dit: «Damoisele, vos veez bien qe ge vos ai gaaignee par reison». ¹⁴Qant la damoisele entent ceste nouvelle, ele comence a plorer trop durement. Et qant ele parole ele dit: «Or sachiez, sire, qe ge n'irai avec vos en nulle guise dou monde qe ge puisse. ¹⁵Et se vos encontre ma

294. 1. ou] oci (?) L4 3. merveille] merve[...]le L4 (*buco*)

volanté me menez, ge vos pramet loiaument qe vos ne me trouveroiz vive au matin. — Non? damoisele, fet il, et coment porroiz vos ore si tost finer com vos dites? — ¹⁶Si m'ait Dex, fet ele, qe ge m'ocirai de mes deus mains se vos m'enmenez maugré mien. — Si m'ait Dex, damoisele, fet cil, qant vos avec moi ne volez venir, et ge vos en qit. ¹⁷Trop seroie de vos desirans se ge vos amasse qant vos ne me prisiez. Ore remanez en ceste place, et ge m'en irai d'autre part por qerre meillors chevaliers qe cist ne sunt».

295. ¹Qant il a dite ceste parole, il n'i fet autre demorance, ainz s'en vet outre entre lui et son escuer et leise ceaus en la place. A chief de piece vint li rois d'estordison, trop honteux et trop vergondeux de cele aventure qi li estoit avenue. ²Et il demande son cheval et l'en li amoine tantost et il monte. Atant evos entr'eaus venir un chevalier et un escuer qi mout fierement se hastoit de chevauchier. Qant il sunt venuz entr'eaus, il lor demandent: ³«Veistes vos le seignor de la Dolo-reuse Tor?». Li rois Artus dit: «Nenil, qar ge ne le conois. — Sire, fet cil, ce est un damoisieaux qe nos leissames ici hui matin, et porte un chapel de fer en sa teste. — ⁴En non Deu, fet Calynant, il s'en vait de ci orendroit et tient ceste voie droitement. Vos le poez tantost trouver, se vos vos hastez de chevauchier». ⁵Cil s'en part tout errament, qe il n'i fet autre demorance, et s'en vet après Carados. Et qant li rois voit qe il a esté einsint deschevauchiez par Carados, qi encore n'estoit chevalier, il le se tient a trop grant vergoigne. ⁶Ore ne set il qe il doie dire, qar en home qi chevalier ne fust ne porroit il metre main par reison. Por ce dit il a Calynant: «Chevauchom. Encore sera, se ge onques puis, ceste honte vengiee». ⁷De celui point fust il bien alez après Carados por cele vergoigne vengier en aucune mainere, mes il disoit a soi meemes qe [se] il se partoit de Calinant, ja puis ne le trouveroit il mie et einsint perdrait la delivrance dou bon chevalier qe il aloit qerant. ⁸Et por ce se met il au chemin après Calynant, et tant chevauchent en tel guise tout celui jor entier qe il anuite devant une meison vielle et decheoite. ⁹Et se il ne portassent qe mangier avec eaus, il peussent bien geuner celui soir, qar ilec n'avoit il qe mangier, ne pres de cele meison n'avoit null recet a moins de .iiii. liues englesches. ¹⁰Por ce lor avint il bien adonc qe feisoient porter avec eaus mangier, et si le fesoient plus por les damoiseles qe por autre chose, qar eles ne pooient pas einsint geuner com feisoient li chevalier. ¹¹Qant il furent descenduz devant la meison, li rois se fist tantost desarmer, mes ce ne

295. 3. Doloreuse Tor] D. Garde L4 (*v. nota*) 7. qe se] qe L4

fist pas Calynant, qar il pensoit bien a autre chose. ¹²Qant li rois ot mangié, si s'endormi com cil qi travailliez estoit de cele jornee, et si escuers s'entredormi de l'autre part. Qant Calynans voit qe li rois s'es-toit endormiz et sis escuers avec lui, il dit a soi meesmes qe ore s'en puet il bien aler, si dit a sa mesnee: ¹³«Or tost, monton et nos meton a la voie en tel mainere qe cist chevalier ne sache nostre departement». Et cil le font en tel mainere com cil le comande. ¹⁴Qant il ont appareillé lor oerre, il se metent au chemin et s'en vont non pas la grant voie, mes une autre qe Calynans lor ot trouvee.

296. ¹Toute cele nuit chevaucherent droit au travers de la forest. A l'endemain, qant il ajorna, il descendirent a une meison de religion et mistrent leianz lor chevaux et se tindrent au plus priveement qe il porrent. ²Eschapez sunt par grant engin des mains le roi Artus. A l'endemain bien matinet s'esveilla li rois tout premierement, et encore se dormoit son escuer. ³Qant li rois regarde entor lui et il ne voit Calynans ne la damoisele ausint ne nul de cele conpeignie, il est si fiere-mant esbahiz qe il ne set qe il doie dire. ⁴Or se tient il a deceuz trop fierement. Il ne set qe il doie fere. Il se dresce en son estant et vet regardant ça et la, or a dextre or a senestre, por savoir se il verroit les escloux des chevaux, ⁵mes noient est de qantqe il qiert, qe il n'en puet veoir nulles enseignes. Il les a einsint perduz a ceste foiz com se il fus-sent entrez en terre. Li rois ne set qe il doie dire de ceste chose, a mort se tient et a trahi vileinement. ⁶«Ha! Dex, fet il, qe porrai ge fere? Tant m'est ore mescheoit. Li chevalier s'en est alez, porce qe il ne delivrast le bon chevalier a l'escu d'or ensint com il m'avoit pramis. ⁷Certes, ore puis ge bien dire qe voirement sui ge li plus mes-cheanz chevalier qi orendroit soit en cestui monde, qar ge ai perdu par ma defaute a delivrer de prison le meillor home qi orendroit soit en vie. ⁸Ce n'est mie la soe culpe, ainz est la moie: ge le voi bien».

297. ¹Li rois, qi tant est corrouciez de ceste aventure qe a pou qe il n'enrage de duel, il esveille son escuer, et il saut sus tout errament. «Ha! fet li rois, com nos avom malement gardé ce qe garder deviom. ²Li chevalier s'en est alez, qi tient en sa prison le bon chevalier a l'escu d'or. Se Dex nel fet, ge l'ai perdu a toz jors mes. Or tost, donez moi mes armes, qe encore le porrom nos trouver par aventure ou apreindre aucunes nouveles certaines qi nos porront reconforter». ³Li rois Artus, qi trop est corrouciez, se fet armer a grant besoing. Et qant il est armez et montez, si comence a rregarder d'une part et d'autre por savoir se il porroit aucunes enseignes veoir de Calynant. ⁴Mes ce qe vaut? Il ne li vaut riens, a piece mes n'en porra il oïr

noveles. ⁵Li rois, qī tant est corrouciez q'a pou qe il n'enrage de duel, s'en vet avant le grant chemin et se haste de chevauchier mout durement. Il ne puet onques veoir nulles enseignes de ce qe il voudroit trouver. ⁶Quant il ot chevauché en ceste mainere le grant chemin toutesvoies, adonc li avint sanz faille qe il encontra .ii. chevalier[s] qī conduisoient une damoisele et un nain, et il estoient andui monté trop richement et trop bien armez. ⁷Quant il vindrent aprouchant dou roi, il s'arrestent enmi le chemin, et li uns crie maintenant au roi: «Sire chevalier, volez vos joster?». Li rois, qī a celui point n'avoit volanté de joster, respont: ⁸«Sire chevalier, or qerez joste en autre leu, qar a ceste foiz avez vos failli a moi: ge n'ai orendroit volanté de joster. — Donc est il mestier qe vos preigniez ceste damoisele qe nos conduisom en vostre conduit! — ⁹Sire chevalier, fet li rois, or sachiez veraiement qe a cestui point n'ai ge ore volanté de dame ne de damoisele: a autre chose me couvient attendre a ceste foiz. — En non Deu, fet li [chevalier], ou vos prendroiz la damoisele, ou vos josteroiz a moi! — ¹⁰Coment, sire chevalier, fet li rois, vos tenez vos si encombrez de la damoisele qe vos volez a fine force qe ge la preigne? — ¹¹Itant vos di ore, fet li chevalier, ou vos la preignoiz, la damoisele, tout maintenant einsint com chevalier doit prendre damoisele en son conduit, ou vos jostez encontre moi. — Or sachiez de voir, fet li rois, qe ge n'ai talent de joster. — ¹²En non Deu, fet li chevalier, donc prendroiz vos la damoisele». Li rois regarde la damoisele et il la voit bele et avenant, et dit a soi meemes qe de ceste damoisele ne se doit il pas tenir a encombrez, qar mout est bele. ¹³Lors dit au chevalier: «Sire chevalier, ge la voill bien, la damoisele, se vos la me donez. — En non Deu, fet li chevalier, et ge la vos doing, ja n'en seroiz escondiz». ¹⁴Li chevalier dit a la damoisele: «Alez vos en a cest chevalier». Et cele le fet tout erramant.

298. ¹Quant ceste chose fu avenue en tel guise com ge vos cont, li autres chevalier qī venoit derrieres un pou si escrie le roi: «Sire chevalier, a joster vos estuet. — Biaux sire, fet li rois, ge n'ai volanté de joster. — ²En non Deu, fet li chevalier, ou vos prendroiz cestui nain qe vos veez et le conduiroiz einsint com chevalier doit conduire, ou vos josteroiz a moi. — Coment? fet li rois. Estes vos encombrez del nain come vostre conpeignon de la damoisele? — ³Oïl, certes, fet li chevalier. — En non Deu, fet li rois, et ge voill le nain a

297. 6. chevaliers] chevalier L4 (*v. nota*) 9. fet li chevalier] fet li «rois» L4 (*v. nota*) ♦ ou vos prendroiz] o[.] vos p. L4 (*bucco*)

ma part. – Certes, fet li chevalier, ce me plect trop. Or le prenez, qe ausint grant joie vos en paise venir com il a fet a nos. – ⁴Ne sai qel joie il m'en avendra, fet li rois, mes toutesvoies le prendrai ge, puisqe ge ai dit qe ge le prendrai, coment qe il m'en doie avenir». ⁵Après ce qe li rois ot pris la damoisele et puis le nain, li rois demanda as deus chevaliers: «Veistes vos tel gent?». Et lor devise l'estre dou chevalier et de la damoisele. ⁶«Certes, dient li chevalier, nos n'encontrames home ne feme hui fors qe vos seulement». De ceste novele est trop durement iriez li rois, et li chevalier li distrent: ⁷«Sire chevalier, ore-més vos comandom nos a Deu, qar nos volom aler en une nostre beisoigne hastivement. Mes au departir qe nos fesom de vos, vos disom nos bien tout certainement qe vos avez trop plus a fere qe vos ne cuidez, qar certes vos avez a conduire deus deables. ⁸Or i parra coment vos le savez conduire a honor de vos. – Seignors chevaliers, fet li rois, a ce qe vos m'alez disant m'avez vos cargié. – Vos le savroiz», dient ces deus chevaliers. Et maintenant s'en vont outre qe il ne font autre demorance en la place. ⁹Joianz s'en vont de grant mainere de ce qe il se sunt delivré dou nain et de la damoisele.

299. ¹Li rois, qi encore estoit remés en la place, qant il voit qe li chevaliers se sunt auques esloigniez de lui, il se torne vers la damoisele et li dit: «Damoisele, qi estes vos? – Sire, fet ele, veoir le poez qe ge sui une damoisele non pas si bele com ge voudroie. – ²Damoisele, ce dit li rois, se Dex me doint bone aventure, se il avoit tantes bontez com ge i voi de biauté, nus ne porroit dire por verité qe il eust en vos mauvestié. ³Porqoi donc est qe cist dui chevalier qi de ci s'en vont dient de vos si grant mal, et dou nain autresint? – Sire, ce dit la damoisele, celui qi est acostumez de dire vilenie ne dira jamés cortoisie volantiers se petit non. ⁴Li chevaliers qi de ci s'en vont sunt si vilains et si anuieux en toutes guises qe jamés si annuieux chevaliers ne verroiz com il sunt. ⁵Or sachiez bien qe se il fusent de riens cortois, il ne deisent vilenie en nule guise de moi ne de nule autre damoisele. ⁶Mes la grant vilenie de eaus ne lor leisse dire fors qe leides paroles et vilaines et anuieuses». ⁷Qant li rois ot ceste parole, il cuide bien certainement qe la damoisele soit assez meillor qe li chevaliers ne li avoient dit, et por ce se re[co]nforte mout. «Damoisele, ce dit li rois, qel part volez vos chevauchier? – ⁸Sire, cele part dom ge sui venue. – Damoisele, fet li rois, donc volez vos bien chevauchier cele part ou ge voill aler, qar ceste est la voie qe ge voill tenir». ⁹Atant se

metent a la voie. Et qant il orent un pou avant alé, la damoisele dit au roi: «Sire, ge ne vos loeroie pas qe vos tenisiez plus cestui chemin ou nos somes orendroit. — Porqoi, damoisele? fet li rois. — ¹⁰En non Deu, fet ele, qe ci devant a une tor ou il vos couvendra joster, vousisiez ou ne vouxisiez, et au joster ne vos acorderiez vos mie volantiers. — Damoisele, fet li rois, qe savez vos? — ¹¹Ne le vi ge, fet ele, orendroit qe vos fustes deus foiz apelez de joster, et andeus les jostes refusastes? Legierement puet l'en conoistre les hardiz chevaliers et les coharz ausint au semblant qe il mostrent au beisoing».

300. ¹De ceste parole est li rois mout vergondeux, qar il conoist certainement qe la damoisele li a dit par rampoine et por mal de lui ceste parole. — Damoisele, fet li rois, il m'est avis qe vos avez ja comenciez». ²Cele ne dit nul mot del monde, ainz chevauche avant toutesvoies pensant adés. Et qant ele a un pou alé bien demie lieue englesche, ele dit autrefoiz au roi: ³«Sire, encore vos loeroie ge en droit conseil qe vos retornisiez, qar se vos venez granment avant, il vos couvendra a joster, ce vos faz ge bien asavoir. — ⁴Damoisele, ce dit li rois, des qant estes vos si privee qe vos avez de moi si grant pitié? Or chevauchiez seurement, qe ge vos pramet qe ge n'en retournerai, tant com ge puse. — ⁵En non Deu, fet ele, de ce vos croi ge bien». Einsint parlant chevaucant tant qe il voient devant eaus un chastel fermé desus un monte, et estoit li chastiaux auques nouveaux. «Sire chevalier, fet la damoisele, veez vos cest chastel? — ⁶Damoisele, fet li rois, ge le voi bien, mes porqoi l'avez vos dit? — En non Deu, fet ele, ge le vos dirai qant vos savoir le volez. ⁷Or sachiez veraïement qe a cestui chastel vos fera l'en mout plus bele acuellance et plus noble qe l'en ne fist a nul chastel ou vos venissiez ja a grant tens, ⁸mes ge vos pramet loiaument qe au departir l'achatez vos mout chierement se vos ne savez mout bien ferir de lance, qar il vos couvendra joster par trois choses. — ⁹Damoisele, fet li rois, devisez moi, se il vos plect, les choses. — Et porqe, fet ele, le vos deviseroie ge? Vos les savroiz bien tout a tens. — ¹⁰Damoisele, fet li rois, puisque vos ne le me volez dire, or me dites, se il vos plect, coment a non li chastiaux. — En non Deu, fet ele, ce vos dirai ge bien. Or sachiez qe l'en l'apelle la Joie Estrange. — ¹¹En non Deu, fet li rois, de celui chastel ai ge bien oï parler autre foiz, il sunt a l'entree dou chastel mout cortoise gent, mes a l'oisir sunt mout vilain. — ¹²Or i parra qe vos feroiz, dit la damoisele. Ge vos pramet qe se vos ilec refusés les jostes com vos refusastes orendroit as deux che-

300. 10. coment] coment | coment L4 11. Deu] de[.] L4 (*bucco*)

valiers qi nos conduisoient, vos n'eschaperoiz pas si legierement com vos eschapastes d'eaus. Leianz ne vaut riens le refuser des jostes».

301. ¹Einsint parlant chevauchent tant qe il encontrent un viell chevalier tout desarmé qi chevauchoit un palefroï mout bel et mout cointe, et fesoit mener devant lui a un vallet a pié un brachet. ²Tout maintenant qe il rencontre le roi, il s'arreste et regarde la damoisele, qe il avoit ja veuee autre foiz. Il ne se puet tenir qe il ne die au roi: «Sire chevalier, Dex vos porroit bien conduire sauvement en cestui voiage, se il velt. – ³Certes, sire chevalier, vos dites verité, et il sauvement me conduira, se il li plest. Mes porquoi, sire, dites vos ceste parole? Se Dex vos doint bone aventure, dites moi le voir. – ⁴En non Deu, fet li chevalier, ge vos en dirai partie, puisque vos savoir le volez. Or sachez qe vos menez en vostre conpeignie deus si males bestes qe certes, se il ne vos meschiet avec eaus et assez tost, ce sera trop grant merveille. ⁵Et tout orendroit en cest chastel qe vos veez ci devant avroiz vos plus de travaill por eaus qe il ne vos seroit mestier. Por ce vos di ge, sire chevalier, qe Dex vos porroit bien conduire, se il voloit». ⁶Quant il a dite ceste parole, il s'en vet outre qe il ne tient au roi autre parlement. Li rois est un pou plus pensis qe il n'estoit devant quant il entent ceste parole, et neporquant il n'est onques desconfortez. ⁷Einsint pensant et parlant entr'eaus chevauchent tant qe il sunt venuz dusq'a la porte dou chastel. Et lors voit apertement qe desus les murs dou chastel avoit ja plus de .C. et .LX. homes qe femes, qi tuit crioient a haute voiz: ⁸«Bien viegne li chevalier!». Et tuit enclinoient au roi ausint com se il seussent certainement qe ce fust li rois Artus. ⁹Et quant li rois voit ceste grant honor qe cil de leienz li feisoient, porce qe il avoit ja oï conter a plusors chevaliers a quel fin lor joie tornoit au derrien, dit il entre ses denz: ¹⁰«Qe ceste joie soit maudite, et tuit cil qi premierement l'acostumerent et cil qi encore la maintiennent». Li rois entre dedenz la porte a tel conpeignie com il avoit. ¹¹Atant evos venir un des chevaliers de leienz devant eaus qi dit a la damoisele: «Bien viegnant, qex nouveles de cest chevalier qi vos conduit? – ¹²Sire, se Dex me saut, fet la damoisele, ge ne vos en sai qe dire, fors qe il est un chevalier de pes. – En non Deu, fet li chevalier, donc soit il mavenuz, et si est il sanz faille! Ja ne qerisom qe tel chevalier fust venuz entre nos a ceste foiz». ¹³Lors se torne envers ceaus dou chastel, qi fesoient encore si grant joie et si grant feste com ge vos ai ore ici devisé, ¹⁴et il fait semblant qe il teissent maintenant, qe au semblant qe il

301. 1. a pié] da pie L4 8. enclinoient] enc[...]noient L4 (*bucò*)

lor fist lor mostra il tout apertement qe cil n'estoit pas chevalier dom l'en deust fere feste, et por ce ont il lor feste leisiee et toute la crie ausint. ¹⁵Li rois, q' tout ot entendu clerement la parole qe la damoisele avoit dite, devint honteux et vergondeux trop fierement. Et un chevalier vient tantost au roi et li dit: «Sire chevalier, voudroiz vos anuit ceianz herbergier, ou chevauchier avant? En vostre volanté en est. ¹⁶Or sachiez, se vos i demorez l'en vos fera honor assez selonc la bonté q' est en vos, et se vos volez ore chevauchier outre, fere le poez. ¹⁷Voirement il vos couvendra tout avant aqitier de la costume de cest chastel, qar einsint est establi».

302. ¹Li rois, q' tantes foiz avoit oï parler de la costume dou chastel, n'avoit pas trop grant volanté de demorer [et] respont au chevalier et dit: «Or sachiez, sire chevalier, qe ge n'ai nulle volanté de demorer a ceste foiz en cest chastel. — ²En non Deu, fet li chevalier, donc porroiz vos tost oisir. Nos volom savoir voiremant, avant qe vos en oisiez, coment vos savez porter voz armes. — ³Or sachiez, fet li rois, qe a ceste foiz n'ai ge mie trop grant volanté de joster. — Si m'aït Dex, fet li chevalier, ce vos croi ge bien: la damoisele q' avec vos est nos en dist auques la novele. ⁴Mes por ce ne remaindra il qe a joster ne vos coviegne, voilliez ou ne voilliez. Et savez vos qantes foiz? Por vos vos covendra joster tout premierement, et après une autre foiz por la damoisele et une autre foiz por le nain. ⁵Et se vos .iiii. damoiseles menisiez orendroit, trois foiz vos covenist joster, et se vos .iiii. nainz menisiez tout ausint». Qant li rois entent ceste parole, porce qe il conoist de voir qe encontre ceste costume ne porroit il aler, respont au chevalier: ⁶«Biaux sire, puisque einsint est qe ge autrement ne me porroie partir de cest chastel, fetes venir les chevaliers encontre cui ge me doi joster, qar ge voudroie ja estre al fet, coment qe il m'en doie avenir». Et maintenant se met li chevalier avant et li rois après.

303. ¹Qant il ont alé en tel mainere tant qe il vindrent enmi le chastel, ou il avoit une mot bele place auques grant ou li chevaliers estranges estoient acostumez de joster encontre ceaus dou chastel, ²«Biaux sire, fet li chevalier, en ceste place josteroiz vos. — Or viennent donc li chevaliers q' encontre moi se doivent joster. — En non Deu, fet li chevalier, vos les avroiz tout maintenant». ³Après cestui parlement peusiez veoir toute la place enplir de gent q' venoient ilec por regarder les jostes. Et après ce ne demora gueres, evos venir enmi la place .iiii. chevaliers apareilliez, et il se metent el chief des rens. ⁴Li

302. 1. et respont] r. L4 2. donc] dono L4

rois estoit de l'atre part tout apareillié de joster. Puisque il voit qe il n'i a fors dou movoir, il n'i fet autre demorance, ainz leisse corre encontre l'un des chevaliers qi ja li venoit le glaive beisié. ⁵Li rois le fiert de si grant force qe il porte tout en un mont et lui et le cheval a terre, et est li chevalier mout degassez et debrisie, qar li chevaux li fu cheoiz sus le cors. ⁶Qant li rois ot celui abatu, il ne le vet mie regardant, ainz retorne au leu dont il estoit venuz, et [cil] qi les jostes regardoient et voient le chevalier abatu, il s'escrient: «Bien l'a fet li mauveis chevalier, mieuz l'a fet qe nos ne cuidiom». ⁷Li rois entent tout clerement qe cil de leianz l'apelloient mauveis chevalier, mes de tout ce ne li chaut. Il set bien de voir qe la damoisele lor avoit fet enntendant. Qant il est venuz ou leu dont il li couvenoit movoir por joster, ⁸il le[isse] corre une autre foiz, porce qe voit qe li chevalier dou chastel li venoit por joster de l'autre part. Li rois, qi met en cele joste cuer et cors, fiert le chevalier por tel force qe por l'escu ne por le hauberc ne remaint qe il ne li face enmi le piz une grant plaie et parfonde. ⁹Li chevalier est si grevez de celui cop qe il ne se puet tenir en sele, ainz vole a terre maintenant. Puisque li rois a abatu le chevalier, il ne le vet pas regardant, ainz retorne au leu dom il estoit meuz devant. ¹⁰Et cil dou chastel, qi cuidoint tout verairement qe li rois soit li plus coharz chevalier dou monde, qar einsint lor avoit fet entendant la damoisele, il sunt si esbahiz durement qe il ne se vent qe il doivent dire. ¹¹Maintenant qe li rois est appareilliez de la joste, il leisse corre au tiers chevalier dou chastel et fet de li ausint com il avoit fet des autres deus chevaliers, qar il le porte a terre maintenant mout felleneusement. ¹²Qant li rois s'est des .iii. chevaliers dou chastel delivrez en tel guise com ge vos cont, il se torne adonc envers un chevalier auques de tens qi devant lui estoit touz armez et li dit: ¹³«Sire chevalier, vos est il avis qe ge soie encore aqitez de la costume de cest chastel? Dites le moi, se ge i ai plus a fere. – Certes, biaux sire, fet li chevalier, or sachiez qe vos n'i avez plus a fere, se cil de ceianz ne vos font tort».

304. ¹Lors parole li rois Artus a ceaus qi devant li estoient et dit si haut qe tuit le poent entendre: «Seignors, ai ge plus ici a fere por aqiter moi de la damoisele et de la costume de ceienz? – ²Sire, font li chevaliers, vos n'i avez plus a fere. Or vos en poez seurement aler, qar vos ne troveroiz ceianz qi vos arreste de riens. Et se vos volez, vos poez remanoir: assez troveroiz qi vos fera honor et courtoisie. – ³Si m'aït Dex, dist li rois, ja por honor qe ge trouve a cestui

303. 6. cil qi] qi L4 8. il leisse] il le L4 10. Et cil] Et qant cil L4 (*v. nota*)

point ne voill ge remanoir». Lors dit a son escuer: «Met toi a la voie, si issom fors de cest chastel. — Sire, fet li escuers, a vostre comandement». ⁴La damoisele s'en voloit aler avec le roi et li nainz ausint, mes li rois, a cui lor conpeignie ne plect trop, dit a la damoisele: «Damoisele, se Dex me saut, ge ne voudroie mie qe vos venisiez avec moi. — ⁵Sire, fet ele, porquoi? — Si m'aït Dex, fet li rois, porce qe vos estes assez annuieuse et vilaine, et mout plus qe damoisele ne devroit estre. — ⁶Sire, fet ele, se ge vos dis a cestui point aucune chose qi vos doie despleire, et ge m'en chastierai des or en avant. Et bien le doi fere par reison, qe ge conois orendroit sanz faille qe vos estes assez meillor chevalier qe ge ne cuidois. — ⁷Damoisele, dist li rois, se vos volez outreement fere qantqe ge vos comanderai sanz riens contradiere, adonc chevauchiez seurement avec moi. Et se vos nel volez fere, donc remanoiz, ge le vos comant fermement. — ⁸Sire, fet la damoisele, ge ferai qantqe vos voudroiz sanz escondire. — Donc chevauchiez, fet li rois, tout seurement atout vostre nain».

305. ¹Atant se partent dou chastel, et il estoit auques tart. Et un chevalier qi bien conoissoit la damoisele et le nain, qant il voit qe li rois s'en vet, il li dit: «Ha! sire chevalier, com vos menez avec vos mauveise conpeignie! ²Or sachiez qe vos menez avec vos la plus desloial damoisele qi soit ou monde et le peoir nain qi soit ou siecle. Certes, il vos metront en tel leu ou vos ne porroiz oisir ne mort ne vif, mauveissement les conoisiez». ³Li rois entent tout clerement le chevalier, mes il ne li respont de riens, ainz s'en vet outre. Et qant il est fors dou chastel il dit a la damoisele: «Damoisele, males nouveles dient de vos tuit cil de ceste contree. ⁴Or vos gardez de fere mal en ma compaignie, qe ge vos pramet qe vos en seriez tart a repentir, se ge vos i prenoie». La damoisele a grant poor et grant doute de ces paroles. ⁵Ele ne dit mie qantq'ele pense. Ele dit bien entre lui et le nain priveement qe se ele ne moine le roi en tel leu ou il couvendra a remanoir, ele ne se prise une maille: ele abatra tot son orgoill, se ele puet. ⁶Einsint chevauche li rois tant qe il est venuz a l'entree d'une forest, et troevent ilec une riche meison qe un forestier avoit fet nouvelement. Qant li rois est venuz au recet, il fet demander a ceaus de leianz se il i porroit demorer cele nuit. ⁷Et cil de leianz, qi bien savoient de voir qe li forestier herbergeroit volantier tout adés les chevaliers erranz qe aven-

304. 4. avec] [.]vec L4 (*buco*) 6. doie] d[.]ie L4 (*v. nota*)

305. 6. avoit] [.]voit L4 (*buco*)

ture amenoit cele part, qant il voient le roi qī demande hostel, il li dient: ⁸«Venez avant, sire chevalier, qe vos soiez le bienvenuz! Or sachiez qe ceianz vos sera fet honor et cortoisie tant com nos porrom». Li rois descent et se fet desarmer, et cil de leianz li aportent maintenant un riche mantel d'escarlare por afibler soi, qe il n'eust froit après les armes. ⁹Après ce ne demora gueres qe li sires de la maison vint la defors. Et qant il voit le roi Artus si biau bachalier com il estoit, porce qe il conoist bien qe il estoit chevalier errant li comence il a fere trop bele chiere. ¹⁰Mes qant il vit la damoisele qe il conoisoit bien, il ne [se] puet tenir qe il ne die: «Sire chevalier, ou preistes vos ceste damoisele? Certes, pechié la vos amena devant. ¹¹Por Deu, delivrez vos de li au plus tost qe vos le porroiz fere, qe ge vos pramet qe ce est la plus orgueilleuse damoisele et la plus desdeignose qe vos onques veisiez! ¹²Et si vos di une autre chose de lui: or sachiez de voir qe vos ne porroiz longement aler avec lui qe ele ne vos mete a mort ou en prison! – Damoisele, ce dit li rois, qe dites vos de ces paroles? – ¹³Sire, fet la damoisele, qe volez vos qe g'en die? Ge voi tout apertement qe vos avez si grant poor et si grant doute de chascune parole qe l'en vos dit qe certes ge ne cuit mie qe l'en peust trouver en tout le monde nul chevalier plus cohart de vos, ne vos poist se ge le vos di. – ¹⁴Damoisele, fet li rois, or voi ge bien qe vos me failliez de couvenant, qar vos me prameistes hui qe vos feriez tout mon comandement. – ¹⁵Et qel deable seroit qī covenant vos tenist? De chasque parole qe l'en vos dit vos estes si fierement espoentez q'a pou ne moroiz de poor. Certes, ce fu grant damage et grant mescheance qe vos oisistes dou chastel ou vos entrastes hui. ¹⁶Il n'appartient a nul chevalier errant qe il ait poor, ainz doit touz jors estre hardiz en toutes aventures, et vos avez poor. Ge, qī sui une damoisele, qel damage vos puis ge fere, et qel contraire? ¹⁷Certes, trop estes pooreux, et si m'aît Dex, ge cuit et croi qe vos estes de Cornoaille». Li rois est honteux trop fierement qant il entent ceste parole, il se test qe il ne dit mot: ¹⁸mout desire en toutes maineres qe il soit delivré de ceste damoisele. Et [ele] li reдит autre foiz: «Dites moi, sire chevalier, ne savez vos en qel mainere vos me prameistes a conduire? ¹⁹Or vos gardez qe vos ne me failliez de couvenant en nulle guise, qe, si m'aît Dex, vos vos en repentiriez. Et ne cuidez pas qe ge soie dou tout a vos, fors tant com il me plera. ²⁰Et sachiez bien qe il est mestier qe vos aloiz plus en ceste

7. qant il voient] L4 *nuovo* § (v. nota) 10. il ne se puet] il ne p. L4 12. autre] rip. L4 16. doit] doint L4 18. ele] om. L4

voie a ma volanté qe ge a la vostre: vos conoisiez maveisement qe ge puiſe fere».

306. ¹Qant li rois entent cestui plet, il se comence fort a rrire et respont en sorriant: «Ma damoisele, puisqe il est einsint qe il couvient qe ge face en vostre manoie ceste voie, donc vos pri ge, par la franchise vostre, qe vos ne me façoiz se cortoisie non. — ²Certes, fet ele, ge vos ferai selonc ce qe vos deserviroiz». Lors se torne li rois vers le forestier et li dit: «Veistes vos hui tel gent chevauchier par ceste contree?». Et li devise tout maintenant celui afere de Calynant et de sa conpeignie. ³Li forestier respont: «Certes, sire, ge n'en vi riens, ne parler n'en oï». Li rois dit: «Ge me tieng a mort de ce qe ge perdi le chevalier en tel mainere. — Or ne vos esmaiez, biaux sire, fet li forestiers, qe vos le trouveroiz par aventure en ceste contree. ⁴Or me dites, porqoi l'alez vos qerant? — Por ce, fet li rois, qe il tient en prison un chevalier qe ge trop voudroie veoir. — Sire, ce dit li forestiers, conoisiez vos un chevalier q'i porte un escu tout a or? — ⁵Certes, fet li rois, ge ne le conois, mes ge en ai ja oï parler a plusors q'i le virent. Mes porqoi avez vos ore demandé de lui? dit li rois. — ⁶Por ce, fet li forestier, qe, ce vos faz ge bien asavoir, qe il n'a encore mie mout grant tens qe il me fist une si grant bonté qe il n'est orendroit nul q'i peust fere nulle si grant bonté com cele fu, qar il me delivra de mort, moi et ma moillier. ⁷Et fist un si grant fet por ma delivrance qe certes ge ne croi pas qe li .iiii. meillors chevaliers q'i orendroit soient ou monde peus[sen]t ce fere qe il fist. Et por ce demandai ge orendroit de lui. — ⁸Si m'aît Dex, ge ne vos en sai dire nulle certaineté fors qe il est en prison. Mes or me dites, se il vos plect, qel chose fu cele qe il fist por vos. Dites le moi, se Dex vos doint bone aventure». ⁹Li forestier respont: «Certes, biaux sire, il i avroit ja trop a conter: por ce m'en soufferai ge a ceste foiz, se il vos plect. — Certes, biaux hostes, ce dist li rois, or sachiez veraïement qe cestui conte qe ge vos demant oïsse ge trop volantiers, se il vos pleust. — ¹⁰Or vos en soufrez orendroit, ce dit li forestiers, et cestui soir par aventure ge le vos conterai. — Et ge m'en soufferai, ce dit li rois, tant com il vos plera».

307. ¹Lors comence li forestier a parler d'autre chose et dit au roi Artus: «Dites moi, biaux hostes, cil de ceianz vos herbergerent il annuit por la costume de l'hostel? — ²Certes, hostes, dist li rois. Or sachiez qe, qant il m'aherbergerent, il ne me parlerent d'une costume ne d'autre. Mes porqoi le me demandez vos orendroit? ³A il donc en

306. 1. ceste voie] en c. v. L4 4. tient] tientient L4 7. peussent] peust L4

cestui hostel autre costume qe il n'a es autres hostelx de cestes contree? – Certes, oïl, fet li forestiers, il i a voiremant une tel costume qi a nul autre hostel ne se trouve, et certes ge voudroie qe ele n'i fust pas. – ⁴Et donc, puisqe vos ne voudriez qe ele n'i fust, ce dit li rois, porqoi donc ne l'ostez vos? – Certes, dit il, qe ge ne puis. Mi peres la maintint lonc tens, et ge meemes l'ai ja maintenue. ⁵Mes maintenue ne l'eusse au voir conter, qar certes ge ne la maintieng pas de bone volanté se ne fust ce qe mi peres me fist jurer qe ge ne la leiroie a maintenir jor de ma vie, ⁶ne maintenue ne l'eusse dusqe tant qe li bon chevalier ne la feïst remanoir, cil qi metra a fin toutes les aventures del roiaume de Logres, cil qi porra bien ceste aventure fere remanoir. ⁷Mes autrement ele ne remaindra tant com ge la puiſe maintenir. – Biaux hostes, fet li rois, as paroles qe vos me dites m'est il avis qe ele ne remaindra a piece, qar sainz faille li bon chevalier qi doit mener a fin les aventures dou roiaume de Logres ne vendra pas encore. – ⁸Bien puet estre, fet li forestiers. – Biaux hostes, fet li rois, or me dites, se il vos plect, qele est la costume de ceianz. – En non Deu, fet li ostes, ge le vos dirai. ⁹Or sachiez qe se .iiii. chevaliers ou plus encore vienent ceianz herbergier tout ensemble, il sunt volantiers herbergiez a bele chiere: tant chevaliers com il vien[en]t ensemble, tant en recevom nos trop volantiers. ¹⁰Mes puisqe il sunt herbergiez et desarmez, se aucuns chevalier vient la defors qi voille herbergier, il est mestier qe cil qi herbergié sera ceianz premieremant isse fors et qe il s'esprove errament encontre celui qi de fors vient. ¹¹Cele esprove voirement si est de joster seulement, et qi premiere-mant est abatuz, por amedement de la honte qe il reçoit en ce qe il est abatuz, si est herbergiez ça dedenz, et li autres si se porchace puis d'ostel au mieuz qe il puet. ¹²Sire chevalier, or sachiez de verité qe ceste costume est ceanz maintenue fermement: li meillor est chaciez et li pire remaint adés».

308. ¹Qant li rois entent ceste novelle, il comence a sourire trop fierement. Et qant il parole il dit au forestier: «Si m'aït Dex, sire hostes, ceste costume est vilaine qe vos maintenez en vostre hostel. ²Il me semble qe par reison devroit plus estre hostelez li bons qe li mauveis, et ceste costume qe ge vos di orendroit est bien fermement maintenue en plusors leus del roiaume de Logres. ³Mes ceste dom vos orendroit parlez n'oï ge onqe mes a jor de ma vie en leu ou ge fusse. – Biaux sire, fet li forestiers, greignor pitié doit l'en avoir par reison

307. 7. com] [.]om L4 (*buc*) 9. vienent] vient L4

des foibles chevaliers qe des fors, qar li fort home troevent plus legierement secors qe ne font li foible. ⁴Qant il avient par aventure qe il fait ou pluie ou mau tens et un fort chevalier est ceianz, et li foibles vient puis de fors et il est dou fort abatuz, se il estoit adonc chaciez après la honte qe il reçoit, trop li seroit mal avenü en toutes guises. ⁵En leu de la honte qe il a, li feisom nos cest amendement en toutes guises, qant il est ceianz receu et li autres s'en vet defors. Et por ce poez vos veoir qe cist hostel est de pitié, qar il reçoit les foibles, et les forz et les roides gite il defors. — ⁶Hostes, ce dit li rois, or sachiez tout veraïement qe ceste costume est mauveise et annuieuse et dure. De si dure costume ne de si estrange n'oï ge onques mes parler. ⁷Ceste costume est encontre toute reison, qar ce savez vos tout de voir qe en nulle cort ne sunt chaciez li bons chevaliers por les mauveis, et il sunt chaciez de ceianz: ce est bien costume a rrebors. — ⁸Biaux hostes, fet li forestiers, ge ne trouvai pas ceste costume premierement, ne ele ne remandra ja por moi, ainz la maintendrai sainz faille tant com ge la porrai maintenir, porce qe mi peres la mantint grant piece de son aage. — ⁹Biaux hostes, fet li rois, or sachiez tout veraïement qe de ceste costume a maintenir vos porroit plus tost venir damage qe profit. — Ge ne sai qe il m'en avendra, dit li forestier, mes encore la maintendrai». ¹⁰A celui point qe il tenoient entr'eaus deus tel parlement, atant evos un vallet venir et dit: «Sire, la defors a un chevalier errant qi voudroit ceianz herbergier, se il vos pleisoit. — ¹¹Bien soit il venuz, dist li forestiers. Ge ne le puis ceianz herbergier se non par la costume de cest hostel: alez a lui si li dites la costume». ¹²Li vallet s'en vet maintenant la defors por dire la costume de l'ostel au chevalier qi voloit leianz herbergier. Et maintenant s'en retorne li vallez et dist: «Sire, li chevalier en est toz apareilliez de metre soi en aventure de gaaignier l'ostel par la costume de ceianz. — ¹³Biaux sire, fet li forrestier au roi Artus, entendez vos ceste novele? Or tost, prenez vos armes et vos en alez la fors esprover au chevalier qi se velt ceianz herbergier. Se vos abatre le poez, ne retornez cestui soir, qar bien sachiez qe ge ne vos i recevroie pas. ¹⁴Mes se vos estes abatuz, adonc retornez seurement, qar adonc vos i recevrai ge. — Sire, ce dit li rois Artus, ceste costume soit honie, qar certes ele est la plus vilaine dom ge oïsse parler encore!». ¹⁵Li rois demande ses armes et l'en li aporte maintenant. Et qant il est armez, il vient enmi la cort et monte sor son des-

308. 6. De si] Onques de si L4 (si sopprime onques, ripetuto, all'interno di una formula, nella parte successiva della frase)

trier et prent son escu et son glaive. ¹⁶Et puis s'en ist tout errament et trouve qe li chevalier estoit la fors touz appareilliez de joster encontre le roi Artus.

309. ¹Quant li rois est venuz la ou li chevalier l'atendoit, il n'i font autre demorance, ainz leisse corre li uns encontre l'autre tant com il poent des chevaux trere, et si estoit auques nuit a cele foiz. ²Li rois est si feruz de cele joste qe il est portez a la terre, et lui et le cheval ensemble, qar, a la verité dire, li chevalier estoit de trop grant force garniz. ³Li rois, q'i assez estoit legiers, se lieve mout vistement, mes il est tant durement iriez qe a pou qe li cuers ne li faut de dolor el ventre. ⁴Et neporquant, auques le vet reconfortant en ceste aventure ce qe li chevaux estoit cheoiz desouz lui, et il dit au chevalier: ⁵«Sire chevalier, vos poez joster derechief, se il vos plect, qar vos ne m'avez abatu, ainz m'abati mis chevaux q'i desouz moi cheï. – En non Deu, fet li chevalier, puisque vos dites qe ge ne vos abati, et ge vos en qit, mes voirement tant i avra qe ge ne josterai huimés a vos». ⁶Lors vient li rois a son cheval et trouve maintenant qe li cheval se doloit malement dou cheoir qe il ot pris a terre. ⁷Li rois Artus, q'i trop volantiers vengeroit sa vergoigne, se il le pooit fere, dit au chevalier: «Sire, encore josterroie ge a vos, se vos voliez. – Or sachiez qe ge ne josterai huimés a vos. – ⁸Puisqe vos ne volez joster, fet li rois, or vos combattez a l'espee trenchant encontre moi. – Or sachiez, fet li chevalier, ge ne me combatrai huimés a vos ne a autre qe ge puse, ne a ceste foiz meemes n'eusse pas josté a vos, mes besoing le me fist fere. – ⁹Or me dite, fet li rois, se il vos plect, coment vos avez non? – Et de savoir mon non qe gaagneriez vos? fet li chevalier. Certes, assez petit». Lors vient li forestiers au roi Artus et li dit: «Sire, or poez vos estre herbergieç. – ¹⁰Si m'aït Dex, biaux hostes, fet li rois Artus, or sachiez tout veraïement qe de ceste aventure ne sui ge mie trop joianz. Et certes, por l'amor de ceste bele aventure q'i avenue m'est, ne qier ge entré a ceste foiz leianz desoremés por herbergier».

310. ¹A celui point qe li rois parloit au forestier, evos entr'eaus venir une damoisele q'i dit a ceaus q'i ilec estoient: «Fuiez vos tuit et leissiez herbergier ceianz le meïllor chevalier dou monde, q'i ceianz velt entrer por herbergier cestui soir». ²Quant li rois entent ceste nouvelle, il se conforte trop fieremant, qar maintenant li dit li cuer qe il ne puet estre en nulle mainere qe ce ne soit Guron li Cortois, qe il vait qerant, puisque ceste damoisele dit qe ce est li meïllor chevalier

dou monde. ³Atant evos entr'eaus venir le chevalier, et il estoit granz assez et trop bien seanz en sele. ⁴«Que vos diroie? A merveilles sembloit preudome. Et qant il est venuz entr'eaus, il les salue maintenant, et cil li rendent son salu au plus tost et au plus bel et au plus cortoisement qe il le sevent fere. ⁵«Liqex de vos, fet il, est seignor de cest ostel?». Et li forestiers se met errament avant et dit: «Biaux sire, ge sui seignor de ceianz. Qe vos plect? Dites vostre volaté. — ⁶En non Deu, dit li chevalier, ge voudroie herbergier en vostre meison, se il vos pleisoit. — Biaux sire, fet li forestiers, or sachiez qe por les bones noveles qe ge ai entendues de vos, vos herbergeroie ge volantiers, se ge peuse. ⁷Mes bien sachiez qe ge ne le porrai fere sanz la volaté de cest seignor qi ci est, si li mostre le roi Artus, et sor tout ce vos couvendrai il joster a lui tout avant. Et se ce ne fust, orendroit ge vos herberjasse. — ⁸En non Deu, dist li chevalier, il m'est bien avis qe ce seroit trop tart de joster, et neporqant ja por une joste ne remaigne».

311. ¹Lors se torne envers li roi Artus et li dit: «Sire chevalier, avez vos en volaté de joster encontre moi? Veez m'en tout appareilliez, se vos volez». ²Et li rois, qi bien cuide de voir qe ce soit Guron li Cortois sainz faille — celui qe il vet qerant! — et encontre lui ne se voudroit il en nulle guise esprouver, respont: «Or sachiez, sire chevalier, qe a cestui point n'ai ge nule volaté de joster encontre vos. — ³Donc vos pri ge, fet li chevalier, qe vos me qitez l'ostel dou tout, qar de la costume de ceianz sai ge bien tant qe ge sai de voir qe li osten ne herbergeroit pas deus chevaliers ensemble se il n'estoient d'une conpeignie. — ⁴Certes, dit li rois, sire chevalier, et por l'amor de vos qit ge cest ostel dou tout». Et lors se torne li chevalier envers le forestier et li dit: «Vos me poez bien herbergier, ce m'est avis, qar cist chevalier me qite l'ostel franchement. — ⁵En non Deu, sire, dist li forestier, puisque il vos qite la soe reison, et ge vos voill bien donc herbergier. Mout me plect mieuz, se Dex me saut, qe vos soiez huimés mon hoste qe se il le fust». ⁶Lors se torne envers les deus chevaliers et lor dit: «Seignors chevaliers, or poez chevauchier et qerre hostel en autre leu, qar a ceste foiz avez vos a cestui failli cestui soir sanz faille». ⁷Et qant il a dite ceste parole il s'en entre dedenz, et li chevalier avec lui. Et maintenant est la porte fermee de l'ostel. Qant li rois Artus voit ceste chose, il se torne vers le chevalier qi l'avoit abatu et li dit: ⁸«Sire chevalier, or poez veoir qe nos somes defors. Vos m'en feistes oissir et si m'en gitastes, puis en estes vos gité. Vos n'i estes, ne ge n'i sui, anuit

en cest hostel». Et li chevalier respont et dit au roi: ⁹«Sire chevalier, li tens est bien biaux et clers, il n'est ore près de ci nul recet ou nos aillom herbergier. Nos trovom a grant planté qe paistre por les chevaux. ¹⁰Dahez [ait] ore de ma partie qi mieuz demande ceste nuit: se seulement eusse pain ge ne demanderoie plus».

312. ¹Quant li rois ot ceste parole, il se comence a sorrre et dit entre ses denz qe de grant cuer est li chevalier, q'i si hautement se reconforte en ceste aventure. Et la damoisele, qi tant estoit doulente de ce qe ele est mise fors de l'hostel q'a pou qe ele n'enrage de duel, quant ele voit qe li rois parloit au chevalier qi abatu l'avoit, ele dit: ²«Certes, sire chevalier, or estes venuz a vostre droit. Bone aventure ait le chevalier qi vos a mis fors de l'hostel, qar certes li hostex valoît pis de ce qe vos y estoiez. ³De cest chevalier qi ci est, si est domage de ce qe il est defors. Mes de vos ai ge mout grant joie, qar certes se il fussent .l. en une place, si seriez vos toutesvoies li plus mauveis. – ⁴Ha! damoisele, ce dit li rois, il m'est avis qe vos avez mis en oubliance ce qe vos me prameistes, tost me failliez de couvenant. – Et qi seroit cele, fet ele, qi de vos porroit bien dire? Qe vos estes en toutes guises si coharz et si perceux com ge sai! ⁵Certes, ce fu bien mescheance trop grant qe vos eschapistes hui de celui chastel qe vos savez sainz honte a prendre de vostre cors. Grant bien eust esté sainz faille qe vos y eussiez auqun pou de vostre reison. – ⁶Damoisele, ce dit li rois, ge sui tex com vos veez, qe diriez vos? – En non Deu, dit la damoisele, ainz estes encore peior! Et por la vostre mavestié si somes si avilenis qe nos giromes ceste nuit en la chanpaigne. – ⁷Damoisele, ce dit li rois, autre foiz gerom en chaut et en chastel. – Encore, ce dit la damoisele, puisiez vos tant demorer qe ge vos en traie, adonc ne prendriez vos pas damoisele en vostre conduit com vos preistes moi. – ⁸Ha! damoisele, ce dit li autres chevalier, por Deu, ne soiez trop vilaine, mes parlez cortoisement com damoisele doit parler, si en vaudroiz mieuz en toutes guises. – Sire, fet la damoisele, vos plest il? – ⁹Damoisele, fet li chevalier, ainz vos en pri. – En non Deu, fet ele, ge le ferai por vostre priere aconplir, qar certes vos estes bien home de qi l'en doit fere bien por sa priere».

313. ¹Lors se torne li chevalier envers le roi Artus et li dit: «Dites moi, sire chevalier, qe voudroiz vos fere? Voudroiz vos ici remanoir ou chevauchier en autre leu? – ²Certes, ce dit li rois, or sachiez tout de voir qe ge ai si grant volanté de veoir le chevalier qi leianz herber-

311. 10. ait] *om.* L4

312. 1. sorrre] sorri | rre L4 4. dit] d[.]t (*buco*)

gera anuit qe ge me tendroie a mort se ge nel veise avant qe il se parte de cestui leu: ge voill ici estre demain matin. ³Qant li chevalier [se] levera, ge parlerai a lui por savoir se il porroit estre un chevalier qe ge vois qerant et por cui ge ai maint jor travaillié, qar bien sachiez veraïement qe celui chevalier dont ge vos parol orendroit [est] l'om dou monde qe ge verroie plus. ⁴Se il vos plect, vos poez chevauchier aillors, qar leïanz, ce sai ge bien de voir, ne poez vos huimés entrer. — En non Deu, fet li chevalier, ge travaillai tant cestui jor qe ge ne voill plus de travail: ge voill huimés demorer ici. ⁵Li sires de leïanz nos donrai pain et eve au meins, et se il me fait ceste bonté, ge ne voill plus dou suens a ceste foiz». ⁶Lors fet son hyaume oster et availle sa coife dou fer et les manicles, et comande a son escuer qe il aporte herbe sor qoi il dormiroit, et cil fait tout ensint com il le comande. ⁷Et li rois, qi trop estoit desiranz de conoistre le chevalier, qar il feisoit reison en soi meemes qe il ne pooit estre qe li chevalier ne fust garniz de trop haute bonté, le met en parlement et li dit: ⁸«Sire chevalier, de qel part venez vos ore, et qel part baez vos aler? Dites moi, se Dex vos doint bone aventure, coment vos avez non». Et li chevalier respont tantost et dit au roi: «Sire chevalier, porqoi estes vos ore si desiranz de savoir la verité de mon estre? — ⁹Certes, fet li rois, qe il m'est avis qe vos soiez trop preudom des armes, et por ce vos desir mout a conoistre. — En non Deu, fet li chevalier, mauvement savez bon chevalier conoistre, qi por bon chevalier me tenez. ¹⁰Porce qe vostre cheval cheï desouz vos et vos avec le cheval cheistes me tenez a bon chevalier, vos tenez trop la reison! ¹¹Or sachiez tout veraïement qe jamés a jor de ma vie bon chevalier ne serai, qar ge n'enn ai premierement la force ne le pooir, ne il ne plect a Deu, qi les graces done as mortex homes. ¹²Ge sai de voir qe mi peres ne fu si bon chevalier des armes dou tout, ne si vaillanz com vos dites. Si mi peres eust esté si vaillanz en son tens et de si haute valor com sunt mainz autres bons chevaliers, adonc peusse ge avoir esperance qe encore venisse ge a aucune haute renomee. ¹³Mes qant il est en tel mainere qe il ne fu si bon chevalier d'assez com il deust estre, de qel part donc porroit venir la tres grant bonté qe vos dites? ¹⁴Sire chevalier, or sachiez qe de mauveis chevalier n'istra jamés preudome, se autrem[ent] ne s'esforce encontre reison d'amender tel nature qi de mauveis home est oissue. ¹⁵Et por ce di ge qe ge en nulle guise dou monde ne porroie estre tres bon chevalier, qar mi peres ne le fu mie.

313. 3. se levera] levera L4 ♦ est] om. L4 14. autrement] autrem L4

314. «— ¹Sire chevalier, porqoi blasmez vos vostre pere? Par aventure il fu assez meillor chevalier qe vos ne dites. — ²En non Deu, dit li chevalier, ce ne vos dirai ge mie, ne ne dirai qe il ne fust assez bon chevalier des armes, tant com il armes volt porter. Mes porce qe a son tens furent des meillors chevaliers qe il ne fu, ne di ge pas qe il fust bon chevalier. — ³Or me dites, ce dit li rois, coment fu apelez vostre pere? — Certes, fet li chevalier, son non vos dirai ge bien, puisque savoir le voloiz. ⁴Or sachiez certainement qe cil qi le conoisoient l'apelerent Helianor de la Montaigne, et fu un tres grant chevalier et fors a merveilles. Mes a la verité dire, il ne fu mie si bon d'assez des armes com il avoit la force en lui». ⁵Qant li rois ot ceste nouvelle, il li souvient tout maintenant dou chevalier qe il avoit leissié a l'ermilage, celui meemes qi avoit son fill ocis: «Biaux sire, fet li rois Artus, ge ne vos vi onques mes, et si vos conois orendroit: vos avez non Ezier». ⁶Li chevalier est touz esbahiz qant il entent ceste nouvelle, qar son non aloit il si celant en touz les leus ou il venoit qe il ne li estoit pas avis qe nul chevalier errant le peust savoir. Et qant il a chevalier trouvé qi set son non, il ne set qe il en doie dire. ⁷Lors dit au roi Artus tout en riant: «Dites moi, sire chevalier, se Dex vos doint bone aventure, coment seustes vos mon non, et qi le vos dist? — Coment ge le soi? fet li rois. Ge ai tant fait qe ge le sai. — ⁸En non Deu, fet li chevalier, vos dites verité. — Or me dites, fet li rois, combien puet il avoir de tens qe vos ne veistes vostre pere? — En non Deu, fet li chevalier, il a plus de .v. anz passez qe ge ne le vi. — ⁹Or me dites, fet li rois, trovastes vos puis home qi vos en deist nouvelles? — Certes, nenil, fet li chevalier. — Et cuidez vos, fet li rois, qe il soit encore vif? — ¹⁰Nenil, fet li chevalier, il est mors pieça: autrement ne porroit estre en nulle mainere. — En non Deu, sire chevalier, fet li rois, mauveisement et pouvrement savez vos les nouveles de vostre pere. ¹¹Or sachiez qe il est touz vis et forz et sainz et delivres, et encore vet il armes portant par cele contree ausint bien com vos fetes, et ausint roidement». Li chevalier comence a rrirre qant il entent ceste nouvele. Et qant il respont il dit en riant: ¹²«Sire chevalier, benoiz soiez vos, qar par vostre parole sainz faille avez orendroit fet revivre celui qi est mors ja a plus de .v. anz passez. A cestui point m'avez vos fet grant joie de noiant. ¹³Qant vos començastes a dire qe il estoit vif, ge le creioie auqun petit, mes après, qant vos me contastes qe il portoit armes, adonc m'ostastes vos del tout del cuider ou vos m'aviez mis avant.

¹⁴Sire chevalier, or sachiez tot certainement qe se mi peres fust en vie a cestui tens, si ne porroit il porter armes por nulle aventure dou monde, qar trop seroit viell durement. ¹⁵Et celi dom vos parlez porroit bien [estre] apelez Helianor, plusors chevaliers ont un non, mes bien sachiez de verité qe cestui Helyanor n'est pas celui Helyanor qi fu mi peres».

315. ¹Qant il a finé sa parole, li rois Artus comence la soe et dit: «Sire chevalier, or sachiez qe cestui Helyanor est vostre pere propre-mant et vostre fre le reconeu por son pere tout certainement». ²Qant il entent ceste nouvele, il est plus esbahiz qe devant et il dit errament au roi: «Et qeles armes portoit mi freres? Dites le moi, por ce porrai ge tost savoir se vos parlastes a mon freres. — ³En non Deu, fet li rois, il porte teles armes». Et li devise. «En non Deu, dit li chevalier, vos dites verité. Ormés vos croi ge plus tost qe ge ne feisoie devant. ⁴Et qant il est einsint avenuz qe vos m'avez ci aporté les plus estranges nouveles dom ge oïsse pieçamés parler, qar ge cuidioie qe mi [peres] qe vos rendez vif fust mors ja a grant tens, et après me fetes entendant qe il porte armes qe ge encore ne puis croire par la grant veillesce qe il a, por Deu, or me fetes tant d'avantage qe vos me dioiz coment vos le trovastes et coment vos vos acointastes premerement [de] son non. ⁵Et me dites, se il vos plest, coment il se tient encore en armes. — En non Deu, dist li rois, de ce vos puis ge bien dire la verité. ⁶Or sachiez tout certainement qe il est si fors et si roides dedenz la sele qe, si voiremant m'ait Dex, qe ge cuit qe il vos metroit plus tost a terre qe vos ne feriez lui, porqoi il ne vos coneust».

316. ¹Et maintenant li rois comence a conter au chevalier coment il passerent l'eve honteusement et coment il vint après eaus et delivra touz. Et q'en diroie? Tout ce qe il en avoit en cuer li vet contant. ²Mes la verité de son frere, coment son pere l'avoit mort, ne li conta il pas, ançois s'en tint outreement. Li chevalier est si joianz de ces noveles qe il ne set qe il doie dire. Li rois li dit autre foiz: ³«Ne me creez vos pas qe ge vos die voir de toutes ces choses? — Si m'ait Dex, fet li chevalier, ge ne sai qe ge doie croire. Ce qe vos m'alez ici contant me semble estrange merveille, qe de si grant n'oï ge onques parler ja a grant tens passé. — ⁴Si m'ait Dex, fet li rois, autant en fui ge esbahiz qant ge le vi premierement, qar ge ne cuidasse en nulle mai-

15. estre] *om.* L4

315. 4. peres] *om.* L4 ♦ de son non] s. n. L4 6. sele] se | sele L4

nere qe si viell chevalier com il est peust porter armes. ⁵Ançois disoie ge plus, qar ge disoie qe ce qe il disoit disoit il par folie de teste et par veillesce. Et qe diroie? Se Dex me doint bone aventure, qe ge [me] gabaie de lui et de tout ce qe il disoit». ⁶Einsint parlant celui soir une grant piece. A chief de piece, evos venir entr'eaus deus vallez de leianz qi apportoient a mangier as deus chevaliers, et sor ce chandelles aporтерent assez qi donoie[n]t grant clarté la defors. ⁷«Sire conpeinz, dist Ezier au roi, puiſque noz avom a mangier, dire poom seuremant qe mielz nos est avenuz qe nos ne cuidiom. Or manjom et noz soulaçom, et puis dormirom plus a aise». ⁸Einsint passerent celui soir et orent a mangier tant qe bien lor poit souffrir. La damoisele est tant iree de ce qe ele est venue entre les mains au roi Artus qe ele se tient a honie. ⁹Et porce qe ele est acostumee de fere contraire et anui a touz ceaus entor cui ele repeiroit dist ele a soi meemes qe ele ne valioie riens se ele ne metoie celui a mort et a dolor, qar ele voit tout apertement qe il ne la prist se pou non, dom ele a tant grant duel q'a pou qe li cuer dou ventre ne li crieve.

317. ¹Quant il est ore de dormir, il se dort sor l'erbe vert, don il avoit ilec a grant plant[é], qar li escuers l'avoient apor_té, et s'endorment en tel mainere dusqe a l'endemain qe li jors encomence aparoir. ²Li chevalier qi Ezier estoit apelez, tout maintenant qe il voit le jor, il dist au roi Artus: «Sire conpeinz, se il vos pleisoit, desoremés voudroie ge chevauchier, qar tens en est. ³Ge endroit moi n'avrai jamés joie ne aise ne confort devant qe ge aie veu mon pere, puiſque il est einsint avenu qe Dex le m'a leisé en vie dusqe ci. Vos remaindroiz tant qe li chevalier isse fors, qi leianz est. – ⁴Sire chevalier, dist li rois, puiſque il est einsint qe vos avez si grant beisoing de chevauchier qe vos ne porriez atendre qe li chevalier isse fors, ge voill ici remanoir tant qe ge aie a lui parlé. ⁵Ge vos comant a Nostre Seignor! – A Deu soiez», fet Ezier. En tel mainere se departent li dui chevalier. ⁶Li rois remaint devant la porte touz armez com cil qi atendoit adés qe li chevalier oissist de l'hostel, et Ezier se departi d'ilec maintenant, a qi est tart durement qe il soit venuz a l'hermitage ou cil cuidoit trouver vif son pere et son frere. ⁷L'un i porra il trouver vif, mes l'autre non. Einsint s'en vait li chevalier qi des armes estoit preudom estrangement. Et li rois, qi remés estoit devant la porte touz armez com cil qi adés

316. 5. folie de teste] foliere t. L4 ♦ ge me] ge L4 6. donoient] donoiet (*riscritto*)

317. 1. planté] plant L4

atendoit qe li chevalier en deust oissir, et atent tant qe la porte fu overte. ⁸Li rois monte tout maintenant et fait monter sa mesnee, et après ne demora gueres qe il voit le chevalier monter enmi la cort, qe menoit en sa conpeignie une damoisele et deus escuers. ⁹Il oisirent tuit trois avant et li chevalier après. Et li forestiers, qe estoit apareilliez dou convoier, remaint qant il voit qe li chevalier li comande fermement qe il remaigne en son hostel orendroit.

318. ¹Qant li chevalier fu oissuz fors, li rois, qe bien cuide de voir qe ce soit Guron sainz faille, li vient a l'encontre et li dit: «Sire, bon jor vos doint Dex. — Biaux sire, bone aventure aiez vos, fet li chevalier. — ²Sire, ce dit li rois Artus, quel part voudroiz vos aler? — Certes, biaux sire, fet li chevalier, ge ne le sai encore certainement, fors qe la ou aventure me voudra mener, einsint com chevalier errant sunt acostumé de fere. — ³Sire, ce dit li rois Artus, ge voudroie, se il vos pleisoit, qe vos me deissiez une chose qe assez petit vos costera. — Tel chose porroit ce estre, fait li chevalier, qe ge ne vos diroie pas. — Ge vos pri, fet li rois, qe vos me dioiz vostre non. — ⁴Or sachiez veraiement, fet li chevalier, qe mon non ne vos diroie ge pas orendroit. — Et se ge le vos disoie, fet li rois, m'en feriez vos certain? — ⁵Oïl, certes, fet li chevalier, mes encore ne croi ge pas qe vos le s[a]chiez. — Et ge le croi savoir, fet li rois, et le me dit l'esperance qe ge ai de vos, qe vos sainz faille estes le meillor chevalier dou monde et avez non Guron li Cortois. ⁶Et sachiez qe se por vos ne fust, yer soir eusse ge chevauchié en autre leu. Mes des lors qe ceste damoisele qe ci est dist qe vos estiez le meillor chevalier dou monde, me pris il volanté de remanoir tant qe ge eusse parlé a vos. ⁷Porquoi ge vos pri, tant com ge porroie prier chevalier, qe vos me dioiz se vos estes Guron ou non». Li chevalier respont errament et dit: «Or sachiez, sire chevalier, qe ge ne sui mie Guron, ne si bon chevalier d'assez com est celui qe vos dites. — ⁸Biaux sire, fet li rois, puisque vos n'estes Guron, donc vos comant ge a Nostre Seignor. Or sachiez qe ge n'avrai granment jamés de repos devant qe ge l'aie trouvé».

319. ¹Einsint se part li chevalier dou roi Artus. Et sachent tuit cil qe cest conte escouteront qe cil est Henor de la Selve, li coharz, li mauveis, li beau failliz, li plus vil de toutz les chevaliers et li peior. ²Cil qe li feisoient conpeignie savoient tuit certainement sa mauves-

318. 5. le sachiez] leschiez L4 6. Et sachiez qe] Et s. et qe L4

319. 1. li beau failliz] li beb (?) f. L4 (*v. nota*)

tié, et porce qe il ne fust coneuz par la ou il venoient, aloit [la damois]ele de lui [disant] qe ce estoit li meillor chevalier dou monde, porce qe honor li fust fet et a eus ausint. ³Puisqe li rois se fu partiz de lui, il comença cele matinee a chevauchier a tel conpeignie com il avoit et, por oïr qe la damoisele respondroit, se torne il vers la damoisele et li dit: ⁴«Ge voill qe vos soiez m'am[i]e et qe vos façoiz outreement ma volanté». La damoisele, qi ne puet pas sa langue tenir, respont tout maintenant: ⁵«Si m'aît Dex, sire chevalier, or sachiez qe encore ne vi ge en vos si grant bonté ne si grant valor qe ge por ami vos vouxisse, encore soiez vos assez plus cointes et plus mignoiz et plus orgoilleus qe vos ne deusiez estre. – ⁶Coment, damoisele, fet li rois, si m'alez vos ore dou tout refusant qe vos por ami ne me volez? – Certes, voiremant vos refus ge, fet la damoisele, et encore vos di ge une autre chose. ⁷Or sachiez qe qant ge voudrai fere ami, ge ferai adonc ami de meillor chevalier qe vos n'estes, et de meillor hom[e]. – Da]moisele, ce dit li rois, et qe savez vos qi ge sui? – Certes, fet ele, sire chevalier, ge ne sai mie tres bien qi vos estes. Et neporqant ge ai ja tant veu en vos qe vos ne porriez riens valoir por nulle aventure dou monde. ⁸Porqoi ge me priseroie trop pou, se Dex me saut, se ge fuse vostre amie. – Coment? ce dit li rois. Me refusez vos donc dou tout? – Certes, fet ele, por cel fet dom vos me parlez vos vois ge bien refusant. – ⁹Damoisele, ce dit li rois, et ge m'en soufferrai atant. Une autre foiz par aventure seroiz de meillor volanté. – Ja Dex, fet ele, ne me doint volanté de vos amer, qar adonc seroie ge honie trop malemant!». ¹⁰Einsint parlant entr'eaus celui matin. La damoisele cuidoit bien qe li rois li deist a certes, mes non feisoit: il se voloit de lui gaber, se il peust. Qant il orent eu entr'eaus deus cestui parlement grant piece, li rois li dist: ¹¹«Damoisele, ge vos part un geu, et prenez en l'une partie – cele qe vos mieuz voudroiz. Lequel volez vos mieuz por ami, ou moi ou le premier home qe nos enconterom? ¹²Or sachiez qe se vos por ami me volez, il ne vos puet venir se bien non. Se vos por ami ne me volez, or sachiez bien de voir qe ge vos donrrai au premier home qe nos enconterom». ¹³La damoisele, qi bien fesoit reison en soi meemee qe li premier home qe il enconteroiient seroit chevalier sainz doute – et por les paroles qe ele avoit eu au roi Artus avoit ele poor et doute qe li rois ne la leisast par corrouz en aucune aventure perilleuse –, respont ele au

2. aloit la damoisele de lui disant] aloit ele de lui L4 4. m'amie] m'ame L4
7. home. – Damoisele] homo | ise le L4 11. Lequel] Laquel L4

roi, qant ele entent ceste partie: ¹⁴«Sire chevalier, ge voill mieuz por ami celui qe nos enconterrom premierement qe ge ne voill vos. Et se vos por ami le m'otroiez, ge le preing deci. — ¹⁵Damoisele, ce dit li rois, deci le vos outroï ge bonemant, se vos me volez qiter de toutes qereles. — Oïl, certes, fet la damoisele, puisque vos ensint me qitez. — En non Deu, fet li rois, et ge vos qit de toutes qereles». ¹⁶En tel guise com ge vos cont aquita li rois la damoisele et ele lui ausint, et toutesvoies chevauchent ensemble. Il n'orent pas granment alé après celui couvenant qe il enconterent un nain monté sor un grant roncîn trouteor. ¹⁷Li nain estoit si laiz durement com beste de celui harraz porroit estre plus, et li rois le vit venir de plus loing qe ne fist la damoisele. Et por ce dit il: ¹⁸«Damoisele, se Dex me saut, veez ici venir le vostre ami, mes il n'est pas chevalier, ce vos pramet ge loiaument. Ge le voi venir tout desarmé: por ce conois ge bien qe il n'est mie chevalier, mes il est bachalier grant et merueilleux. ¹⁹Il est dou lignage as jaianz, tant par est grant estrangement. — Biaux sire, ce dit la damoisele, se il n'est chevalier encore le porra il estre, ne vos gabez si tost de lui, qe ce n'est mie cortoisie de chevalier de gaber soi de null. — ²⁰Damoisele, se Dex me saut, il est si granz qe qant vos vendroiz a un flun, se entre vos n'avez chevaux, il le vos couvendra a porter sor vostre col: il n'est mie greignor d'un singe, vos estes mout bien venue!».

320. ¹Qant ele entent ceste nouvele, ele est si durement iree q'a pou qe ele ne crieve de duel. A cestui point se tient ele dou tout a morte et a deshonorée, qar ele conoist tout clerement qe ce est qe li rois velt dire. ²Après ce qe li rois ot einsint parlé ne domora gueres qe li nain est venuz entr'eaus, si ideux en toutes maineres et si contorfet, qar si estoit bossus dou tout devant et derrieres et avoit gole de levrier et petit nes trop malement, la teste avoit il bien si grose com un roncîn. ³Et q'en diroie? De laidesce ne de vilté ne trovast l'en som per ou monde, et si n'estoit mie si geunes qe il n'eust bien seisante anz. Qant li rois le voit aprouchier et fu auques pres de lui, il li escrie a haute voitz: «Sire, bien puisse vos venir!». ⁴Li nain, q'i bien cuide de voir qe li rois li ait dit par gab et par ranpoigne cest salu, est trop iriez estrangement. Et por ce respont il par ire mout ireement: ⁵«Se ge vieg bien, et vos puisiez trop mal venir! Dan mauveis chevalier failli, por-

13. entent] [.]ntent L4 (*buco*) 17. harraz] barraz L4 (*v. nota*) 18. ami] aire (?) L4

320. 3. aprouchier] aptouchier L4

qoi m'alez vos ranpoignant? Qe vos aiez male aventure! – Ha! nain, fet li rois, einsint voirement m'aït Dex com ge ne te di por mal ne por ranpoigne. ⁶Ainz le te di por la bone aventure qi t'est avenue a cestui point. Et si ne la ses encore, et por ce voill ge qe tu la saches». ⁷Et maintenant li comence a conter l'estrif qi estoit venu entre lui et la damoisele et les couvenances d'eaus, et coment il s'estoient entreqitez de toutes choses. ⁸«Sire chevalier, fet li nain, as paroles qe vos me dites m'est il avis qe ceste damoisele est moie tout qitement. – Nain, dist li rois, tu dis bien verité: preindre la puéz seurement, qar ele est toe, ce ne porroit nus contredire, porq'il te vouxist reison fere. – ⁹Sire chevalier, fet li nain, or sachiez bien qe de ceste nouvele sui ge trop liez et trop joianz, qar, se Dex me doint bone aventure, ge ne trouvai damoisele qi me vouxist ja a grant tens, dont ge avoie le cuer mout triste et mout dolant. ¹⁰Mes qant il est einsint avenuz, ormés porai ge vivre a aise et a honor, qar ge n'ai pas, ce m'est avis, failli a bele damoisele. – ¹¹Nain, ce dit li rois, vos dites bien verité, bele l'avez vos, se Dex me saut, se vos la poez maintenir. Et la poez maintenant prendre, se vos volez. – ¹²En non Deu, fet li nain, si ferai ge mout volantiers».

321. ¹Lors se torne li nain vers la damoisele et li dit: «Damoisele, vos estes moie. Benoiz soit Dex qi ceste part m'amena, qar ge ai fet assez meillor gaing qe ge ne cuidai fere de cest mois. ²Or de l'aler! Vos tendroiz conpeignie a moi et ge a vos, vos seroiz moie en toutes guises et ge serai vostre dou tout». Qant la damoisele ot parler le nain en ceste mainere, ele respont mout iree et mout corrociee: ³«Va de ci, fet ele, viltéz, honte dou monde, ordure, puor, venin! La plus tres orde criature, la plus vil, la plus contrefaite et la plus contraire qe Dex leisast encore nestre! Vil chose pleine de vergoigne, de honte et de maleurté. ⁴Qe ge avec toi m'en alast? Ge te voudroie pendre avant a mes deus mains, si feroie honte de moi se ge touchase a tel ordure. Va t'en de ci, beste maldite, lignee de maleïçon, criature d'enpiremant qi en nul sens n'amenda onques, ainz ves tout adés enpirant. ⁵Va t'en de ci, qe Dex te leist longemant vivre, si avras adés honte assez. Vé t'en de ci et ne tien parlement a moi, qar de parler a tel vilté com tu es abeiserait la moie honor!». Qant li rois entent ceste parole, il se comence a sourire a soi me[eme]: trop a bon tens, trop a joie grant de cest estrif. Et por doner grant cuer au nain et hardement, il dist au nain: ⁶«Ha! nain, cestes sunt drueries, ceste est bien droite envoiseure.

Or saches tu tout veraïement qe ele parlast ja autrement a vos, et plus cortoisement et plus bel, se ge ne fuse devant vos. ⁷Mes por vergoigne de moi et por couvrir sa volanté parole ele a vos en tel guise. Nain, ne vos chaille de ses diz, qar ele vos dit por amors qantqe ele vos dit: ja si tost ne me serai de ci partiz qe la pes sera de vos deus». ⁸Lors se torne vers la damoisele li rois et li dit: «Ma damoisele, ge vos comant a Deu! Puisqe vos avez trouvé celui de qi vos estes par reison, ⁹ge m'en irai le mien chemin et tant qerrai qe ge trouverai damoisele qi me voudra por son ami, ce qe vos ore ne vouxistes. — Coment? fet ele. Sire chevalier, me volez vos donc leissier? — ¹⁰Damoisele, ce dist li rois, puisqe vos primes me leissastes et de vostre bone volanté, se ge vos leis a cestui point, ce n'est pas merveille». Et qant il a dite ceste parole il s'en vet outre a tel conpeignie com il avoit.

322. ¹Qant la damoisele voit qe ele remaint ensint toute seule en la conpeignie dou nain, se ele est adonc doulente et triste, ce ne fet pas a demander. ²Et porce qe il li estoit bien avis qe li nain estoit dou tout si foible et si cheitive chose qe encontre lui ne se porroit il defendre, tout maintenant qe ele voit qe li rois s'en fu un pou esloigniez, ele li leisse corre tout einsint, montee com ele estoit, et le cuide pre[n]dre par les chevoiz. ³Mes ele ne puet, qar li nains, qi assez savoit, hurte roncín d'esperons et pass la damoisele. Et au passer qe il fet outre il fiert la damoisele parmi le visage d'une corgie qe il tenoit, si qe il s'en faut assez petit qe il ne li crieve l'un des elz. ⁴Qant ele se sent si malement mener, ele s'escríe ha aute voiz: «Ha! lasse, fet ele, morte sui!». Et velt foïr arrieres, mes ele ne puet, qar cil, qi se voit au desus et la velt mener a sa volanté, se il onques puet, recouvre un autre cop et puis li dit: ⁵«Certes, vos estes morte se vos ne fetes outrement ma volanté». Cele, qi poor a de mort et qi bien voit tout clerelement qe dou roi Artus n'avra ele ne secors ne aide, s'escríe por sauver la vie: ⁶«Ha! merci, nain, ne me met a mort. Puisqe autrement ne puet estre, ge ferai tout ton comandement. — Le me prametez vos loiaument? fet li nains. — Oïl, certes, fet ele». ⁷A ces granz cris, a ces granz noises qe la damoisele fesoit — et li rois estoit ja tant esloigniez qe il ne la veoit ne ne la pooit oïr se petit non — atant evos entr'eaus venir un chevalier armé de toutes armes qi venoit au travers de la forest. ⁸Il avoit oï le cri de la damoisele d'auques loing, qar la forest retintissoit merveilleusement. Et porce qe il li estoit bien avis qe ce estoit damoi-

322. 2. prendre] predre L4 7. de la forest] dou f. L4 8. retintissoit] retint|tissoit L4

sele qi de secors avoit mestier estoit il cele part venuz au plus tost qe il le pot fere. ⁹Et se aucuns me demandast qi il estoit, ge diroie qe ce fu messire Gauvainz, li niés au roi Artus, qi a celui tens se travailloit d'onorer les dames et les damoiseles de tou son pooir. ¹⁰Por ce estoit il a celui tens appelez de moutes gens li chevalier as dames et as damoiseles souvant.

323. ¹[Q]ant il est cele part venuz et il ot regardee la damoisele, qi ja estoit venue au desouz com cele qi ne se pooit defendre encontre le nain, qar cil estoit plus durs et plus vistes assez en toutes maineres, ²il ne set qe il doie dire, qar de tel bataille com estoit cele n'avoit il encore nulle veue, et meesment de tel damoisele com est ceste, qi assez estoit bele et covenable. Lors crie il au nain auques de loing: ³«Fui nain, leisse la damoisele! Ne touche plus a li devant qe ge sache certainement l'achaison de vostre meslee!». Li nain, qi poor a et doute dou chevalier, leisse tantost la damoisele qi mout savoit. ⁴Qant ele voit monseignor Gauvains, ele se giete maintenant a terre et s'agenoille devant lui et dist en plorant: «Ha! merci, fet ele, frans chevaliers. Se tu eus onques pitié de damoisele, donc aies pitié de moi: trahie sui vilainement. ⁵Et me delivre, se il te plect, des mains de cest deable qi me velt metre a honte et a vergoigne. – Damoisele, fet messire Gauvains, coment li venistes vos entre les mains et en quel mainere? Dites le moi, se Dex vos saut. – ⁶Sire, fet ele, ge le vos conterai maintenant. Or sachiez de voir qe un chevalier me prist en son conduit et me pramist qe il me conduiroit si honoreement com ge voudroie aler en sa conpeignie, com chevalier doit conduire damoisele. ⁷Sire chevalier, or sachiez qe ge vi au chevalier tantes cohardies et tantes defautes qe ge ne me pooie tenir aucune foiz qe ge ne li deisse paroles qi li despleisoient. ⁸Et certes, ge li disoie plus porce qe il devenist hardiz qe ge ne le disoie por mal qe ge li vouxisse. Sire chevalier, hui en cest jor avint qe li chevalier me reqist de drueries et ge li dis outreement qe ge [ne] voloie estre sa drue. ⁹Sire chevalier, por duel de ceste chose me dona li chevalier a cest nain qe vos veez. Ore m'en velt li nain amener et me requiert qe ge face sa volanté. Et ge voudroie morir plus tost, qar certes ge ne sui tel damoisele qe ge me doie tant avilier. ¹⁰Et por ce vos pri ge, frans chevalier, qe vos me

10. de moutes g.] dou mondes g. L4

323. 1. Qant] ant L4 (*l'iniziale non è stata disegnata*) 7. deisse] aucune foiz *agg.* L4 (*rip.*) 8. ne] *om.* L4

delivrez de ceste dolor ou ge sui ensint com vos veez». Et qant ele a dite ceste parole, ele comence a plorer mout tendrement com cele qi trop savoit de mal, si qe a monseignor Gauvains en prent grant pitié. ¹¹Et li nains, qi grant poor et grant doute a qe il ne perde sa damoisele, dit a monseignor Gauvains: «Sire chevalier, ge vos pri et requier qe vos me façois droit et non tort por nulle priere qe ceste damoisele vos face, qe bien sachiez certainement qe ce seroit trop grant vilenie por vos. Ne façoiz force a tel home com ge sui. ¹²Et si vos di une autre chose, or sachiez tout certainement qe, se vos tort me fesiez, qe vos vos en porriez plus tost repentir qe vos ne cuidez, qe certes ge sui a tel home qi ne souferroie pas legierement qe l'en me feist tort».

324. ¹Qant messire Gauvains entent la parole, il comence a rregarder le nain et li dit: «A cui es tu donc? — Ge ne vos en dirai ore plus, fet li nain, mes tant voill ge bien qe vos sachiez se, qe se vos me fetes si grant force com dou tolir ma damoisele, qe vos vos en repentiroiz plus tost qe vos ne cuidez par aventure. — ²Certes, fet messire Gauvains, se fust ici orendroit li rois Artus, qi bien est orendroit le meillor home qe ge sache ou monde, et il te vouxist ceste damoisele doner, si nel souferroie ge, qe ge peuse, qar certes ceste damoisele n'est mie telx qe tu en doies avoir la segnorie, et por ce ne voil ge qe tu l'aies. ³Leisse la dou tout et si en qier une autre, qe, puisque aventure m'a ici aporté, or saches tu ve[ra]liement qe ge la voill delivrer de tes mains, coment qe il m'en doie avenir! — ⁴Sire chevalier, fet li nain, puisque ge voi qe vos ma damoisele me volez toloir par vostre force, ge m'en irai mon chemin, mes ge vos pramet loiaument qe il ne demorra pas granment qe vos vos en repentiroiz. — ⁵Or fais qantqe tu porras fere, fet messire Gauvains, qar ge delivrerai la damoisele». Lors dit: «Damoisele, montez, et se vos volez venir en ma conpeignie, il me plect mout. Et se vos volez autre voie tenir, fere le poez maintenant: au chois estes de cestes deus choses, fetes laquel qe vos voudroiz. — ⁶Sire, ce dist la damoisele, or sachiez qe se ge cuidoie trouver cortoisie en vos, ge m'en iroie volantiers en vostre conpeignie. — Damoisele, fet messire Gauvains, ge vos pramet loiaument qe vos ne trouveroiz en moi vilenie, porquoi ge m'en sache garder. ⁷De ce vos pri ge voirement au comencement qe vos ne porchachiez envers moi ne traïson ne fellenie, adonc me trouveroiz vos obeissant a touz vestres comandementz fere, tant com vos seroiz en ma conpeignie. — ⁸Sire, fet la damoisele, de ce me gart Dex qe ge

324. 3. veraïement] veïement L4 5. chois] choir L4

encontre vos porchace felenie ne traïson. Certes, se ge le fesoie, donc seroie ge plus desloial feme de tout le monde, qar a cestui point m'avez vos fet si grant bonté et si grant cortoisie qe il ne m'est pas avis qe vos la me peussiez fere greignor. — ⁹Damoisele, fet messire Gauvains, or poom donc chevauchier, qant il vos plera, qar bien me plect vostre conpeignie. — Sire, ce dit la damoisele, a vostre comandement».

325. ¹Atant monte la damoisele sor son palefroi, li escuer monseignor Gauvains si li aide, et messire Gauvains li tient le frain. Qant li nain voit qe il a perdu en tel mainere sa damoisele, il est tant durement iriez q'a pou qe il n'enrage de duel. ²Et dou grant dolor qe il a au cuer ne se puet il tenir [qu'il ne die] a monseignor Gauvain: «Sire chevalier, vos me tolez ma damoisele a tel tort com vos savez. ³Or sachiez qe ge ne me partirai jamés de vos devant qe ge l'avrai recouvree en aucune mainere. Alez qel part qe vos voudroiz, qar ge vos sivrai toutesvoies. — Coment, nain? fet messire Gauvains. Nos vels tu donc fere compaignie? — ⁴Il me poise, ce dit li nain, qar il couvient qe ge le face. Mes puisqe autrement ne puet estre, ge la vos ferai dusque tant qe ge vendrai en point et en leu de recovrrer ma damoisele, qe ge certes me tendroie a honiz trop vilainement se ge la perdoie en tel guise». ⁵Atant se met messire Gauvains a la voie, qe il n'i fet autre demorance. Et si li avint en tel mainere qe il se met adonc en celui chemin droitement ou li rois Artus s'estoit mis. ⁶Li rois si chevauche devant et messire Gauvains après. En tel mainere chevauchent d'ore de prime dusq'en l'ore de none, qe il ne descendirent se petit non. ⁷A celui point qe messire Gauvains chevauchoit en tel mainere, il li avint adonc qe il encontra un chevalier tout desarmé qi estoit de cele contree. Messire Gauvains salue maintenant le chevalier com il le voit, et cil li rent son salu errament et puis li dit: ⁸«Sire chevalier, porce qe ge voi qe vos estes chevalier estrange et vos ne savez les costumes de cest país, vos voudroie ge prier et garnir d'une chose qi vos porra fere preu. ⁹Il a ci devant un chastel ou ceste damoisele vos sera tolue se vos l'i menez. Nulle damoisele n'i vient qe ele n'i soit prise. ¹⁰Por ce se garde[n]t tuit li estrange chevaliers qi ceste part viennent qe il ne moient lor damoiseles par dela, qar se il .c. n'i amenassent, il les prendroient toutes cent. ¹¹Por ce vos lo ge, sire chevalier, qe vos teignoiz une autre voie qe ceste, qar bien sachiez veraïement qe par celui chastel ne porroiz vos vostre damoisele conduire sauvement: ele vos

325. 2. qu'il ne die] *om.* L4 **7.** salue] s[.]ue L4 (*buco*) ♦ rent] r[...] L4 (*buco*)
10. gardent] gardet L4

seroit toloite, et vos meemes en porriez estre navrez, se vos defendre vos voliez, et morir i porriez vos tost». ¹²Qant messire Gauvains entent ceste nouvele, il ne set qe il doie dire, qar por achoison de ceste damoisele qe il ne conoist encore rienz ne se metroit il mie en aventure de mort volantiers. ¹³Et cele, qi tant set de mal qe toute la soe pensee estoit adés en males oevres, qant ele voit monseignor Gauvains penser en tel mainere, ele dit: ¹⁴«Ne vos esmaiez, sire chevalier. Or sachiez tout veraïement qe par celui chastel dom cestui chevalier vos parole passera ge tout seurement, et vos meemes ausint. Ge ai leianz tant de mes amis qe, puisque il me conoistront, vos ne trouveroiz qi vos face se honor non. — ¹⁵Damoisele, fet messire Gauvains, me puis ge bien croire en vos? — Oil, fet ele, seuremant. — Donc nos metom, fet il, a la voie. — Sire chevalier, fait li autres, encore vos di ge qe il a encore pis a celui passage qe encore ne vos contai! ¹⁶Se vos sainz ceste damoisele i fusiez, bien i peussiez passer hardiement, mes [por] l'amor de lui si i seroiz vos arrestez. — Ge ne sai coment il m'e[n] avendra, fet messire Gauvains, mes ge ne tornerai huimés arrieres, tant com ge puisse avant aler. — ¹⁷Or vos conselt Dex, fet li chevalier, qe tout ce qe ge vos ai dit vos dis ge por le vostre bien».

326. ¹Messire Gauvains n'i atent plus qant il entent ceste parole, ainz s'en vet outre. Et tant chevauche en tel mainere qe il voit devant lui le chastel qi seoit en une valee. A cestui point puet il bien dire qe il est trahi vilainement. ²La damoisele qi le moine, la desloial, porce qe ele li avoit demandé dom il estoit — et il li avoit reconeu qe il estoit de la meison le roi Artus —, le moine ele droitement au chastel, qar la le velt fere enprisoner. ³Qar, a la verité dire, cil de cel chastel prenoient tuit les chevaliers de la meison le roi Artus qi par ilec passoient, mes nul autre ne prenoient il se il ne menast avec lui ou dame ou damoisele, qar bien lor estoit avis qe nul chevalier qi alast sainz conpeignie de dame ou de damoisele, q'il n'estoit de cele maison. ⁴Li rois ne tenoit pas cele voie, ainz l'avoit leissié de pieça por une autre qe il oit trouvee, qar, porce qe il n'encontroit home qi li seust dire noveles de Calinant, avoit il leissé la voie dou chastel et prisse une autre. ⁵Tant chevauche messire Gauvains a tel conpeignie com il menoit qe il est venuz dusq'au chastel. Cil qi desus les murs estoient,

11. et morir] et en rir (?) L4 **16.** mes por l'amor de lui si i seroiz] mes la mor de lui lisseroiz L4 ♦ m'en avendra] me a. L4

326. 3. cele maison] celui chastel L4

quant il voient la damoisele, il la conoisent maintenant et por ce li dient il de haut: ⁶«Damoisele, qi est celui chevalier? – En non Deu, fet ele, cest est des vaillans chevaliers qi sont en la meison li roi Artus et est conpeinz de la Table Reonde». ⁷Messire Gauvains cuide bien que la damoisele ait dite ceste parole por som preu, mes n'avoit sainz faille: ele lor avoit ce dit porce que els ne [le] leissasent eschaper en nulle mainere dou monde. ⁸Tout maintenant que messire Gauvains fu entrez dedenz le chastel, il n'est pas si bien acoilliz com il voudroit, ne si cortoisement d'assez, qar de plus de .v. glaives fu feru au comencement et sis chevaux fu ocis tot errament. ⁹Et tant li avint il trop bien selonc cele aventure que il ne fu navrez pou ne grant. Li auberc que il avoit ou dos le garenti de la mort a celui point. ¹⁰Quant il se voit porter a terre, il ne moustre mie semblant que il soit coharz de nulle chose, ainz resaut sus mout vistement et, la main a la spee, et fait semblant de lui defendre. Mes tout cel semblant ne li vaut: il est assailli de toutes parz et de tant de gent q'en petit d'ore l'ont pris par fine force, que il ne se puet defendre.

327. ¹Puisque il l'ont pris, il le metent en prison. Après prenent son escuer et l'enprisonent ausint. Quant messire Gauvains se voit enprisonnez en tel mainere, or sachiez tout veraïement que il n'est mie trop joiant. ²Quant il ot einsint demoré .iiii. jors, adonc dit il a une damoisele qi estoit devant l'uis de la prison et qi li avoit aporté a mangier touz les .iiii. jors: ³«Damoisele, fet messire Gauvains, se Dex vos doint bone aventure, qar dites, se il vos plect, porquoi cist de ceïanz m'ont enprisonné en tel guise. Qar certes il ne m'est pas avis que onques en tout mon aage mesfeise de riens a chevalier de cest chastel». ⁴La damoisele respondi maintenant et dit a monseignor Gauvain: «Sire chevalier, or sachiez que cill de ceïanz ne v'ont enprisonné porce que lor aiez de rienz mesfet, mes il ont vos enprisonné porce que vos estes de la meison le roi Artus, et ge vos di une autre chose et voill que vos le sachiez: ⁵or sachiez que ceïanz ne vendra nul chevalier qi soit de la Table Reonde qi maintenant ne soit enprisonnez dusq'a tant que li sires de ceïanz sera delivrez et la dame ausint. – Damoisele, fet messire Gauvains, et qi les tient en prison? – ⁶En non Deu, sire, fet ele, li rois Artus! Dedenz Camahalot des Noel sunt enprisonnez. Et porce que des celui tens ne les velt li rois Artus delivrer, et si en a ja esté priez et reqis de ceaus

6. sont] soit L4 7. que els ne le leissasent] que ele ne l. L4 8. acoilliz] reoilliz L4
 327. 6. de ceaus] dit (?) c. L4

de ceianz, cill de cest chastel se sunt acordez a ce qe desoremés n'i vendra chevalier errant, porqe il soit de la Table Reonde, qe il pris ne soit et retenuz dusq'a tant qe li sires de ceianz et la dame ausint soient delivrez. ⁷Sire chevalier, por ceste achoison estes vos pris: or savez la droite reison. — Or me dites, fet messire Gauvains, et qi tient orendroit la seignorie de cest chastel en leu dou seignor? — ⁸Sire, un chevalier qi est ses cousins, qe l'en apele Fener. — Damoisele, fet messire Gauvains, or vos pri ge qe vos le façoiz a moi venir, si parlerai a lui. — Certes, dit ele, ce li dirai ge volantiers. Ce ne sai ge se li voudra venir por ma priere».

328. ¹La damoisele s'en part atant, et maintenant s'en vait droit au chevalier qi Fener avoit non et li dit: «Sire, de vos mande li chevalier prison qi conpeins est de la Table Reonde [et] vos prie mout qe vos ailoiz parler a lui». ²Li chevalier, qi assez estoit cortois, [r]espond: «Damoisele, ge irai volentiers». Après ce ne demora gueres qe li chevalier vie[n]t a monseignor Gauvain et li dit: «Sire chevalier, qe vos plect? ³Vos me mandastes par une damoisele qe ge venisse parler a vos. Venuz sui, qe volez dire? — Biaux sire, fet messire Gauvains, il m'est mout bel qe vos estes venuz a moi, qar ge avoie grant volanté de parler a vos. ⁴Itant me dites, se il vos plect: porroie ge trouver fin de ceste prison por nulle aventure? — ⁵Oïl, ce dit li chevalier, en une mainere: se vos avez tant de pooir en la cort le roi Artus qe vos peussiez delivrer de prison le seignor et la dame de cest chastel qe li rois tient, adonc porriez vos estre delivrez, mes autrement non. — ⁶Or me dites, fet messire Gauvains, se ge tant feisoie qe ge rendise le seignor et la dame de ceianz, remaindroit adonc maintenant la costume de ceianz qe vos en cest chastel avez establee encontre les chevaliers de la Table Reonde? — ⁷Oïl, certes, remaindroit ele del tout. — Donc me poez vos seurement delivrer, qar ge vos pramet loiaument qe ge vos delivrerai vostre seignor dedenz .viii. jors de la prison ou il est a Camahalot. — ⁸Qi estes vos, biaux sire, fet li chevalier, qi tant avez pooir en la meison le roi Artus qe vos ce poez fere? — Puisque vos le volez savoir, fet messire Gauvains, et ge le vos dirai. Or sachiez qe ge ai non Gauvains, li rois Artus est mes oncles veraïement».

329. ¹Quant li chevalier entent ceste nouvelle, il est trop fierement reconfortez, qar bien conoist certainement qe par cestui porra il estre

328. 1. Sire] [.]ire L4 (*buco*) ♦ conpeins] conpees L4 (*riscritto*) ♦ et vos prie] vos p. L4 ♦ ailoiz] anson (?) L4 2. respont] espont L4 ♦ Damoisele] Chevaliers L4 ♦ vient] met L4 3. venisse] [...].nisse L4 (*buco*)

delivrez, li sires dou chastel, et la dame ausint. Lors dit a monseignor Gauvain: ²«Ha! sire, vos soiez li tres bienvenuz. — Si m'aït Dex, ge ai oï conter tantes cortoisies de vos a maintes genz qe ge vos delivrerai tout orendroit. ³Voirement ge voill qe vos me creantez qe vos le seignor de cest chastel et la dame aussint delivreroiz dedenz .viii. jors de la prison ou il demorent. — ⁴Certes, fait messire Gauvains, ge vos creant qe voirement [les delivrerai] par celui couvenant qe la costume de ceianz, qe vos avez establie encontre les chevaliers erranz et de la Table Reonde, remaigne maintenant. — ⁵Sire, ce dit li chevalier, ele remaint dou tout orendroit». Et maintenant est messire Gauvains delivrez de la prison. La joie est si granz par leianz, puiqe il sevent qe ce est messire Gauvains q' lor a pramis a delivrer lor seignor, qe il n'a orendroit petit ne grant q' atende a autre chose fors qe a fere joie et feste, si fierement sunt reconfortez de la reconoissance de monseignor Gauvain. ⁶Celui jor sejourna messire Gauvains dedenz le chastel a si grant joie et a si grant soulaz com ceaus de leianz le poent fere. A l'endemain s'en parti auques matin, qant il li orent trouvé bon cheval en leu de celui qe il li avoient ocis et il li orent rendu son escuer. ⁷Adonc se mist a la voie et chevaucha tant par ses jornees qe il vint a Camahalot et delivra le seignor et la dame. ⁸Mes atant leisse ore li contes a parler de monseignor Gauvain et retourne au roi Artus por conter partie de ses aventures.

VII.

330. ¹Puisque li rois Artus se fu partiz de la damoisele qe il avoit donee au nain, il chevaucha tant celui jor qe il trouva deus voies. L'une s'en aloit tout droit au chastel ou l'en retenoit les chevaliers de la Table Reonde et l'autre si tornoit a senestre. ²Li rois leissa la voie dextre et chevaucha en tel mainere entre lui et son escuer et le nain qe il vindrent a ore de vespres a la meison d'un viell chevalier, et cele meison estoit asisse desus un flun tout droitement. ³Cele nuit dormi leianz li rois Artus et fu serviz et honorez mout richement de qantqe il porent. Celui soir oï nouveles li rois dou chevalier qe il aloit querant et de la damoisele. ⁴Cill de leianz li distrent qe celui jor meesmes l'avoient veu passer par ilec en la conpeignie de la damoisele et d'un escuer. ⁵Qant li rois ot ceste parole, il est mout reconfortez et trop

329. 4. les delivrerai] *om.* L4 7. mist a la voie] *mi[.]t (buco) a la | a voie* L4

joianz de ceste aventure, qar bien li est avis qe encore trouvera il par aventure le chevalier qe il vet qerant: puisqe il estoit le jor passez par la devant, il n'est mie trop esloigniez. ⁶Cele nuit dormi li rois plus a aise qe il n'avoit fet devant, qar des nouvelles qe il avoit apprises estoit il trop liez et trop joianz. Au soir, qant il fu auques tart, evos leianz venir un chevalier errant qi estoit de la contree de Norgales. ⁷Li sires de leianz le reçut mout bel et mout honoreement, qar bien estoit costumez de fere honor a touz les chevaliers qi leianz venoient. ⁸Qant li chevalier fu leianz descenduz et desarmez, li nain comence maintenant conseiller a lui. Li rois entendoit a parler au seignor de leianz, et por ce ne se prenoit il garde dou parlement qe li nain avoit tenu avec le chevalier.

331. ¹Qant vint après ore de soper, qe il orent mangié si noblement et si richement com cil de leianz le porent fere, li chevalier se torne envers li rois Artus et li dit: ²«Dex aïe, sire chevalier, coment puet ce estre qe vos estes si bel chevalier et si bien fet, et puis estes si mauveis de toutes choses et si coharz et si failliz?». ³Li rois est fierement honteux et vergondeux qant il entent ceste parole, qar il a poor et doutance qe li chevalier n'ait autre foiz veu cohardie ou mauvestié por qoi il le vet si blasmant. ⁴A celui point, einsint honteux com li rois estoit, respont il au chevalier et li dit: «Biau sire, pourquoi m'alez vos ore si blasmant? Qel mauvestié et quel defaute veistes vos encore en moi, pourquoi vos me dites vergoigne? Certes, ce n'est pas cortoisie. – ⁵Coment, ce dit li chevalier, avez vos donc hardement de parler encontre nul home? Teisiez vos, ne dites parole: jamés ne devriez regarder home ne feme entre les deus elz». ⁶Qant li rois entent ceste parole, il est si fierement esbahiz qe il ne set qe il doie dire. ⁷Orendroit est il plus honteux assez qe il n'estoit devant, qar il cuide certainement qe li chevalier le conoisse trop bien et qe il ait veu en lui aucune mauvestié. ⁸Por ce ne li ose il dire riens, ainz beisse la teste vers terre et devient mors come cendre. Et qant li chevalier li voit muer color en tel mainere, adonc cuide il tout certainement qe verité soit tot ce qe li nain li avoit dit. ⁹A chief de piece li rois drece la teste, et qant il a pooir de parler, il dit au chevalier: «Sire chevalier, encore voudroie ge mout savoir de vos, se il [vos] pleisoit, pourquoi vos me dites tel vilenie, qe Dex le set qe ge ne le cuidoie pas avoir

330. 7. costumez] cos[...]mez L4 (*buco*)

331. 9. chevalier] ch'[.] L4 (*buco*) ♦ se il vos pleisoit] se il p. L4

deservi envers vos ne envers autre chevalier. — ¹⁰Ge vos conois tant, fet li chevalier, qe ge sai tout certainement qe vos estes li pires dou monde et li plus coharz et li plus failliz: volez vos nulle chose dire contre ce? — ¹¹Certes, ce dit li rois, oïl. Ge sai bien de voir qe ge ne sui pas li meillor chevalier dou monde ne li pires. Mes de tel com ge sui vos mostreroie ge maintenant, se il fust jor, qe ge ne sui pas si mauveis ne si failliz com vos dites. — ¹²Vassal, ce dit li chevalier, porce qe vos veez qe il est nuit et qe vos estes orendroit ceianz parlez vos si seurement com vos dites, mes ge sai bien qe se il fust jor et nos fussom la defors, vos parliez ja d'autre guise. ¹³Vos seriez adonc plus amesurez qe vos n'estes orendroit. — Sire chevalier, vostre parlement ne vaut riens a cestui point, qar il est tart et nuit obscure, mes demain, qant il sera jor et nos serom la defors, verra l'en qi parlera et qi fera aucune chose. — ¹⁴Vos dites bien verité», ce dit li chevalier. Et lors s'en vont dormir.

332. ¹Cele nuit pensa li rois Artus as paroles qe li chevalier li avoit dites, qar il li estoit tout jor avis qe il n'eust parlé si hardiement se il n'eust en lui veu porquoi il le disoit. ²Por ce pense li rois a ceste chose grant piece de la nuit et puis s'endormi dusqe a l'endemain qe li jors aparut. ³A l'endemain auques matin s'esveilla li rois et demande ses armes, et l'en li aporte tout maintenant. Et qant il est armez, il vient enmi le paleiz et trouve qe li chevalier de Norgales se feisoit armer ausint. ⁴Li rois li dit premierement sanz saluer le: «Sire chevalier, vos souvient il des paroles qe vos m'aliez disant ersoir? Or sachiez qe vos poez bien dire seurement qe vos n'estes pas d'assez si cortois ne si sages com vos devriez estre. — ⁵Mauveis, ce dit li chevalier, nos serom maintenant la defors. Or i parra qe vos feroiz. Se vos avez tant de pooir qe vos vos peussiez defendre de moi par force d'armes, ge vos tendrai adonc por chevalier». ⁶A ceste parole ne respont li rois un seul mot, ainz comande li hostes a Deu et mout li mercie de l'onor et dou bien qe il li avoit fet cele nuit en son hostel. Et puis monte tout erramment et se part de leianz et prent son escu et son glaive. ⁷Et qant il est la defors venuz, il atent qe li chevalier isse fors. Mout li pesera chierement se il ne conoist qi li chevalier est et se il ne venge la honte qe il li a dite en l'ostel.

333. ¹Aprés ce ne demora gueres: evos le chevalier oissir de leianz, et il portoit un escu vert fors qe il ja avoit enmi le leu un

332. 4. pas] p[.]s L4 (sotto una striscia di carta e colla, v. nota § 332) 5. avez] [...]ez L4 (inchiostro evanito) 6. et mout] et // et mout ♦ part de leianz] part et de l. L4

lion d'argent. ²Tout maintenant qe il vit le roi qi s'estoit arreste enmi le chemin, il escrie tant com il puet: «Certes, coharz, vos estes mors: a joster vos estuet a moi! Or i parra se vos seulement d'une joste vos porroiz tenir encontre moi. – ³Sire chevalier, fet li rois, ier soir fu un tens, mes il est orendroit un autre. Or i parra qe vos feroiz, qar ge vos apele de joster. ⁴A cest point vos mostrerai ge, se ge onques puis, qe ge ne sui dou tout si mauveis com vos disoiez ier soir. – ⁵Coment, ce dit li chevalier, est ce donc verité sainz faille qe tu voilles joster encontre moi? Dont est venuz cest hardement? – Veoir le poez, ce dit li rois. Or tost, defendé vos de moi, qar ge vos abatrai, se ge onques puis». ⁶Aprés cestui parlement, il n'i funt autre demorance, ainz leisse corre maintenant li rois encontre le chevalier. Li rois, qi encore estoit mout corrouciez des paroles dou chevalier, se force tant de cele joste por fere honte et deshonor au chevalier qe il le porte a terre et li fait voider les arçons mout vileinement. ⁷Li chevaux se comence a foïr parmi le plain maintenant qe il se sent delivré dou chevalier qi sor lui estoit montez, et s'en fust foï, mes li escuer dou chevalier le prist maintenant. ⁸Qant li chevalier qi encontre le roi avoit si fierement parlé se voit a terre, se il est durement corrouciez, ce n'est merveille. Il se drece vistement com cil qi legiers estoit assez. Et qant li rois le voit drecier, il li dit: ⁹«Sire chevalier, qe vos est avis de vos meemes? Mauveisement vos tenistes ore en sele. Se Dex me saut, orendroit ne poez vos pas dire qe ge soie si mauveis qe vos ne soiez assez plus. – ¹⁰En non Deu, dist li chevalier, vos dites voir, mes se ge ceste grant vergoigne qe vos m'avez fete a cestui point ne venge sor vos meemes avant qe vos vos partoiiz de moi, ne me tenez por chevalier! – ¹¹Sire, ce dit li rois, tel cuide vengier sa honte qi l'acroist: de ce vos souviegne avant qe vos començoiz le fet. – Or ne vos esmaiez, fet li chevalier. – Et qe avez vos en volanté? fet li rois. – En non Deu, fet li chevalier, ge me voill a vos combatre. Ge me tendroie por honi se ge ne venjoie ma honte. – ¹²Puisque vos avez volanté de combatre encontre moi, ce dist li rois, et ge descendrai, qar se nos a cheval nos combatom nos porriom noz chevaux ocirre et einsint remaindriom a pié. – A ce m'acort ge bien», ce dit li chevalier orendroit.

334. ¹Qant il orent einsint parlé, li rois descent tout maintenant et met main a l'espee, qar il voit qe li chevalier s'apareilloit de l'autre part de la bataille. ²Einsint comence la meslee entre le roi et le che-

333. 5. defendé] defende«z» (?) L4 (*forse grattata la -z finale*)

valier, et s'entredonent si granz cox des espees com il poent amener d'en haut a la force des braz. ³Mes il n'ont pas cele bataille maintenue longement qe li chevalier conoist tout clerement qe de ceste enprise ne se partira il pas honoreement, qar trop est li rois meillor chevalier qe il n'est, et ce est une chose qi li done grant poor. ⁴Et li rois, qi en petit d'ore le conoist, le vet tant hastant de l'espee qe li chevalier se tret auques arrieres com cil qi ne puet durer [encontre] la grant force dou roi Artus. ⁵Qant li rois le voit trere arrieres et guenchier encontre les cox, adonc le vet il plus hastant, et tant le haste en tel mainere qe li chevalier chiet arrieres tout envers. Qant li rois le voit trebuchier, il se lance tantost sor lui et le prent a l'hiaume, et le tire si fort a soi qe il li ront les laz et li arrache fors de la teste et puis li avale la coife dou fer. ⁶Li chevalier estoit si estrangement travailliez qe il ne pooit lever les braz se a poine non. Et li rois, qi encore ne le voxist pas ocirre, mes encore li velt fere poor de mort, li comence a doner parmi la teste grandimes cox dou pont de l'espee, si qe il en fet le sanc saillir de plusors parz. ⁷Qant li chevalier se sent si malement mener, porce qe il a poor de morir dit il au roi adonc: «Ha! merci, sire chevalier, ne m'ocie! Ge ne fis encore envers vos [chose] por quoi vos me doiez metre a mort. – ⁸Se tu me vels creanter, dist li rois, qe jamés a jor de ta vie ne diras vilenie a chevalier estrange, ge te qiterai atant, por couvenant voiremant qe tu me dies qe tu veis encore en moi, porquoi tu me donas tel blasme. – ⁹Biaux sire, fet li chevalier, tout ce ferai ge volantiers». Et li rois le leisse tantost. «Or me di, fet li rois, porquoi tu me deis ersoir tant de vilenie. Qel mal veis tu encore en moi por quoi tu me deusses dire tant de honte et de vilenie?».

335. ¹Li chevalier respont tantost et dit: «Or sachiez, sire, certainement qe ge ne vi encore en vos riens por quoi ge vos deusse blasmer. ²Mes cestui nain qe vos menez avec vos, ersoir, qant ge li demandai qi vos estiez, il me dist si granz maux de vostre cors et tantes hontes et tantes vilenies qe, si m'aît Dex, ge cuidoe bien, porce qe il m'avoit dit de vos, qe vos fuisiez sainz faille li plus vil et li plus mauveis dou monde. ³Et por ce parlai ge a vos en tel mainere com vos oïstes, qe ge cuidoe sainz faille dire verité de qantqe ge disoie». Qant li rois entent ceste parole, il respont au chevalier: ⁴«Or vos croi ge bien de qantqe vos me dites, et por ce vos qit ge de toutes qereles. Huimés vos comant ge a Deu, qar ge voil aler mon chemin. – ⁵Biaux sire, fet

334. 2. poent] prent (?) L4 4. encontre] om. L4 6. estoit si] e. il L4 ♦ dou pont] doiz p. L4 (*riscritto*) 7. chose] om. L4

li chevalier, avant qe vos vos partoiz de moi, vos voudroie ge prier par cortoisie qe vos me deissiez vostre non, se il vos pleisoit, qar bien sachiez qe ge sui orendroit assez plus desiranz de vos conoistre qe ge ne fui onques mes. – ⁶Ge vos di, fet li rois, qe vos ne poez orendroit autre chose savoir de mon estre fors qe ge sui un chevalier errant». Et qant il a dite ceste parole, il demande son cheval et l'en li amoine tantost. ⁷Et qant il est montez, il comande le chevalier a Deu et se part d'ilec maintenant. Li nain, qi grant poor avoit dou roi Artus, se voloit remanoir arrieres, mes li rois ne li soefre, ançois li dit: ⁸«Or dou chevauchier, sire nain, ne me leissiez a cest besoing. – Ha! merci, sire chevalier, fet li nain. Por Deu, ne me mené avant: ge ne voill aler après vos, se ge onques puis, qar ge sai veraïement qe vos me ferez anui. – ⁹Se Dex me saut, ce dit li rois, il est mestier qe tu me sieves, et se ge voi aucune bele damoisele, ge la te donrai por amie. Ge te voill fere mout honor ainz qe tu isses de mes mains».

336. ¹Li nain plore mout fierement qant il entent ceste parole, et dit en plorant: «Sire chevalier, ge sai porqoi vos me menez après vos: vos me menez por moi ocirre! – ²Tu dis verité, fet li rois, qar grant honor gaaigneroie et grant pris d'ocirre toi qi es si bel bachalier. Or dou venir, et haste toi dou chevauchier, qe il est mestier, se Dex me saut, qe ge te doigne en cestui jor damoisele, porqoi ge la puisse trouver. – ³Ha! sire, fet li nain, ge sai bien qel moillier ceste est qe vos me volez doner: ce est la mort! Vos n'avez talent de doner moi autre moillier. – Or del venir, sire nain, fet li rois, et leissiez cestui parlement. – ⁴Sire, fet il, si ferai ge, puisqe ge voi qe il ne puet estre autrement». En tel guise com ge vos cont se parti li rois dou chevalier et amoine avec lui le nain qi bien a poor de morir. ⁵Puisqe il se furent mis a la voie, il chevauchierent cele matinee. Li rois se torne vers le nain et li dit: «Or, sire nain, qi vos aprist tel cortoisie, qi de chevalier qi encore ne vos fist annui ne contraire aliez disant vilenie? ⁶Certes, vos estes mal norriz, vos estes de vil nature et de cruele. Bien poez hardiement dire qe voirement estes vos dou tres vil lignage qi jamés ne fis se mal non». ⁷Einsint chevauchent cele matinee dusqe vers ore de tierce et lors entrent en une grant forest. Il n'orent pas granment alé qe il furent entrez dedenz la forest, qe il rencontrent une damoisele messagiere qi estoit acostumee tout adés d'aler par les corz. ⁸Ele savoit mieux les chemins et les chastiaux et les citez qe null chevalier errant, qar plus avoit de .xiii. anz passez qe ele n'avoit servi d'autre chose fors

336. 7. estoit] es|stoit L4

de chevauchier de roiaume en roiaume. ⁹Et q'en diroie? Encore fust ele apelé damoisele, por ce ne remanoit il qe ele ne fust veillarde grant et fort et dure a merveilles. Assez avoit fet el monde mal et maint mauveis conseil doné. ¹⁰Plus estoit por son mal amenee qe por son bien qe il eust en lui. Touz li mondes la conoisoit. Autant s'en aloit. Maintenant qe li rois la voit venir, il la conoist, qar en son hostel sainz faille l'avoit il veue ja maintes foiz. ¹¹Il savoit tout certainement qe ele estoit la meillor geugleresce dou monde, et tout adés si appareillee de dire mal qe ele n'espargnoit ne roi ne conte.

337. ¹Qant li rois la vet aprouchant, il la salue d'auques loing: «Dali-de, fet il, bien vieignes tu, ma chiere damoisele. – Qi es tu, fet ele, maveis, qi ta damoisele m'apeles? Trop te couvendroit estre cointe et de haut pris, si m'aît Dex, avant qe ge soie ta damoisele. – ²Certes, ce dist li rois, tu dis voir. – Di moi, fet ele, qi es tu, qi si tost m'as coneue? – Dalide, fet li rois, qi est ore li mauveis qi ne te conoist? Nus hom ne te mesconoist, qar touz li mondes t'a veue mil foiz. ³Certes, les chiens de Loenois et dou roiaume de Logres et de Norgales te conoissent ja a .xxx. anz passez. Dex aïde, qe dis tu qi demandes de qe ge te conoisoie? ⁴Certes, li buison te conoissent et de Gales et de Norgales, tantes foiz i as esté abatue. – Lichieres, fet ele, par m'ame, com tu dis voir! Tu ne m'as ci menti de riens. ⁵Mes qi es tu, qi me contes einsint mon lignage? Se tu .xx. anz eusses esté mon lichiere, ne me porroies tu mieus conoistre. Et tu le fust par aventure, encore soies tu chevalier?». ⁶Li rois s'en rit trop fierement qant il entent ceste parole. Et qant il parole il dit: «Dalide, fet il, bone aventureuse, dont viens tu ore tout freschement? – ⁷Certes, fet ele, ge vieng de Camahalot: encore n'a mie .vi. jors qe ge m'en parti. – Et qex noveles, fet li rois, a il ore a Camahalot? – Certes, fet ele, cil de Camahalot fussent joianz et liez dou tout se li rois Artus fust entr'eaus. ⁸Mes, porce qe il a ja plus de .xv. jors passez qe il se parti de la si priveement qe il ne mena adonc en sa compaignie fors seulement un escuer, ne puis n'en oïrent noveles, sunt il un pou desconfortez et moins joianz qe il ne fussent se il l'eussent orendroit entr'eaus. – ⁹Dalide, itant me di, se il te plect, ce dit li rois, encontras tu un chevalier a .iiii. damoiseles avec lui? – En non Deu, fet ele, oïl, ge l'encontrai voirement. Il ne puet pas estre loing de ci .iiii. lieues englesches. ¹⁰Et certes, se ge fusse orendroit si bele et si geune com est l'une des damoiseles qe il moine avec li, encore feroie ge musart chevalier chevauchier après moi. – ¹¹Dalide, ce ne puet estre qe tu vais disant. Veillece t'a doné tel flait qe tu puéz bien dire seurement

qe ele t'est trop male voisine et en pouvre afere t'a leisee. – ¹²Por Deu, fet ele, ne me chaut: tant com ge poi, ge fis des moies. Mes se Dex te saut, qi es tu qi si me moines malement? Tu me fiers a la descouverte a chascun cop. Si m'ait Dex, ge cuit et croi qe tu es Kex li seneschal, la cui langue ge dout plus qe nulle autre langue dou monde. Qant ge le voi, ge voi ma mort tout proprement, qar il me honist qe ge ne li sai qe respondre. ¹³Ge n'ai langue qi n'ait seules[en]t hardiment de dire mot encontre lui, et tu as ja comencié a ferir sor moi de tel guise qe ge ne trouvaï chevalier, ja a grant piece, qi si me deist ma reison com tu me dis. ¹⁴Et por ce croi qe qe tu soies celui qe ge di tout certainement».

338. ¹Li rois respont et dit: «Dalide, or saches tu bien certainement qe ge ne sui missire Kex. – Et qui estes vos donc? Se Dex vos doint bone aventure, dites le moi. – ²Velz tu, fet il, qe ge le te die? – Si m'ait Dex, fet ele, oïl. Voirement le voudroie ge bien. – En non Deu, fet li rois, et ge le te dirai, puisqe tu le vels savoir. ³Si te ferai ja tel bonté qe ge ne feroie a maint preudome qi sunt par le monde». Et lors la tire d'une part et li dit: «Ge sui li rois Artus. – Sire, fet Dalide, est ce voirs? – ⁴Oïl, fet il, sainz faille». Et cele le vet adés reconoisant a la parole. Et maintenant se giete a terre dou palefroi sor qoi ele estoit montee et li vet embrachant les jambes, si armees com eles estoient, et comence a plorer desus de la grant joie qe ele avoit, et qant ele parole, ele dit: ⁵«Sire, porqoi méz tu ton cors a si grant travaill com de chevauchier come chevalier errant? – Tes toi, fet il, ne dis parole, mes monte tost: ge le te comant». Cele, qi n'ose contredire ce qe li rois li vet disant, remonte en son palefroi. Et li rois li redit: ⁶«Dalide comme est ce qe tu n'as ami ne mari? – S[i]re, fet ele, or sachiez qe ge ne voill ne l'un ne l'autre devant qe vos le me doignoiz. – ⁷Et ge le te donrrai tantost: va, si prent cest nain por ami ou por mari, leqel qe tu ameras mieuz. Fa de lui a tota ta volanté, ge le te doing bonement».

339. ¹Dalide, qi bien conoist qe il ne puet estre en nulle guise qe li nain n'ait mesfet au roi – et por ce li done li rois en tel mainere –, respont tantost: «Sire, mercis et graces. Por mari nel voill ge mie, mes

337. 13. seulement] seulesm L4 (*riscritto*)

338. 3. tire] (?) L4 4. embrachant les jambes] enbrachins les chambet L4 (*riscritto*) ♦ avoit et qant] avoi[...] sen [...] q. L4 (*buco e inchiostro evanito*) 5. méz tu ton cors a si grant trauvaill] m. [...] ton c[.]rs a si g[...] t. L4 (*buchi nella pergamena*) 6. Sire] Sre L4

ge le voill por mon ami. ²Honor li ferai desoremés tant com ge fis ja a touz les autres qe ge tenoie por ami. Et qant ge serai a cheval et ge entreraï en chastel ou en cité, ge le ferai aler a pié. Se ge mainje deus foiz ou trois le jor, et il mangera une seule. ³Et se ge voi qe il soit joianz et liez por aucune aventure, ge ferai tant qe il sera doulenz et corrouciez et tristes. Et se ge chant et me soulaz, il sera mestier qe il plore. ⁴Et se ge ai aise ou aucun bien, il sera mestier qe il ait aucun malaise. Se ge sui noblement vestue et chauciee, il est mestier qe il aile nuz et deschauz et mal appareilliez: par tel couvenant le preing ge por mon ami qe il ne faudra en nulle saison de [se] trouver touz appareilliez. ⁵Touz cest couvenant ge li pramet loiaument devant vos». Qant li nain entent cestui plet, il n'est pas trop bien reconfortez, mes desconfortez malement. Et qant il a pooir de parler, il dit au roi: ⁶«Sire, ge ne voil ceste por amie ne por enemie, ge ne voil ne lui ne sa conpeignie! – En non Deu, fet li rois, vos ne la poiz huimez refuser: puisque il est ensint avenu qe ge vos ai doné a lui, voz ne poez aler encontre. ⁷Mestier est qe vos soiez suens, ceste vos enseignera bonté et valor et cortoisie. Se vos fustes mal enseigniez, ele vos amendra. Cheitif, bon jor vos est hui venum: onques mes ne vos avint une si bele aventure ne si bel encontre com est ceste q'i orendroit vos est avenue». ⁸Li nain, q'a pou qe il ne muere de po[o]r, ore crie au roi: «Sire, sire, ge ne la voill, ainz la refus en toutes guises». Lors se met avant Dalide et dit au nain: ⁹«Coment? Par male aventure, chose vil, chose contrefete, ordure de toute autre gent, si m'alez einsint refusant? Vostre escondit ne vos vaut. Si m'aït Dex, il est mestier qe vos soiez miens! ¹⁰Or tost, descendez a terre, si verra cist franc chevalier coment vos savez aler a pié et coment vos estes legiers». Lors se met avant la damoisele et prent le nain par les deus braz. Et cil se voloit defendre encontre lui, mes sa defense ne li vaut, qar cele estoit dure et fort au regart de cel cheitif. ¹¹Ele le tire encontre lui si roidement qe ele le giete dou roncin a terre. Cil giete un cri mout doloireux qant il se voit a terre en tel mainere. «Ha! fet il, sire chevalier, com vos fetes grant vilenie, q'i ensint me metez a mort. ¹²Certes, vos nel deussiez fere por nulle aventure, qar a chevalier n'appartient de fere mal a si povre chose com ge sui ne a si cheitive». Li rois ne respont a parole qe li nain li die,

339. 4. il est mestier qe il] il e. m. qe il mestier L4 ♦ se trouver] t. L4 5. couvenant] coieuenant L4 (*riscritto*) 6. En non Deu] Einnodeu L4 (*riscritto*) 7. amendra] amend[...] (*buco*) ♦ bon jor] b. j[...] L4 (*buco*) 8. muere] muers L4 (*riscritto*) ♦ poor ore crie] por otu (?) c. L4 (*riscritto*)

ainz se torne envers la damoisele et li dit: ¹³«Dalide, ma chiere damoisele, alez vos en, se Dex vos saut, tout droit a Camahalot, si dites a mes amis qe il se reconfortent et qe vos me trovastes ici sain et haitié, la Deu merci, et qe tost me retournerai a Camahalot, se ge onques puis. ¹⁴Tant lor dites de ma part. – Sire, ce dit la damoisele, ce ferai ge volantiers».

340. ¹Aprés cestui parlement li rois n'i fet autre demorance, ainz se met tantost a la voie avec son escuer et leise le nain avec la damoisele enmi la place, qi tout autrement le voudra mestroier qe il ne vouldroit. ²La chose vil a trouvé mestrese a cestui [point]. Puisque li rois se fu partiz dou nain et de la damoisele qe il a leissiez en la barate, il comence adonc a chevauchier au plus esforcement qe il puet, tout einsint com la damoisele li ot dit enseigne qe il alast. ³Et il voit adonc devant lui une montaigne mout haute qe l'en apelloit Montaigne de Sanc, porce qe la desus avoit eu une bataille de mout grant gent et tuit i avoient esté mort. ⁴Et por la grant foison dou sanc qe li autre i trouverent qi après i vindrent appellerent il adonc cele montaigne Montaigne de Sanc, ne onques puis ne li cheï le non. ⁵En tel mainere chevauche li rois dusqe après ore de vespres, et li soleill estoit tornez com en oscurté et il estoit tou droitement ou pié de la montaigne. Adonc li avint il sainz faille qe il trouva devant lui a une fontaine Calinant avec sa fille et toute l'autre conpeignie. ⁶Calynant estoit desarmez et se seoit devant la fontaine et pensoit. Devant lui estoit sa fille, auques reconfortee de ce qe ele s'en retornoit a l'ostel, qar mout li tardoit durement qe ele peust veoir Guron li Cortois.

341. ¹Atant evos entr'eaus venir le roi. Maintenant qe il voit Calynant, il li dit sanz saluer le: «Vassal, se Dex me saut, assez m'avez doné travaill et poine et anui. Vos n'estes mie si loiaul chevalier d'assez com ge cuidoe, qar vos vos departistes de moi si mauveisement com chevalier porroit partir d'autre. ²Mes qant il est einsint avenu, la Deu merci, qe ge vos ai ici trouvé, se vos m'eschapez desoremés, qe vos m'aiez por nesci et por fol, devant qe vos m'aiez rendu celui qe vos tenez en prison, ou ge vos trencherai la teste. ³Ge vos tieng ore entre mes mains: fuiez vos en, se vos poez!». Qant Calinant entent ceste nouvelle, il ne set qe il doie dire. Il est espoentez trop durement, qar il a grant poor de morir. ⁴Il ne puet respondre un seul mot, ançois se

340. 1. mestroier] mestriner (?) L4 (*riscritto*) ♦ ne vouldroit] novouldroit L4 (*riscritto*) 2. point] *om.* L4 3. Sanc] sano L4 (*riscritto*) 4. dou sanc] dou sano L4 (*riscritto*) ♦ i trouverent] strouverent L4 ♦ appellerent] appillèrent L4 (*riscritto*)

test tout einsint com se il fust mors. «Vassal, ce dit li rois, ne diroiz vos riens? – Sire, et qe volez vos qe ge die? fet Calinans. ⁵Ne sai qe ge die orendroit. Ge sai bien qe ge fis trop mal, et ce chevalier ne deust fere, qant ge vos fausai de couvenant qe ge vos avoie fet, mes la grant doutance et la grant poor qe ge avoie de vos le me fist fere. ⁶Mes se par vostre cortoisie me volé pardonner cestui mesfet, vos ne me trouveroiz jamés en tel mesfet com fu cestui, par tel mainere voirement qe ge soie seurs de ma vie et qe vos ne m’ocioiz. – ⁷Ge vos en assure, fet li rois. – Or descendez hardiement, fet Calinant, qe jamés ne me partirai de vos por nulle aventure qi aviegne devant qe ge vos aie rendu celui chevalier qe ge tieng en ma prison. – ⁸Le me creantez vos? fet li rois Artus. Qe bien sachiez tout certainement qe se ge cuidoie qe vos m’en deussiez faillir de riens, ge vos couperoie la teste tout maintenant, et pou s’en faut qe ge ne vos met a mort. ⁹Et puis m’en iroie de ci avec vostre mesniee dusqe a vostre hostel et delivreroie le bon chevalier qe vos tenez en prison. – ¹⁰Ha! sire, ne doutez onques de riens de tout ce qe ge vos di. Or sachiez qe ge ne vos faudrai de couvenant qe ge vos aie orendroit pramis». ¹¹Et lors se fait li rois Artus desarmer. Et qant il est desarmez, il s’asist devant la fontaine et demande a Calinans se ill ont riens a mangier. – Certes, fet il, pain vos poom nos doner, mes autre chose non, qar nos manjames maintenant». ¹²Li rois comande qe l’en li aporte dou pain, et l’en li aporte tantost. Et en mainje tant com il li plest et done l’autre a son escuer, et puis boit a la fontaine.¹³Et puis comence a parler a la damoisele et Calinant et lor demande coment il ont puis fet qe il ne les vit, et il dient qe il ne firent riens puis se bien non toutesvoies.

342. ¹A celui point tout droitement qe li rois entendoit a parler a Calinant et a la damoisele, evos entr’eaus venir deus pastors qi menoient pors et les menoient boivre au ruisel de la fontaine, einsint com il soloient fere chascun jor acostumeement. ²Qant li pastors trouverent les chevaliers, il lor dient: «Ha! seignors chevaliers, coment vos fetes grant mal qi ci demorez. – Porqoi? ce dit li rois Artus. – ³Seignors, dient li pastors, vos fetes mal por vos et non por autres, qe bien sachiez de voir qe a ceste fontaine repairent souvent les jaianz, qi volantiers font mal et anui a touz ceaus qi repairent par ceste contree ne trespasent par cest chemin. ⁴Por Deu, seignors chevaliers, alez vos en, qe bien sachiez qe se li jaianz vos trouvent ci par aventure, vos estes mors tot maintenant». Qant li rois entent ceste nouvelle, il se comence a rrire mout fort, qar encore cuidoit il qe li pastors deissent par folie ce qe il disoient. ⁵«Dites moi, fet il, de qels jaianz dites vos?

– Sire, fait li un des pastors, nos parlom des jaianz qī demorent la desus en cele montaigne, qe bien sachiez qe il i demorent plusors et vienent souventes foiz a ceste fontaine. Et se il i trouvent gent, il les destruent et ocient. – ⁶Coment, dist li rois, la desus en cele montaigne repere il gent? – Sire, oīl, dient li pastors. Il i a une tor mout haute et mout bele et mout riche de l’oeuvre ancienne, ou li jaianz habitent et toute lor mesnie. ⁷Et por ce seroit il bon, biaux seignors, qe vos mon-tissiez et vos en aillissiez de ci, qe bien sachiez veraïement qe se li jaiant sevent vostre venue, qe il verront ça jus et vos metront a mort, ou atout le moins vos deroberont il. – ⁸Seignor pastors, ce dit li rois, bien avom entendu ce qe vos avez dit. Or vos en alez, se il vos plect, qe Dex vos doint bone aventure». Li pastors s’en partent atant qe il ne tiennent adonc au roi autre parlement. ⁹Li rois, qī un pou est tra-vailliez de cele jornee, s’endormi maintenant, et la damoisele ausint. Et q’en diroie? Tuit s’endormirent a la fontaine.

343. ¹Qant il furent endormi com cil qī cuidoient estre mout aseur, atant evos venir vers eaus .ii. jaianz granz et merveilleux qī furent descenduz de la montaigne. Et venoient boivre a la fontaine et il virent les chevaux peïsant par la prairie. ²Il dient entr’eaus mainte-nant: «Ci a chevaliers, autrement ne puet estre». Cascqun d’eaus por-toit a son col une grant masce dom il peussent un buef tuer au pre-mier cop, qar il estoient ambedui estrangement fort. ³Et comencent a aler le petit pas au plus celeement qe il pooient, com cil qī volantiers se metroient entre les chevaliers, en tel mainere qe il ne fussent veu devant qe il fussent venuz entr’eaus, qar il avoient enpensé qe se il fussent trop grant gent, qe il s’en retournassent a lor tor por qerre grei-gnor force. ⁴Qant il sunt venuz dusq’au roi Artus, il voient adonc tout clerement qe tuit estoient endormi, ausint li homes com les damoi-seles, et il se metent entr’eaus et les comencent a rregarder mout hideusement et mout a loisir. ⁵Et [qant] il les ont une grant piece regardez, il dient entr’eaus deus: «Cist est li sires de ceste gent». Et ce disoient il dou roi Artus, et après disoient il: ⁶«Iceste est sa damoisele sanz faille». Et ce disoient il de cele qī amoit Guron.

344. ¹Qant il les ont grant piece regardez, il parolent et dient: «Qe ferom nos?». Et li uns disoit, et cil estoit auques de tens et peres a l’autre jaiant: «En non Deu, ge en voill porter cest chevalier la sus en

342. 8. pastors] pas[...]rs L4 (*buco*)

343. 3. pooient] po[...]ient L4 (*inchiostro evanito*) 5. qant] om. L4

cele tor. – ²En non Deu, pere, et ge en voill porter ceste damoisele, qar trop me semble bele et noble». ³Tout ensint com il l'ont devisé le firent il, qar li peres prent li rois Artus par les flax, ne porce qe il estoient encore armez de chaues et de hauberc ne remaint il qe il ne le mete desor son col ausint legierement com se ce fust un enfant de .iiii. anz, et le comence a porter tout contremont la montaigne. ⁴Li autres prent la damoisele et la met sor son col et s'encomence a aler après son pere grant oirre. Mout li grieve pou la damoisele, ainz li est avis qe il ne porte riens, qar fors estoit et granz a merveilles. ⁵La damoisele crie fort, Calynans s'en est esveilliez, si sunt tuit li autre sainz faille. Calynant demande ses armes et l'en li done maintenant. Et qant il est armez il monte, et tant vet amont la montaigne qe il ataint les deus jaianz en petit d'ore. ⁶«Certes, fet il, vos estes mors, vilains failliz». Qant li filz, qi aloit derieres et enportoit la damoisele, ot le chevalier venir après lui, il se torne vers cele part don il venoit et leisse un pou la damoisele. ⁷Et cil, qi après li venoit au ferir d'esperons, cuide bien le jaianz ferir parmi le cors, mes il faut, qar li jaianz li a fait un saut en travers. ⁸Et qant li chevalier cuide passer outre, li jaianz hauce adonc la mace et fiert le cheval parmi la teste qe il le rue mort a terre. Et cil remaint enmi la place si espoentez durement de cestui cop qe il gist ilec com se il fust mors: il ne remue ne pié ne main. ⁹Li jaianz le vet regardant une grant piece, et porce qe il voit qe cil ne se remue de riens cuide il tout veraïement qe il soit mort et il le leisse ilec remanoir. Et recort autre foiz a la damoisele et la prent et la rue sor son col. Et l'enporte ausint legierement com se ce fust un petit enfant. ¹⁰En tel guise com ge vos cont enporte li jaianz la damoisele encontremont la montaigne. Mes dou roi Artus qe dirom nos? Li rois, qi se voit en perill, fist tant por la poor qe il a de la mort qe il se delivre a qelqe poine des mains as jaianz. ¹¹Mes toute ceste delivrance ne li vaut: il ne se puet tenir encontre lui, qar li jaianz estoit armez et li rois n'estoit armez de nulles armes. ¹²Li rois se defent as poinz tant com il puet, mes toute cele defense ne li vaut noiant: au derrien le met li jaianz au desouz en petit d'ore, et tant le vet travaillant qe li rois ne puet en avant. ¹³Tant a souffert et enduré qe li sanc li saut parmi la bouche et parmi les elz et par le nes. Il ne puet pas lever les braz. ¹⁴Qant li jaianz voit et conoist bien qe il a dou tout conquis le rois, il le desarme de toutes ses armes et puis met ses armes en une grote qe il trouva ilec devant. ¹⁵Puis prent le roi une autre foiz et le met sor son

344. 11. n'estoit armez] n'e. pas armez L4 12. Li rois se defent] Li r. qi se d. L4

col, et l'enporte tout maintenant en petit d'ore dusqe a la tor q̄i estoit la desus fermee en la montaigne. Et estoit la tor si bele et si riche que pou doutoit a celui point ne roi ne prince, porq̄oi il i eust a mangier. ¹⁶Qant il sunt la amont venuz, li rois est tout maintenant enprisonez, qar li filz au jaiant si dit qe il voloit avoir por s'amie la damoisele, et por ce la fist il metre en une chambre de leianz mout bele.

345. ¹Qant la damoisele voit et conoist qe li li est einsint avenu qe ele est venue entre les mainz as jaianz, ele est tant doulente et tant triste et tant iree durement qe ele voudroit tantost morir. ²Ele plore trop durement et fait un duel si grant et si merveillex qe nul ne la veist adonc q̄i pitié n'en deust avoir. ³Qant li jaiant voit le grant duel qe la damoisele demoine, il la voloit reconforter. Mes ce est noiant, qar ele dit tout plainement qe ele s'ocirra a ses deus mains. ⁴Qant la feme au jaiant ot le grant duel qe la damoisele fesoit, ele en devint toute esbahie, qar ele n'avoit pas apris qe feme demenast tel duel com cestui qe demoine la damoisele. ⁵Et por ce la prent ele et la moine en sa chambre et li dit: «Chiere damoisele, ne vos esmaiez mie. Ge vos pramet loiaument qe nus ne touchera a vos encontre vostre volanté de tout cest mois, ne de tout l'autre. ⁶Ge vos assure de touz homes par tout le terme qe ge vos ai ore pramis, n'en doutez».

346. ¹Einsint parole la feme au jaiant a la damoisele com cele q̄i toutesvoies avoit aucune pitié dedenz li [cuer]. Ce n'avoit pas li jaiant: il avoient tel pitié d'omes ocirre com il avoient de motons. ²Bien estoient deputiere et sanz merci. Toutesvoies a la damoisele trouvé meillor prison, avec la feme au jaiant, qe li rois n'a en la chambre ou il est enclos. ³Il n'est ilec regardez ne pou ne grant: seulement dou pain et de l'eve li done l'en, ne tant ne l'en donoient il mie qe il n'en manjast encore plus, se cil de leianz l'en donassent. ⁴Einsint est au roi avenu q̄i est la sus en la prison. Dou mal qe il a receu ne li chaut gueres mes qe il ne li facent encore pis. ⁵De Calynant qe dirom nos? De celui poom nos bien dire qe, puisqe li jaianz li ot mort le cheval et l'ot abatu, ensint com ge vos ai conté ça arrieres, il gist ilec une grant piece si espoentez durement qe il ne savoit a celui point liq̄el il estoit, ou mort ou vif. ⁶A chief de piece il se drece et comence a rregarder environ lui. Et qant il ne voit les jaianz de nulle part, il est reconfortez a merveilles. Il se met maintenant au retourner, mes mout li anuie et mout li poise de ce qe il leisse derrieres lui sa bele fille qe il amoit de tout son cuer. ⁷Qant il est retournez a la fontaine, il trouve

adonc toute sa mesnee qe il atendoient et qe il ramenast la damoisele et le roi Artus avec soi, mes, qant il voient qe il retornoit a pié, il comencent a fere trop grant duel. ⁸«Ha! sire, fet li valez au roi Artus, ou est mi sires? – En non Deu, fet Calynant, il est ja amont en la tor ou li jaianz l'en aporté. ⁹Vos poez seurement dire qe jamés ne le ver-roiz». Qant li valet entent ceste nouvele, il comence a crier a haute voiz: «A las! com ci a male parole et anuieuse par tout le roiaume de Logres. ¹⁰A cestui point poent bien dire li grant et li petit qe il ont p[er]du le meillor seignor et le plus vaillant qi orendroit soit ou monde. ¹¹Ha! rois Artus, com grant dolor et com grant plainte com touz li mondes fera qant ceste nouvelle sera contee de vos. – Coment? fet Calynant. Vallet, est ce donc li rois Artus qe li jaiant en ont aporté la amont en la tor?». ¹²Li valet, qi a celui point avoit oublié tout le comandement qe li rois li avoit fet, respont: «Sire, ce est il voirement». Et qant il a dite ceste parole il velt repentir, mes ce est noiant, qar la parole qi li estoit volee fors de la boche ne puet il mie repeler. ¹³Lors comence Calynans a penser, qant il entent qe li rois Artus est celui qe li jaianz en aporté. Et qant il a une grant piece pensé, il dit a sa mesnee: «Or tost, il est mestier, se ge onques puis, qe ge mete conseil en ceste aventure et assez tost. ¹⁴Se li rois Artus n'est mors la amont, il est mestier qe il soit delivreç en tel mainere qe tout li mondes en parlera a merveilles». Lors monte sor le cheval qe li rois Artus soloit chevauchier, porce qe li suens est mors, et lors dist a l'escuer le roi: ¹⁵«Vien avec moi, valet, et ne le fes pas autrement. Tu ne perdras pas ton seignor, se ge onques puis, ne ge ne perdrai ma bele fille qe ge tant amoie, se ge la puis delivrer por nulle aventure dou monde. ¹⁶Vien t'en avec moi tout seurement, qe ge te ferai cortoisie assez plus qe tu ne cuides».

347. ¹Tant dist Calynant a l'escuer unes paroles et autres qe il s'acorde qe il s'en aut avec lui. Atant se metent a la voie tuit ensemble, mes a celui point n'i a nul qi ne face duel grant et merveilleux. ²En tel mainere chevauchent toute cele nuit a grant dolor et a grant plainte, et l'endemain ausint dusqe ore de none. ³Et il chevauchent adonc si esforcielement qe merveille fu sanz faille qe tuit li chevaux ne morirent – qe de la voie, qe de la nuit et de la jornee qe il

7. retornoit] re[...]noit L4 (*buco*) 10. perdu] pdu L4 12. ceste] ces[.]e L4 (*buco*) 14. escuer] escueri L4 (*riscritto*) 15. Vien] Vint L4 (*corretto a partire dal § 346.16*)

347. 2. a grant dolor] [...] g. d. L4 (*buco*)

furent celui jor. ⁴Et q'en diroie? Tant chevauchierent en tel mainere plorant mout fort qe il sunt venuz dusq'a la tor ou Guron estoit en prison, li bon chevalier, li vaillant, li cortois. ⁵Tout maintenant qe li vallet le roi Artus fu entrez leianz, Calinant le fet prendre et metre en prison, qar ne voloit mie qe il parlast en nulle mainere a Guron, ne qe il deist a home dou monde nouveles dou roi Artus. ⁶Por ce le met il en prison, a tel eur qe il n'en oissi puis de tout son aage, qar il morut en la prison.

348. ¹Qant il furent leianz venuz, Calynant comande a ses homes qe il n'i ait nul si hardi q'i male chiere face de riens: il le feroit tantost morir de male mort, se il i avoit nul q'i mostrast mauveis semblant por cestui fet. ²Celui soir se repose Calynant, qe il n'ala veoir Guron. A l'endemain, après ore de prime, s'en ala devant la porte de la chambre ou Guron estoit en prison. ³Guron se seoit en son lit et tenoit une harpe, et harpoit celui lay proprement qe il avoit fet des deus amanz, de Tesale et de Esalon, dont nos avom parlé ça arrieres. ⁴A celui point tout droitement qe Calynans vint devant l'uis de la prison harpoit Guron le lay des .ii. amanz et le chantoit basset. Et a la verité dire, il chantoit bien et harpoit merveilleusement. ⁵Il n'en set gueres moins qe savoit Tristanz, q'i fu le souverain mestre de harpe q'i a son tens fust en cest monde. ⁶Il vit bien Calynant venir et vit bien coment il s'estoit arreste devant l'uis de la prison. Et il leisse adonc le harpe et se drece encontre lui: ⁷«Calynans, fet il, bien viegniez vos! Qeles nouvelles aportez vos de cestui país dom vos venez? Il a tant qe ge ne vos vi qe ge sai tout certainement qe vos avez esté en aucune contree, puisque ge ne vos vi. ⁸Se Dex vos saut, or me contez de voz noveles, si me sera aucun reconfort en ceste prison ou ge sui. Ha! sire Dex, fu onques mes chevalier en cest monde q'i tant demorast en prison com ge ai fet puisque ge fui primes chevalier? ⁹Certes, il m'est avis qe ge ne fui onques se en prison, tant i ai demoré en une saisons et autres. – Sire chevalier, fet Calynant, il vet einsint des aventures dou monde: li uns des chevaliers usent lor tens en joie et li autres en dolor et en t[ris]tece. – ¹⁰Vos dites verité, fet Guron. Il a grant tens qe ge les i usai, mes por tot ce ne remaigne, se Dex vos doint bone aventure, qe vos ne me dioiz de voz nouvelles, qar ge sai bien qe vos avez puis chevauchié fors de ceste contree. – ¹¹Certes, vos dites verité, fet Calynant, et puisque ge voi qe vos avez si grant volanté d'oïr noveles, ge le vos conterai. ¹²Or sachiez tout certainement qe, porce qe ge sai bien

348. 1. mauveis] mauv[.]is L4 (*buco*) 9. tristece] tidece L4

de verité qe ma fille vos amoit plus qe ge ne vouxisse – et ele vos amoit, au voir dire, qe ele moroit por voz amors, et ge veoie tout de voir qe vos ne l'amiez ne pou ne grant – pris ge conseil a moi meemes qe ge la partiroie de ceste contree et la me[n]roie vers Camahalot a un chevalier q'i longement l'avoit amee par amors, et est cist chevalier plus gentil home qe ge ne sui. ¹³De ce estoie bien seur qe il la prendroit volantiers por moillier, q'i me tornoit a grant honor. Et por ce me parti ge de cest pais por mener lui – et bien la vos vouxisse doner por moillier, mes ge savoie tout certainement qe ele ne vos ple-soit. ¹⁴Puisq' ge fui mis a la voie, il avint un soir tot de nuit qe ma fille se parti de moi et s'encomencé a foïr toute seule parmi la foreste. Ge alai après tant d'une part et d'autre qe ge la trouvai a une fontaine avec le roi Artus. – ¹⁵Calynans, fet Guron, veistes vos donc le roi Artus puisq' vos vos partistes de ci? – Oïl, certes», fet Calynant. Et maintenant li comence a conter coment il se combati au roi et coment li rois vint au desus de lui. ¹⁶«Et sachiez, sire, qe ge ne croi mie qe se il fust vostre parent charnel ou vostre fill proprement, qe il vos peust plus desirer a veoir qe il vos desire». Et Calinant li conte tout le parlement e le couvenant q'i entr'eaus avoit esté por la delivrance Guron. ¹⁷Aprés li conte mot a mot ce qe il vit dou seignor de la Dolorouse Tor, et puis coment il se parti celeement dou roi Artus et coment li rois le trouva au derreain. ¹⁸Et puis li conte coment li dui jaïant enporterent le roi Artus et la bele damoisele, sa fille, sus en la montaigne, et ilec les tienent il encore en prison.

349. ¹Quant Guron entent ceste nouvelle, se il est doulanz et cor-rociez ce ne fet pas a demander. Il sospire de cuer parfont et les lermes li vienent as elz dou grant duel q'i el cuer li croist. ²Et quant il a pooir de parler, il dit tout lermoiant des elz: «Ha! fet il, com grant damage et com grant perte, qe li meillor home dou monde est en prison ou en perill de mort por un cheitif chevalier com ge sui. ³Et il a tout cestui mal por moi souffert, ce voi ge bien, et est en grant perill de son cors. Ha! Dex, tant grant mescheance qe ge ore ne le puis aidier! Se ge fusse a cest point delivrez, a grant reconfort me tornast orendroit, qar mestier fust, si m'aït Dex, qe ge le delivrasse. ⁴Ha! Calynant, biaux douz amis, se vos ore me vouxissez fere tant de bonté qe vos me delivrisiez, qar vos en avez le pooir. – Et qel bonté volez vos qe ge vos face? fet Calynans. Or sachiez qe a la volanté ou ge sui orendroit ne vos delivreroie ge en nulle mainere.

350. «– ¹Calynant, ce dit Guron, ge [ne] voill qe tu me deli[v]res devant qe tu le faces de trop bone volanté por toi meemes. ²Mes ge te dirai qe tu me feras por la delivrance dou roi Artus et de ta fille: tu me laisseras oissir de ceianz et me donrras cheval et armes. ³Et tu meemes vien avec moi et me moine tout droitement la ou sunt li jaiant qi ont le roi en prison et ta fille ausint. Ge irai ilec et delivrerai le roi Artus et la damoisele, se Dex me defent d'encombrier. ⁴Puisque li rois Artus sera delivrez et ge t'avrai ta fille rendue, ge te pramet loiaument qe ge retournerai main[ten]ant en ceste prison ou ge sui orendroit. Tout einsint com tu vois m'i remetrai ge. ⁵Se tu vels puis avoir merci de moi, si aies. Se non, a me couvendra remanoir. – E coment siroie ge assure de vos, fet Calynant, qe vos ne me feissiez mal? ⁶Qar ge sai tout certainement qe encontre vos ne me porroie ge defendre en nulle mainere dou monde, porqoi fuissiez delivrez. – Ge te pramet loiaument, fait Guron, qe ge te metrai ceianz sainz et aitié de tes membres com tu es orendroit, porqoi Dex me defende d'encombrer mon cors et de mescheance. ⁷Et ausint com ge sui orendroit del tout en ton pooir et en ta merci me metrai ge en ceste prison ou tu me vois. – ⁸Certes, ce dit Calynans, se ge cuidasse certainement qe vos couvenant me tenissiez de ce qe vos me prametez, ge vos feroie maintenant ce qe vos me demandez. – ⁹Ge te creant loiaument, fet Guron, qe tout ensi[n]t com ge le te di ge le te tendrai, ne ne te faudrai de riens. – En non Deu, fait Calinant, et ge vos delivrerai maintenant, coment qe il m'en doie avenir».

351. ¹Lors comande qe la prison soit desfermee, et l'en le fait tout maintenant qe il le comande. Et lors s'en ist fors Guron, si bel chevalier et si granz com il estoit. ²Et q'en diroie? Il est tant biaux estrangement qe tout li paleis enbelist, autant se vaut de sa biauté. ³Et se il est biaux, il fust plus bel d'assez se il fust liez et joianz com chevalier devoit estre, mes ce qe il se voit si souvant enprisonnez li tient le cuer triste et doulant, et por ce n'est il mie d'assez si joianz com il fust se ne fust cele mescheance qi de prison li avenoit plus souvant qe a null autre chevalier. ⁴Celui jor demora leianz fors de prison Guron. Il est serviz et honorez tant com Calynant le puet fere: cil se travaille en toutes guises qe il set qe il li doie plere. ⁵Guron fet apporter ses armes, qar veoir velt qe il n'i failli riens. Et qant il a bien regardé son hauberc et ses chaues et son hyaume et s'espee, il demande son escu qi estoit

350. 1. ne] *om.* L4 ♦ delivres] delires L4 4. maintenant] mainant L4 9. ensint] ensit L4

tout a or sanz autre taint. — ⁶Sire, ce dit Calynant, vos porterez un autre escu qe cestui: li vostre escuz est trop renomez a cestui point parmi le roiaume de Logres. — Ge le ferai couvrir, fet Guron, d'une honce, si ne sera coneuz. — ⁷Sire, ce dit Calinant, or sachiez tout veraïement qe de ceïanz ne le trerez vos a ceste foiz, se vos nel fetes rencontre ma volanté. — Calinans, fet Guron, or sachiez de voir qe ge ne ferai chose qì vos despleise. ⁸Or remaigne cestui escu, puiſqe vos volez qe il remaigne. Fetes m'en donc un autre baillier tel com il vos plera, qar sanz escu ne doi ge pas aler, bien le savez vos». ⁹Lors fait Calinans apoter un escu tout noir qe il n'i avoit nul autre taint, et il estoit auſes noef et estoit mout fors. «Sire, fet Calinans a Guron, vos porteroiz cest. — ¹⁰Ce me plest mout», ce dit Guron. Celui soir appareillerent son oïrre au mieuz qe il le porent fere. A l'endemain auſes matin si se partent de leïanz et enmoient .ii. escuers tant seulement.

352. ¹En tel guise com ge vos cont oïssi Guron de la prison a celui point. Mes tout ice qe li vaut? Il retournera maintenant com cil qì en nulle mainere ne fausist de couvenant ne a son ami ne a son enemi, tant com il se peust aqitier. ²Qant il orent tant chevauché qe il furent oissuz de la forest qe l'en appelle la Forest des Deus Voies, il trouverent adonc le perrom de malbre ou les letres vermoilles estoient entailliees. ³Cestui brief vos devisasse ge mot a mot, mes porce qe ge vos ai devisé ça arrieres tout apertement m'en terai ge a cestui point. ⁴Qant Guron voit le perrom, il torne autrefoiz por regarder les letres. Et qant il les a auſes regardee une grant piece, il dit en sospirant de cuer parfont: ⁵«Ha! Danayn, biaux doux amis chiers, en cestui leu nos partimes nos l'un de l'autre. En cestui leu me deïstes vos qe poor vos estoit dedenz le cuer entree et me priastes tout lermoïant des elz qe ge ne vos oubliasse et qe ge meisse conseil en vos, ⁶qar li cuers vos aloit disant qe vos trouveriez en ceste aventure contraire et anui si grant qe ja n'en porriez oïssir, se autres ne vos en delivroit. ⁷Amis, ge ne sai pas de vos coment il vos est avenu, mes a moi est il mescheoi en tel mainere qe, se vos estes encombrez, mauveusement en seroiz delivrez por moi. ⁸Amis, ge ne sai qe ge die, vos ne savez riens de mon estre: ge ne sai se vos estes mors ou vif, puiſqe nos de ci nos partimes. ⁹Grant pechié font et mal trop grant tuit cil qì metent cestes costumes par le roiaume de Logres, qar maint bon chevalier en morront encore qì n'i avront deservi mort». Lors se torne vers Calinant et dit: ¹⁰«Di moi, Calinant, se Dex doint bone aventure, ses tu qeles adventures l'en puet trouver en ceste voie?». Si li moustre la voie ou Danain fu entrez. «Sire, ce dit Calinant, or sachiez qe ge n'en sai

riens. ¹¹Ge ne croi qe puis .xx. anz retornast null chevalier estrange de ceste voie, ne de ceste meemes ou nos somes orendroit. Il ne vait nul avant qì jamés en son aage il ne retourneroit par tel mainere. ¹²Voirement en sunt ja eschapez aucuns qì jamés ne pooient retourner por nulle aventure qì i aviegne, se il ne volent dou tout mentir lor serement. – Certes, fet Guron, ce est grant mal et grant pechié. ¹³Et se il pleust a Damedeu qe ge fusse encore delivrez, si m'aît Dex com ge i cuideroie encore metre conseil par force d'armes, en tel mainere qe jamés chevalier errant n'i seroit arreztez, ne cil de la contree ne seroient si hardi qe il feissent as estranges chevaliers se cortoisie non».

¹⁴Par ceste parole qe Guron dist a celle foiz fu il puis en prison mainz anz, qe il n'i eust pas demoré tant se ceste parole ne fust, qar Calinans, [qì] en ot tel doute por la grant chevalerie qe il savoit en lui, dit il a soi meemes qe se il le delivroit, il destrueroit tout le país. ¹⁵Et por ce le tint il en prison tant qe li bon chevalier, li vaillanz, messire Lancelot dou Lac, le delivra. ¹⁶Encore le leisast oissir de prison Calynant aucune foiz, si retornoit Guron tantost com cil qì ne voudroit en nulle mainere mentir de covenant qe il li prameist, ne a lui ne a autre chevalier.

353. ¹Qant Guron ot grant piece regardee les letres vermoilles dou perrom, il regrete Danain son conpeignon qe il veist trop volantiers ou, atout le moins, se il en oïst nouvelles trop s'en reconfortast. ²Il se torne adonc vers Calinant et li dit: «Calinant, ses tu qe ces letres dient? – Sire, fet Calynant, ge le sai bien. – Et qe dient eles? fet Guron. – Sire, eles dient qe nul chevalier ne soit si hardiz qe il se mete en nulle de ces deus voies, et se il s'i met il est mors. – ³En non Deu, dit Guron, einsint dient eles bien sainz faille. Et [qant] ge vins premierement en cestui leu, se il me fust bien souvenu de fortune, qì tout adés m'a tenu en prison plus qe nul autre chevalier, si com ge croi, ge ne me fusse mis en ceste voie sor le defens qe font ces letres. Mes ge le fis sor cest defens, si m'en repent, mes ce est trop tart. ⁴Or chevauchom desoremés a cest pas, qe encore porroit avenir qe fortune m'aideroit». Atant se metent a la voie, qe il n'i font autre demorance. ⁵Devant le peron Calinant se repent orendroit de ce qe il trest Guron fors de la prison, qar il le voit si desconfortez qe il a poor et doute grant qe il ne l'ocie en aucune mainere avant qe il se parte de lui. ⁶Tout celui jor chevaucha Guron sainz boivre et sainz mangier et

352. 14. qì en ot] en ot L4

353. 3. qant] om. L4

sainz dire mot dou monde, et s'en vet avant toutesvoies la teste enclinee vers terre. ⁷A celui point qe il chevauchoit en tel guise com ge vos cont, si corrouciez et si doulanz q'a pou qe il ne crevoit de duel, il li avint adonc qe il encontra Bandemagus qi chevauchoit en la conpeignie d'un escuer. ⁸Quant il vit Guron venir vers lui, si bel chevalier et si bien fet com il estoit – et si bien chevauchant, fors tant voirement qe il venoit la teste enclinee vers terre, qe il ne deust – il dist a soi meemes: ⁹«Ci porroit avoir un bon chevalier, porquoi il fust si preudome com il a le semblant. Mes il chevauche si embronx qe il ne porroit estre qe il ne fust doulanz et tristes d'aucune chose. ¹⁰Certes, ge savrai aucune chose de son estre». Lors se torne vers son escuer et prent son escu et son glaive. Et comence a crier: «Sire chevalier, gardez vos de moi: a joster vos estuet!».

354. ¹Quant Guron entent le chevalier qi de joste l'apelle, il drece la teste. Et le comence a rregarder et li respont: «Sire chevalier, ge n'ai ore talent de joster. Se vos volez jostes, en autre leu la poez qerre, qar a moi avez vos failli. – ²Dex aïe, biaux sire, fet Bandemagus, coment, est ce qe vos me failliez d'une joste? Ja estes vos si bel chevalier et si bien fet. – Certes, fet Guron, ge vos en faill, qe il ne m'en prent ore volanté». Lors se fet Bandemagus vers lui et li dit: ³«Sire chevalier, ge vos pri sor l'amor qe vos avez a toute chevalerie qe vos me dioiz porquoi vos venez ore si pensant, qe li cuers me dit bien sainz faille qe ce est de duel et de corrouz qe vos pensez en tel mainere». ⁴Guron respont tantost et dit: «Vostre cuer est trop voirdisant, sire chevalier, or sachiez qe se ge vos pensant, ce n'est merveille. ⁵Et quant ge recort la moie aventure, ge puis tout seurement dire qe ge ne croi qe il ait ou monde de si mescheant chevalier qe ge ne soie encore plus mescheans, qar ge vois usant tout mon tens en prison et en dolor. – ⁶Coment, sire chevalier, fet Bandemagus, estes vos donc prison? – Oïl, certes, fet Guron, prison sui ge voirement. – Et porquoi ne vos delivrez vos? fet Bandemagus. ⁷Ja voi ge qe vos estes seul a cest chevalier, et certes, se vos estes si preudom com vos semblez, il ne porroit durer a vos se trop petit non». Guron respont et dit: ⁸«Certes, sire chevalier, ge ne vos di pas por moi vanter. Or sachiez q'encontre moi ne se porroit il mie defendre se ge voloie. Et se ge par ma desloiauté me vouxisse delivrer, ge seroie tantost delivré – mes de ce me defende Dex, qe ge par desloiauté me delivrasse! ⁹Certes, ge voudroie mieuz estre en prison tout mon aage qe ge en tel mainere me delivrasse.

354. 5. monde] mond[.] L4 (*bucu*)

355. «– ¹Sire chevalier, fet Bandemagus, puisqe vos estes dou tot si loial qe vos estes prison, et si ne vos delivrez porce qe vos ne façois desloiauté, puisqe ge voi qe ensint est avenu, donc vos voill ge delivrer de la prison de cestui chevalier. ²Selonc la costume des chevaliers erranz sui ge tenuz de fere, qar chascun chevalier errant doit delivrer quelqe prison il encontre, porquoi il le peust delivrer. Et se il nel fet en tel guise, il mesfait. ³Por ce, sire chevalier, couvient qe ge vos delivre orendroit. Et se vos estiez mes mortex enemis, si le feroie ge, puisqe ge vos truis es mains de vostre enemis, qar autrement ge passeroie la costume des chevaliers erranz». ⁴Qant il a dite ceste parole, il se met avant errament et dit a Calinant: «Sire chevalier, ge ai ente[n]du qe cist chevalier est vostre prison. ⁵Nos qi somes chevalier erranz somes tenuz de delivrer touz les chevaliers prisons qe nos encontrom. Or tost, qitez cest chevalier, et se vos encontre ce volez fere, combattez vos a moi!». ⁶Qant Calynant entent ceste parole, il n'est mie trop bien assure, qar il voit bien tout apertement qe Bandemagus a trop grant volanté de combatre a li. Lors se torne vers Guron et li dit: ⁷«Sire, tenez moi couvenant. Biaux sire, vos savez bien qe vos me prameistes de [me] conduire sauvemant dusqe a mon hostel. – Certes, Calinans, tu dis bien voir, fet Guron, et ge le ferai, se Deu plest». ⁸Lors se torne Guron envers Bandemagus et li dit: «Sire chevalier, ge vos pri qe vos vos soufrez atant de ceste delivrance, qe ele ne porroit ore avenir. – ⁹En non Deu, fet Bandemagus, si avendra, qe il est mestier qe il se combatre encontre moi ou qe il vos delivre tantost. Ge nel faz mie tant por vos com ge faz por maintenir la costume des chevaliers erranz.

356. «– ¹Sire, fet Guron, ne vos poist se ge le vos di. Or sachiez qe vos ne me poez delivrer, ne a cest chevalier a cui merci ge sui ne vos poez vos combatre a cest point por ceste achoison, qar se bataille i couvenoît, ge me combatroie por lui. – ²Coment, sire chevalier, fet Bandemagus, si vos volez combatre por vostre enemis encontre moi? – Oïl, sire chevalier, ce dit Guron, qar a fere le me couvient, se ge ne voloie mentir de couvenant». ³Qant Bandemagus entent ceste parole, il devient touz esbahiz. Et qant il parole il dit: «Or sachiez, sire chevalier, qe il est mestier qe ge face tout mon pooir de vostre delivrance metre avant. – ⁴En non Deu, dit Guron, ce seroit trop fort chose a fere, et vos d[i]rai porquoi. Il couvendroit tout premierement qe vos

355. 4. entendu] entedu L4 7. de me conduire sauvemant] s. de c. L4

356. 4. dirai] drai L4

vos combatissiez a moi, qe bien sachiez qe cestui chevalier voudroie ge defendre encontre vos et encontre tout le monde tant com ge peusse ferir d'espee. ⁵Et ge vos di qe avant qe vos m'eusiez mené dus-q'a outrance seroie ge tex atornez qe jamés n'avroie pooir de porter armes. – Sire chevalier, ce dit Bandemagus, or sachiez qe ja tant ne me diroiz paroles qe ge ne vos delivre, se ge puis». ⁶Lors se torne envers Calinant et li dit: «Sire, defendez vos de moi se vos poez, qar mestier est, se Dex me saut, qe vos qitez cest chevalier de la prison, ou vos vos combattez a moi. – ⁷Sire chevalier, fet Guron, il ne li est pas mestiers qe il se combatte a vos, qar ge le defendrai, se ge onques puis. – En non Deu, fet Bandemagus, donc somes nos venuz a la meslee! – ⁸Certes, fet Guron, ce me poisse, qar encontre vos ne me vouxisse ge combatre a ceste foiz. – Sire chevalier, fet Bandemagus, puisque il est einsint qe vos vos volez combatre encontre moi por vostre enemí, or vos defendez donc, se vos le poez fere. – ⁹Si ferai ge bien», ce dit Guron. Puisqe il orent ensint parlé, il n'i font autre demorance, ainz leisse corre tout maintenant li uns encontre l'autre tant com il poent des chevaux trere. ¹⁰Mes a cele joste apert tout clement qe trop estoit meillor chevalier li un qe l'autre. ¹¹Bandemagus est si feruz de cele joste qe il n'a pooir ne force qe il se puisse tenir en sele, ainz vole a terre maintenant, si hestordiz et estonez dou dur cheoir q'il prist adonc qe il ne set se il est nuit ou jor. ¹²Si gist ilec enmi la place com se il fust mors, qe il ne remue ne pié ne main. ¹³Qant Guron voit cele aventure, porce qe il a grant poor et grant doute qe Bandemagus ne soit mors s'arreste il auques pres de lui et atent tant qe Bandemagus est revenuz tout par loisir d'estordison et retornez a son cheval et montez. ¹⁴Lors se torne Guron envers Calinant et dit: «Chevauchom, qar cist chevalier n'a nul mal, la Deu merci. Ge avoie grant doute, se Dex me doint bone aventure, qe il ne fust mors». Lors se met Guron a la voie a tel conpeignie com il avoit. ¹⁵Aprés ce ne demora gueres qe Bandemagus vint après lui, si grant oirre com il puet dou cheval trere. «Calinant, ce dist Guron, or voi ge tout apertement qe nos somes a la meslee. – ¹⁶De ce ne m'esmai ge, ce dit Calynant, qar ge sai bien qe vos vos defenderez bien de lui legierement». Atant evos entr'eaus venir Bandemagus, et dit: «Sire chevalier, vos m'avez fet honte et deshonor. Mout me pesera chierement se ge ne me venge de vos. – ¹⁷Biaux sire, dit Guron, il m'est avis qe de la vergoigne qe vos avez ici receue ne poez vos blasmer se

vos non, qar ce qe vos avoie dit dis ge par force et encontre ma volanté voirement.

357. «– ¹Sire chevalier, ce dit Bandemagus, ge n’oï encore parler, se Dex me saut, d’un si loial chevalier com vos estes, qi vos poez delivrer de prison et ne volez. – Biaux sire, dist Guron, tel est ore ma volanté. ²Mes or me dites, se Dex vos doint bone aventure, qel part baez vos a aler et qe alez vos qerant? – Sire, fet Bandemagus, ge qier ce qe ge ne puis trouver, et si n’ai ja maint jor travaillé. – ³Et toutesvoies, se il vos plect, me diroiz vos, ce dit Guron, qe ce est qe vos alez qerant? – Certes, ce dit Bandemagus, et ge le vos dirai, puis-qe vos estes si desiranz de savoir le. ⁴Or sachiez qe ge vois qerant le chevalier a l’escu d’or, mes Dex le set qe ge ne sai coment ge le puisse trover, qar ge ne truis home dou monde qi m’en sache a dire verité ne mençonge ne plus qe se il fust entrez en terre. ⁵Et ce est une chose qi me desconforte mout, qar ge vois qerant tout adés, si ne truis ne ce ne qoi. Voirement, l’en m’a fet entendant qe se ge vois a Malohaut, qe il ne puet estre qe ge n’apreigne ilec aucunes nouveles de lui. ⁶Et por ce vois ge cele part tant com ge puis. – Coment, sire chevalier? fet Guron. Tenez vos donc cestui chemin por aler a Malohaut? Or sachiez: se vos le tenez, avant passera tout cestui an et l’autre après qe vos vegnoiz a Malohaut. – ⁷Coment, sire chevalier, fait Bandemagus, dites vos verité? – Oïl, fet Guron, qe ge ne vos mentiroie de riens, porce qe il m’est avis qe vos soiez de la meison le roi Artus. ⁸Leissiez dou tout cestui chemin dom ge vieg et prenez au travers de cest forest. La premiere voie qe vos trouveroiz, tenez les granz voies a destre et en tel mainere sainz faille porroiz venir a Malohaut, se Dex vos defent d’encombrier, avant .v. jors. ⁹Et se il vos plect, qant vos serez leianz venuz, vos me feroiz une bonté qi assez pou vos costera: vos en iroiz droit a la dame et la salueroiz de la moie part. ¹⁰Et li dites qe pechié et dolor et mescheance et ire et corrouz, et toute la mesaventure qe porroit a home venir est novellement avenue a celui chevalier proprement qi fist sor la fontaine a Danain si grant bonté com ele set, et si grant cortoisie et si grant loiauté. Fortune l’a mis desouz sa ruele». ¹¹Et qant il a dite ceste parole, il giete un sospir de cuer parfont si grant qe il est bien avis a Bandemagus qe l’alme li doie partir dou cors. Et lors beisse la teste vers terre et s’em passe outre, si doulanz qe les lermes li corrent contreval la face desouz son hiaume.

357. 3. ge] g[.] L4 (*buco*)

358. ¹Quant Bandemagus voit cest semblant, il en a pitié grant a merveilles, qar bien conoit certainement qe trop fort est a malaeise le chevalier. Et il le leisse un pou chevauchier et puis vient dusq'a lui et li dit: ²«Sire chevalier, vos pri par amor et par cortoisie qe vos me dioiz nouvelles dou bon chevalier a l'escu d'or, se vos le savez». Guron comence a souspirer, qant il entent ceste nouvelle, et puis respont: ³«Sire, or sachiez qe il est perduz. Dire le poez seurement a touz cels qi de lui demanderont qe onques mes en tout vostre aage null chevalier si mescheant ne fu qe cist ne soit encore plus. ⁴Mal avi[n]t il dou tout [de] sa loiauté qar ele le fera encore morir honteusement. Ormés vos en poez aler cele voie qe ge vos ai dite. Se Dex me saut, ge ne vos en sai dire nulle autre certaineté droite dou doulant chevalier triste, celui qi porte l'escu d'or, fors ce qe vos en ai dit. ⁵Grant doumage est qar il fu onques nez, mieuz li vauxist qe il fust encore a nestre, qar la soe vie est tornee toute en dolor». Et qant il a dite ceste parole, il se test qe il ne puet dire plus, qar li cuers li aloit faillant de la grant ire qe il avoit. ⁶«Sire chevalier, fet Bandemagus, me dites vos nulle autre chose de celui qe ge vois qerant? – Certes, nanil, nulle autre riens. – Sire chevalier, fet Bandemagus, desoremés vos comant ge a Nostre Seignor. ⁷Or sachié qe mout me poise voirement qe ge ne vos delivre de cest chevalier tout maintenant qi vos moine en prison. – Or est einsint, ce dit Guron, ceste delivrance ne puet si tost venir, qar a Nostre Sire ne plect encore».

359. ¹Atant s'en part Bandemagus et s'en vait au travers de la forest tout einsint com Guron li avoit enseignié. Et tant chevaucha par ses jornees qe il est venuz a Malohaut. Encore n'i estoient pas venuz li autres conpeignon qi venir i devoient, einsint com li rois li avoit comandé. ²Tantost com il fu helbergiez ou borc defors de Malohaut, les nouvelles vindrent a la noble dame de Malohaut qe la defors estoit venuz un chevalier errant qe il ne conoisoient de riens. ³La dame tant avoit duel et jor et nuit qe merveille estoit sainz faille qe ele ne moroit de duel, qar ele avoit deus corrouz qi li tenoient pres dou cuer: li uns des duels est por son ami et l'autre por son mari. Et ele estoit tant corrouciee qe ele ne se pooit conforter. ⁴Por son ami estoit tant contrarieux li duels: chasqun jor sanz faille n'i

358. 1. un pou] [...] p. L4 (*bucu della pergamena*) 4. mal avint] mala vit L4 ♦
de sa loiauté] sa l. L4

359. 3. La dame] la d. qi L4

vint qe ele manjast de sa boche le premier mes, si estoit lermes et plors. ⁵Ce estoit la premiere chansçon qe plorer et qe comencier ses regrez. Merveille estoit qe ele n'avoit ja perdu grant partie de sa biauté par la fort vie qe ele menoit de plorer et de dolor fere toute jor et toute nuit.

360. ¹Qant cil de son ostel li orent dit qe venuz estoit un chevalier errant qi herbergiez estoit ou borg aval, ele comence a penser. Et qant ele parole a chief de piece, ele dit: «Qi est cest chevalier errant? ²Puis-que li chief de l'ome faut, qe poent li membre valoir? Puisque il est dou tout perdu cil qi bien estoit sainz faille pris et honor de toute mortel chevalerie, qe puet le romanant valoir? Li nons en est sainz faille remés dou chevalier. ³Mes puisque li dui conpeignon sunt perdu, qi estoient flor de chevalerie, qe puet chevalerie valoir? Puisque Danain est perduz et li bon chevalier a l'escu d'or qi tout seul valoit tout li mondes, qe vaut tout l'autre remanant des chevaliers? Certes, noiant! ⁴Bien puet dire chevalerie qe ele a perdu toute sa force et tout son pooir, puisque cil dui chevaliers sunt perduz». ⁵Et qant ele a dite ceste parole, ele beisse la teste vers terre et comence a plorer trop durement, si qe les lermes li corrent contrevail la face, li roelent sor les piez, qi vestue estoit d'un vermoill samit. ⁶Qant ele a grant piece pensé et ploré, ele terz ses elz et puis dit a ceaus qi entor lui estoient: «Alez au chevalier estrange et li priez de ma part qe il viegne parler avec moi. – ⁷Dame, dient il, a vostre comandement». Lors descendent dou chastel et s'en vont la ou Bandemagus estoit. ⁸Après ce ne demora gueres, evos Bandemagus venir desus la mestre sale ou estoit la noble dame de Malohaut, et avoit bien avec lui dusqe a .xx. dames et damoiseles, gentilx femes et de gentil lignage. ⁹Bandemagus vint devant la dame, et bien ressembloit chevalier de haut afere et gentil home. Il encline a la dame et la salue gentilmente, et ele le reçoit au plus cortoisement qe ele le set fere et le prent par la main et le fet aseoir dejoste li un pou loing. Et puis li comence a demander: ¹⁰«Sire chevalier, estes vos de la meison le roi Artus? – Ma dame, fet Bandemagus, oïl. Voirement en sui ge. – Et coment avez vos non?». Et il dit: «Dame, ge ai non Bandemagus. – En non Deu, fet ele, de vos ai ge ja oï parler autre foiz, encore n'a pas un an compli. – ¹¹Ma dame, bien porroit estre. – Or me dites, fet la dame, de quel part venez vos ore? – Dame, fet il, se Dex me saut, ge ai esté en tantes parties et tanz leus ai chevauché qe ge en sui auques travailliez et laissez plus qe ne me

seroit mestier. – ¹²Or me dites, ce dit la dame, et en leu ou aventure vos aportast veistes vos onques Danain, le seignor de cest chastel et de toute ceste contree? – Certes, dame, fet Bandemagus, nenil. ¹³Il a ja plus d'un an qe ge ne vi home qi le veist, et si en demandai ge en plusors leus, Dex le set. – Or me dites, ce dit la dame de Malohaut, d'un autre chevalier qi soloit porter un escu d'or et qi estoit conpeinz de Danain seignors de cest chastel, oïstes vos pieça nules nouvelles? – ¹⁴Certes, dame, fet il, de celui oï ge parler assez, qe ce vos faz ge bien asavoir qe pou vont orendroit des chevaliers erranz parmi le roiaume de Logres qi de celui ne tiegne[nt] parlement adés, qar, a la verité dire, celi a fet tant en pou de terme de hautes chevaleries et de merveilleuses, en touz les leus ou aventure l'aportoit, q'a nostre tens ne dist l'en nules si granz merveilles de chevalier com l'en vet contant de celui chevalier qe vos dites.

361. ¹«Or sachiez, dame, qe por cestui chevalier qi porte l'escu tout a or – qe ge le peusse trouver! – ai ge travaillé maint jor. Mes tele fu la moie aventure qe ge trouver ne le poi vers nulle part ou ge alasse, ne home ne trouvai qi m'en seust a dire nulle certaineté, fors un chevalier seulement, et cil estoit prison! ²Cil me dist, qant ge le fis entendant qe ge voloie venir a Malohaut, qe ge li feisse une grant bonté qi assez pou me costeroit. Et ge li respondi errament et li dis qe ge li feroie volantiers, encore me deust il torner a grant grevance, et il me dist après: ³«Puisque vos seroiz a Malohaut, fet il, saluez la dame de Malohaut de ma part et li dites teles noveles dou chevalier a l'escu d'or»». Et maintenant li comence a conter mot a mot ce qe Guron li avoit enchargié. ⁴Et qant il a finé son conte et son message fet, il s'en test qe il ne dist plus a cele foiz, et atent tant qe la dame de Malohaut resp[o]igne.

362. ¹Qui adonc fust a celui conte qe Bandemagus devise et qe la dame de Malohaut escoutoit et li veist muer color et changier souvant et menu, bien peust seurement dire et conoistre legierement qe la dame estoit a malaieise et mout doulente de ces nouveles tant com dame porroit plus, ²ne ele n'est si amesuree ne si atenpree qe ele se peusse tenir dou plorer dou duel qi li vint au cuer. Et qant ele parole a chief de piece, ele dist a Bandemagus: ³«Sire chevalier, qant trovastes vos le chevalier prison qi portoit le noir escu, qe vos aliez

14. tiegnent] tiegne L4 ♦ les] *rip*. L4

361. 2. dist] dis[.] L4 (*bucu*) ♦ respoigne] respigne L4

qerant? – Dame, fet il, se Dex me saut, ge aloie qerant le chevalier a l'escu d'or. – ⁴En non Deu, fet la dame, bone aventure vos avint qant vos trovastes proprement celui qe vos aliez qerant, mes fortune vos [fu] contraire en cele trouveure, qar vos ne le coneustes et le trovastes. ⁵Malement seustes garder la bone cheance qe Dex vos avoit envoiee». Qant Bandemagus entent ceste nouvelle il est si fierement [esbahiz] qe il ne set qe il doie dire, qar orendroit conoist il bien en soi meemes qe la dame li dit verité, qe ce fu sainz faille Guron li Cortois qe il encontra. ⁶Or se tient a trop vergondeux et a trop mesconnoissant fierement de ceste aventure. Il est si fierement honteux qe il n'osse un seul mot respondre, ainz beisse la teste vers terre tout ausint com se il fust pris en un grant mesfet. ⁷A chief de piece li dit la dame: «Or me dites, sire chevalier, vos est avis qe il fust bien sains de ses membres qant vos le trovastes? – Certes, dame, fet Bandemagus, oïl, bien selonc ce qe il me fu avis. – ⁸Et [de] Danain le Rous vos dist il riens? – Certes, dame, nenil, fet Bandemagus. Il estoit tant durement irez, a ce qe il m'estoit avis, qe a poine pooit il chevauchier. – ⁹Certes, fet la dame, ge le croi bien. Maudite soit l'ore et destruite fortune, qant ele fu contraire a si preudome com est celui. ¹⁰Certes, de celui puet l'en bien dire seurement qe ce est orendroit le meillor chevalier de toute chevalerie qi soit en cestui monde et li plus gracieux de toutes les bontez dou monde». ¹¹La dame, qi tant est dolente de ces nouvelles qe a pou qe ele n'enrage de duel, ne dit mie qantqe ele pense, ançois se teste et cele sa volenté et son corage. ¹²Et qant ele a tant lo[n]gement pensé com il li plect, ele parole a Bandemagus. Et qant ele a longement parlé a lui, il demande congié et ele li done. Et il s'en part et s'en retourne a son hostel. ¹³Mes il est mout fierement iriez de ce qe il reconoist orendroit en soi meemes qe ce fu veritablement le bon chevalier qe il aloit qerant qe il trouva, et si ne le reconoist mie. ¹⁴Einsint est Bandemagus remés dedenz Malohaut et atent ilec ses conpeignons, einsint com il avoit promis de fere et com li rois l'avoit comandé. ¹⁵Il li tarde mout durement qe li rois Artus soit venuz por conter li ceste nouvele, qar il li est bien avis qe li rois i puisse metre conseil en aucune mainere qe Guron soit delivrez. ¹⁶Mes atant leisse ore li contes a parler de Bandemagus et retourne a la dame de Malohaut et dit en tel mainere.

362. 4. fu] *om.* L4 5. esbahiz] *om.* L4 ♦ set] fet L4 7. sains] sain[.] L4 (*buco, si intravede però parte della -s*) 8. de] *om.* L4 12. longement] logement L4

VIII.

363. ¹En ceste partie dit li contes qe celui meimes jor qe Bandemagus fu venuz a Malohaut vint un escuer a la dame de Malohaut. ²Celui escuer avoit esté plus d'un an avec Danain et bien avoit veuee la vilenie qe Danain avoit fet encontre Guron de la damoisele dom li contes a parlé ça arrieres. ³Il ot veu tout apertement [ce] qi ot esté entre Danain et Guron li Cortois devant la fontaine, a celui point qe Guron eust mis a mort Danain, se il vouxist. ⁴Qant la dame voit le vallet, ele est trop reconfortee, qar bien cuide certainement qe il seust certaines nouveles de ce qe ele tant desire a oïr. ⁵Ele le fet venir devant lui et en sa chambre et puis comande a ceaus qi devant li estoient qe il oïssissent fors, et il le font puiſque la dame le comande. Qant ele est a privee avec le vallet, ele li dit: «Qeles nouveles m'aportes tu de mon mari Danain le Rous? – ⁶Ma dame, fet li vallet, se Dex me doint bone aventure, il a ja plus de .vi. mois qe ge ne vi ne l'un ne l'autre. – Et qant, fet ele, te partis tu de ton seignor? – Dame, fet il, ge m'en parti après .iii. jors qe il se combatirent ensemble por l'achoisson de la damoisele. – ⁷Ha! sire Dex, ce dit la dame de Malohaut, com Danain fist tant grant defaute qant il s'esprouva si vilainement encontre son conpeignon! Il se recorde mauveisement d'aucunes bontez qe sis conpeinz li aveit fet en arrieres. ⁸Certes, il ne deust penser por nulle aventure dou monde celui fet. Mes ore me dites coment ala de cele bataille, qi en ot le plus bel et le meilleur? Coment s'esprouva Danain a cele besoigne? – ⁹Dame, ce dit li vallet, or sachiez tout certainement qe il ne se prouva si bien en ceste bataille qe ge cuit qe il ait orendroit home ou monde qi mieuz se fust prouvé de lui. ¹⁰Mes vos devez regarder a une autre chose, ma dame: qi est orendroit li chevalier ou monde qi encontre Guron poist bataille encom[en]cier dom il ne venist au desouz et a honteuse fin? ¹¹Dame, ce dit li vallez, or sachiez de voir qe Guron eust bien mis a mor Danain se il le vouxist fere, mes il ne volt: ançois li prist pitié de lui». Et lors li comence a conter coment Guron ot pitié de Danain au derreain. ¹²Aprés li conte mot a mot coment li jaiant l'enportoit encontremont la montaigne, mes Guron le delivra des mains dou jaiant, et de celui point li defendi Guron la soe conpeignie. ¹³«Ma dame chiere, de celui jor ne vi ge le bon chevalier ne Danain se petit

363. 2. plus d'un an] plus d'un [an] L4 (an è *integrazione seriore*) 3. ce] *om.* L4
10. encomencier] encomcier L4

non». Et qant il a dite ceste parole, il se test qe il ne dist plus a cele foiz et se part maintena[n]t de la chambre, qar la dame li done congié. Puisqe li vallez se fu partiz de leianz, la dame se comence a dementier a soi meemes trop fierement. ¹⁴Mes cestui dementier et ceste complainte leisserom nos a deviser dusqe a une autre foiz et retournerom a Guron por conter de ses aventures et coment il delivra adonc le roi Artus des mains des jaianz.

IX.

364. Or dit li contes qe, puisqe Bandemagus se fu partiz de Guron, einsint com ge vos ai conté ça arrieres, Guron, a cui il tardoit mout qe il fust venuz la ou li rois Artus estoit en prison, se haste auques celui jor de chevauchier. ²Celui soir dormirent en une meison de religion qi estoit a l'entree d'une forest et furent leianz receu mout bien et mout richement, qar li freres se travaillierent mout porce qe chevaliers erranz estoient. ³Et li rois Uterpendragon avoit fet cele meison sainz faille por les chevaliers erranz recevoir. A celui point qe il herbergierent leianz, avoit un chevalier navré en une des chambres de la meison, qar plusors chambres et beles et riches avoit leianz. ⁴Qant li chevalier navrez oï dire qe leianz estoient venuz chevaliers erranz, porce qe il avoit volanté de veoir les, se lieve il desus son lit — qar il s'estoit couchiez por lui repouser, ne il n'estoit pas dou tout navrez einsint qe il ne peust bien porter armes, se besoing li fust. ⁵Voirement il avoit esté navrez trop durement, mes toutesvoies estoit il auques bien gueriz et atendoit leianz un suen conpeignon qi cele setemaine devoit venir. ⁶Qant il fu venuz devant les chevaliers qi a celui point manjoient, il les salue doucement. Et li chevaliers se drecent encontre lui et li rendirent son salu trop cortoisement et le firent aseoir devant eaus. ⁷Qant il se fu assis devant Guron, il le prist a rregarder mout durement. Et qant il l'a regardé une grant piece, il li dit: «Di moi, vassal, se Dex te saut, veis tu le chevalier qi porter soloit l'escu a or?». ⁸Qant Guron oï parler le chevalier si orgueilleusement, il li respont et dit: «Certes, sire chevalier, se il vos pleissoit, vos porriez un pou plus cortoisement parler qe vos ne fetes! Si vaudroit trop mieuz por vos, qar a chevalier ne couvient pas orgueilleusement parler. — ⁹Toutesvoies di moi ce qe ge demant: veis tu le chevalier qi soloit porter l'escu a

13. maintenant] maintenat L4

or? – Certes, oïl, ce dit Guron, et ge sui cil qe tu demandes veraie-
 ment. Or saches tu tout certainement qe ge ne sai ou monde cheva-
 lier por cui poor ge renoiasse null fet. ¹⁰Mes porqoi l'as tu demandé?
 Bien le me puez seurement dire. – Certes, ce dit li chevalier, ge le
 te dirai. Or saches tout veraielement qe il a bien un an conpli qe ge
 t'ai qis en toutes les contrees qe l'en disoit qe chevaliers erranz repai-
 roient. ¹¹Assez oï de toi noveles, mes ce estoit la moie aventure qe
 ge ne te pooie trover. Or, qant il est einsint avenu qe ge t'ai ici trou-
 vé, Deu merci, or saches bien qe tu ne eschaperas de moi ne de mes
 mains, si avrai vengié une honte qe tu ja me feis. – ¹²Coment, sire
 chevalier, avez vos donc si grant volanté de combatre vos encontre
 moi? – Oïl, certes, fet il. – En non Deu, fet Guron, ce poisse moi.
¹³Ge n'eusse volanté ne de combatre ne de joster encontre vos oren-
 droit, ne encon[tre] autre. Mes or me dites une autre chose, se Dex
 vos doint bone aventure, vos esprovastes vos encore encontre moi?
 – ¹⁴Oïl, certes, fet cil. – Et gaaignastes vos adonc riens sor moi? dist
 Guron. – Certes, dit li chevalier, nenil, ainz i perdi. – Dex aïe, fet
 Guron, et qant vos a cele foiz i perdistes, coment avez vos ore si grant
 volanté de combatre vos encontre moi? ¹⁵Cuidez vos orendroit estre
 meillor chevalier qe vos n'estiez adonc, ou vos cuidez qe ge soie
 enpirez de chevalerie puis celui jor? ¹⁶Or sachiez, sire chevalier, qe ge
 ne me combatrai a vos, qe ge m'en puise garder. Mes se a fere le
 m'estuet qe force me conduie a ce, or sachiez qe ge ferai adonc mon
 pooir de fere a vos contraire et anui. – ¹⁷Ge sai bien, fet li chevalier,
 qe, puisque ce avendra au fet, vos ne m'espargniroiz de riens ne ge vos.
 Ge vos pramet: demain matin a celui point sainz faille me trouverez
 vos garniz. – ¹⁸Sire chevalier, ge entent bien qe vos dites, fet Guron.
 Qant vendra demain matin, vos seroiz adonc de meillor volanté, se
 Deu plect, qe vos n'estes orendroit. – Vos le verroiz bien», ce dit li
 chevalier.

365. ¹Li chevalier se part atant d'ilec ou estoit Guron et ala dormir
 en une autre chambre de leianz. ²Mout menace Guron durement, et
 porce qe il estoit bien sainz faille mout bon chevalier et mout preuz
 et mout puisant des armes cuide il bien en aucune guise v[e]nir au
 desus de Guron par sa proece. ³Mes porce qe li contes n'a pas encore
 devisé porqoi il voloit si grant mal a Guron, vos en deviserai ge a ces-

364. 13. ne encontre] ne encon L4

365. 2. venir] unir L4

tui point tout apertement, et retournerai a nostre matire et vos dirai en tel mainere. ⁴Li chevalier estoit appellez Tenedon et estoit parent dou roi de Norgales, gentil home et bon chevalier et biaux durement, et n'avoit encore d'aage plus de .xxiiii. anz. Il amoit une damoisele par amors ou roiaume de Nohombellande, gentil feme et bele. ⁵Einsint estoit venu a Guron qe, tout maintenant qe il fu gitez de la prison ou il avoit demoré si longement, il trouva un frere de la damoisele qi gardoit un pont, et avec lui estoit cele bele damoisele, et si freres l'amoit de si grant amor qe il ne pooit estre sainz lui. ⁶Et Guron vint au pont par aventure, einsint com si chemins l'amenoit. Et qant il trouva le chevalier qi le pont li voloit defendre, il se combati tant a lui qe il le mena dusqe a outrance. ⁷Et en cele bataille morut le chevalier qe trop avoit ilec plaies receues et perdu dou sanc. Qant la damoisele voit qe ele avoit son frere perdu, se ele ot adonc ire et dolor, ce ne fait pas a demander. ⁸Ele se parti maintenant dou pont et fist porter son frere dusqe a son chastel. Et voirement, avant qe ele se partist de Guron, li pria ele tant qe il li moustrast son escu tout a descouvert qe il li moustre, et ele vit adonc tout clerement qe li escu estoit tout a or sainz autre taint. ⁹En cele seison droitement avint qe li rois de Nohombellande tint une grant cort et noble et mout i ot chevaliers privés et estranges. Tenedor estoit si prisiez durement qe il n'avoit en toute cele assemblee chevalier qi fust de si grant pris qe Tenedor ne fust encore de greignor. ¹⁰A celui point qe cele feste fu asemblee en une prairie devant un chastel dou roi de Nohombellande, atant evos qe par devant eaus passa Guron armez de totes armes. ¹¹Et il chevauchoit adonc si priveement qe il ne menoit en sa conpeignie fors un escuer seulement qi li portoit son escu et son glaive, et il chevauchoit adonc le hyaume en la teste. ¹²Qant li chevalier qi a la feste estoient virent venir Guron par devant eaus, il le firent arrester et li firent demander se il voloit descendre por reposer soi avec eaus, et il dist qe il n'avoit volanté de reposer ne de descendre. ¹³Il li demanderent après se il avoit talent de joster, et il respondi: «D'une seule joste avroie ge bien volanté, mes de plus non. Se il volent une seule joste, mandent moi tout le meillor chevalier qi est entr'eaus, qar se il me mandent encontre moi chevalier qi ne fust de pris et de valor, ge le tendroie a grant honte et deshonor».

366. ¹Qant cil qi a cele feste estoient venuz entendirent cestui mandement, il distrent errament qe il ne puet estre qe li chevalier ne soit de grant valor, et lors distrent entr'eaus qe il i manderoient Tene-

dor, qar il estoit [le] meillor sainz faille qi fust adonc en cele conpei-
gnie. ²Tenedor fu joianz et liez qant il vit qe il le manderent en cele
esprouve, qar il cuidoit tout maintenant abatre Guron. Il prist ses
armes et monta, et tost s'en ala vers Guron por joster encontre lui. ³Et
cil, qi trop estoit bon chevalier, leissa corre tot maintenant encontre
Tenedor et le feri si roidement qe por l'escu ne por le hauberc ne
remest qe il ne li feist une grant plaie enmi le piz, qe pou s'en failli
qe il ne fu mors. ⁴Guron s'en ala son chemin maintenant: mout petit
li estoit dou mal qe Tenedor avoit. Tenedor en fu portez maintenant
en son repaire et le covint grant piece gesir avant qe il peust guerir.
⁵Qant il fu gueriz, il ala veoir la damoisele qe il tant amoit et la reqist
d'amors, einsint com il avoit fet devant autre foiz. Cele, qi dusq'a
celui point l'avoit tout adés escondit, qant ele vit qe cil la prioit si
doucelement, ele li dist: ⁶«Volez vos qe ge vos aime par amors? Or
sachiez qe se vos volez vengier la mort de mon frere, ge ferai qantqe
vos voudroiz, mes autrement non! – Damoisele, ce dit Tenedor, qi
est celui qi vostre fre ocist? – ⁷En non Deu, fet la damoisele, celui
chevalier qi porte l'escu a or. Se vos de celui me vengiez, or sachiez
qe ge serai vostre amie a touz jors mes. ⁸Cil m'a destruite, cil m'a
morte, et por ce desire ge sa mort sor toutes les riens de cest monde.
Se vos a mort le poez metre, tantost com vos l'avroiz ocis venez a moi
tot seurement, qar ge ferai tout outreement vostre volanté de qantqe
vos me demanderoiz. – ⁹Damoisele, fet Tenedor, et ge vos pramet
loiaument com chevalier qe jamés a jor de ma vie ge n'avrai joie ne
repos devant qe ge avrai vengié et vos et moi. Et bien sachiez veraie-
ment qe ge ne li voill moins mal de vos!». ¹⁰Por ceste achoison qe ge
vos ai orendroit contee haÿ Tenedor mortelment Guron, et por ce fu
il joia[n]z et liez qant il le trouva a celui point, qar il cuidoit bien
avoir pooir et force de venchier la honte qe il li avoit fete et d'acon-
plir la volanté de la damoisele. ¹¹Si m'en teirai ore atant, qar bien ai
conté mot a mot le comencement de ceste haine qi yert entre Guron
et Tenedor.

367. ¹Cele nuit dormi Guron plus a aeise qe il n'avoit fet piece
mes, porce qe fors de prison se veoit. A l'endemain, avant qe li soleux
levast, il oï messe. Et qant il l'a escoutee, il s'en retourne en la chambre
ou il avoit la nuit dormi et demande ses armes, et l'en li aporte tan-

366. 1. le meillor] m. L4 5. qant ele] et q. e. L4 10. joianz] joiaz L4

367. 1. piece mes] dormi *agg.* L4

tost. ²Et qant il est armez il monte, et tuit cil qi avec lui estoient ausint et puis oissirent de leianz. Tout maintenant qe il furent de leianz oissuz, il voient enmi le chemin Tenedor tout appareilliez de la bataille, ne il n'avoit en sa conpeignie fors seulement un escuer. ³Qant il voit Guron de leianz oissir, il le reconoist errament et li crie maintenant a haute voiz: «Vassal, gardez vos de moi, se vos le poez fere: a la bataille estes venuz! — ⁴Sire chevalier, ice me dites, se il vos plect, et porroie ge trouver en vos autre cortoisie qe la bataille? — Certes, nenil, fet Tenedor, de ce soiez bien assure. — Sire chevalier, fet Guron, vos est il avis qe ge vos feise onques lait et honte? — ⁵Oïl, certes, fet li chevalier, et cele honte qi encore m'est dedenz le cuer voill ge vengier orendroit, se ge onques puis. — Sire chevalier, fet Guron, ne vos seroit encore mieuz qe vos vos soufrisiez de honte ⁶se ge la vos fis auqun tens einsint com vos meemes dites, qe vos en receussiez encore une autre? Or sachiez tout veraïement qe vos ne vos porriez defendre encontre moi, se aventure ne m'estoit trop contraire. ⁷Si ne di ge mie ceste parole por moi vanter, mes ge le di porce qe ge n'ai pas trop grant volanté de joster ne a vos ne a autre. ⁸Mes qant il est einsint venu qe joster me couvient, voille ou ne voille, or vos gardez hui-més de moi, se vos le poez fere, qe ge vos abatrai se ge onques puis».

368. ¹Qant il orent einsint parlé, il n'i font autre demorance, ainz hurtent chevaux des esperons. Et s'adrece li uns encontre l'autre le glaive beissiez, et s'entrefierent de toute lor force come cill qi ne se feignent mie. ²A cele joste aparut bien tout clerement qe Guron feroit mielz de lance qe Tenedor, qar Tenedor fu feruz si roïdement qe por l'escu ne por le hauberc ne remaint qe il ne li face enmi le piz deus plaies granz et parfondes, et [l'une] aussint perilleuse et plus que ne fu l'autre. ³Or porra lonc tens sejourner Tenedor, qar bien i a reison por qoi. Il gist ilec droitement enmi le chemin, si hestordiz et estonez qe il ne remue ne pié ne main, ne nul nel veist adonc qi legierement ne cuidast qe il fust mors. ⁴Qant Guron le voit trebuchier, porce qe il a poor et doute qe il ne soit mors de celui cop s'arreste il enmi le chemin, qe il voie ce qe celui fera. A chief de piece revint Tenedor d'estordison, et la place ou il gisoit estoit ja tainte de sanc chaut et vermoill. ⁵Et neporqant il estoit de si grant cuer et de si fiere volanté qe por doute de la plaie ne remaint qe il ne se drece en son estant, et dit a Guron: ⁶«Sire chevalier, or voi ge bien qe encontre vos ne porroie ge durer a la lance. Or vos ai ge deus foiz assaié, mes se Dex me doint

368. 2. l'une] *om.* L4 3. droitement] d|droitement L4

bone aventure, se Dex me leisse guerir et ge vos truis une autre foiz, or sachiez qe ge m'esprouverai a vos a l'espee trenchant. — ⁷Sire chevalier, fet Guron, qant vos a ce vos voudroiz metre, or sachiez qe ge me defendrai de vos, se ge onques puis. ⁸De ce qe vos estes navrez orendroit ne poez vos mie tant blasmer moi com vos meemes, qar rencontre ma volanté me feistes vos joster a vos, ce savez vos bien». Et qant il a dite ceste parole, il s'en vet outre qe il ne tient autre parlement au chevalier. ⁹Et cil remaint enmi le chemin: a pieçamés n'avra il pooir de porter armes einsint com il avoit fet celui matin. ¹⁰Mout est doulanz et iriez et tristes de ce q'il a esté deus foiz deshonzorez en tel mainere por un seul chevalier.

369. ¹Après ce qe Guron se fu partiz dou chevalier qe il avoit navré en tel guise com ge vos ai conté, il chevaucha cele matinee a tel conpeignie com il avoit sainz aventure trouver. ²Qant il out einsint chevauchié pensant adés dusq'a ore de tierce, adonc li avient il qe il encontra a l'entree d'une forest un chevalier qi menoit en sa conpeignie trois damoiseles qi estoient aukes de d[i]v[e]rs aage, qar l'une pooit bien avoir .xl. anz, et l'autre en avoit .xxx., et l'autre en avoit .xv. et non mie plus. ³Einsint estoient les damoiseles de divers tens, et li chevalier ne pooit pas avoir d'aage plus de .xvi. anz. Et neporqant, il estoit preuz et hardiz durement et bien ferant de lance et d'espee. ⁴Qant Calinant voit venir le chevalier qi estoit si garniz de damoiseles, qi ne menoit en sa conpeignie qe .iiii. escuiers, il regarde Guron, qi encore pensoit, et li dit: ⁵«Sire, qe pensez vos? Por Deu, leissiez vostre penser et regardez vos avant!». Guron drece la teste tantost et dit: «Qe volez vos? — Sire, ne vos metez tant au penser. Ne veez vos, fet Calynans, un chevalier qi conduit .iiii. damoiseles? — ⁶Or sachiez, ce dit Guron, veraïement qe li chevalier n'a mie perdu le cuer. Par cele foi qe ge vos doi, il est plus hardiz qe nul autre chevalier, et le grant hardemant qe il a li fet enprendre un si fort fet com est cestui, qi n'est mie legiers sainz faille, ainz est bien perilleux et grief. ⁷Et certes, il m'est avis qe se il ne sentist en soi hardement et proesce et valor, il n'enpreist a mener par ceste contree .iiii. damoiseles com il moine en son conduit orendroit».

370. ¹Atant evos entr'eaus venir le chevalier. Qant Guron voit le chevalier, il le salue mout cortoisement, et li chevalier li respont: «Seignors, bone aventure vos doint Dex. — ²En non Deu, fet Guron, il m'est bien avis qe voirement chevauchiez vos com chevalier errant

369. 2. out] ont L4 ♦ divers] durs L4

et com home qi est jolis et envoisiez. – ³En non Deu, fet li chevalier, vos dites voir. Mes se ge ving en tel mainere, vos venez pensis et mornes com se la teste vos douxist, vos venez bien entre vos deus com home doulant et cheitif. – ⁴Sire, fet Guron, si voirement m'ait Dex com vos nos avez trouvez ausint bien com se vos fuisiez dedenz noz cuers, qar cist chevalier qi ci est, si li moustre Calynant, est cheitif en toutes maineres et coharz et lens. ⁵Ge encore sui plus cheitif de lui, et por ce di ge qe trop bien nos coneustes. – Coment? ce dit li chevalier. Si estes vos orendroit si bien assemblez qe se li uns est cheitif dou tout li autres encore plus? – ⁶Voir, certes, ce dit Guron. – En non Deu, fet li chevalier, et ge vos voill reconforter d'une chose, si vos sentiroiz un pou de ma venue». Guron avoit hosté son hiaume a celui point si qe li chevalier le pooit bien veoir tot apertement enmi le vis, einsint avoit fet Calynant. ⁷«Seignors, dit li chevalier, ge ai trois damoiseles ici, einsint com vos veez. Ge ne sai orendroit en tout le monde nulle chose qi si tost me reconforte com font dames et damoiseles. ⁸Por ce vos voill ge bonté fere tele qi vos reconfortera par aventure: veez ci .iiii. damoiseles, chascuns de vos en prendra l'une et la tierce me remaindra.

371. «– ¹Sire chevalier, fet Guron, se Dex me saut, cestes bontez et cortoisies qe vos nos dites, se nos fetes en tel guise com reison l'aporte? – Certes, sire, fet li chevalier, ge le partirai si par reison qe ge ne croi qe nus hom qi jolis soit et envoisiez m'en puisse repreindre. ²Et porce qe vos estes li ainz nez de nos et ja avez passez .xxx. anz, avriez vos l'ainz nee de ces .iiii. damoiseles. Cest autre vostre conpeinz, qi est plus geunes de vos qe encore n'a il mie .xxx. [anz], si avra l'autre damoisele. ³La tierce me remaindra, qi est auques de mon aage. Einsint avra chascun de nos la soe selonc ce qe il la doit avoir. Or les prenez par bone estrene, qe Dex vos en leisse joïr. ⁴Qant Guron oï cest geu parti, il se comence a sorrre, puis se torne vers Calinant: «Sire chevalier, qe dites vos de la reison de cest chevalier? – ⁵Sire, fet Calinant, porce qe ge sai bien qe vos savrez mieuz respondre au chevalier qe ge ne savroie, leisse ge sor vos ma reison. Or dites ce qi vos voudroiz, qar ge ne contredirai riens de ce qe vos en voudroiz fere». ⁶Lors parole Guron et dist au chevalier: «Sire chevalier, encore die mis conpeinz qe ge doie por lui respondre, ge vos

370. 4. toutes] toutoutes L4 8. prendra] preidra L4

371. 2. mie .xxx. anz] mie .xxx. L4 4. reison] leistu (?) L4 6. doie] diie (?) L4

di qe ge por lui ne dirai riens, qe ge ne sai sa volanté. Ge di por moi, qar ge sai qe me dist li cuers. ⁷Il m'est avis qe la partie qe vos fetes est partie trop malement. Vos savez bien qe vos nos deistes au comencement qe vos donriez a nos deus chose q'i nos reconforteroit. ⁸De mon conpeignon ne sai ge mie se il se tient a bien païé de cele qe vos li donez, mes de moi vos di ge tout outreement qe ge ne me tieng apaïé de cele qe vos m'avez doné, et vos dirai reison por qoi. ⁹La damoisele est de tel aage qe ele a ja passez plus de .xxx. anz qe ele ne fu geune. Ele a gité et pargité si fierement qe ele n'a dent en la boche, et ge de l'autre part sui vieuz com vos dites et sui debrisiez des armes porter. ¹⁰Se ge sui vieuz et ele vielle, qel joie m'avendra? Et qel feste? Et qel soulaz fera ele a moi? Qel deduit en porrai ge avoir? Ele sera d'une part triste, et ge de l'autre part doulant. ¹¹Qele assemblee sera ceste? Or est orendroit assemblee de dolor et de cheitiveté. Por ce vos di ge, sire chevalier, qe ge ne m'acort a ceste partie, trop est vilaine sainz faille por moi. – ¹²Et qe volez vos donc qe nos façom? fet li chevalier. – Ge le vos dirai, fet Guron. Vos prenez cele damoisele por vos qe vos me voliez doner, et vos auques porroiz convenir, et vos dirai reison por qoi. ¹³Vos estes geunes chevalier et ele est vielle, ele avra de vostre geunesce grant desir et convoitise. Et tant se delitera en vos et tant vos fera a plaisir de toutes choses qe ele vos amera sainz faille et qe ele [fera] vostre volanté dou tout. ¹⁴Einsint porroiz entre vos deus joie et feste mener pleniement, qar ele savra tant fere qe ele vos plera et atalentera. Ge de la vostre demoisele me tendrai a trop bien païé, qar ele est bele fierement et pleisant en toutes maineres. ¹⁵Et porce qe ge sai encore assez plus qe vos ne savez, qar mon aage le me done, savrai ge tant fere cortoisie et moustrer bele chiere et biau semblant qe ge croi bien qe ge li pleirai. ¹⁶Einsint avroiz entre vos deus pleniére joie et ge de l'autre part et ma damoisele ausint. Porqoi ge di qe mierz porra aler sainz faille ceste partie qe ge faz qe la partie qe vos me feistes avant. ¹⁷Vos plect il en ceste mainere, sire chevalier? Einsint m'acorderai ge, mes a la partie qe vos me feistes ne m'acorderoie ge pas volantiers».

372. ¹Li chevalier a grant despit qant il entent ceste parole. A grant desdeig l'atorne et por le despit qe il a dit il a Guron: «Coment, sire chevalier? Vos est il donc avis qe vos deussiez ausint bien avoir ceste bele damoisele com ge devroie? – ²Biaux sire, fet Guron, porqoi non? Or sachiez qe ge la cuideroie par aventure ausint bien defendre au

besoing com vos feriez ou com un autre. — ³Coment, dist li chevalier, vos [est] il avis qe vos soiez chevalier qì autant pleust a la damoisele com ge seroie? Vos meemes avez ici reconeu qì vos estes si doulanz et si cheitis en toutes guises qe el monde n'a plus doulanz ne plus mauveis. ⁴Or donc, coment porriez vos plere a nulle damoisele? Certes, ge nel puis veoir». Guron respont en sorriant et dit au chevalier: ⁵«Porce qe vos dites qe ge ne porroie plaire a damoisele, or vos metez, se il vos plect, en une aventure qe ge vos dirai. ⁶Ge entent bien par voz paroles qe ceste damoisele qe vos menez en vostre conpeignie vos plect mout, et ge croi bien de l'autre part qe autretant li plaisiez vos, mes porce qe mieuz vaut assez savoir qe cuidier, or prenez vostre damoisele et la menez entre nos deus. ⁷Ge serai un pou esloigniez de vos et vos de mo ausint. Donez li puis congí, qe ele aille a celui de nos deus leqel ele voudra mieuz por soi. ⁸Se ele vient adonc a moi, ge la voill a ma part. Mes se ele s'en vait a vos, ge la qit dou tout: ja plus ne m'en orroiz parler. Adonc dirai ge apertement qe damoiseles ne me volent».

373. ¹Quant li chevalier entent cestui parti, il comence a sourire et dit en sorriant: «Par Deu, sire chevalier, or voi ge bien tout plainement qe voirement a il moins de sens en vos qe ge ne cuidioie. ²Et cuidez vos ore, se Dex vos saut, qe la damoisele leisast moi por prendre vos? Si m'aît Dex, ce est folie trop estrange se vos le cuidez. — ³Sire chevalier, fait Guron, puisque de ceste chose cuidez estre si aseur com vos dites, donc vos metez en ceste aventure hardiement et vos en tendroiz adonc parconoisant et moi mesconoisant. — ⁴Coment? ce dit li chevalier, et volez vos qe ge ce face? — Oïl, certes, fet Guron. — En non Deu, ce dist li chevalier, et ge le ferai maintenant». Lors dit a Guron: ⁵«Or vos trahez en loing, sire chevalier». Et il le fet tout einsint com il le comande. Et [li] chevalier prent la damoisele et la met en mileu d'eaus deus. ⁶«Ma damoisele, or vos en poez aler a celui de nos qì mieuz vos plaira, qe de ceste chose vos doing ge bien congí». Lors se tret un pou d'une part et rgarde la damoisele qe ele voudra fere. ⁷Quant la damoisele voit qe il li done outrement congí de fere sa volanté, ele se torne vers lui et dit: «Mauveis, vil et honis, ou vos mesfis ge tant onques qe vos me deusiez doner congí por autre chevalier? Certes, vos avez fet honte de vos et deshonor de moi!». ⁸Lors

372. 3. est] *om.* L4 ♦ seroie] feroie L4

373. 3. mesconoisant] parconoisant L4 (*v. nota*) 5. li] *om.* L4

se torne envers Guron: «Sire, me voudriez vos amer par amors se ge leisoie cest chevalier por vostre conpeignie? – Damoisele, ce dit Guron, volez vos qe ge vos die la verité ou la mençonge? – ⁹En non Deu, fet ele, ge ne voill mie qe vos m'en dioiz mençonge mes la verité, qar a chevalier n'appartient pas de dire mençonge. – ¹⁰En non Deu, fet Guron, donc vos di ge tout apertement qe il n'a orendroit ou roiaume de Logres dame ne damoisele qe ge amasse par amors tant com ge fusse en autre subjection com ge sui a cestui point. – ¹¹Donc ne me volez vos pas par vostre amie? dist la damoisele. – Certes, non pas ore», fet Guron.

374. ¹Lors se torne la damoisele vers l'autre chevalier et li dit: «Dites moi, dan chevalier, m'amez vos ore mout? Ne le me celez mie, se Dex vos doint bone aventure». ²Li chevalier qi mout amoit la damoise et tant qe il ne la pooit plus amer, respont en soriant et dit: «Damoisele, vos le savez bien se ge vos aim, vos ne l'avez pas ore a conoistre. – ³Toutesvoies, fet ele, voill ge qe vos le reconoissiez devant ces deus chevaliers qi sunt ci, einsint qe il le puissent oïr. – Damoisele, fet il, et ge le vos dirai, puisque il vos plest. ⁴Or sachiez tout veraïement qe ge vos aim si de tout mon cuer et sainz fauseté qe il ne m'est pas avis qe cuer d'ome peust tant amer damoisele. – ⁵En non Deu, fet ele, et il ne m'est pas avis qe damoisele peusse plus aïr chevalier de mortel hayne com ge vos hé de tout mon cuer. Et certes, cestui jor qi hui est avenuz ai ge desiré longement. ⁶Or me puis ge de vos partir, si m'est jor de joie et de feste. Benoiz soit Dex qi ceste part amena cest chevalier qi de vos me fait departir, qe de cest departement sainz faille sui ge trop liee durement. ⁷Encore die li chevalier qe il ne me velt por amie, si me metrai ge en aventure qe il por s'amie me tiegne. ⁸Et sachiez qe ge faz bon change et trop meillor qe l'en ne cuide, qar tot premierement ge me metrai au meillor chevalier dou monde et au plus bel et au plus gentil home qe el monde n'a plus gentil. ⁹Et ge vos leis por si mauveis com ge sai, et vos meemes le savez bien». Qant ele a dite ceste parole, ele n'i fet autre demorance, ainz s'en vet maintenant a Guron et li dit: ¹⁰«Sire chevalier, ge m'en vieng a vos et vos pri, si com vos estes le meillor chevalier dou monde, qe il n'ait en vos tant d'orgoill qe vos me refusez, qar certes ce seroit vilenie de refuser tel damoisele com ge sui. ¹¹Et se vos vilenie feisiez, donc devriez vos par reison vostre non perdre qi de cortoisie estes nomez».

375. ¹Qant Guron ot ceste parole, il ne set qe il doie dire, qar orendroit conoist il tout certainement qe la damoisele l'a reconeu: ne il ne l'ose refuser dou tout, ne il ne l'ose prendre porce qe il se sent

prison, si ne l'ose il fere si apertement. ²Et Calinanz, qī douter le voit, li dit: «Sire, prenez la damoisele seurement. Ja por doute de moi nel leissiez vos pas». ³Guron prent la damoisele, et qant li autres chevalier voit ceste chose, il est si fierement esbahiz qe il ne set qe il doie dire, mes qe il dit a ses autres damoiseles a chief de piece: ⁴«Ha! qel foi et qel loiauté l'en trouve en vos! Bien est cel foux, bien est cil honis, bien doit estre deshonzorez qī vos croit de nulle chose. Or aie ge dahez se jamés a jor de ma vie vos faz honor, ne a une ne a autre damoisele. ⁵Certes, ge voill estre Brehuz sainz Pitié desoremés, et peior d'assez qe il n'est encore. Jamés, se Dex me doint bone aventure, n'encontrerai dame ne damoisele a cui ge ne face deshonor atout mon pooir. ⁶Mauveisement s'est recordere la desloial damoisele a cestui point dou grant trauvaill et de la grant poine qe ge oi ja por lui en plusors leus et de la grant honor qe ge li portai totesvoies. ⁷Or tost de ci, maleurees choses, femes, vils beste de deable! Qī plus vos honor et vos sert, celui plus i pert. ⁸Or tost, fuiez vos devant moi et gardez si chiers com vos avez vostres membres, qe vos ne veigniez plus en ma conpeignie qe, se Dex me defent d'encombrier, ge vos metrai ambedeus a mort!

376. «— ¹Sire chevalier, or voi ge bien, fet Guron, qe vos ne fetes mie cortoisie de ce qe vos chaciez vos damoiseles arrieres et si vilainement. E cestes, qe vos ont eles mesfet? Se ceste autre damoisele ne vos velt amer, por Deu, ne fetes vilenie a ces deus, qar a chevalier n'appartient pas. — ²Coment? ce dit li chevalier. N'avez vos veu orendroit coment ceste desloial m'a leissé por prendre vos, qī ne vaudriez une feme au besoing? Certes conois vostre cohardie et vostre povre cuer assez mieuz qe vos ne cuidez. — ³Sire chevalier, ce dit Guron, por ce, se vos estes corrouciez de vostre bele damoisele porce qe ele vos a leissé, ne me dites vilenie, ge vos en pri. Se ge sui mauveis et failliz, a vos qe nuist ma mauvestié? ⁴Ne ma bonté si ne vos touche. — Si fait, ce dit li chevalier, qe por vos m'a leissé ma damoisele. Mes ge li ferai cestui change achatier si chierement qe ele me leissera la teste en gage qe ja por vos remaindra. — ⁵Sire, fet Guron, se Dex me saut, vos nos mesfetes de menacier la damoisele. — ⁶En non Deu, fet li chevalier, ge ne la menacerai plus, mes ge li donrrai maintenant son loer de la bonté qe ele m'a fet». Et lors met il la main a l'espee por

375. 7. de ci] de cil L4

376. 6. m'a] m[.] L4 (*buco*)

trencher li la teste, se il peust fere a sa volanté. ⁷Mes Guron ne li leisse mie, ainz se lance avant et li dit: «Soufrez vos, sire chevalier, ne touchez pas la damoisele plus qe il ne me plect mie ne a li ausint, ce sai ge bien! ⁸Et puisqe vos la qitastes devant moi de toutes qereles, et devant cestui chevalier, vos ne la poez desoremés demander par nulle reison. – Coment? fet li chevalier. Par male aventure la volez vos donc defendre encontre moi? – ⁹Mes vos par male aventure, ce dit Guron, volez vos avoir segnorie sor lui, et si l’avez qitee dou tout! Or ne soiez si osanz ne si hardiz qe vos tochiez a lui, qar bien sachiez certainement qe ge nel souferroie en nulle mainere dou monde. – ¹⁰En non Deu, fet li chevalier, et ge ne souferroie qe ele vos remainsist, encore l’aie ge qitee, qar ge le fis por vos gaber et lui. Or la voill ge recouvrer».

377. ¹Lors se torne envers la damoisele et li dit: «Or tost, damoisele, leissiez le chevalier et vos en venez avec moi, ge le vos comant». Et la damoisele, qi bien conoist Guron qar en autre leu avoit ele veu partie de sa proesce, respont ele au chevalier et dit: ²«Sire chevalier, se volez damoisele avoir, qerez la en autre leu, qar a moi avez vos failli dou tout. Ge sui orendroit es mains d’un tel chevalier qi bien [me] defendroit sainz faille de tex .xx. chevaliers com vos estes un. – ³En non Deu, fet li chevalier, ceste mençonge voil ge veoir tout maintenant». Et lors s’esloigne il un pou de Guron et prent son escu et son glaive qe un suen escuer portoit. Et puis dist a Guron: ⁴«Sire chevalier, puisqe la damoisele est vostre, or pensez de defendre la contre moi, se vos le poez fere, qar bien sachiez qe ge la voill sor vos conquerre par force d’armes en guise d’un chevalier errant. – ⁵Sire chevalier, fet Guron, volez oïr bon conseil por vos? – Oïl, ce dit li chevalier. – Donc vos soufrez de ceste enprise, fet Guron, qe certes ge croi bien qe vos i porriez plus perdre qe gaagner, se vos vos jostez a moi por ele. – ⁶Biaux sire, fet li chevalier, a un autre fetes vostre poor, qar bien sachiez qe de vos n’ai ge nulle poor: ge voil en toutes guises avoir la damoisele. – En non Deu, fet Guron, et ge en toutes guises la voill defendre encontre vos». ⁷Einsint comence la meslee des deus chevaliers droitement en mileu le chemin. Qant il furent appareilliez de la joste, il n’i font autre demorance, ainz leisse corre li uns encontre l’autre tant com il poent des chevaux trere, et s’entrefierent

9. certainement] certai[...]nt L4 (*inchiostro evanito*)

377. 2. orendroit] ore |orendroit L4 ♦ me] om. L4 4. sachiez qe] s. qar L4 (*confusione col precedente qar*)

de toute la force qe il ont. ⁸De cele joste avint einsint a cele foiz qe li chevalier, qi n'estoit pas si fort d'assez com Guron ne si bien chevauchant, est feruz si roidement qe il n'a force [ne] pooir qe il se puisse tenir en sele, ⁹ainz vole a terre maintenant si estordiz et estonez qe il gist ilec une grant piece qe il ne se remue ne pou ne grant, et li sanc li saut parmi les elz et par le nes, tant feleneusement cheï. ¹⁰Qant Calinant voit le chevalier gesir a terre, et il dit a Guron: «Sire, ge croi qe mors soit li chevalier. Ne veez vos qe il ne se muet? — Il n'est mie mors, fet Guron, ainz est estonez dou dur cheoir qe il prist a terre, ja le verroiz toust redrecier».

378. ¹A chief de piece se redrece le chevalier estonez durement qe encore aloit en chancellant. Et qant il est revenuz d'estordison, Guron li dit: «Sire chevalier, vos plect il encore qe la damoisele me remaigne? — ²Biaux sire, fet li chevalier, puisque ge voi qe encontre vos ne la porroie recouvrer, qar a la verité dire vos estes trop meillor chevalier qe ge ne sui, ge la vos qit malgré mien, et non mie de ma volenté. — ³Et de ces autres damoiseles, ce dist Guron, qe ferom nos? — En non Deu, dist li chevalier, ge ne sai: puisque vos les avez gaagniees, vos en poez fere a vostre sens. — ⁴En non Deu, sire chevalier, fet Guron ge les voill partir, mes non pas en tel [...]

379. [...] ¹[mon]taigne. Et qant il voient celui gesir mort, il sunt si fierement esbahiz qe il ne sevent qe dire. Li sires de la tor estoit li uns des deus jaianz qi venoient, cil qi venoit avec lui estoit sis filz, et cil qi gisoit mors sis filz ausint. ²Qant il vit son fill mort, qe il amoit de tout son cuer, se il est doulanz ce ne fet pas a demander. Il giete un cri trop doloireux, ausint fet li autres jaianz. ³Guron, qi estoit a la fontaine, oï le cri: bien set qe ce sunt les jaianz qi sunt descenduz de la montaigne. Lors s'en vait vers eaus droitement, et qant il le voient venir, s'escrient a haute voiz: ⁴«Veez ci celui qi nos a honiz!». Et lors s'apareillent de lui assaillir. Qant Guron voit qe il est venuz a la meslee, il saut vistement com cil qi trop fierement estoit legiers et fors et leisse corre a un des jaianz. Et le fiert si roidement de l'espee trenchant qe il li trenche le braz dextre dom il tenoit la mace de fer, qi estoit si grant et si pesant qe ce estoit merveille de veoir. ⁵Qant li

8. chevauchant] chevaucheavauchant L4 ♦ ne pooir] p. L4 9. nes] n[...] L4

378. 4. en tel] *lacuna di L4 (v. nota)*

379. 1. montaigne] //taigne L4

jaiant voit qe il a le braz perdu, il giete un cri trop doloieux. Guron nel vet pas regardant, ainz cort a l'autre tout maintenant com cill qi ja voudroit estre delivrez de cestui fet. ⁶Et li jaiant, qi tant a grant duel q'a pou qe il n'enrage touz vis et qi trop volantiers vengeroit la mort de son fill et la mescheance de l'autre, giete un grant cop encontre Guron, qe bien le cuide metre a mort de celui cop, porquoi il le puisse ateindre. ⁷Qant Guron voit le cop venir, il giete son escu encontre le jaiant qi grant force avoit. Li jaianz fiert en l'escu, et il avint qe, de la grant force dom feri en l'escu, qantqe il en ataint, trenche tout ausint com se il fust glacié, et plus en abat de la moitié par desouz. ⁸Se il eust plus haut feru, bien peust Guron avoir perdu le poing dom il tenoit l'escu. Qant Guron voit la tres grant force dou jaiant, se il en est auqun pou esbahiz, ce n'est pas merveille. ⁹Il se tret un pou arrieres et puis fet un grant saut avant et fiert le jaiant de tel force qe il trenche au jaiant la main senestre.

380. ¹Qant li jaiant se sent si malement mener, il voloit torné en fuie, mes il ne puet qar Guron, qi pres de lui estoit, le prent as deus mains par le col et le met maintenant a terre et li dit: ²«Vilain, vos estes mors tout orendroit, jamés ne verroiz autre jor». Si hauce le pont de l'espee, si li comence a doner grandimes cox del pont parmi la teste, si qe il en fait le sanc saillir de plusors parz. ³Adonc scribe li jaiant a haute voiz: «Ha! sire chevalier, por Deu, merci, ne m'ociez pas! Encore ne deservi ge mie mort encontre vos. Por Deu, aiez merci de moi! – ⁴Or tost, vilain, ce dit Guron, fa venir tout maintenant touz ceaus qe tu tiens en prison laissus en cele tor: chevaliers, dames et damoiseles et vallez. ⁵Garde qe n'i remaigne un seul qe, se Dex me doint bone aventure, se tu ne le fes einsint ge te ferai voler la teste. Or tost, mande laissus et les fa venir touz et toutes ça aval. ⁶Autrement ne puéz tu eschaper de mes mains en nulle guise dou monde qe ge ne t'ocie orendroit». Qant li jaiant entent ceste parole, il dit a Guron: ⁷«Sire, apelez moi un de voz escuers». Et Guron le fet tantost venir. Qant il est venuz devant le jaiant, il li dit: ⁸«Frere, fet il, se Dex te saut, va t'en tost laissus a cele tor et demande Hebusan, ce est mi freres, si li dit qe il viegne ça aval parler a moi, et qe il viegne sanz armes. – ⁹A qeles enseignes, dist li vallez, li dirai ge cestes paroles? Qar par aventure il ne me creiroit mie sainz enseignes. – ¹⁰Or li dit, fet li jaiant, qe il porte les cles de ce qe ge ai plus amé: tantost com il orra ceste novele, il vendra ça aval sanz demorance».

380. 2. teste] t[.]ste L4 (*buco*)

381. ¹Li vallez s'en vait maintenant por fere celui message. Et tant monte qe il vint a la tor des jaianz. Et qant il est venuz, il voit qe la tor estoit de l'oeuvre ancienne, mes ele estoit si bele et si fort merveilleusement et si fierement haute qe nus ne la veist adonc q' por riche ne la deust tenir. ²Qant [il est] lasus venuz et il a conté les noveles a celui a cui il estoit envoie, cil n'i fet autre parlement, ainz se met tantost a la voie por venir a son frere. Et qant il fu venuz a la fontaine, il troeve son frere lié a un arbre mout vilainement. ³Et il estoit liez par les piez d'une grose corde et pres de celui estoit liez ses filz a un autre arbre, q' avoit perdu le braz destre, ne encore n'avoit il mie veu l'autre q' gisoit mort enmi la place. ⁴Qant il voit ceste chose, il comence a fere un duel trop merveilleux, et si freres, q' estoit lié a l'arbre, li dit: «Frere, leissiez cest duel estier et me delivrez de mort, qar ge sui mors sainz faille, se ge ne sui por vos delivrez. ⁵Alez vos en laissus a la tor tout maintenant et delivrez touz ceaus et celes qe ge avoie enprisonnez: chevaliers, dames et damoiseles et les vallez ausint. ⁶Gardez qe il n'i remaigne un seul, qar autrement ne puis ge de ci eschaper. Alez tost et retornez vistement si chierement com vos m'amez, q'il ne porroit autrement estre». ⁷Cil se remet au chemin tantosto, et qant il est retornez amont, il conte les doloroeuses noveles. Li duel comence laissus si grant et si merveilleux com se il veissent devant eaus tot le monde mort. ⁸Cil n'entent pas a lor dolors, ançois delivre les prisons et les giete fors de la tor. Et sachent tuit qe il estoient .xii. chevalier par conte et .x. damoiseles et .xx. escuiers.

382. ¹Aprés ce qe il furent oissuz tuit ensemble de la tor – ne encore ne cuidoient il pas estre delivrés, ainz cuidoient certainement qe l'en les delivrast d'ilec por metre en une autre prison –, il demandent adonc: ²«Ou iron nos?». Et cil q' delivre les avoit lor dist: «Venez après moi». Et tantost comencent a devaler la montaigne. Et cil vont adés après lui, liez et joianz de ce qe il sunt delivre. ³Tantost ont alé qe il troevent le jaianz ocis q' encore gissoit enmi la place. Et lors dist li rois Artus a ceaus q' avec lui estoient: «Seignors, veez vos cestui cop? ⁴Or sachiez qe de grant force estoit li chevalier q' si durement le feri, et nos somes delivre, si com ge croi par celui q' fist celui cop. – Sire, dient li autre, bien puet estre verité». ⁵Qant il sunt venuz a la fontaine, il troevent adonc les .iii. chevaliers q' ilec les atendoient: ce est Guron et li Liez Hardiz et Calinant. Et sachent tuit qe li Liez Hardiz se merveilloit tant de ce qe il avoit veu de Guron qe il ne savoit

381. 2. il est] *om.* L4 3. filz] *fil[.]* L4 (*buco*)

qe il deust dire. ⁶Quant il vit le roi Artus venir et le reconoist, il li vient a l'encontre et li dit: «Ha! sire, qe vos soiez li tres bienvenuz. Des qant fustes vos laissus en prison? Si m'aît Dex, ge cuidoie tout certainement qe vos fuissiez a Camahalot, et maint autres chevaliers qe ge ai puis trové le cuidoient». ⁷Et li rois Artus comence a conter maintenant coment il avoit esté pris et par qel mainere, et coment li jaiant l'en avoient porté dusq'a la tor. «Mes or me dites, fet li rois, qi fu celui q' delivré nos a? – ⁸En non Deu, fet li Liez Hardiz, ce fu cist chevalier», si li moustre Guron. «Et sachiez, sire, qe il est si preudom des armes qe ge ne cuidasse en nulle mainere qe il eust orendroit en tout le monde un si preudom com il est». ⁹Quant li rois ot ceste novele, il s'en vait a Guron et li dit: «Sire, fet il, bien soiez vos venuz». Guron, qi onques mes n'avoit veu le roi Artus, pense en soi meemes qe ce est il voirement, et por ce li dist il: ¹⁰«Sire, estes vos li rois Artus? – Certes, sire, dist li rois, oïl. Et ge ai trop grant desirer et trop grant volanté [de vos fere] tant de cortoisie et de bonté com ge porroie fere a null chevalier. ¹¹Et certes, ge le doi bien fere par reison, qar vos m'avez a cestui point si grant bonté fete qe a poine vos en porroie ge rendre le guerredon de tout ce qe ge ai en cestui monde. – ¹²Sire, ce li dit Guron, puisqe il est einsint venu qe vos estes delivrés, la Deu merci, benoiz soit Dex qi fere le volt. Desoremés vos comant ge a Nostre Seignor. – ¹³En non Deu, fet li rois, sire, ja de moi ne vos partiroiz, se il vos plect, qe ge ne sache aucune chose de vostre estre. – ¹⁴Sire, fet Guron, sauve vostre grace, vos n'en poez ore savoir autre chose fors qe ge sui un chevalier errant qi vois par le roiaume de Logres qerant chevaleries einsint com funt li autres chevaliers». ¹⁵Lors se met avant Calinant, qi estoit descenduz de son cheval. Grant poor avoit eue, et bien sachiez qe il ne descendi devant qe li .ii. jaiant furent lié a l'arbre. ¹⁶La ou Calinant vit le roi Artus qi ensint tenoit Guron a parlemant, il le prent par la main et li dit: «Sire, me conoisez vos?». Et li rois, qi le regarde, li dit: ¹⁷«Oïl, ge vos reconois voirement. Vos estes celui chevalier qi tenez en prison le bon chevalier a l'escu d'or, et qi a vostre hostel me deviez amener par delivrer le. Mes ou avez vos demoré des lors qe ge fui en prison? – ¹⁸En non Deu sire, fet Calinans, or sachiez qe ge ai plus travaillé por vostre delivrance qe vos ne cuidez, qar ge chevauchai dusqe a mon hostel et delivrai por la vostre amor le bon chevalier de prison qe vos tant me demandiez. ¹⁹Cil vos a delivré sainz faille: or me sui ge dou tout aqitez

382. 10. ai trop] ai trop | trop L4 ♦ de vos fere] om. L4

de vos». Qant li rois entent ceste nouvelle, il est trop liez et trop joianz, et s'en vient adonc a Guron et li dit: ²⁰«Ha! sire, porquoi vos celez vos vers moi? Einsint voirement m'ait Dex com vos estes le chevalier dou monde qe ge plus desiroie a veoir! Et si m'ait Dex com ge estoie entrez en qeste por vos trouver et autres chevaliers de mon ostel. ²¹Por Deu, ostez vostre hyaume, si vos verrai a descouvert. — Coment, sire? fet Guron. Savez vos donc q' ge sui? — ²²Oïl, fet li rois, ge sai de voir qe vos estes li bon chevalier a l'escu d'or, et si avez non Guron li Cortois. Vos estes sainz faille le meillor chevalier q' orendroit soit en cestui monde. — ²³Sire, fet Guron, puisque vos me conoissiez, or vos pri ge qe vos me doignoiz un don. — ²⁴Certes, dist li rois, volantiers: demandez seuremant, si voirement m'ait Dex qe se vos me demandez la moitié de tout ce qe ge ai en cestui monde, ge le vos donroie avant qe ge vos en fesse escondit de vostre demande. — ²⁵Sire, ce dit Guron, moutes mercis. Vos m'avez outroïé qe vos ne m'arresterez plus a ceste foiz, ainz m'en leiroiz aler tout mon chemin». ²⁶Qant li rois entent ceste parole, il se tient a mort, et Guron vient a son cheval et monte. Et sachent tuit qe li chevalier q' de la prison estoient oissuz avoient lor armes einsint com il avoient qant il furent mis en la prison. ²⁷Qant Guron fu montez, il se torne vers le roi et li dit: «Sire, ge vos comant a Nostre Seigno[r]. Ge ne sai se ge onques mes vos verrai. ²⁸Por Deu et por gentilece, de ce vos travailliez qe tuit li chevalier q' en prison sunt soient delivrez, qe bien sachiez qe il in i a de tex qe, se il fussent delivrez, dou tout il acroisteroient vostre honor et vostre corone de tout lor pooir. ²⁹Sire, por Deu, souviene vos de ceste parole». Et qant il a parlé, il s'en vaït outre tout lermoiant des elz com cil q' pitié a de soi meemes.

19. joianz] *dopo la lacuna segnalata al § 264.5 riprende il testo di X, f. 75ra* 20. veoir] connoistre X 21. ostez vostre hyaume] de vostre teste *agg.* X 22. a l'escu] al[.]scu L4 (*buco*) ♦ q' orendroit ... monde] dou monde X 24. demandez ... cestui monde] d. orendroit dla (*sic*) moitié de mun roigiaume X 25. outroïé] doné et o. X ♦ mon chemin] quel part que je voudrai *agg.* X 26. mort] et trahi *agg.* X ♦ et monte] et fet la damoïsselle monter sor un des chevaux as valez et li dui valet monterant sor l'autre cheval, Calinant monte maintenant X ♦ einsint] entierement *agg.* X ♦ qant il] a cele hore qu'il X 27. montez] entre lui et sa compaignie *agg.* X ♦ Seignor*] seigno L4; *om.* X ♦ se] quant X 28. gentilece] gentile L4 ♦ en prison sunt] el roigiaume de Logres *agg.* X ♦ sachiez] sire tout veraïement *agg.* X ♦ de tex] en prison *agg.* X 29. ceste parole] que ge vous ai dite *agg.* X ♦ parlé] en ceste mainere *agg.* X ♦ com cil ... meemes] et de ce qu'il avoit ja autre foiz si loingnemant demoré em prison *agg.* X

383. ¹Quant li rois Artus l'en voit aler, il se torne vers li Liez Hardiz et li dit: «Trahiz sui a ce qe cist chevalier se part de moi. ²Ceste grant merveille qe il a ici fete ne doit pas estre celee au monde, ne ne sera ele, se Dex me gart. ³Por ce qe devant ceste fontaine avint sera ele apelee la Fontaine de Guron li Cortois. Et ge ferai fere ici .iiii. ymages de coevre sordorees: les .iiii. en seront ausint granz com les jaianz estoient, et li qarz ausint com est Guron li Cortois. ⁴Et il tendra ses piez en semblanse de segnorie desus les testes as jaianz, et ceste ovre sera la plus riche et la plus bele qe l'en porra fere. — ⁵Sire, fet li Lez Hardiz, or sachiez qe il a tant fet por vos qe certes vos ne li porriez tant fere d'onor en cestui leu ne en autre qe il n'ait trop mais deservi. — ⁶De ce dites vous verité, fet li rois, et certes, pour la haute valor dom il est, li ferai je gregnor honor qe je encor ne fis a nul autre chevalier. ⁷Or covendroit, ce dist li rois, porchachier chevaux, qant n'enn avom null. — Sire, ce respont li Liez Hardiz, tost en avrom. ⁸Envoyez en cel chastel un message et lor fetes asavoir qe vos estes ici et qe il vos envoient chevaucheures tant com il vos en est besoing». ⁹Et li rois le fet tout einsint com il l'a devisé, et l'en mande un message au chastel q' il lor dit ce qe li rois lor mande. ¹⁰Quant il entendent qe li rois Artus est en cele contree, il sunt trop liez durement, qar de lui veoir estoient il trop fierement desiranz, porce qe tout li mondes disoit grant bien de lui. ¹¹Et cil dou chastel vindrent maintenant la ou li rois estoit, li un a pié li autre a cheval, en tel mainere qe pou en remest ou chastel, qe tuit vindrent a la fontaine por veoir le roi. ¹²Et qant il sunt a lui venuz, il se metent tuit a ses piez et si li funt si tres grant honor et si grant feste com il poent fere. ¹³Mes après ce qe il

383. 1. se part de moi] en tiel mainere *agg.* X 2. celee] oubligé X ♦ me gart] me doint vie X 3. avint] devint ceste merveille X ♦ ele] ceste fontaine X ♦ les jaianz] li troi j. X ♦ Guron li Cortois] G. proprement X 4. Et il tendra] Desus les testes as jaianz tendra Guron X ♦ et la plus bele] *om.* X 5. il a tant] li bon chevalier a t. X ♦ por vos] a ceste foiz *agg.* X 6. De ce ... honor qe (honneur que X) ... autre chevalier] *om.* L4 8. Envoyez en cel chastel] Pres de ci a un castel riche durement envoyez la aucun X ♦ ici] a ceste fontaine X ♦ besoing] et il le feront maintenant *agg.* X 9. Et li rois ... lor mande] Tout issi coume cil le devisse le fet li rois tout maintenant, quar il mande ja un mesage. Cil entre dedenz le chastel et lor conte tout mot a mot ce que li rois lor mande X 10. Qant] *nuovo* § X ♦ entendent] ceste nouvelle *agg.* X ♦ disoit grant bien] qui entr'elz venoit d. b. X 11. Et cil ... maintenant] Et il se partent maintenant del chastel et vient X ♦ estoit] au plus hativemant qu'il poent *agg.* X ♦ pou en remest ou chastel] pou de gent r. donc dedenz le c. X ♦ tuit] cil del chastel X 12. funt] en toutes guises *agg.* X 13. après ce qe] a. quant X

voient qe li jaianz estoient mors, il sunt si fierement reconfortez qe il dient tout apertement qe a cestui point les a bien Dex delivrez de martire et de dolor, qar li jaianz les tenoient adés si vilainement en toutes maineres com se il fussent dou tout lor sers. ¹⁴Trop est grant la joie et la feste qe cil dou chastel funt qant il voient les jaianz mors. La joie est a celui point grant et pleniére en toutes guises, premierement par la venue le roi Artus et puis por la mors des jaianz. ¹⁵Qar bien sachent tuit certainement, cil q' cest conte escouteront, qe li jaianz q' encore estoient remés en vie ne vesquirent pas après cest fait se petit non. ¹⁶Devant cele fontaine demora li rois Artus a tel conpeignie com il avoit trois jors entiers, qar cill dou païs venoient por veoir la merveille. ¹⁷Des celui jor fu cele fontaine apelee la Fontaine Guron, et adonc comanda li rois Artus a ceaus de la contree qe il facent fere les .iiii. ymages en tel mainere com il avoit comandé des le comencement. ¹⁸Et sainz faille ce fu fet celui an proprement tout einsint com il l'avoit devisé, si noblement, si richement qe cele oeuvre dura sainz faille dusqe la venue de Charlemagne le grant enpereres.

384. ¹Qant li rois Artus ot demoré .iiii. jors entiers devant la fontaine en tel guise com ge vos conte, il se parti adonc en tel mainere qe il ne mena conpeignie fors le Lez Hardiz et deus escuers. ²Il ne souffroit qe nul autre chevalier venist avec lui. Cill q' delivré estoient as jaianz tindrent lor voie en autres parz. ³Puisqe li rois se fu mis au chemin, il chevaucha tant par ses jornees qe il vint a Malohaut et troeve adonc touz ses conpeignons q' venir i devoient. ⁴Il lor estoit bien avenu en cele voie qe, encore fussent il auques navrez et eussent esté enprisonnez, si estoient il ilec venuz et atendoient le roi Artus. ⁵Et porce qe il avoit un pou plus demoré qe il ne deust estoient il un pou desconfortez, qar grant poor avoient qe il ne fust arresté en aucun leu autrement qe il ne vouxissent. ⁶Et il se tenoient si priveement el borc defors de Malohaut qe il n'i estoient coneuz ne pou ne grant: bien savoient qe il estoient chevaliers erranz, mes il ne savoient pas qe il

15. escouteront] entendirunt X 16. ♦ por veoir la merveille] ilec a m. por veoir le X 17. jor] temps X ♦ facent] fac[.]n[.]t L4 (*buco*); feissent X 18. oeuvre] heure X ♦ enpereres] trop noble et trop belle *agg.* X (*sogg.* cele oeuvre)

384. 1. *no nuovo* § X 2. venist avec lui] li feist compaignie adonc X ♦ as jaianz] de la prison des j. X ♦ parz] leu X 3. jornees] entre lui et le Lez Hardiz *agg.* X 5. ne deust] n'estoit lor convenant X ♦ poor] et grant doute *agg.* X 6. el borc ... Malohaut] el bo[...] ge (?) fors Maalohaut L4 (*riscritto*, v. *nota*) ♦ coneuz ne pou] coneuz tre p. (?) L4 (*riscritto*)

fussent de la meison le roi Artus. ⁷Quant il virent le roi venir, se il sunt liez et joianz nel demandez pas. Il le reçoivent mout honoreement, mes non mie si hautement com il couvenoït a lui, qe il ne l'osoient fere qar il avoient poor qe il ne fust reconeuz. ⁸Quant il est entr'eaus descenduz et il l'orent desarmé, il le metent en une chambre de leienz. Et quant il sunt assis sor l'erbe fresche qe tot maintenant avoit esté aportee, li rois lor dist: ⁹«Seignors chevaliers, vos savez bien porqoi nos nos partimes avant ier? – Sire, font il, vos dites verité. Voirement le savom nos bien. – Or, seignors, a il null de vos qi nouvelles me sache a dire dou bon chevalier a l'escu d'or?». Et chascun respont, li un pres l'autre: ¹⁰«Sire, nos n'en savom riens. Nos ne le veimes puis, ne ne venimes en leu ou nos peussom apreindre nouvelles certaines. – ¹¹Seignors, fet li rois, donc m'est il avis qe vos avez por noiant travaillé de ceste chose. – Sire, dient il, bien est voirs, et bien sachiez veraiement *que assés avon puis travaillé pour lui trouver, mes a Dieu ne plot que nous le trovissom.* – ¹²Seigneur, fet li rois, et m'en savriez a dire autres nouvelles? – Sire, dient il, nani. – E non Dieu, fet li rois, et je vos en conterai nouvelles, puisque vous riens n'en savez, mes cestes sunt bien les plus hautes nouvelles que vous oissiés piece mais conter de chevalier». ¹³Et maintenant lor comence a dire mot a mot tout ce que en estoit avenü, et ce qe li bon chevalier l'avoit delivré de la prison as jaïans. ¹⁴Aprés lor dit comant le bon chevalier prist comgié de lui et comant li rois ne le pot arester pour les convenances qui entr'els deus estoient. Et quant il lor ot celui conte devisé, il s'en test que il n'en dit plus.

385. ¹Quant misire Gavan, qui ilec estoit presentemant, quar le jour devant proprement estoit il venus a Malohaut, entent cest conte, il dit au roi son onde: « Certes, sire, vous poés bien tenir ceste aventure trop bele a vous et trop vilaine pour vous, et vous dirai en quel mainere. ²Or sachiez, sire, que quant vous fustes delivrés de si fort prison coume estoit cele ou vous estiez, bien fu l'aventure belle pour vous et merveilleuse. ³Mes après ce, quant fortune vous volt tant de bien que vous trovast celui bon chevalier que si grant bonté vos avoit fete coume vous avez ci contee, et il se parti puis

7. venir] entr'eles *agg.* X ♦ poor ... reconeuz] p. de reconoissance X 8. de leienz] au plus priveement qu'il le porent fere *agg.* X 9. Seignors chevaliers] et seignor compaignos (*sic*) *agg.* X ♦ avant ier] encor n'a pas grantment de jors *agg.* X 10. puis] p[...s] L4 (*buco*) ♦ ne ne venimes en leu] ne aventure ne nous aporta en nul leu X ♦ peussom] peus[...] L4 (*buco*) ♦ apreindre] de lui *agg.* X 11. por [p[...]] L4] noiant travaillé de ceste chose] puis pour n. t. X ♦ et bien sachiez veraiement] et ne de ce vous devez vos blasmer que b. s. X; in L4 *ultime parole del f. 263vb, l'ultimo del ms.* 13. mot a mot tout] tout mot a mot tout X

de vous si legierement qu'il ne fu puis en vostre compaignie ne hore ne jor, ⁴bien poez seuremant dire que ceste aventure fu trop laide pour vous et trop vilainne. — Gauvains, ce dit li rois Artus, si m'aît Dieus, vous dites voir. Mes après la proumesse que je li avoie faite, einsint coume je vous ai devisé, quel force li pooie fere qu'il demorast avec moi? ⁵Ne je m'osoie failir de convenant, ne force ne li pooie je fere encontre sa volonté, a ce qu'il est en toutes guises meillor chevalier que je ne sui. Or, Gauvan, que porroiz vous dire sor ce? — ⁶Sire, fet misire Gauvan, je n'en [sai] que dire, fors tant qe malemant seustes garder la belle aventure que Dieus vous avoit mandé entre mains, et ce meemes que vous aliez querant. — ⁷Or est issi, ce dit li rois, autrement ne puet oremais estre venu».

386. ¹A celui point qu'il tenoient entr'elz tel parlemant coume je vous cont et si priveement qu'il n'avoit leienz en cele chambre fors seulemant les compaignons, atant evous un vallet venir devant li roi qui s'agenoille et dit au roi Artus: ²«Sire, madame de Malohat, la dame de ceste contree, est la fors descendue devant cest hostel et vous verroit mout voluntiers, s'il vous plesoit». ³Quant li rois entent ceste nouvelle, il respont coume touz esbaïs: «Dex aïe, qui li pot dire nouvelles de ma venue? Ja cuidoe je ore estre venuz si priveement en cest ore. — ⁴Certes, fet li vallez, unques si tost n'en fustes venuz qu'elle le sot. Fetes v[ost]re comendenent, s'il vous plect, qu'elle veigne çaienz a vous, car elle est la fors descendue». ⁵Li rois respont en souriant: «Il me plect mult qu'elle viegne, et bien soit elle venue». ⁶Après ce ne demora gaires que leienz vient la dame de Malohaut, tant belle riens de toutes chouses que nuz ne la veoit, tant soit saïges, a cui li sanz ne remuit. Ce n'est pas biautés que la soe, aïnz est biautés passe biautés et remenant de veoir. ⁷Et encor fust elle plus belle qu'elle n'estoit a celui point, mes le grant duel qu'elle avoit dedenz le cuer fessoit contraire a sa biauté aucun petit, si qu'elle en ert un pou mains belle, la belle, li riens de toutes chouses. Si avenant en toutes guises que ce estoit droit merveilles de remirer sa biauté, ⁸viant la dame devant le roi Artus et amainne en sa compaignie entre dames et damoisselles bien douze et non plus. ⁹Quant li rois la voit venir, il li vet a l'encontre et la reçoit plus honoremant qu'il le puet faire. «Sire, [dit] elle, vous soiez li bienvenuz. Se vous ne fuissiez mon seigneur, je me plainsisse de vous, voiremant le sachiez vous, quar vous m'avez fet vilanie trop grant et trop gregnor que vous ne cuidastes par aventure. ¹⁰Mes pource que vous estes mi sire, me couvient taire et regarder

385. 4. Gauvains] Garsons X 6. sai] om. X

386. 3. Quant li] Quant e li X ♦ cest ore] cest | tore X 4. vostre] ure X 9. dit] om. X

vostre volenté. ¹¹Sire, la premiere priere qe je vous faz a cestui point si est que vous montoiz maintenant et que vous veigniez en un nostre castel, et vous compaignons autresint. ¹²Et certes, sire, se vous de ce m'escondiez ici, je ne dirai desoremais que chevalier erant soient si cortois del tout coume l'en dit!». Quant li rois entent ceste parole, il respont en sorriant et dit a la dame: ¹³«Dame, or sachiez veraïement que se Danain li Rous fust en cest chasté, orendroit je ne fusse ci descenduz en nule mainere. Mes pource qu'il n'i estoit et je n'avoie volenté de ci demorer, voloie je priveement demorer ci cest jor sanz plus, et la maitin au point del jor metre moi a la voie. — ¹⁴Sire, fet la dame, que vous dirai? Je n'oseroie blasmer riens que vous deisiés, mes si m'aït Dieus, sire, se vous l'eussiez einsint fet coume vous dites, je m'en peusse par reison assez plus blasmer que loer. ¹⁵Et certes si feisse je, mes quant il est einsint avenü, biau sire, la Dieu merci, que vous nel peustes del tout acomplir, cest vostre dur proposemant, or n'i fetes, s'il vous plest, autre demore, mes venez en tantost lasus. — ¹⁶Sire, fet misire Gauvain, ma dame vous enseigne cortoisie et ce que vous deussiez avoir fet, s'il vous pleust, des lors que vous venistes en cest hore. — ¹⁷Certes, fet li rois, vous dites voir, mes je lesoie porce que vous avez oï. Et puisque je voi que entre vous vous acordez a ce que je aille, et je sui touz prest d'aler. — Sire, fet la dame de Malohaut, multes mercis».

387. ¹Aprés icestui parlemant n'i fist li rois delaïement nul, ainz se parti de celui ostel entre lui et ses compaignons et s'en ala herbergier dedenz la mestre forterescie del chastel, «ou vous seriés mout bien receuz et honoreement». ²Et qu'en diroie? La dame li fet tant d'oneur en toutes chouses coume elle puet, et li rois, q'i regarde la cortoisie et le sens de la dame, dit a soi meemes que bien est ceste dame sanz faille une des plus cortoisies dames qu'il veist onquemais, ³car avec ce qu'elle estoit plus belle dame et plus pleisante de toutes chouses est elle tant sage et tant cortoise qu'i ne cuidast e nulle mainere dou monde qu'elle peust tant valoir coume elle vaut. ⁴Einsint est li rois receuz noblement dedenz Malohaut. Mes de monseigneur Lac, le bon chevalier, le vailant, qui tant a demoré leienz em prison, que dirom nos? ⁵L'avom si del tout oublié que nous n'en ferom mais parole en nostre livre? Ce ne seroit mie reson que nous le obleïssom del tout, car trop fu bon chevalier. ⁶Il est leienz emprisonnez en tel mainere qu'il vouxisti bien a celui point avoir autre prisom. Non mie qu'il [fust] enferrés, non mie qu'il n'eust asez a boire et a mangier, non pas qu'il n'eust riche lit et belle chambre, il ne [li] faut en sa prison fors

12. ici] ic[.] X (v. nota) ♦ soient] soie[...] X **13.** n'avoie] n'aioie X

387. 6. fust] om. X ♦ enferrés, non] e. [.]on X ♦ non pas] non [.]as X ♦ li faut] [...] f. X ♦ dame] da[.]e X

qu'il ne veoit sa dame se trop pou non. ⁷Et quant il par aucune aventure la voit, il ne la voit fors em trespasent, einsint coume elle passoit aucune foiz par devant la chambre ou il estoit emprisonnez. ⁸Il pense a li et jour et nuit, il l'aime tant de tout son cuer que cele prison ou il est ne li anuie riens del munde: il a ja esté em prison sis mois entiers, voire assez plus, mes tout cel terme ne li ressent.

7. aventure] [.]venture X ♦ einsint] [.]insint X ♦ devant] de[.]ant X 8. pense]
pen[.]e X ♦ que] qi.e (sic) X ♦ voire] [.]ioire X ♦ ressent] ressem X

